

Bibliothèque de la Faculté
de Théologie

Les Fontaines - CHANTILLY

A 125/8



BIBLIOTHÈQUE S. J.

Les Fontaines

60 - CHANTILLY

L. in 8.º n.º 24.

R. P. BERNARDI PEZII,

BENEDICTINI ET BIBLIOTHECARI
MELLICENSIS

**BIBLIOTHECA
ASCETICA
ANTIQUO-NOVA,**

HOC EST:

COLLECTIO VETERUM QUORUN-
DAM ET RECENTIORUM OPUSCULORUM
ASCETICORUM, QUÆ HUCUSQUE IN VARIIS MSS.
CODICIBUS ET BIBLIOTHECIS
DELITUERUNT.

Sti Petri

Senoniensis

TOMUS VIII.

Catalogo inscriptus anno 1740.

Cujus contenta Lectorem sequens pagina
docebit.

CUM FACULTATE SUPERIORUM.

RATISBONÆ,

Sumptibus JOANNIS CONRADI PEEZII,
ANNO MDCCXXV.





Contenta Octavi Tomi.

- I. Ven. Catharinæ de Geweswiler, Priorissæ Subtiliensis, seu Unterlindensis Ord. S. P. Dominici Colmariae in Alsatia de *Vitis primarum Sororum Monasterii sui Liber.* pag. 3
- II. Matthiæ Thanneri Cartusiani Friburgensis Appendix de *Vitis aliquot aliarum pietate præstantium ejusdem Ordinis Virginum e diversis MSS. Codd. collecta.* 400
- III. Ven. Irimberti, seculo XII. Abbatis Admontensis, de *Incendio Monasterii sui, ac de vita & moribus Virginum Sanctimonialium Parthenonis Admontensis Ord. S. Bened. Narratio.* 453
- IV. Ven. Joannis de Ellenbogen Abbatis Waldsassenensis Ord. Cist. de *vita venerabilium Monachorum Monasterii sui Liber.* 465

Contenta Octavi Tomi.

- V. Anonymi Benedictini an. MCCCC. *Epistola de consuetudine & modo vivendi Cœnobitarum Monasterii Sublacensis.* 491
- VI. Ven. Martini de Senging, seculo XV. *Prioris Mellicensis Tuitiones pro observantia Regulæ S. P. Benedicti in Concilio Basileensi.* 503
- VII. Ejusdem *Epistola de Statu Monasterii Bursfeldensis Ord. S. Bened.* 550
- VIII. G. A. Archiepiscopi Thebarum *Epistola de recentiori statu Monasteriorum Congregationis Bursfeldensis & Benedictino-Bavaricæ sub titulo SS. Angelorum Custodum.* 556
- VIII. S. Joannis Capistrani Ord. FF. Min. *Epistolæ duæ: Prima de Catholicæ fidei progressu in Moravia, altera de publicis & promiscuis balneis Religiosorum, cum animadversione Thomæ de Paden, Prioris Mellicensis in eandem.* 562
- X. Udalrici de Weilhaim, qui anno MCCCCLVIII. in Monasterio Diessensi *Canonicus Regularis O. S. Aug. vixit,*
Epi-

Contenta Octavi Tomi.

- Epistola de tribulationibus & procellis
Monasterii sui.* 574
- XI. *Coenobitarum Mellicensium Epistola
Encyclica de obitu Ven. Nicolai de Ma-
zen Abbatis & Reformatoris sui, vita
functi anno MCCCCXXVI.* 578
- XII. *Ven. Joannis de Welming, anno
MCCCCLIX. Abbatis Mellicensis Epi-
stolæ de restituenda universim in Or-
dine S. Benedicti Monastica disciplina,
& procuranda rituum ac observantia-
rum conformitate.* 581
- XIII. *Ven. Caspari Aindorffer; anno
MCCCCLX. Abbatis Tegernseensis
Epistola ejusdem argumenti.* 588
- XIII. *Coenobitarum Tegernseensium Epi-
stola Encyclica de obitu prædicti Abba-
tis sui Caspari.* 589
- XV. *Bernardi de Waging, año MCCCCLXI.
Prioris Tegernseensis Epistola de ejus-
dem Abbatis obitu & electione Con-
radi V. ejusdem loci Abbatis.*
- XVI. *Ejusdem Conradi Abbatis Tegerns.
Johannis Abbatis Mellicensis, Mel-
chioris*
- a 3

Contenta Octavi Tomi.

*chioris Ab. S. Udalriciani August. Vind.
&c. Epistolæ de unione Monasterio-
rum Ord. S. Bened. in Germania. 601
usque ad 628*

*XVII. Ven. Johannis de Weilhaim Prioris
Mellicensis, qui anno MCCCCLXXXII.
mortuus est, Vita & Scripta cum
Appendice. 629*

*XVIII. Johannis III. Episcopi Eystetensis Hi-
storia Reformationis Monasterii S.
Walpurgæ Ord. S. Bened. 650*

*XIX. Anonymi Carmen Rhythmicum vetus
de miseriis Ordinis Monastici. 671*



PRÆFATIO.
IN TOMUM VIII
BIBLIOTHECÆ. ASCETICÆ
ANTIQUO - NOVÆ.

Cum plures hætenus in
ista Collectione Tracta-
tus & libellos ediderim,
quibus salubres admo-
dum & necessariae de rectè for-
mandis Ascetarum moribus do-
ctrinae continentur, nihil ingra-
tum Lectoribus me facturum exi-
stimavi, si eos in tanta præcepto-
rum veluti sylva longius oberran-
tes ad planiora jucundioraque, id
est, ad Historiarum campos dedu-
cerem,

P R Æ F A T I O.

cerem, in quibus & animum subtiliorum rerum consideratione fessum piè recrearent, & modum rationemque ea, quæ hucusque ab Asceticæ disciplinæ Doctõribus tradita sunt, ad opus redigendi propositis Heroicæ pietatis exemplis condiscerent. Utrumque hoc volumine affecuturum me spero, in quod ejusmodi vetera maximam partem monumenta congesti, quæ nullius non, nisi a pietatis sensu penitus remoti animum suaviter possunt afficere, ac ad pulcherrimorum facinorum executionem provocare. Quod si qua & hic nihilominus occurrerint, quæ non nihil pungant & urant (ut nullibi rosæ sine spinis proveniunt) ne me propterea æquus & prudens Lector illico condemnet, quasi qui consultius ea æterno silentio preffissem, quàm

P R Æ F A T I O.

quàm in omnium oculos ingeffissem. Præterquam enim , quòd boni ex omnibus proficiant, ista non alio a me animo atque consilio evulgantur, quàm quo a suis Auctoris, hominibus sanè quàm sanctis ac rerum suarum gnaris, in litteras relata & posteris servata sunt, scilicet ut mala, quæ memorant, seriò caveantur, bona verò & egregia, quorum pars longè major est, exemplo sint ac imitationi. De potioribus nunc hujus Tomi monumentis eorumque auctoris non nulla pro more observemus. Nam quò minùs idem in singulis faciamus, ipsa Opusculorum brevis in causa est, præterquam quòd suis locis ea omnia vel in ipsis eorundem titulis, vel ad paginarum oram adnotaverimus, quæ Lectori scitu vel commoda vel necessaria videbantur.

P R Æ F A T I O.

I. *Ven. Catharinæ de Gevvesviller Priorissæ Subtiliensis Ord. S. Domini de Vitis primarum Sororum Monasterii sui Liber pag. 1.* De aureo hoc Opere ejusque Auctore Catharina Matthias Tannerus, qui illud primus e MS. Cod. erutum prelo paravit, in suo ad id propylæo ita egit, ut nihil ferè nobis dicendum amplius reliquerit. Id unum hic animadvertere juvat, eruditissimos e Dominicana familia viros Quetifium & Echardum, qui illustre *de Scriptoribus Ordinis Prædicatorum* Opus nuper publicârunt, Tomo II. pag. 831. a Codice Baluziano deceptos, has Sororum Subtiliensium vitas cuidam Elisabethæ Staglin perperam tribuere, utpote quas genuinum & indubitatum Catharinæ foetum esse ex nostra editione luculentissimum sit. Catharinæ etiam meminit, sed paucis,

P R Æ F A T I O.

cis, Fridericus Steillius in *Ephemeridibus Dominicano-Sacris*, Germanicè Dillingæ editis anno 1692. ad diem 10. Junii. Quo in Opere sparsim etiam memoriæ quorundam ex his nostris Virginum extant, quæ tamen cum Catharinæ narratione non semper neque satis cohærent. Nimirum Steillius nunquam vidisse videtur Opus Catharinæ, citare duntaxat solitus Epipium Ordinis S. Dominici Scriptorem seculi XV. & Conradum Zittardum, qui *Chronicon Generalium Magistrorum* sui Ordinis non nisi Germanico idiomate scripsit.

II. *Matthiæ Tanneri, Cartusiani Friburgensis Appendix de Vitis aliquot aliorum pietate præstantium ejusdem Ordinis Virginum è diversis MSS. Codd. collecta. pag. 400.* Longè amplior prolixiorque hæc Appendix in autographo Carthusiæ Aypacensis,

P R Æ F A T I O.

censis, unde nostram editionem adornavimus, habetur. Verùm cum in ea Vitas Sanctarum piarumque ex ordine Prædicatorum Virginum tam typis excusas quàm hactenus ineditas referri viderem, illis relictis has duntaxat, & si quæ aliæ vulgò minùs notæ essent, selegi, additis ex Tannero locis; unde singulas prompsisset: id quod facere in promptu fuit. Erat enim Tannerus vir doctus & usque ad scrupulum accuratus, omnia diligentissimè observare solitus, quæ ad fidem rebus conciliandam necessaria erant. Cujus labores si citiùs non nihil e tenebris in lucem emerfissent, non uno numero & loco supra laudatam Ordinis Dominicani Bibliothecam locupletare potuissent. Porro cum hic vir tam strenuam conservandis piorum hominum vitis operam
nava-

P R Æ F A T I O.

navaverit, æquum fane est, ut & ejus perenni memoriæ hic quoquo modo consulamus. Itaque Matthias Tannerus seu Thannerus, antequam Ordinem Cartusiensem ingrederetur, Juri utrique operam dedit. Deinde cum se ad matrimonium conferre decrevisset, re prope confecta Evangelicæ perfectionis magistram præter opinionem in sponfa reperit, quæ deserto terrestri sponso cœlestem adamare cœpit, facta, ut ferunt, Sanctimonialis Capucina. Tam illustris virtutis exemplo vehementer commotus Tannerus mox & ipse Mundi commoda contempsit, Ordinem Cartusianum Friburgi, labente ad finem sæculo XVI. amplexus, ubi diu vitam sanctis moribus & litteris excultam vixit. Inde cum belli Svecici procella Rhenum adsitasque urbes invade-

P R Æ F A T I O.

vaderet, in Austriam ad Cartusiam Gemnicensem profugere coactus est, in qua ob spectatæ virtutis & doctrinæ opinionem Vicarii munere decoratus fuit. Eidem postea loco cum laude jam grandævus præfuit in Cartusia Axpacensi usque ad annum 1648. quo, vel mox præcedente, diem supremum feliciter clausit. Eum ad annum 1648. Charta Capituli Generalis Ord. Cartus. his verbis celebrat: *Obiit D. Matthias Tannerus, professor Domus Friburgi, Vicarius Domus in Agsbach, qui laudabiliter vixit in Ordine ultra LII. annos.* Ejusdem, sed parcè admodum, meminit Carolus Marotius in Theatro Ordinis Cartusiensis. Amplius ejus elogium extat apud Ven. P. Ambrosium Maëss Cartusianum Axpacensem in vita P. Martini Windtleutner, Sodalis sui, anno 1685.

P R Æ F A T I O.

1685. demortui. Sic autem scribit: *Assignatus ei (Martino) fuit, ut moris est, in vitæ moderatorem & Magistrum Ven. P. Matthias Tannerus, professor Friburgensis, vir grandævus, quem in Austriam furor fugârat Svecicus. Hujus Venerabilis Patris memoria propter spectabilem vitæ sanctimoniam semper in benedictione erit. Fuit quippe, ut pauca de plurimis referam, quæ narrante discipulo Martino aliisque ejus convidtoribus didici, in seculo Juris utriusque Doctor. Sed sacrum Ordinem ingressus, per sanctarum assiduationem virtutum eò usque profecerat, ut ad primævos columbinæ simplicitatis annos rediisse visus sit. Hanc tamen astutiâ adeò serpentinâ temperare noverrat, quòd & simplicitas esset intuentibus exemplo, & sapientia ejus Ordini foret & Ecclesiæ emolumento. Plures enim in hoc edidit jam Ordini associatus libros, & restant adhuc edendi plures,*
qui

P R Æ F A T I O.

qui hic in Cartusia nostra asservantur: & plerique a Reverendissimo Patre Generali, & a Censoribus ordinariis jam approbati sunt, nondum tamen ob expensarum difficultates evulgati. Hæc de Tannero Ambrosius. Jam verò ad ejus ingenii monumenta quod attinet, ex iis præter *Vitas Sororum Subtiliensium*, ad easque *Appendicem* tantum tria sequentia typis commendata novit Venerabilis ac Eruditus P. Leopoldus Wiedemannus, Vicarius Gemnicensis, cui hæc omnia accepta refero.

I. *Vallis humilitatis, seu vera & profunda humilitas in Humanitate, nova methodo explicata, & Sanctorum exemplis illustrata. Friburgi Brisg. 1631. 8.*

II. *Ven. Virginis Baptistæ Vernaciæ Genuensis Ord. Can. Reg. S. Aug.*

P R Æ F A T I O.

S. Aug. Tractatus de Vita Spirituali ex Italico Latine versus.

III. *Ejusdem Virginis Tractatus de Cognitione Dei, itidem a Tannero Latinitate donatus, & Molshemii cum præcedente excusus, ut ipse in præfatione ad mox sequentes ejusdem Vernaciæ Tractatus testatur, etsi annum editionis haud exprimat.*

IV. *De Gaudiis & fletibus spiritualibus. Incipit versio Tanneri: Gaudete cum gaudentibus &c.*

V. *De mirabili vita Mundo mortuorum. Mortui enim estis &c.*

VI. *De Gaudiis cœlestibus. Intra in gaudium Domini tui &c.*

P R Æ F A T I O.

- VII. *Appendix de modo obtinendi illa gaudia. O Deus sempiternum &c.*
- VIII. *De perpetua cum Deo unione. Manete in me &c.*
- IX. *De Osculo Divino. Osculetur me osculo &c. Tractatus hi VI. proximè relati, ac a Tannero Latini ex Italico facti, extant manu descripti in Cartusia Aypacensi, nec mihi constat, typisne evulgati aliquibi fuerint, necne. Idem dubium est de omnibus sequentibus Tanneri Opusculis, quæ in eadem, ni fallor, Cartusia hodieque adservantur.*
- X. *Vita B. Catharinæ de Riccis, vulgò Pratenfis, Monialis Ord. S. Dominici, Cœnobii S. Vincentii Prati, Italicè primum*

P R Æ F A T I O.

*mum A. R. P. Philippo Guido
Dominicano scripta, nunc La-
tinè reddita.*

XI. *Vita B. Mariæ Magdalenaë de
Pazzis Carmelitanaë ex Itali-
co Vincentii Puccini in Lati-
num translata. Harum
ambarum Beatarum vi-
tæ editæ sunt a PP. Bol-
landianis, sed eos trans-
latio Tanneri latuit.*

XII. *Ejusdem S. Mariæ Magd. de
Pazzis Vita in Germanicum
versa.*

XIII. *Vita B. Osannæ de Mantua
Ord S. Dom. ex Italico Lati-
nè reddita.*

XIV. *Ejusdem Beatæ Vita Germa-
nicè versa.*

XV. *Vita & Doctrina Divinitus ac-
cepta Elisabethæ ab Eicken,
Monialis Cœnobii Ottenba-
censis Ord. S. Dom. in Helve-
tia,*

P R Æ F A T I O.

tia, ex Germanico in Latinum translata.

XVI. *Vita & Revelationes B. Gertrudis Saxonica, e Latino in Germanicum conversa.*

XVII. *Viridarium animæ, sive Geistlicher Lust-Garten (alias Sophronii Pratum Spirituale &c.)*

XVIII. *Devotæ Meditationes Germanicæ in Passionem Domini, olim ab egregio Contemplatore stilo valde obscuro scriptæ, nunc a F. Matthia passim correctæ, ac phrasi lucidiori donatæ.*

XIX. *Vita B. Dorotheæ Dantisca-næ (alias de Prussia) Viduæ, e septem libris ejusdem Confessarii in compendium redacta.*

XX. *Vita ejusdem Dorotheæ in Germanicam translata.*

XXI.

P R Æ F A T I O.

XXI. *Tractatus de perenni separatione animæ a Deo, sive Trost- und Liebloses Scheiden / durch F. Matthiam Thanner erklärt.*

XXII. *Tractatus de Amore Dei erga homines. Germanicè.*

XXIII. *Tractatus de cæcitate humana in præcipuis vitæ spiritualis punctis. Itidem Germanicè.*

XXIV. His omnibus addenda versio Germanica Catharinæ de Gevvesviler de vitis primarum Sororum Monasterii Subtiliensis & adjectæ Appendicis, ab ipso Thannero adornata, quam fortè aliàs ac separatim in usum Virginum Deo consecratarum, quæ Latinæ Linguae ignaræ sunt, in lucem proferemus. Cæ-
b 3 terum

P R Æ F A T I O.

terum Latinam ejusdem Operis editionem ideo extantioribus formulis hic excusam exhibeo quòd ejus exemplum Sanctissimo & Beatissimo Domino ac Patri nostro Benedicto XIII. Pontifici Maximo, Dominicani Ordinis longè studiosissimo, demississimè offerre ausus fuerim. Id quod propterea commemoro, ne quis sine causa libellorum meorum molem augere me arguat.

III. *Ven. Irimberti Abbatis Admontensis de Incendio Monasterii sui ac de vita & moribus Virginum Sanctimonialium Parthenonis Admontensis Narratio.* pag. 453. De auctore hujus narrationis plus simplici vice in hætenus a me editis Commentariis

P R Æ F A T I O.

riis tractavi. Ejus integram etiam vitam ex veteribus monumentis contextam dedi in Dissertatione Isagogica ad Tom. II. *Thesauri Anecdotorum Novissimi* a pag. XI. usque ad XVI. ubi præter ea omnium Irimberti Operum recensitionem institui. Inde habes, doctissimum hunc virum ex Cænobita Admontensi Abbatem Monasterii S. Michaëlis Bambergensis anno Domini MCLX. factum, anno verò MCLXXII. Cœnobii Admontensis Archimandritam creatum fuisse, in eaque illustri præfectura durasse usque ad añum MCLXXVII. quo, antiquo Chronographo Admontensi teste, *quievit in Domino*. Porro Narrationem istam profecto lugubrem in citata Dissertatione delibavi duntaxat, reliqua, quæ Irimbertus attexuerat de *Vita*

P R Æ F A T I O.

Virginum Admontensium, integri in *Libros Regum Commentarii*, unde excerpta est, editioni reservans. Verum cum postea viderem, licet perinvitus, eam editionem longius produci, elegantem hunc ex laudato Irimberti Commentario locum *Historiæ Virginum Subtliensium* illico propter argumenti similitudinem adnectere statui. Nec eum, ut spero, pius Lector sine pio animi motu percurreret, præsertim si posteriorum temporum mores cum illis priscis contulerit.

IV. *Vén. Joannis de Ellenbogen Abbatis Waldsassenensis de Vita Venerabilium Monachorum Monasterii sui Liber. pag. 465.* Opusculum hoc ad me singulari benevolentia misit vir humanissimus juxta ac doctissimus Jo. Christophorus Iselius, Bibliothecæ Academiæ Basileensis Præfectus, erutum ex veteri Codice,

ce,

P R Æ F A T I O.

ce, qui nescio quo fato ad eum locum delatus est. Porro etsi mihi probè cognitum sit, plures hoc nomine Abbates Celeberrimo Monasterio Waldsasseni seu Waldsachsensi in Diœcesi Ratisbonensi præfuisse, nec Codex Basileensis cognomentum *de Ellenbogen* seu *de Cubito* differtè præferat, vel solum tamen nomen *Petri Abbatis Aulae Regiæ*, cui Auctor libellum suum inscripsit, hujusque promicans undique pietas satis argumento sunt, hunc *Johannem Abbatem Waldsassensem* diversum non esse a *Johanne* cognomento *de Ellenbogen*. Ejus laudes his verbis celebrat Gaspar Jongelinus in Notitia Abbatiarum Ord. Cist. *Joannes de Cubito*, vulgò *Ellenbogen*, oppido Bohemico ad Egram fluvium sito, ex Priore Waldsasseni, ejusque loci Abbas constituitur anno Domini 1313. vir Deo & hominibus dile-

b 5

P R Æ F A T I O.

dilectus. In conspectu enim Regum ac Principum auctoritate summa præditus erat, quòd esset prudentia & consiliis maximus, erga omnium ordinum homines placidus ac mitis, in observatione verò instituti Cisterciensis & regulæ suæ cum zelo quodam strenuus & vigil, in prædicatione verbi Dei graciosus, in operibus virtuosus. Is utilissimè & summam prudentiam præfuit annis duodecim &c. Qui characteres Johannis satis perspicuè ex præsentis Libri elucent. De Petro Abbate Aulæ Regiæ, Johannis amico vide Carolum Vischium in Bibliotheca Scriptorum Ordinis Cisterciensis edit. Secundæ pag. 276. ubi ait eum quoque scripsisse Librum Miraculorum B. Virginis Aulæ Regiæ, aliorumque sanctorum Monachorum & Conversorum, quem librum inscripsit Volumen Secretorum Aulæ Regiæ, nondum, quod sciam, in lucem elatum.

V. Ano-

P R Æ F A T I O.

V. *Anonymi Benedictini Epistola de consuetudine ac modo vivendi Cœnobarum Monasterii Sublacensis. a. pag. 491.* Vix ullum totâ Italiâ Monasterium a regularis vitæ observantia sub initium seculi XV. commendatius fuit, quàm Sublacense ac Sacri Specus. Eo velut ad communem quandam exactioris Monasticæ disciplinæ scholam convolebat, quisquis in perfectionis studio longiùs progredi volebat, reban-
turque omnes, meliores Monastice Magistros sibi contingere non posse, quàm exercitatos in iisdem Monasteriis Cœnobitas. Inde in Austriam petiti Viri celeberrimi Nicolaus de Mazen, Petrus de Rosenhaim, aliique plures Monasterii Mellicensis reformatores sanctissimi, qui deinde per omnem Germaniam Monasticæ vitæ re-
stitutionem susceperunt. Quo-
circa

P R Æ F A T I O.

circa nemo non vehementer nôſſe cupierit, quænam vivendi conſuetudo qualisve obſervantia Sublacenſibus fuerit. Eam velut in tabella depictam habes hic in Anonymi cujuſdam epiſtola, qui ipſis Sublacenſium rebus quotidie interfuit. Prodit verò hoc inſigne Monastiæ hiftoriæ monumētum ex duplici Codice, Monasterii ſcilicet S. Udalrici & Afræ, ac Mellicenſis, qui poſterior nunc Lit. O. Num. 20. inſignitus eſt.

VI. *Ven. Martini de Senging Prioris Mellic. Tuitiones pro obſervantia Regule S. P. Benedicti in Concilio Baſileenſi. pag. 503.* Nemo ignorat, quantum Patres duorum Generalium Conciliorum, Conſtantiensis & Baſileenſis formandis in melius Monachorum moribus intenderint, cùm ſibi perſuaſiſſimum haberent, Univerſalis Eccleſiæ inſtaura-

P R Æ E A T I O.

staurationem non admodum diu perstaturam, nisi hoc sanctius ex instituto suo hominum genus, lapsu temporum vehementer defœdatum corrigeretur, arctioribusque legibus coërceretur. Ea de re dum deliberaretur in Concilio Basileensi, non una omnium Patrum opinio fuit, censentibus quibusdam, quorum caput Legatus Apostolicus erat, Ordinem S. P. Benedicti sat reformatum fore, modò ad observantiam trium votorum substantialium reduceretur, cæteris, quæ in Regula Benedictina præcipiuntur suadenturve, Prælatorum arbitrio relictis. Ab hac opinione ut Martinus noster, qui tum Concilio Notarii munere aderat, Patres abduceret, præsens commentariolum edidit, in quo probare adnititur, *non sufficere Monasteria ejusdem Ordinis, in Regulari obser-*

P R Æ F A T I O.

*observantia collapsa, reducere ad solatRIA substantialia, prout Reverendissimus Pater Dominus Legatus intendebat. Neque enim, inquit, est possibile reformationem hujusmodi fieri, videlicet reducendo ad tria substantialia omis-
sis accidentalibus. . Quod argumen-
tum dum prolixè pertractat, di-
versa notatu digna suorum tem-
porum facta immiscet, quo nomi-
ne Opusculo, aliàs merè doctrina-
li, inter monumenta Ascetico-Hi-
storica locum dedi. Ei statim ejus-
dem Martini epistolam subjunxi
*de statu Monasterii Bursfeldensis sub
initium suæ reformationis*, unde tan-
dem celeberrima illa *Congregatio
Bursfeldensis*, quæ tot sanctis & do-
ctis Monachis Germaniam imple-
vit enata est. Porro non videtur
Martinus alio fine atque consilio
Bursfeldam profectus, quàm ut
exploratis ejus locis ac obser-
van-*

P R Æ F A T I O.

vantià videret, num sperari posset universalis quædam unio & conformatio plurium in Germania tum florentium Observantiarum, Castellensis scilicet, Mellicensis & Bursfeldensis, cujus unionis cupidissimum & studiosissimum fuisse Martini Abbatem Mellicensem, *Joannem* cognomento *de Welming* luculenter hujus aliorumque coævorum Abbatum, maxime *Tegernseensium* epistolæ, hic ex *Tegernseensibus* & *Mellicensibus* Codicibus publicatæ, demonstrant. Quid verò eo accessu apud Patres Bursfeldenses effecerit Martinus, ex domesticis monumentis non liquet, licet rerum ab eo aliàs actarum non rarò meminerint. Ex his enim habemus Martinum natione *Austriacum*, domo *Sengingensem*, sacroque Presbyteratus Ordine decoratum fuisse, antequam Monach-

na-

P R Æ F A T I O.

nachum in Monasterio Mellicensi indueret ac solemniter profiteretur, id quod contigit anno 1427. Leonardo Abbate. Prius ipse affirmat in Codice Mellicensi B. 21. his verbis: *Explicit Tractatus de perfectione spiritualis vite editus per S. Thomam de Aquino, scriptus per fratrem Martinum professum Monasterii Mellicensis in Ducatu Austria, ubi & ortus est, at regeneratus in Christo gubernatore consensu & licentia Patrum utriusque Monasterii Sublacensis & Specus S. Benedicti loci de Morrabuttis supra specum. 1565.* Ubi regenerationem Martini alteram ejus professionem in Monasterio Morabuttensi, ad Sublacense spectanti, interpretor. De prima enim ejus in Monasterio Mellicensi professione hæc differtè habet antiquus Cœnobitarum Mellicensium Catalogus ad añum 1427. *Martinus ex Presbytero de Sen-*
ging

P R Æ F A T I O.

ging seculari probatione prævia professus est. Additur ibidem, eum reformatæ hujus Congregationis tertium Cellerarium & tertium Priorem quatuor annis rexisse, absolutumque anno Domini 1433. missum fuisse ad Concilium Basiliense ut Syndicum, ubi expedivit & impetravit unam Karolinam & unam conservatoriam. Catalogo consonat Wolfgangus de Stira noster in Itinerario suo apud R. Fratrem Tom. II. Scriptorum Rerum Austriac. ita scribens : anno 1433. in Vigilia S. Bartholomæi, quæ tunc fuit Dominica, Abbas Leonardus moritur, & Christannus dictus Eybensteiner sibi in Abbatem succedit : qui etiam eligitur per Priorem Leonardum de Maurbaco, Priorem in Achspach, per Magistros Ruedolfum, Narcissum & Conradum de Halstat septimo die Septembris, quæ fuit feria secunda, videlicet in profesto Nativitatis Mariæ. Et post circa Adventum Domini

C

mini

P R Æ F A T I O.

mini Pater Martinus a Prioratu deponitur, & Pater Johannis de Spira in Priorem substituitur. Quæ postrema

Wolfgangi verba in sensu Auctoris Catalogi accipienda esse facile persuadent pietas, zelus sanctioris disciplinæ, varia in Divinis Litteris, SS. Patribus sacrisque Canonibus eruditio, quæ dotes in Martino extabant, ut ejus ingenii ac industriæ monumenta sanè quàm plurima, quæ hodieque in nostra Bibliotheca servantur, testari possunt. Nihil enim antiquius Martino fuerat, quàm optimos quosque, in quos incideret, libellos exscribere, iisque Mellicensium penum litterarium augere. Cumque magnam Europæ partem tum universi Ordinis, tum Monasterii sui causâ peragraverit, a pulcherrima tamen hac exscribendi & excerptendi consuetudine nullibi se abduci passus est.

Cir-

P R Æ F A T I O.

Circa annum 1456. Romam adiit. Itineris ejus causam occasione terræ motus in Sicilia facti Johannes de Weilhaim Prior Mellicensis narrat in Codice K. 78. *Nota, inquit, quòd die Cathedræ S. Petri (anno 1457.) rediit de Curia Romana Frater Martinus, dicti Monasterii Mellicensis professus, ad quam missus fuerat per Prælatos Austriæ in causa subsidii & passage contra Turcos, qui affirmavit veram famam esse de terræ motu facto in regno Siciliae &c.* Si conjectura nostra de regeneratione Martini, quam paulo ante attulimus, vera est, stabilitas ejus in loco Morrabutteni perpetua non fuit, siquidem anno 1474. jam iterum Mellicii egit, quo a Mellicensibus ad Marcum Cardinalem tit. S. Marci, Patriarcham Aquilejensem & Sedis Apostolicæ Legatum a Latere Augustam Vin-del. missus fuit, ut constat ex qua-

c 2

dam

P R Æ F A T I O.

dam charta memoriali nostri Joannis de Megies, aliàs de Septem Castris, quam his verbis ad calcem Chronici Mellicensis manu exarati concludit: *Horum omnium testis est venerabilis Pater Martinus de Sängin, Senior nunc nostri Conventus, qui & missus fuit ad præfatum Reverendissimum Patrem pro confirmatione nunc Domini nostri Abbatis Ludovici Schänczel de Chrembs.* Quamdiu deinceps superstes Martinus fuerit, mihi nondum compertum est. Adhuc in vivis egit anno 1480. quo electioni Augustini de Obernalib in Abbatem Mellicensem Senior interfuit, quod ex ipsis electionis actis liquet apud P. Anselmum Schrambium Chron. Mellic. part. VI. pag. 503. Præter *Tuitiones Regulæ S. Benedicti*, quæ ex Codicibus Mellicensibus R. 26. & N. 16. hic erutæ prostant, reliquit etiam Martinus amplum
Formu-

P R Æ F A T I O.

Formularium scribendarum epistolarum , condendorum decretorum & edictorum in Codice Mellic. P. 50. in cujus primo folio hæc notantur: *Formularius bonus, scriptus & collectus in Basilea tempore Concilii per Domnum Martinum Monachum professum in Monasterio Mellicensi.* Scripsit præterea *Analysin Constitutionum Benedicti XII. & Gregorii IX. de nigris Monachis,* in Codice Mellic. N. 16. & fortè alia plura, de quibus alibi commodius agetur. Opuscula verò, quæ ad aliorum Codicum fidem sua manu exaravit, propè innumera sunt. Quibus accensendus & ille Codex Helmstadiensis, ex quo V. Cl. Hermannus v. der Hardt Tom. VI. Rerum Concilii Constantiensis, Andreae Episcopi Magorensis Hispani O. S. Ben. *Gubernaculum Conciliorum* edidit, ad cujus calcem sequentia adscripta sunt:

P R Æ F A T I O.

Scriptum Basileæ, tempore Concilii Generalis ibidem celebrati, anno Verbi incarnati MCCCCXX XVI. a nativitate vero Christi anno 6c. XXXVII. d. 19. Martii, manu fratris N. professi Monast. Mellicensis, Pataviensis Diœcesis, Ord. S. Benedicti. Quibus verbis Martinum designari tum ex hucusque dictis, tum ex aliis manu ejus descriptis Codicibus certissimum est.

XVIII. Johannis III. Episcopi Eystettensis Historiæ reformationis Monasterii S. Walpurgæ Ord. S. Bened. p. 650. Illustris hic doctrinâ & vitæ sanctimoniâ Episcopus Sedi Eystettensi ab anno 1445. usque ad an. 1464. præfuit, cujus audita morte Pius II. Pontifex Maximus dixisse fertur in cœtu Cardinalium, Ecclesiam meritò lugere debere, quandoquidem columnam auream 6c Ecclesiæ præcipuam, 6c Alamania notabilem Prælatum perdidisset, ut tradit apud Jacob. Gretserum in
Cata-

*Catalogo Episc. Eystettensium Auctor
Appendicis ad Gundackarum pag.
511. qui paulo ante de reformatione Monasteriorum Diœcesis Eystettensis, Johannis ductu patrata, hæc commemorat: Monasterium S. Walpurgis in civitate Eystettensi situm, ubi regularis observantia jam exulaverat, labore maximo, obsistentibus sibi nobilibus multis, reformat, funditusq; dirutum (nam vetustate & incuria ferme corruerat) ædificiis renovari fecit. In dies Præsulis vigilantia nedum in spiritualibus, sed temporalibus quoq; Monasterium augetur. Nam ubi olim vivebant decem tantum, nunc triginta aut quadraginta Christi Virginibus pro alimentis redditus Monasterii sufficiunt. Ejusdem professionis Monasterium, nomine Bergen, ædificiis & observantia regulari optime instauratum reliquit. Canonicos Regulares in Rebdorff vita severiori instituit, Windesheimensis observantia ritus*

P R Æ F A T I O.

ac statuta illuc transferens. Fratres Prædicatores in civitate Eystettensi, D. Dominici præcepta negligentes, regularem vitam amplecti compulit, rebellibus procul pulsus. Multa denique solitudine Clero suo invigilavit, adeò, ut pæne omnium Presbyterorum suorum, maxime curatorum nomina, vel personas & mores probè cognosceret. Tum post aliqua subdit de Johannis Opusculis: Inter alia reformationem Statutorum ac judicii Eystettensis, summo consilio editam, perpetuò observari voluit. Ordinem etiam Judicarium compilaverat, juris scientiam præcipuam redolentem, sed nondum emanaverat, dum mortem obiret. Edidit & alios Tractatulos, ac Monasteriis chartas, quæ rectè vivendi normam darent, de comparatione vitæ activæ & contemplativæ. Item de Constantia ad Virgines S. Walpurgis, ac alia quædam reipublicæ ac Religioni proficua. Ubi observes, Lector, Johan-
nis

P R Æ F A T I O.

nis libellum *de constantia ad Virgines S. Walpurgis* hoc ipsum Opusculum esse, quod nos *Historiam reformationis Monasterii S. Walpurgis*, præcipuum illius argumentum spectantes inscripsimus. Extat id in Codice Mellicensi signato Litt. O. num. 52. Johannis ævò exarato. Reliquorum ejusdem Opusculorum, a Gundackarii Continuatore memoratorum, nihil vidi, nisi fortè ex iis quædam eadem sint, atque sequentia, quæ habentur in Bibliotheca Tegernseensi.

1. *Epistola ad Bernardum de Waging Priorem Tegerns. de eo, num tutius & utilius sit uni Deo & sibi in Monasterio vacare, quàm in cura animarum & praelatione existere. Incip. Johannes Dei gratia &c. Allatæ sunt pridem &c. In Cod. num. 596. notato.*

2. *Aliæ quinque ad eundem Bernardum Epistolæ in Cod. 548.*

P R Æ F A T I O.

3. *Epistola ad Jacobum Anachoretam Domus Cartusienſis Cellæ Salutis in Ducklhaufen, de gravi onere præſulatûs. Incip. Johannes Dei gratia &c. Quoniam juxta Prophetam &c. In eod. Codice, ubi & additur reſponſio Jacobi duabus epistolis. Ibidem vidi Erhardi ejusdem loci Prioris amplam ad Johannem Epistolam, qua eum in ſuis tribulationibus & oneribus conſolatur.*

Ex his poſterioribus epistolis puto me aliquid typis in 4. excuſum conſpexiſſe in Bibliotheca Tegernſeſi. Quocirca ſi fallor, omnes proſectò luce publica dignæ forent, qua eas, mox ut accepero, tanto promptiùs & libentiùs donabo, quantò præclariùs earum auctor de ſacro noſtro Ordine commeritus fuit.

Ven.

VEN. CATHARINÆ

de GEWESWILER,

Priorissæ Subtiliensis , seu Unterlindensis

Ord. S. P. Dominici, Colmariae in

Alsatia ,

DE VITIS

PRIMARVM SORORVM

MONASTERII SUI

LIBER,

Ex MS. Cod. Tiliensi

Accessit Appendix de Vitis aliquot

aliarum pietate præstantium ejusdem Or-

dinis Virginum e diversis MSS.

Codd. collecta.

A

AP-

APPROBATIO.

EX commissione Reverendissimi & Illustrissimi Principis, Episcopi Constantiensis, Vitam primarum Sororum sub Tilia & aliarum nostri Sacri Ordinis Prædicatorum, summa diligentia conspexi, & nihil sanè animadvertere potui, quod spiritum non excitet, affectum inflammet, devotionem foveat ac nutriat. Quare nostro iudicio, pro Religiosæ ac Christianæ vitæ amatoribus, præcipuè verò ad sacrarum sororum animos ad virtutem inflammandos meritò evulgari, atque ad manus omnium devenire possunt ac debent. In quorum fidem propria manu subscripsimus. Friburgi Brisgoiæ 24. Maij 1625.

F. Ludovicus Venegas
Ord. Præd. SS. Theologiae Mag. & Studiorum
Regens ac primarius
Professor.



ELOGIUM
DOMINÆ
CATHARINÆ
EX GEBESWILER *, PRIORISSÆ COE-
NOBII SUB TILIA,
HUIUS LIBRI AUCTORIS.

*Habetur in MS. Codice ejusdem
Cœnobii.*



Laruit in Monasterio
sub Tilia, reverentiâ &
laude digna Soror Ca-
tharina ex Gebeswiler,
Sapientissima Virgo, magna Dei
A 2 gra-

* Gebeswiler seu, quod idem videtur, Gebwiler, est oppidu-
lum superioris Alsatiae Abbatiae, Murbacensi subiectum.



gratia, multisque virtutibus excellens, à pueritia in eodem Sancto Monasterio educata, ubi rigor Sacrae Religionis tum temporis maximus erat, canonésque Monastici optimè ac perfectissimè à sororibus servabantur. Inter quas ipsa tanquam splendidissima columna sanctitatis, gratiae, religionis & sapientiae clarissimè refulsit. Ibidem usque ad supremum vitae suae diem laudabiliter, sanctèque vixit sine omni querela, & Deo devotissimè servivit.

In scripturis admodum versata & erudita erat (quo dono cæteris præstabat) ut evidenter apparet ex insigni *libro*, quem conscripsit *de perfecta conversione, ferventi-que erga Deum devotione prima-*
ma-

marum sanctarum sororum sui Monasterii sub Tilia, quæ à principio usque ad ipsius tempora in florido & virenti horto Ordinis Prædicatorum in omni sanctitate, exacta monasticæ disciplinæ observatione, ac perfectâ virtutum exercitatione vixerant: quem librum sancti, doctique illius ordinis Patres approbârunt & commendârunt.

Hæc veneranda, & excellenti gratiâ illustris soror Catharina speciali devotione & dilectione ferebatur erga Patres Ordinis, quos sciebat sapientiâ, doctrinâ, virtutibus, & vitæ laudabilis famâ insignes, etiam in longè diffitis regionibus existentes: quódque non minùs præclarum est, ipsam iidem sancti Patres maximo prosequerantur




honore, favore & amore ob sanctitatis tum ipsius, tum sororum ejus fragrantiam longè latèque diffusam, ùt satis testantur *Epistolæ Patris Venturini ad eandem sororem Catharinam*, dum Priorissam ageret, ejúsque sorores scriptæ.

Descriptio Civitatis Colmariensis.

C*Olmaria*, olim *Columbaria* dicta, est Imperialis * & elegans Civitas in medio ferme Alsatiae (quæ superioris Germaniae regio est) & foecundo solo, vini frumentique feraci sita. Variis quondam exagitata est tum civium seditionibus, tum bellis ab externis, præcipuè Rudolpho Habsburgensi, &

* Ab Anno 1673. juris Francici.

& Adolpho Nassoviensi Regibus
 Romanorum, illatis, quò aliquot
 hujus libri historiæ alludunt. Mul-
 tis alluitur amnibus, præsertim
 Loucho, Turo, Fächto, Ello &c.
 quorum pars in ipsam civitatem
 influunt, pars secus eam per præ-
 dia decurrunt, ipsúmque terræ
 fundum fertiliorē
 reddunt.





VENERABILIS
P. MATTH. THANNERI,
 CARTUSIANI FRIBURGENSIS,
PRÆFATIO AD LECTOREM,

Nomine

JOANNIS HARTMANNI,
 Typographi Molshemensis, cui hoc Opus typis
 excudendum ille destinaverat,
 conscripta.

CUm in *Librum de Vitis*
primarum sanctarum
sororum Monasterii sub
Tilia, vulgò *Underlinden*, Ordi-
 nis S. Dominici, Colmariae in Al-
 satia siti, incidissem, eumque spi-
 ritualibus opibus & deliciis refertum
 offen-

offendissem, nolui omittere, pie lector, quin è latebris illum eruerem, & tibi quòque easdem opes *deliciasque* communicarem. Nam describitur in eo harum beatarum sororum *primò* austeritas vitæ tanta, ut mirum, homines, præsertim imbecillioris sexûs, tam ardua perfecisse, tam molesta & acerba per tulisse. Deinde Monasticæ disciplinæ zelus & observantia perfecta. Adeo enim exactè juxta Ordinis sui constitutiones vixerunt, ut vel apicem earum prætergredi nefas duxerint. Præterea eximia sanctitas. Virtutibus enim, quæ verè sanctum efficiunt, excellenter ornatae fuerunt. Ad hæc præclara & stupenda DEI dona, quorum nonnulla intimis solummodo DEI

amicis , & perfectioribus Sanctis concessa leguntur. Et hæ sunt speciales opes, quas liber iste continet.

Deliciæ verò sunt suavissimi DEI in has amabiles sponfas suas influxus, divinæ consolationes, dulcedines, & animæ gaudia, quibus cumulatissimè perfusæ ac repletæ fuerunt. Sunt & mellitissimæ æternæ beatitudinis sorbitiunculæ, tum eis sublimiùs & abundantius collatæ, cùm sopitis sensibus mente in DEUM excefferunt.

Quamvis autem ab iis, quæ hoc libro traduntur, omnis falsitatis suspicio abesse debeat, eò quòd olim, ùt paulò ante in elogio Dominae Catharinæ ex Gebeswiler, auctoris ejusdem dictum, à sanctis & doctis Patribus Ordinis Prædicato-

torum liber visus, approbatus & commendatus sit, & quidam de illustribus ejusdem Ordinis personis agentes non pauca ex eo desumpserint : pro majori tamen fide illis concilianda nonnulla hîc in medium adducere libet.

P. Reinerus, Prior Fratrum Prædicatorum Basileæ, jussus à Domino Alberto Magno, tum temporis Episcopo Ratisponensi de Sanctis Patribus Ordinis S. Domini, qui ab initio ad id usque temporis in Germania claruerant, historiam texere, in libelli sui præfatione ad eundem Episcopum sic scribit: *Fidenter dico, quòd si accurate quoque stupenda, quæ Deus à principio Ordinis usque in præsens in nostris sororibus ad spiri-*
ta-

talem ipsarum consolationem operatus est, investigarentur, & literarum monumentis traderentur, eadem vel saxea corda ad compunctionem ac devotionem permoverent & ad plurimorum ædificationem cederent. Quod ut de multis Germaniæ Cœnobiis verum est, ita de Underlindensi verissimum: ad quod etiam potissimum id scribens respexisse videtur, cum ea tempestate illi præfuerit & secreta sororum probè perspecta habuerit. Nam post P. Waltherum, Argentinæ fratrum Prædicatorum Priorem, cujus consilio id extructum fuit, ipse secundus illud sanctè prudentèrque quadraginta tribus annis rexit. *

Cæ.

* Ita MS. Codex Cœnobii Underlindensis testatur.

Cæterùm quod ad libri hujus Auctorem attinet, nempe Catharinam ex Gebeswiler, non tantùm ea scribit, quæ aliæ sorores ex illis ipsis, quarum vitas edit, acceperunt, eidemque integra fide retulerunt, ut ipsa passim testatur, sed etiam non pauca, quæ propriis oculis conspexit, sicut hinc inde liquidò apparet. Et quid mirùm, cùm multas sanctarum illarum sororum noverit? Ut enim è diversis locis conjicere licet, Monasterium ingressa est circa annum Domini 1260. nimirum à prima ejus fundatione fermè tricesimum, quando paucae adhuc prædictarum sororum obierant, & in eo sanctè exegit annos plus minùs septuaginta, vitâ circa annum Domini 1330. functa. Cùm enim à pueritia in eodem Monasterio

na-

nasterio educata sit, necdum decennem fuisse, quando ad Coenobium venit, vero simile est. Et quia affectâ ætate *oculisque caligantibus* se hunc librum scripsisse in prologo suo affirmat, annis plùs minus septuaginta in eo vixisse & octogenariam, vel circiter decessisse colligitur. Quare multorum quæ scripsit testem oculatam fuisse oportet.

Sed & ipsemet Deus veritatem eorum, quæ hoc libro continentur, non semel apertissimo signo comprobare visus est. Nam cùm Domina Catharina primùm ea tabulis cereis mandaret, tanta ex illis tabulis ubicunque locorum positis, odoris fragrantia prodibat, ut sorores plurimùm mirarentur. Quo uno signo Dominus & scribentis,
&

& sororum, quarum vitas scribebat, sanctitatem & scriptorum veritatem astruxisse dubium non est.

Fructum verò multiplicem pio lectori hæc historia afferet. Etenim quàm excellens bonum sit Religio Monastica rite servata quantàmque utilitatem, dignitatem, & jucunditatem suis alumniis conferat, intelliget: tum bonorum operum & laborum pro Christo exantlatorum virtutem ac præstantiam perspiciet, nempe quid eadem hominibus à DEO impetrent, & quàm charum gratumque Domino DEO efficiant. Denique largissimam divinæ Pietatis & Charitatis in homines, præsertim sanctè in Monastica Religione viventes, effusionem cognoscet dicetque : *Domine quid*

quid est homo, quod memor es ejus, aut filius hominis, quoniam visitas eum? Minuisti eum paulò minùs ab Angelis, gloria & honore coronâsti eum, & constitui- sti eum super opera manuû tuarum. Ps. 8. Domine quid est homo, quia magnificas eum, aut quid opponis erga eum cor tuum? Job. 7. Itémque: Quàm magna multitudo dulcedinis tuæ Domine, quam abscondisti timentibus te! Ps. 30. Si tam bonus & dulcis es hîc timentibus & quærentibus te, quid in Regno cœlorum fruentibus te?

Suaveolentibus rosis, quas hortus Underlindensis tulit, adjuncta

junctæ sunt aliæ * in Viridario Ord.
 S. Dominici enatæ, quas ut cælestis
 sponsus suavi earum odore allectus
 jam legit & in Regiam suam trans-
 tulit, ubi simul omnes perpetuò
 vernant & fragrant, ita hîc ad ejus-
 dem Ordinis decus conjunctim in
 publicum proferre ac VV. VV. PP.
 ** dedicare volui, non tantùm, ut
 sanctæ & ad Canonis Monastici
 normam perfectè institutæ vitæ illu-
 stria in ipsis exempla cernerent, sed
 earum etiam nomine, ceu Nobi-
 lium Patriarchæ sui filiarum, insi-
 gnium ordinis sui membrorum,
 & suarum in CHRISTO sororum,
 meritò sibi gratularentur.

Dominus DEUS, qui tam mi-
 rabilia & amabilia in his beatis so-
 roribus

Tom. VIII.

B

roribus

* Ex his in Appendice non nisi aliquas selegi, quarum scilicet vitas
 aut omnino incognitas, aut certè per paucis notas existimavi.

** Alloquitur RR. PP. Dominicanos Selestadienses.


roribus , aliisque Sanctis suis operatus est , nobis omnibus intercessionem illorum gratiam & gloriam largiri dignetur , qui vivit & regnat in secula seculorum, Amen.

E Typographia Molshemensi
Anno Domini MDCXXV. die ...

VV. VV. PP.

Observantissimus
JOANNES HARTMANN,
Typographus Molshemensis.

INDEX



INDEX.

Capitulum hujus Operis.

CAP. I. De perfecta conversione & cordis fervore ad Deum sororum, primò claustrum ingressarum.

CAP. II. De stricta silentii observatione.

CAP. III. De diligenti instructione Novitiarum.

CAP. IV. De frequentatione divini officii & assiduitate orationum.

CAP. V. De rigore abstinentiæ.

CAP. VI. De obsequiis mutuæ charitatis.

CAP. VII. De Priorissis hujus congregationis ab inchoatione monasterii, earumque statu perlucido & perfecto.

CAP. VIII. De speciali devotione & veneratione primarum sororum ad B. V. MARIAM.

CAP. IX. De Sororibus, quibus in vita vel in morte Dominus specialem gratiam consolationis ostendere dignatus est: Et primò de quadam sorore nomine *Benedicta de Mülhausen*.

CAP. X. De sorore nomine *Benedicta*, dicta *de Egensheim*, supra modum Deo devota.

B 2

CAP. XI.

- CAP. XI. De sorore *Agnete de Ochsenstein* felicis memoriæ.
- CAP. XII. De sorore *Gertrude de Columbaria* dignæ memoriæ.
- CAP. XIII. De religiosa conversatione sanctæ memoriæ sororis *Tuda de Egensheim*.
- CAP. XIV. De vita laudabili beatæ sororis *Hedvvigis de Steinbach*.
- CAP. XV. De ferventissima conversatione bonæ memoriæ sororis *Mechtildis de Winzenheim*.
- CAP. XVI. De odoris mira fragrantia in obitu bonæ memoriæ sororis *Stephanie de Phirreto*.
- CAP. XVII. De felicissima sorore *Helwige de Wigenheim*.
- CAP. XVIII. De laudabili vita & obitu sororis *Hedvvigis de Gudelsheim*, Monasterii sub Tilia Priorissæ.
- CAP. XIX. De quadam nostri Monasterii sorore, nomine *Hedvvige*, cognomento *de Logelnheim*, cui mirabilem consolationis gratiam Dominus indulsit revelando sibi secreta cælestia, in cujus quoque exitu lætificare Dominus dignatus est sorores tunc præsentibus per odoris insueti fragrantiam.
- CAP. XX. De veneranda & sancta sorore bonæ memoriæ, *Bertha* nomine, *de Rubeco*, Monasterii de sub Tilia, quæ audire promeruit, dum adhuc vixit, Angelicam harmoniam, quam etiam Dominus JESUS
CHRI

CHRISTUS circa obitum suum invisere dignatus est cum MARIA matre sua.

CAP. XXI. De beata sorore venerabilis memoriæ, nomine *Agnete*, dicta *de Herckenheim*, hujus monasterii fundatrice.

CAP. XXII. De beata sorore *Herburge de Herckenheim*, bonæ memoriæ, quam Dominus in præsentis multis supernis consolationibus frequentavit.

CAP. XXIII. De felice sorore *Adelheide de Rheinfelda* divæ memoriæ hujus quondam monasterii Priorissa.

CAP. XXIV. De beata sorore *Gertrude* dicta *de Herckenheim*, dulcis memoriæ.

CAP. XXV. De sorore sanctæ memoriæ *Agnete de Wallaria* cognomento.

CAP. XXVI. De sorore *Adelheide de Apiaco* bonæ memoriæ.

CAP. XXVII. De sorore divæ memoriæ *Gertrude de Bruck*.

CAP. XXVIII. De sorore felicis memoriæ *Adelheide de Torolzheim*.

CAP. XXIX. De duabus aliis sororibus, videlicet *Elisabeth de Funckholz*, pariterque *Gertrude de Girsperg*, devotis valde & cum omni reverentia nominandis.

CAP. XXX. De felici sorore bonæ memoriæ nomine *Giselhilde*.

CAP. XXXI. De felici sorore *Annâ de Wineck* prædulcis memoriæ. B 3 CAP.

- CAP. XXXII. De sorore *Tuda de Columbaria* beatæ memoriæ.
- CAP. XXXIII. De beatâ sorore *Gertrude de Rheinfelda*.
- CAP. XXXIV. De felici sorore *Sophia de Rheinfelda*.
- CAP. XXXV. De duabus sororibus felicibus uterinis, scilicet *Mechtilde & Agnete*, pariter *de Apiaco*.
- CAP. XXXVI. De beatâ sorore *Heduvige de Laufenberg*, felicis memoriæ.
- CAP. XXXVII. De venerabili ac bonorum memoriâ digna sorore *Elisabeth de Senheim*.
- CAP. XXXVIII. De felici sorore *Eligenta* nomine *de Sulzmat*.
- CAP. XXXIX. De sorore bonæ memoriæ *Heilrade de Horburg*.
- CAP. XL. De religiosa sorore *Rinlinde de Bisseck*, piæ memoriæ.
- CAP. XLI. De beatâ sorore *Adelheide de Muntzenheim* dulcis memoriæ.
- CAP. XLII. De felici sorore *Elisabeth de Rubeco*, sanctæ memoriæ.
- CAP. XLIII. De quadam sorore Laica, *Mechtilde* nomine, *de Columbaria*, piæ memoriæ.
- CAP. XLIV. De quadam sorore Conversa devota, nomine *Agnete de Blotzenheim*, felicis recordationis.
- CAP. XLV.

CAP. XLV. De devota CHRISTI famula *Adelheide de Sigolzheim*.

CAP. XLVI. De devota sorore nomine *Gertrude* orta de Civitate quadam *Westphaliae* Provinciæ *Saxonie*.

CAP. XLVII. De sorore *Gertrude de Hattstat*, bonæ memoriæ.

CAP. XLVIII. De sorore *Hedvige de Gerviller* felicitis memoriæ.

CAP. XLIX. De beata quondam hujus Monasterii sorore *Margareta de Brisaco*, felicitis recordationis.

APPENDIX.

CAP. I. De sorore *Margareta de Kentzinga*, Laica Tiliensi.

CAP. II. Vita sororis *Elizabeth Kempfin de Colmaria*, virginis Tiliensis.


CAP. III. De *Elizabeth de Neüstat*, virgine Adelhusana Ord. S. P. Dominici.

CAP. IV. De *Adelheide de Brisaco*, ejusdem Monasterii sorore.

CAP. V. De statu, gratiis, & virtutibus sororum ejusdem loci.

CAP. VI. De *Elizabeth de Eycken*, sorore Monasterii Ottenbacensis Ord. S. P. Dominici.

CAP. VII. De *Mechtilde de Stans* sorore Cœnobii Tösenfis ejusdem Ordinis.



PRIMORDIA MONASTERII SVB TILIA.

Ex MSS. ejusdem Monasterii codicibus.

Sicut malus inter ligna sylvarum : sic Dilectus meus inter filios. Sub umbra illius , quem disiderabam , sedi , & fructus ejus dulcis gutturi meo. Cantic. 2.



Disideratissimus & suavissimus *Dilectus* est filius DEI Omnipotentis, æterna sapientia Patris , Benedictus fructus Virginei ventris MARIE , CHRISTUS JESUS , *candidus & rubicundus, electus ex millibus.* Cantic. 5. Hic dilectissimus Dilectus descendit in hortum suum , ad areolam aromatum , ut pascatur , & Lilia colli-

colligat. Cant. 6. In horto sanctæ Ecclesiæ multæ sunt areolæ aromatum, id est, multa diversorum Ordinum Cœnobia, variis virtutibus suaviter redolentia. Ex iis quoddam præ multis aliis iudicio sapientium meritò celebratur ceu rigore vitæ monasticæ præcellentius, & virtutum copiâ redundantius. Hoc situm in oppido Colmariensi sub Tiliis ad S. Joannem Baptistam, cui quondam Sacellum ibi sacrum fuerat. Diciturque *Tilia*, quoniam speciosæ *Tiliæ* circa illud visuntur: potissimum verò, quia sorores ibi sub nobilissimis & floridissimis arboribus, hoc est, sub umbra Dilectissimi, de quo propositum thema loquitur, & sub protectione Genitricis DEI, atque regimine maximi inter natos mulierum, S. Joannis Baptistæ, Patroni sui fedent & quiescunt, dulcissimosque fructus S. Spiritûs carpunt. Ad hanc floridam & fertilem areolam aromatum Dilectus descendit, non tantum ut lilia colligat, sed etiam mirâ & multiplici fragrantia, ex omnigenis ipsarum virtutibus exhalante, pascatur & recreetur.

Prima hujus nobilis areolæ aromatum benedicti Monasterii sub Tilia institutio

B 5

feu

seu fundatio hæc est. Duæ Viduæ, pietate, morum honestate ac generis nobilitate conspicuæ, Colmariaë habitârunt Agnes de Wittelnheim & Agnes de Herckenheim. Iis à DEO inspiratum est, ut juxta consilium F. Walteri, Lectoris in Conventu FF. Prædicatorum Argentinaë (cujus beata memoria habetur in Vitis Patrum Ord. S. Domini) monasterium conderent. Hoc suum propositum aliis vicinis viduis aperuerunt, audituræ illarum quoque hac in re sententiam. Inde multo gaudio affectæ eas consilio & auxilio strenuè juverunt. Prædictæ duæ viduæ ædes suas, quas Colmariaë habebant, sub annua pensione aliis locantes, sese unà cum filiis & filiabus suis in suburbium contulerunt, ubi altera earum domum & fundum possidebat in loco, qui dicitur *sub Tilia* ubi tamen non diu moratæ sunt. Nam duarum nobilium matronarum, quæ illis se adjunxerant, consilio suburbium relinquentes, ad locum, qui *Auffmülen* vocatur, ad sacellum S. Joannis Baptistæ pariter se receperunt in ejusdem sancti Pervigilio Anno Domini 1222. erantque illarum octo.

Eodem

Eodem anno in solennitate S. Andreae Apostoli præfatæ sorores habitum Monasticum à prædicto F. Waltero, Lectore Argentinensi, sub Generali Magistro Jordano susceperunt. Mox eodem loco aliquot domos & longum, latum, altumque dormitorium construxere ex lapidibus, ubi se incluserunt, vitam ducentes religiosissimam. Per conductitios fervos & ancillas more priscorum Cœnobiorum suos colebant agros & vineas, atque integræ famæ sacerdotem, quotidie illic sacris operantem, suis sumptibus alebant. Verùm primæ duæ nobiles ac devotæ viduæ, hujus Monasterii fundatrices, multo labore animoque infracto Romam profectæ sunt, & Cœnobium sororum, quod ipse S. Pater Dominicus instituit, contemplatæ, cùm structuræ, tum habitûs & disciplinæ Monasticæ specimen inde sumpserunt. Sed & magno fervore atque constantiâ Ordinem & habitum FF. Prædicatorum à SS. Patre nostro Innocentio Papa quarto postulârunt, & ut curæ ac regimini ipsorum commendarentur, ejusdemque Ordinis Privilegiis gaudere possent, supplicârunt. Devotis illarum precibus Summus Pontifex libenter annuens

Bul-

Bullam misit Magistro Ordinis, & Provinciali Priori per Germaniam in hæc Verba.

Innocentius Episcopus servus servorum Dei, dilectis filiis Magistro, & Priori Provinciali Theutoniæ Ordinis Prædicatorum, salutem & Apostolicam benedictionem. Apostolicæ Sedis benignitas prudentes Virgines, quæ se parant accensis lampadibus obviam Sponsi ire, tantò propensiori debet studio prosequi charitatis, quanto majori propter fragilitatem sexûs indigere suffragio dignoscuntur. Cum igitur, sicut ex parte dilectarum in Christo filiarum, Priorissæ & sororum Monasterii S. Joannis Baptistæ in Columbaria Ord. S. Augustini, Diæcesis Basileensis fuit propositum coram nobis, eadem inclusæ corpore in castris Claustralibus, mente tamen libera, devotè Domino famulantes, de Constitutionibus Fratrum Ordinis vestri; illas quæ sibi competunt, hætenus laudabiliter observârint, ac committi vobis affectent, nos pium earum propositum in Domino commendantes, ipsarum supplicationibus inclinati, eas & idem Monasterium auctoritate Apostolica vobis duximus committendum, eadem auctoritate nihilominus statuentes, ut eadem sub Magisterio & doctrina Magistri & Prioris Provincialis Theutoniæ dicti Ordinis, qui pro tempore fuerint, de cætero debe-

debeant permanere, illis gaudentes privilegiis; quæ Ordini prædicto concessa sunt, vel in posterum concedentur. Dat. Lugduni Non. Sept. Pontificatûs nostri Anno tertio. *

Post aliquot annos eadem Bulla de-nuo confirmata est, & D. Hugo ** Cardinalis misit illis transumptum cum dependenti sigillo, cujus hoc est initium.

F. Hugo miseratione divinâ Tit. S. Sabinae Cardinalis almificis Agni Sponsis, omnibus Priorissis & sororibus per Alemanniam constitutis Ordini Prædicatorum, à Sede Apostolica commendatis, salutem, & sponsum apprehendere, quem sequuntur. De florido horto Ecclesiae rosæ quædam in Alemannia prodierunt, quæ sicut specie & pulchritudine sua alliciunt propè positos, ita etiam odore suo attrahunt in remotis partibus constitutos. Sanè rosas istas, vos esse dixerimus, quas olim in præclaro rosario, roseo videlicet Prædicatorum Ordine felix ille plantârat Hortulanus, piæ recordationis D. Innocentius Papa quartus, cum vos venerabilibus FF. Magistro & Priori Provinciali Theutoniæ me-
mo-

* Domini 1246.

** Hic Hugo aliàs de S. Charo dictus, fuit doctus & sanctus vir, in Cardinalem ascitus Anno Domini 1244. Conrad. Zillard. in Germ. Chron. Ord. Prædicatorum. fol. 22.

*morati Ordinis commendârat. Nos auctoritate specialiter nobis in hac parte commissâ vos eidem rosario reinscribimus sicut prius. Dat. Romæ apud S. Sabinam 3. Id. Feb. Pontificatûs D. Alexandri Papæ quarti Anno tertio. **

Sed anno à Redemptore nato 1252. sorores de loco *Auffmülen* Colmariam reversæ sunt: cujus emigrationis causa hæc erat. Milites seu Nobiles civitati Colmariensi vicini quotidie armati veniebant ad Civitatem, eamque incursionibus vexabant; unde Cives coacti sunt suburbium mœnibus & fossâ cingere. Quo factum, ut prædictum Monasterium *Auffmülen* à civibus defereretur, profûsque immunitum maneret: sorores autem partim extraneos milites, partim etiam incolas civitatis timentes, loco *Auffmülen* relicto, iterum in suburbium ad primum locum sub Tilia commigrârunt.

A nostris majoribus tam spectatæ fidei personis, ut verbis eorum non credere nefas putemus, nec non sæcularibus, quorum nihilominus parentes locum *Auffmülen* incoluerunt, accepimus, S. Joannem Baptistam

* Fuit Annus Domini 1257.

istam nocte, hanc loci mutationem præcedente, quibusdam Sororibus in somnis apparuisse ac dixisse, se pariter cum ipsis locum sub Tilia petiturum, ibi semper apud eas mansurum, & adiutorem atque protectorem illarum sese futurum, nec unquam eas deserturum. Scirent etiam, incommoda quidem & afflictiones ipsas passuras, semper tamen à se fore liberandas. Quædam etiam vocem audierunt altè sub terra clamantem : Ne sine me hinc discesseritis, sed me vobiscum tollite. Quam vocem insecutæ, humum effoderunt, & venerandam S. Joannis Baptistæ imaginem cum duabus ardentibus lampadibus invenerunt. Duo quoque Angeli ibidem visi sunt, qui tamen mox earum conspectibus sese subdixerunt. Unde ingenti lætitiâ perfusæ magna cum reverentia & devotione sacram imaginem è terra levârunt, secumque in benedictum locum sub Tilia asportârunt, ubi in superiori templi parte juxta Altare B. Mariæ Virginis unâ cum duobus Angelis, candelabra tenentibus, collocata est, in monimentum, quod sub terra inter duos Angelos duasque ardentes lampades reposita esset.

Et

Et quoniam S. Joannes Baptista tam clementer apud Sorores esse ac manere voluit, idcirco eum in Patronum & protectorem sui Cœnobii sub Tilia delegerunt, quamquam prius S. Andream Apostolum adsciscere decrevissent, eò quòd in solennitate ejusdem Apostoli primò habitum monasticum induissent. Postmodum Ecclesiâ & Monasterium in honorem B. Joannis Baptistæ consecrata sunt. Ecclesiâ extructâ, ingens Crux plumbo cooperta in fastigio tecti versus Orientem posita est: Super Crucem elegans S. Joannis Bapt. imago (ni fallor ærea) statuta. Et si quandoque incendium monasterio damnum minitans oriebatur, apertè S. Joannes pallio suo visus est ignium globos discutere, longiusque à suo habitaculo propulsare. Quodam verò tempore sævus turbo prædictam æream imaginem, è grandi ferreo clavo, cui immissa erat, abripuit, & in Religiosam domum Joannitarum, ut nobis relatum est, demisit, quam tamen ultrà recuperare non valuimus. Hæc à majoribus nostris commemorata in scriptis non reperimus, sed hîc annotavimus, ne progressu temporis penitus in oblivionem venirent, & ut posteritas

ritas nostra eò majorem devotionem atque fiduciam erga sanctissimum Christi Baptistam, gloriosissimum Patronum nostrum conciperet.

Narratum etiam nobis est, quòd prædicta ejusdem honoranda imago ob ferocem gentilem populum, aliquando per partes illas profectum, subter terram occultata fuerit, qui sacellum S. Joan. Baptistæ, quod *Auffmülen* tunc temporis fuerat, destruxit, in quo fortè imago illa asservabatur: sed ita terræ mandata cùm à truculentis hominibus salvata, tum SS. Angelorum custodiâ beatarum sororum sub Tilia devotioni reservata est.

Anno verò Domini M. CCCC. memorata plumbea Crux cum clavo ferreo, qui priùs imaginem S. Joannis Baptistæ sustentaverat, vehementi turbine avulsa, & relictà per aërem delata, ac sine ullius hominis & ædificii detrimento, non procul à foribus Ecclesiæ deposita est. Crux hæc tam longa, grandis & gravis fuit, ut eam vix duodecim sorores loco movere possent; & nisi B. Joannes Baptista tam mirabiliter & opportunè eam sustulisset, tectum ac

Tom. VIII.

C

testu-

testudinem chori casu suo contrivisset, qui profectò casus ob interiorem trabem ligneam, vetustate temporis omni ex parte putrefactam, jam jam imminebat. Hoc S. Joannes Baptista conspicatus, nos id ignorantes, sed nec cernere quidem valentes, hac ratione protexit, propter quod miraculum & beneficium DEUS solemni cantico *Te Deum Laudamus*, magnificè à nobis collaudatus est.

Sequitur Liber, quem Deo dilecta Soror Catharina ex Gebeswiler Latinè de austera primarum hujus cœnobii sororum, conversatione ingentique sanctitate ac devotione conscripsit. Quocunque tabulas cereas, in quibus primùm scribenda consignabat, reposuit, tanta odoris ibi fragrantia spirabat, ut omnibus sororibus id stupori esset, intelligerentque, hoc pacto declarari, quàm grata Deo essent sanctæ sorores illæ, & quantopere is hanc sanctitatis earum conscriptionem approbaret.



PROLOGUS AUCTORIS
IN VITAS PRIMARUM SANCTARUM
SORORUM DE SUB TILIA IN CO-
LUMBARIA.



Libellum , si tamen di-
gnus tali nomine æsti-
metur , quem diligen-
tiâ multâ edidi & la-
bore , de primis divinis Sororibus
sanctæ Congregationis nostri Mo-
nasterii , earumque perfectissimo
ac felicissimo statu in omni sancti-
monia summaque vigilantia circa
observantias regulares , rudi qui-
dem stylo & imperito composi-
tum , sed veritate firmissima com-

pletum, universis Deo dilectis Sororibus istius Monasterii gratis offero plurimo cum affectu.

Cupiens itaque eximiarum Sororum, quæ coeli civibus in super-
nis sedibus jam conjunctæ, præful-
gentem & prælucidam vitam ali-
quatenus plenaria certitudine,
quantum ingenii mei parvitas suf-
ficit, exprimere, posterisque nobi-
litem a viti generis intimare, pri-
mæ væ sanctitatis ingenuitatem,
prout potui, verbis simplicissimis
& minùs congruentibus designavi,
ne in oblivionem aliquando veni-
ant tam excellentes sorores, earum-
que gesta gloriosa & mirabilia ope-
ra eximiæ sanctitatis, & ut cum
quanta gloria & religione istud
sanctum Monasterium sit funda-
tum, tam modernis, quàm poste-
ris

ris innotescat. Non autem ut volui, nec ut debui, feci tamen, quod potui. Textum huius operis primum in cera jam senescens conscripsi propriis manibus oculisque caligantibus & compegi, expavescens quidem & multum erubescens, quod imperitia mea ad aures vestras unquam pertingere debet.


Accedunt ad hæc revelationes & multiplices consolationes, divinitus factæ sororibus DEO plenis, quæ spernendæ omnino non sunt, revelationes veterum sororum fidelissimæ, & omnium credulitate dignissimæ, per quas earum inclyta merita declarantur, quas ego indigna didici & percepi à personis fide dignis, quarum testimonia credibilia nimis, quæ firmiter asse-

C 3

verant,

verant, se auditu proprio percipere meruisse ab eisdem sanctis & DEO placitis sororibus, ad quas hæ revelationes factæ specialiter dignoscuntur. Ex his omnibus præsentis opusculi materia sumpta, & in unum libellum conscripta fideliter & compacta est, cui auctoritatem præstat gestorum veritas, sine qua nec valet auctoritas: Cæterùm scientes, quòd hæc sub brevitæte perstrinxi, & superficietenus depingendo quasi quosdam pro delectamento flosculos decerpsi, dans occasionem legentibus, ut & ipsæ processu temporis peritam manum apponant huic informi materiæ, & opus perficiant gloriosum.

CAP.



CAPUT I.

*De perfecta conversione
& cordis fervore ad DEUM Sororum
primò claustrum ingressarum.*

Fuerunt supra modum DEO
devotæ sanctæ Sorores hujus
Congregationis, quæ per DEI
gratiam divinitus inspiratæ, sanctæ
Religionis habitum & Ordinem exi-
mii Patris S. Dominici in principio
assumpserunt sub Beatissimo Patre
Jordano, Magistro Ordinis secun-
do, successore primi inclyti Patris
nostri sanctissimi Dominici Anno
Domini 1232. plures ex illis nobi-
les extiterunt, divitiis, possessioni-
bus & dignitatibus sæculi præemi-
nentes. Hæc omnia propter Chri-
stum respuerunt, paupertatémque
voluntariam, ut verè pauperes spi-
ritû, secutæ Christo vici veræ vo-

tis omnibus adhæserunt. Odor itaque sanctitatis earum cœpit latius ubique diffundi, tanquam vernantium & redolentium liliorum, quæ in florifero Prædicatorum Ordinis horto plantatæ, cœlestis Hortulani manibus & excultæ, germinârunt vitam virtutibus plenam in salutem plurimorum, quam & sollicitè suis posteris indiderunt.

Quapropter in veneratione habebantur tunc maxima & favore, non modò apud Magistros Ordinis, earumque Priores, Provinciales, aliàsque excellentes Ordinis personas, verùm etiam apud sacrosanctam Romanam Ecclesiam, quæ eas tot Privilegiis, tot gratiis specialiter insignivit. In rebus quoque, & in grangiis suis tunc ab incurribus iniquorum hominum, & quorumlibet potentum illæse optimè custodiebantur divinâ eas gratiâ protegente. Creverunt tunc filiæ DEI, & quasi germinantes multiplicatæ sunt: impleverunt locum Sanctum Monasterii optimarum multi-
cu-

tudine personarum , & pulcherri-
mam messem & copiosissimam pul-
lulantes , quæ nunc ab Angelicis
messoribus in cœlorum horrea con-
gregatæ pro laboribus suis , quibus
fideliter in Vineâ Domini Sabaoth
desudârunt , ineffabilibus bonis Do-
mini perpetuò perfruuntur in re-
quie opulenta.

Nempe compendio multa sata-
go præterire, ne proposita brevita-
te priver, videlicet quantâ instantiâ
& labore Prædicatorum Ordinem
â Domno Apostolico impetrârunt
Curiam Romanam in persona pro-
pria adeundo, & qualiter de loco,
quem primitus inhabitare coepe-
rant, ad hunc locum, in quo nunc
degimus, se transtulerunt, pleniùs
de talibus dicere supersedeo in præ-
senti. Verùm de sanctitatis & per-
fectionis earum operibus aliqua
pauca de innumeris dicam ad ædi-
ficationem modernorum.

Erat verè tunc tempus acce-
ptabile diésque salutis, cum tot san-
ctæ sorores odoriferum sacrificium

in conspectu Domini, & holocaustum contriti spiritûs obtulerunt. Erant verè tunc dies immaculatarum, quas novit Dominus, spiritu ferventes, Domino servientes in veritate & corde perfecto, facientes, quod bonum & placitum est in oculis ipsius. Miserat namque tunc DEUS ignem de excelsis in ossibus earum, & facta sunt corda ardore charitatis æstuantia vehementer. Diffundebatur autem flamma exterius lucentium operum, & efficacium exemplorum, quibus plures ad sui imitationem attrahebant. Quotquot autem tunc per gratiam DEI à tumultibus sæculi ad secreta claustris silentia convertebantur, toto mentis conamine se ipsas puras & immaculatas, hostiam sanctam & DEO placentem offerebant. Rimabantur sollicitè vespere & mane secreta conscientiarum suarum. Si quid autem obviabat, quod vel modicum cor pungeret, vel ejus munditiam obfuscaret, strictissimè punierunt puris confessionibus diluentes.

entes. Delicata enim conscientia non solum criminalibus, verum etiam peccatis minimis pungitur & torquetur. Tunc contra omnes carnis dæmonisque tentationes viriliter armatæ, scutum fidei prætendebant vanarum cogitationum spinas sollicitè eradicantes. Omnium sæcularium negotiorum, commodorum, deliciarumque nulla eis erat recordatio, sed solum divinis intendere, se intra se continere, corpus suum servituti subicere & despiciere, Deo omnia committere, eique soli jugiter inhærere sollicitudo & intentio tota fuit, & hoc tantum conquerebantur, quòd Deo servire tanto tempore distulissent.

CAP. II.

De stricta silentii observatione.

IN observatione silentii, quod fundamentum Religionis Sacræ est, stricta tunc fuit censura, devota

44 *De stricta silentii observatione.*

ta cura, & observantia studiosa & pura, maximè locis & temporibus interdictis. Nisi enim grandis urgeret necessitas, vel periculum immineret, disciplinam silentii infringere inter eas nefas tunc erat. Verbi gratiâ: cùm aliquam ex eis contingeret subitò & improvisè ex aliqua debilitate cadere, defectumque mentis pati, omnes tacitæ accurrentes eam piis obsequiis relevabant. Aut si domus vicina claustro ab igne esset succensa, & incendium exinde monasterio timeretur, illico universæ accurrentes DEUM pro defensione loci devotis precibus & lachrymis invocabant. Si qua verò pro extinguendo igne erant necessaria, absque strepitu & clamore citiùs deferebant. Porro in his casibus & similibus, rarò aliqua legem silentii transgredi præsumpsit.

Fuit ergo inter eas pax magna, *Coloss. 3.* concordia & *charitas*, quæ est vinculum perfectionis, quia refrenabatur lingua loquax. Nam sicut obstru-

tio

Et ore clibani calor intrus fovetur: sic servato silentio gratia S. Spiritûs in corde retinetur. Hoc cognoscentes ponebant custodiam oris suo, ut non delinquerent in lingua sua: ideoque concaluit cor earum intra eas, & *in meditatione earum ex-* Ps. 38.
arsit ignis ille, Dominus DEUS noster, consumens omnem rubiginem vitiorum.

CAP. III.

De diligenti instructione

Novitiarum.

Magna valde tunc fuit ad Novitiarum & juvenum fororum instructionem diligentia, ut primùm scirent quælibet Ordinis & Religionis instituta, & hæc distictissimè conservarent. Informabantur quoque tunc cura pervigili ad omnem morum honestatem, & ut decentiam & compositionem gestuum omniumque membrorum suorum motum diligentius obser-

va-

varent, ne quid incompositum appareret aut indecens in eisdem, quod oculos intuentium offenderet aut gravaret. Siquidem in loquendo valde parcae & modestae juvenes sorores existebant, dicenda proferentes absque strepitu & clamore, detractiones & jurgia sollicitè vitantes: à nocivis, vanis & litigiosis linguam refrenabant, continentes se à dissolutionibus, risibus & cachinnis, maximè in conventu: nec aliqua, quamvis in ætate puellari & tenera constituta, talia excitare aut facere tunc præsumpsit. Honorem & reverentiam maximam conventui tanquam Domino *Mat. 18* exhibentes, qui se medium promissit congregatis in suo nomine affuturum. Gressus quoque suos à vanis discursibus cohibere, secumque habitare intrinsecus edoctæ Sancti Spiritûs unctione, voluntatem suam frangere, Prælatis suis absque murmure obedire.

Divino verò officio omnimoda reverentia, sollicitudine & timore

re

re assistebant, ad Psalmodiam intentum habentes animum & devotum, scientes omnium, quæ ibi dicuntur, usque ad unam literam se pro certo debitrices, vel dicendi in suo choro, vel in alio audiendi. Porro tanti fervoris juniores sorores ad DEUM tunc erant, quòd oportuit frenum discretionis eis adhibere, ne indiscreto labore vigiliarum & abstinentiarum debilitatæ, inutiles postea ad alia redderentur, sicut necesse est tepidos & remissos ad operandum stimulis perurgere.

CAP. IV.

De frequentatione Divini Officii & assiduitate Orationum.

Matutinæ & Missæ, omnesque horæ Canonicae certis temporibus quotidie cantabantur valde solenniter & distinctè quibus quælibet Priorissa & Suppriorissa tunc temporis interesse consueverunt,

runt, dantes operam diligentem, ut omnes pariter & tempestivè convenirent, & psallerent alacriter & devotè.

Surgentes ad Matutinas, officium gloriosæ Virginis MARIE reverenter, ut moris est, binæ & binæ stando complentes statim ad chorum properârunt, ne tantillo tempore ab oratione vacarent. Finitis autem Matutinis & Completorio, communiter in Choro persistebant sorores in oratione usque ad signum, ardentissimæ devotionis exercitiis illud tempus expendentes. Aliæ multis genuflexionibus laborantes semetipsas affligebant Majestatem Domini adorantes. Aliæ verò igne divini amoris liquefactæ non poterant se à lachrymis continere. Quin & devotissima vox plangentium expressiùs audiebatur, nec inde recedebant, donec ad novam gratiam incalescerent & invenirent, quem diligebat anima sua. Aliæ virgarum verberibus, aliæ corrigiis nodosis, habenti-

ti-

tibus ramos duos vel tres, aliæ catenis ferreis, aliæ autem flagellis spineis, singulis diebus carnem suam affligentes acerrimè lacerabant.

In Adventu Domini, & per omne tempus Quadragesimæ universæ sorores post Matutinas in Capitulum divertentes, sive ad loca alia opportuna, diversis flagellorum generibus corpus suum usque ad sanguinis effusionem lacerantes, crudelissimè & hostiliter cæciderunt, ita quòd sonitus verberantium ubique per omne monasterium resonaret, ascendens in aures Domini Sabaoth suavior omnimelodiâ, cui talia humilitatis & devotionis opera multùm placent, nec despicit gemitus contritorum.

Porro quædam ex eis desiderio divini amoris succensæ vehementer, in oratione ante Matutinas sæpius pernoctabant, assistentes tamen Matutinarum solenniis alacriter & devotè. Quædam verò ex eis in omni vita sua, quamvis debiles & infirmæ, finitis matutinis ad le-

Etum suum nunquam redierunt, persistentes immobiles in oratione. Nec fraudatæ sunt à desiderio suo. Perfundebantur enim desuper gratiarum stillicidiis abundanter.

His itaque multis & diversis modis appropinquantes Domino, illuminabantur corda illarum, mundabantur cogitationes, incaluit affectio, serenabantur conscientia, elevabantur mentes in DEUM. Unde aliquæ earum in oratione elevata inter cœlum & terram aliquamdiu manere cernebantur, corpus terrenum & grave devotionis & gratia spiritu sursum agente. Solemnēs & Dominicos quoque dies continuis orationibus & devotis expendentes, quodlibet festum novis devotionis exercitiis perornabant. Propterea rarò vacabat Chorus obsecrantibus, raróque sine sororibus illis diebus videbatur. Unde inveniebantur tunc frequentius ibi, cum fuissent ab aliqua requisita.

CAP.

CAP. V.

De rigore abstinentiæ.

Cùm mensa Conventualis parca & sobria tunc temporis satis esset, ipsam tamen quarundam sororum sobrietas & superaddita abstinentia adornabat. Quædam namque per plures dies ab omni potu abstinentes penitus non bibeant: aliæ verò â vino multo tempore abstinebant, sola aqua frigida utentes. Quædam autem ex eis saporem cibi cum superfuso aliquo insipido diluebant. Multæ quoque, ne notam singularitatis incurrerent, nunc ab uno cibo, postmodum ab alio abstinebant, de oblati sibi quotidie aliqua subtrahentes. Aliæ per totam Quadragesimam potum permodicum tantum semel in die sumebant, nec loquebantur nisi de aliquo requisitæ. Aliæ similiter per multos annos ab omni potu, excepto tempore refectionis

propter Dominum abstinebant.

Præterea fuerunt quædam, quæ non solum ab omni cibo delectabili, sibi oblato, qui posset appetitum allicere, abstinebant, verum quoque de cibis insipidis sibi necessaria subtrahebant, quod vix natura tantillo modo potuit sustentari. Hæ igitur sanctæ & DEO dilectæ sorores habitabant in adiutorio Altissimi, propterea rigidam & austeram vitam pro nomine ipsius cum desiderio tolerabant, & protectione DEI cœli communitæ non deficiebant in arduis mirificisque operibus sublimium meritorum.

Aliquæ insuper ex sororibus beatis asperitate regularis habitûs non contentæ, indutæ occultè Ciliciis carnem propriam afflixerunt, lumbosque suos super nudam carnem cingulis spineis, artificiosè factis, accinxerunt. Aliæ quoque ex eis per multos annos valde strictè super nudo secingentes funibus recentibus & nodosis : Quædam verò carnem suam cingulis ferreis &

CON-

concatenatis , usque ad sanguinis effusionem vulnerantes crudeliter cruciabant. Aliæ similiter flagellum sibi facientes de cingulis ferreis, præacutos habentibus clavos, instar acum crudeliter pungentes, cum talibus flagellis innocens corpus suum quotidie verberantes, dirissimis punctiõibus hostiliter lacerabant, adeò ut sanguis ubertim ex creberrimis inflictis vulneribus emanaret, ita quòd tunica interior intincta sanguine plurimò perfunderetur.

Itaque hæ sanctæ sorores portantes stigmata Christi in corpore suo non sunt fraudatæ gloria Martyrum. Ipsæ quoque Christi pro amore sanguinem suum fuderunt, in hoc passionem ejus pro suo modulo imitantes.

CAP. VI.

De obsequiis mutue Charitatis.

Charitatem magnam valde tunc ad invicem conservabant, ca-

ventes modis omnibus, ne causamurbationis aut offensionis alicui exhiberent, invicem prævenientes obsequiis & honore. Idcirco in conventu lecturis sive servituris tunc certatim aliæ pro adiutorio occurrebant, præbentes se spontaneas & paratas ad quælibet pro ipsis servitia facienda. In laboribus sive quibuslibet operibus ad utilitatem communem pertinentibus affectuosa admodum fuit tunc & charitativa jucunditas, quibus passim sorores non vocatæ aut coactæ, sed ultrò se ingerebant.

In sublevandis quoque infirmarum sororum necessitatibus misericors erat valde omnium compassio, & indefessa, & efficax sermonis & operis consolatio. Proinde si quæ in compassione infirmarum & debiliū sororum, in conventualibus servitiis sedulior esse poterat, feliciorē se coram Domino reputabat.

Erat tunc in sororibus fervor Charitatis magnus ad omne opus
vir-

virtutis, suavitas eximiæ devotionis, vigilantia continuæ orationis, observantia strictissima religionis, pulchritudo conversationis in exemplis & moribus sanctis, rigor strenuissimus in vitiis coërcendis. Tunc enim levem transgressionem nequaquam levis ultio sequebatur.

Gratiam admirandam contulerat eis DEUS consolandi tristes & pusillanimes sermonibus efficacibus atque blandis. Acceperant enim à Domino linguam eruditam, & valde medicinalem, quæ ægris mentibus medelam potenter conferre potuit sanitatis. Ardebat namque in se ipsa igne divini amoris mens ipsarum: ideóque verba exinde procedentia mirabiliter alias consolabantur, & frigida pectora inflammabant.

CAP. VII.

De Priorissis hujus Congregationis ab inchoatione Monasterii earumque statu perlucido & perfecto.

Libet hîc aliquantulum diutiùs immorari , & memorando contemplari divinissimas sorores quæ in officio regiminis super Congregatione Conventûs nostri ordinatione divinâ â fundatione Monasterii extiterunt. Erant denique stellæ radiantes in vita sua optimorum exhibitione & efficacium exemplorum floribûsque virtutum & famæ mirificè redolentes , talibus odoramentis omne Monasterium resperferunt. Hæ sanè sunt candelabra, præclarè lucentia ante Dominum, ex quarum consortio Sanctorum nunc gaudia augmentantur. Verùm de his ignaviæ soboles negligentia nihil hætenus in scriptis posteris dereliquit memoriâ dignum

dignum , cùm tamen propter incomparabilium earum virtutum insignia meritò commendari excellentissimè potuissent. Cùm ergo dignis laudibus perfectam earum vitam & lucentem nequeam describere, per paucis verbis & simplicibus attentabo.

Ordinem suum integrè & perfectè servaverunt in nullo sibi parcentes. Rigorem quoque conventûs tenentes continuè in omnibus sequebantur. In Choro, in Refectorio , cibo & potu, in jejuniis & aliis Regulam & Ordinem in se strictissimè tenuerunt, pro posse laborantes , quòd sorores hæc omnia pro viribus observarent. Si quæ autem sororum his se forte subtrahere notabiliter nitebatur absque evidente necessitate, reproba & inutilis habebatur, & ad hæc quoque invita, pœnis afflicta gravibus, cogebatur. Sanè super custodiam gregis sibi crediti assiduâ sollicitudine vigilabant, salutem sibi creditarum quærentes in omnibus & pro-

fectum, quem & promovere tam in spiritualibus, quàm in temporalibus studiosissimè laborabant, quæ sua sunt, in hujusmodi administratione non quærentes in aliquo vel suorum.

Habebant tunc rigorem strenuissimum in vitiis coërcendis, culpas delinquentium nullatenus dissimulantes. Transgressiones enim fororum, quantumvis leves, transire minimè patiebantur impunitas. Porro modestæ & maturæ in omnibus actibus suis erant, multùmque providæ & discretæ in agendis, curantes quoque opere perficere, quod alias nitebantur postmodum edocere. Nomen officii sui decorabant bonis moribus & exemplis, Christi bonus odor factæ in omni loco hujus Congregationis. Has igitur verè beatas magni fore meriti apud Dominum Salvatorem verissimè prædicamus, quas tantis gratiarum copiis perfundere, crebris supernis visitationibus, divinísq; revelationibus consolari voluit in præ-

præsenti, & felici transitu consummare, secum eas collocando intra pascua æternæ viriditatis, ubi gloriâ vultûs sui perpetuò satiantur.

CAP. VIII.

De speciali devotione & veneratione primarum sororum ad B. V. MARIAM.

GRandis admodum & continua ad gloriosam Virginem MARIAM, Matrem misericordiæ, omnium sororum in principio fundationis fuit devotio, mira reverentia, pia in ejus laudibus & cultu diligentia, sedula ac fervens ad eam oratio, sancti amoris affectio, magna fidelisque de ipsius patrocinio confidentia, insatiabilis in ejus contemplatione suspensio. Denique in solennitatibus ejusdem Virginis Gloriosæ crebrioribus & ferventioribus orationibus insistebant, bonorum operum studiis, arctiorisque vitæ disciplinis majorem solito operam

ram impendentes, ut gratiam Domini & misericordiam efficacius assequi valerent per ipsius preces potentissimas, quæ esse meruit cœleste promptuarium, divinarum gratiarum eructans abundantiam incessanter. Nocturnum quoque officium & diurnum in ipsius festivitibus cantu altissimo & devoto valde solenniter celebrabant, diversarum vocum melodiis, tanquam vocibus Angelicis suavissimè resonantes.

In Sabbatis singulis, quando de ipsa divinum officium fieri debuit, charitate affectuosissima totum officium tam de nocte, quàm de die nimis celebri cantu persolvere consueverant. Porro divinam & sanctam Antiphonam : *Salve Regina*, voce cordis atque oris devotissimè decantabant ad laudem ejusdem Virginis & honorem usque ad cœlum vociferantes. Ad cujus quoque venerationem illâ horâ, quando prædicta Antiphona in choro à conventu cantabatur, omnes sorores, quæ Completorio intere-
re non
po-

poterant, decumbentes quoque lecto & febricitantes, quasi ad solennitatem venire sollicitè properabant, semetipsas in fine diei eidem Virgini attentius commendantes, ejusque patrocinium devotis precibus & lachrymis invocantes, ut in hora mortis suæ benignum respectum miserationis ipsius assequi mererentur.

Quapropter gloriosa Mater Regis gloriæ pluribus sororibus hujus Monasterii in extremis vitæ constitutis visibiliter apparens, in luctu mortis eas mirabiliter consolans, angustiam & timorem abstulit, infundens eis gaudium & consolationem suâ præsentia gratiosâ sicut ipsæ in mortis transitu retulerunt. De quibus aliisque nonnullis sororibus, quædam eidem DEI Genitrici dignissimæ singulis diebus vitæ suæ mille *Ave MARIA*, interdum verò duomillia devotissimè offerebant. Quas etiam ipsa Adjutrix benignissima in opportunitatibus spirituali gaudio lætificare mirabiliter ac confortare

non

non defuit in vita & in morte , consolationis eis gratiam largiter conferendo , ut suo loco & tempore plenius enarrabo. Unde & nos pie credimus, confidimus & speramus, quod Theotócos, sancta polorum terræque potentissima imperatrix , inter alia loca dominationis suæ, hortum sibi deliciarum præviderit , elegerit & constituerit istud Sanctum Monasterium ex antiquo, in quod libenter perambulavit & frequenter, clausum DEI custodiâ circumdedit, & protexit diligenter, ex quo orationum ferventium & virtutum omnium spiravit odor suavissimus abundanter.

In hunc ergo hortum, virtutum floribus decoratum, pia DEI Genitrix ad deliciandum libenter progressa , extirpavit vitiorum germina, plantans virtutum semina , rigando fecundavit interiora cordium, perfundendo ea profusiori imbre gratiarum, stillante indefinenter DEI munere super terram.

De quo horto tam florido &
amœ-

amœno numerosam multitudinem sanctarum sororum, devotissimè sibi servientium, tanquàm albescentia & suaveolentia lilia sancta DEI Genitrix manu Virginea jam collegit, & in coelicum pomarium sui dilecti Filii transplantavit. Cujus meritis gloriosis, dum viverent, protectæ jugiter & adjunctæ, longiùs à se abjicere prævaluerunt pondus omnium carnalium desideriorum & terrenarum concupiscentiarũ gravissimam sarcinam, quæ impugnant & impediunt miseras animas mortalium, transeuntes per tot & tanta discrimina hujus maris magni & formidolosi liberè & securè pervenerunt ad regna cœlestia, ejusdem Virginis suffultæ præsidiis & ducatu.

Nos igitur assidua discussione conscientia nos ipsas dijudicemus, ne quid in nobis culpabile reperiat, ut cùm Dominus noster JESUS CHRISTUS ad particulare venerit judicium cum unaquaque nostrum, & pulsaverit nos per mortem vocans de præsentis exilio, patriæ cœlestis

lestis hæreditatem capiamus meritis sanctissimis & precibus ejusdem Virginis gloriosæ.

CAP. IX.

De sororibus, quibus in vita vel in morte Dominus specialem gratiam consolationis ostendere dignatus est. Et primò de quadam sorore nomine Benedicta de Mülhausen.

MAtrona quædam nobilis & juvenacula, nomine Benedicta, de Mülhausen oppido oriunda, viro quoque nobili atque militi in matrimonium copulata, Columbariensi erant oppido residentes. Verùm miserante Domino non multo tempore, postquam in simul convenerunt, divinitus inspirati sæculum ambo reliquerunt, ad Religionem illico convolantes. Ipse verò ad Cisterciensem Ordinem sanctum se transtulit, in quo cursum vitæ suæ in Domini servitio sine laudabili

bili consummarit. Prædicta autem matrona, uxor ejusdem militis cum sorore sua adhuc parvula, nomine Otilia, se conjunxit sanctis, honestis & nobilibus viduis, quæ fundatrices sanctæ religionis Congregationis nostræ & Monasterii extiterunt.

Illa autem prima Sororum omnium hujus Monasterii sancto habitu Ordinis induta Anno Domini 1243 * à Fratre Walthero Ordinis Fratrum

Tom. VIII. E Prædi-

* Hoc anno nempe 1243. Rector Cœnobii subtilia fuit B. Rainerus Prior F. F. Predicatorum Basilea (id enim regendum suscepit anno Domini 1238. cui 43. annis præfuit) non B. Waltherus, ut hic dicitur, nec B. Jordanus amplius erat in vivis, sed generalem Magistrum tunc agebat B. Joannes Teutonicus, quartus Magister electus anno 1241. defunctus autem anno 1253. Vide Germanicum Chronic. Conradi Zillardi fol. 19. 23. & 24. Ergo in numero annorum hic erratum, & pro anno 1243. ponendus est annus 1232. quo prima octo Sorores habitum Relig. sumpserunt, ut supra in primordiis Cœnobii &c. dictum.

Prædicatorum, viro eximiæ sanctitatis, quondam Lectore Argentinensi, sub Beatissimo P. Jordano, Magistro Ordinis secundo, Successore primi Incltyti Patris nostri sanctissimi Dominici, cujus Dei gratiâ in hac Congregatione extitit filia generosa. Siquidem in florida juventutis suæ ætate Domino devotissimè incipiens deservire, corpusque suum in servitutem spiritûs redigens, vigiliis, jejniis, orationibus continuis, cæterisque pœnitentiæ operibus semetipsam assiduè castigavit, vitam ducens religiosam, laudabilem valde, arduam & strictam. Quod eò magis mirum fuit, & magnificè laudum præconiis inter cætera mira opera, & stupenda pii conditoris extollendum (*qui vocat ea, quæ non sunt, tanquam ea quæ sunt*) quantò eadem Soror Benedicta voluptatibus & deliciis hujus sæculi abundavit. Grave onus Monasticæ Religionis, & durum jugum tunc temporis paupertatis, quod vix his diebus credibile nimisque importabile vide-

videretur, valde leniter sustinebat, utpote unctione perfusa S. Spiritûs copiose. Erat denique circa Ordinis observantias, & custodiam cordis sui sollicita & timorata nimis.

Sanctæ quoque paupertatis præcipua extitit amatrix. Induta semper habitu valde vili, pretiositatem aut curiositatem in magnis & in parvis, scilicet in cultellis & in cingulis non quæsit. Quapropter ob custodiam humilitatis, qua plurimum excellebat, nova vela, lotaque pepla & candida imponere per diem suo capiti diligentius evitabat, potius utens eis tempore Matutinarum, quousque effecta sordida & abjecta. Amorem namque suum sic in Deum fixum tenebat, quòd non solum à magnis abstinere, verùm quoque à minimis affectus suos studuit cohibere.

Sanè ad obedientiæ virtutem summam omnibus diebus vitæ suæ adhibere diligentiam contendebat, sollicitè præcavens, ne quid faceret aut possideret, etiam in minimis,

absque licentia speciali. Porro temporis sui sollicita & diligens exstitit conservatrix, aut operibus communibus vigilantia insistens diligentia & devota cura, aut in orationibus divinisque suspenfa contemplationibus, in quibus delectabatur, sicut in omnibus divitiis. Sciebat namque, quoniam volat irrevocabile tempus, quo nihil est pretiosius, quo nil vilius à nobis aestimatur, & dum poenam, quæ in præfenti pro Domino suscipitur, declinamus, centuplicatam incurrimus in futuro. Cæterum in officiis Supprioratus & Procurationis aliisque nostri Monasterii quamplurimis & diversis multum strenuè, devotè & utiliter ad ultimum vitæ suæ senium laboravit, maturam valde, discretam, providam & circumspectam se exhibens in eisdem.

Verum quoniam scriptum est: *Quem diligit Dominus, corripit & castigat* Hebr. 12. Per aliquot annos usque ad exitum suum gravibus & diuturnis incommodis flagellata

lata est , quibus tanquam aurum mundum à camino tribulationis excocta diutius & probata , mox gravi mole carnis deposita , Spiritus ad Creatorem suum ob merita sanctitatis , haud dubium , sine molestia evolavit. In hora autem mortis suæ , quanti meriti & sanctitatis apud Dominum foret , cuidam antiquæ Sotori , valde devotæ , pius Dominus ostendere dignatus est. Percepit enim odorem mirificum & suavissimum , quantum in vita nunquam experta fuerat , illâ horâ , quando beata illa anima de ergastulo corporis solvebatur.

CAP. X.

*De Sorore nomine Benedicta, de Egensheim * supra modum Deo devota.*

HOnesta quædam, nobilis & multum devota vidua, nomine Benedicta, dicta de Egensheim, habens tres liberos, videlicet duas ** filias virgines, & unum filium, quem ad serviendum in Ordine Prædicatorum Domino obtulit Creatori, cum duabus verò filiabus suis in principio inchoationis Monasterii nostri coadunare se studuit consortio sanctarum Sororum, devotissimè Deo ibidem servientium in patientia, humilitate & paupertate spiritus sub disciplina regulari. Porro hæc Soror Benedicta, de qua loquimur, germana fuit Sororis Agnetis

* Egensheim seu Egisheim oppidulum Alsatie, supra quod tres arces in monte sunt posita.

** De harum altera vid. Cap. 13.

Agnetis de Herckenheim * bonæ & verè beatæ memoriæ, quæ ejusdem nostri Monasterii fundatrix extitit, non dispares moribus & sanctitate. Ambæ enim exemplis eximiæ sanctitatis & perfectionis in vita sua singulariter effulsere, pro suæ sanctitatis reverentia affectum in se sororum omnium provocantes.

Nunc verò de venerandæ Sororis Benedictæ purissima & religiosissima conversatione ad utilitatem legentium pauca commemorabo. Siquidem de tenebris hujus sæculi in admirabile lumen Dei translata, atque in sanctuario Domini sanctæ hujus Congregationis locata, dignè ac strenuè usque ad exitum suum studuit Domino militare, ubi tantis virtutum charismatibus effulsit, tantaque mansuetudine & charitatis gratiâ extitit decorata, ut universam sororum multitudinem ferventissimâ conversatione sua in amorem Dei accenderet vehementer.

E 4

Ipsa

* De qua infra Cap. 21.

Ipsa quoque sanctæ hujus & à Deo benediætæ Congregationis speciali prærogativâ, nomine & re Benedicta, Suppriorissa existit multis annis, in virtutum stans culmine, neque ab homine religionis incrementa mendicare necesse habens, cùm esset tantùm unctiõne Spiritûs S. edocta. Malens tamen in tuto humilitatis consistere, perfectiores quasque Sorores sibi præposuit in exemplum, virtutes earum admirari satagens, merita earum magna & sublimia æstimare, de se potius humilia sentiens, respectu aliarum Sororum conversationem suam nullius momenti reputavit. Utinam nos desides & inertes haberemus illam humilitatem in nostris negligentis & peccatis, quam sanctæ Sorores habuere tunc in virtutibus operibusque valde miris!

Cùm igitur in omnibus Sancti Ordinis institutis & regulâ exercitata, devota & fervens existeret, placuit Domino JESU CHRISTO famulam suam magnificare miris divinis

vinis visitationibus super terram. Quadam die tempore Communionis cum solita devotione & reverentia accessit ad altare ad percipiendum Sacramentum Corporis Domini Nostri JESU CHRISTI. Quo percepto audivit de interioribus animæ suæ Dominum Nostrum JESUM CHRISTUM dicentem sibi: *Accipe me dilecta mea. Ego enim ipse verè sum DEus tuus. Esto deinceps subdita mihi ob amorem, & humilia te sub omni creatura.* Hæc verba suavissima nimisque jucunda Domini loquentis in corde illius ita aperta & sonora exstiterunt, quòd etiam corporeis ejus auribus infunderint. Post hæc à servitrice sua statim ad lectum suum reducta est. Erat enim tunc temporis valde debilis & infirma.

Coepit interea ardentissimo devotionis affectu ruminando indesinenter in corde suo revolvere verba Domini sui plena coelesti consolatione & dulciora animæ suæ super mel & favum. Porro super

verbo Domini pretiosissimo sibi que tam diligenter ab ipso commissio, scilicet: *Humilia te sub omni creatura*, plurimùm [erat] admirans, atque diu intra se anxie quærens illius significationem, donec responsum accepit à spirituali quadam Sorore dicente, quòd in *homine*, omnis creatura intelligitur, eò quòd homo commune habeat aliquid cum omni creatura.

Mirabilis & excelsus Dominus, cui pervium est omne solidum, & apertum, pertingens usque ad divisionem animæ & spiritûs, adjecit secundò hanc Sororem beatam suis mirabilibus consolari. Quadam itaque die secundùm consuetudinem Ordinis, cùm participasset corpus Domini Nostri JESU CHRISTI, valde dulciter cogitare de ineffabili cœpit dignitate & gratia hujus Sacramenti, & tota liquefacta in amorem dilecti sui, subitò mirabili modo, & sensibili persensit, quòd sanguis Domini Nostri JESU CHRISTI, quem perceperat, tanquam fluvius cum

cum impetu erumpens, per omnia membra corporis sui defluxit, per-tingens ad intima animæ suæ, ex-coxit in ea omnem scoriam vitio-
rum, efficiens vas purissimum san-ctitatis. Sicque veridicum factum est Prophetæ verbum, immò Do-
mini per eum dicentis: *Effundam su-* Ezech. 36
per vos aquam mundam, & munda-
bimini ab omnibus inquinamentis
vestris.

Denique hæc Dei famula excel-
lentiori valde adhuc charismatum
gratia ditari promeruit à Domino
Salvatore. Quodam namque tem-
pore, cum in oratione posita esset,
subitò aperti sunt intellectuales oculi
ejus, totaque extra se rapta, atque
in illam pacem, quæ exuperat
omnem sensum, duce Domino in-
troducta, quæ in præmium sempi-
ternum omnibus Sanctis, & gau-
dium sinè interpolatione & decur-
sione temporis conservatur. In tali
siquidem rapta radiofo intuitu videre
& intelligere ad horam promeruit
superessentialem luminosæ Deitatis
Trini-

Trinitatem, quam nōsse, scire & intelligere vita est procul dubio sempiterna. Verè beata anima, cui mira dignatione divinæ gratiæ parvâ morâ prægustare atque frui concessum est illis ineffabilibus bonis, quæ oculus non vidit, nec auris audivit, nec in cor hominis descenderunt, quantum quidem homini mortali, adhuc carne circumdato, possibile erat! Quis autem dignè explicare valeat, quomodo cunctis affectibus animæ suæ recreatis & renovatis, tota in amorem illius, quem viderat incanduerit? Solius dantis & accipientis nōsse est, quantis tunc divinis delectationibus tenebatur. Unde *Genes. 32.* de meritò cum Patriarcha Jacob exclamare potuit: *Vidi Dominum facie ad faciem, & salva facta est anima mea.*

Hanc visionem gloriosam nisi annis quatuordecim elapsis nulli voluit revelare. Postmodum cuidam Sorori magnæ sanctitatis, tunc temporis Priorissæ, eam secretius patefecit, asserens, quòd in illa supercoelesti

cœlesti visione tam mira & ineffabilia viderit & audierit, quæ non licet, neque fas est homini loqui. Verumtamen eundem mentis excessum pari visione ac fruitione in vita sua ter ei Dominus iteravit, tamen successivè & multo temporis intervallo. Expletis autem in Prædicatorum Ordine, Monasterio sub Tilia, multis annis, sicut sincerâ devotione vixerat, sic etiam felici defunctione carne exempta est, complevitque dies suos in bonis, & annos suos in gloria.

CAP. XI.

De Sorore Agnete de Ochsenstein felicitis memoria.

SOror Agnes de Ochsenstein, * una de primis Sororibus hujus sanctæ Congregationis, puræ ac innocentis vitæ à pueritia extitit, decus Virginitatis conservavit perpetuò illibatum. Denique in Monasterio sub Tilia

* Ochsenstein Arx in Wasgoja.

Tilia nostri Conventûs à juventute sua usque ad obitum suum religiosissimè conversata, velut singulare jubar sanctitatis emicuit. Erat enim sanctitatis exemplum, religionis forma, Clausstralis puritatis speculum, regularis observantiæ præcipua observatrix. Siquidem tanta morum honestate pollebat, tantòque divini fervoris impetu ferebatur, ut ipsam vas honoris & gratiæ fiducialiter prædicemus.

Præterea dulcis admodum & efficax sororum omnium extitit consolatrix, adeò ut omnes turbatæ quolibet de causa, ad se venientes discederent consolatæ, quibus etiam orationis suæ præsidio sæpius succurrebat. Plenum namque erat sanctissimis affectibus pectus ipsius, & ad omne commodum incommodumvè proximi piissimè movebatur, dulcibus, consolativisque sermonibus semper abundans. Equidem desiderabat æstu cordis incredibili omnes homines Christo lucrifacere. Idcirco à sanctis sedulisque admoni-

tio-

tionibus non cessavit, affectuosissimè de Deo loquens cum Sororibus, pariterque cum extraneis ad fenestram. Tenuit enim multis annis officium audiendi ad fenestram tam sanctè, tam religiosè, ut omnes illuc venientes religiosi pariterque sæculares inde discederent non modicùm ædificati. Insuper in officiis Supprioratus, aliisque hujus Monasterii pluribus & diversis, humiliter, devotè ac strenuè laboravit, & pro suæ sanctitatis reverentia totus Conventus Sororum amplectebatur eam unico charitatis affectu.

Porro in virtute abstinentiæ incomparabiliter eminebat. Erat enim in cibo & potu temperantissima: ab omni cibo delectabili tam in magnis, quàm in minimis, quod appetitum posset allicere, penè in omni vita sua abstinens, semetipsa propter nomen Domini rigidissimè castigavit. Ad hæc in mensa aliis sororibus duo pulmenta edentibus, unum sibi semper subtraxit. Panem quoque hordeaceum peraridum comedens, triticeum

riceum candidumque sibi oblatum non edebat. De pomis, nucibus aliisque fructibus his similibus vel modicum quid nunquam gustare voluit.

Profecto strictam valde & arctam vitam gessit, corpus suum innocens vigiliis, jejniis, orationibus assiduis, aliisque bonis operibus supra modum hostiliter conterens & castigans. Sanè in æstate & hyeme ante Matutinas surgere ad orationem tanto temporis spatio solita erat, quo integrum Psalterium dici potuisset. Et hæc consuetudo erat ei in omni vita sua continua, cùm esset sana vel infirma. Ad hæc Matutinarum tamen solenniis adstare semper devotâ animi vigiliantiâ consuevit, postmodum ad stratum suum nunquam vel rarissimè revertens. Perpendat itaque quælibet devota Soror, quæ hæc fortè legerit, quam parvum & tantillum noctis spatium inter hæc corpusculo suo concesserit ad pausandum.

Verum-

Verumtamen hæc sufficere minimè potuerunt æstuantì animo, ignémque divini amoris jugiter vaporanti. Aliud namque genus afflictionis his superaddidit valde grave. Præcinxit sanè carnem suam multis annis valde stricte super nudo tribus cingulis, sed diversis. Unum illorum erat ferreum totum, habens laminas ferreas valde latas, ab invicem parumper disjunctas, inter quas erant circuli ferrei inserti, habentes clavos præacutos acerrimè pungentes. Tali fuit præcincta cingulo circa pectus. Secundum autem simile catenæ, qua latera præcinxit, ferreum quoque & ipsum similiter existerat. Tertium verò funis erat valde magnus, quo renes semper præcingere consuevit: sub quibus cutis & caro post obitum suum denigrata, tanquam carbo extinctus ac tabida nobis intuentibus apparebat. Verùm ad augmentum tantarum pœnarum nocte ac die caligas portabat, pro eo, ut reor, quia Sorores in constitutionibus jubentur etiam cum caligis dormire in regionibus,

Tom. VIII. F nibus,

nibus, in quibus mulieres portare caligas consueverunt: nimirum satagens in hac causa, sicut & in aliis, Ordinis instituta perfectè & integrè observare.

Cúmque Virtutum profectibus sic succresceret in immensum, permisit tamen Dominus quadam densa caligine eam diutiùs involvi circa Sacramentum Dominici Corporis & Sanguinis Domini nostri JESU Christi, ita quòd ejusdem Sacramenti veritas minùs animæ suæ sapuit & illuxit, fidem tamen secundùm Ecclesiasticæ traditionis formam retinere satagens repugnanti sensualitati suæ jugiter reluctando. Colloquium habere de eodem divino Sacramento, aut ab aliis audire, studiosiùs evitabat, verens, ne fortè de certitudine fidei in opinionis ambiguum periculosiùs laberetur. Verùm postquam advenit tempus miserendi ejus, affuit ei pius Dominus, humilium Consolator, illuminans mentis ipsius tenebras tali modo.

Quadam die dum Missarum Solemnia

lemnia celebrarentur , aspicerétque devota nimis animi attentione in hora sacrificii Altare, subito lux de cœlo splendidissima circumfulsit sacramentissimam Eucharistiam in manibus sacerdotis. Qua visa ex tunc ab omni priori nubilo caliginis fuit protinus liberata. Mirabili profectò deinceps dulcedine pascebatur in contemplatione hujus cœlestis Mannæ Dominici Sacramenti, meditari de eo jugiter, aut loqui aut audire loquentes nimis duxit delectabile ac jucundum.

Denique huic Sorori beatæ incidit quidam hæitationis scrupulus valde gravis, non sine, ut opinor, benigna Dei ordinatione, à quo etiam *omnia diligentibus eum cooperantur in Rom. 8.*

bonum ipsius provida bonitate. Hæsitavit enim aliquanto tempore satis pertinaciter, utrum Prophetarum verba mystica instinctu S. Spiritûs, an potius ab humano spiritu fuissent prolata. Nam & hoc magis ei sapiebat, eò quòd sibi videbantur nimis obscura pariter & absurda. Porro misericors & miserator Dominus,

qui non derelinquit sperantes in se ,
misertus hujus dilectricis suæ , excu-
tiens tenebras ignorantiaë ejus , infu-
dit ei lumen gratiaë salutaris. Illa ni-
mirum quodam tempore devotissi-
mè orans subitò tota extra se facta est
per mentis excessum , atque ad agni-
tionem summæ veritatis altissimè
sublevata , datúmque sibi fuit divini-
tùs revelatis oculis purissimè con-
templari in lumine æternitatis , nòsse
& intelligere omnia sanctorum Pro-
phetarum scripta dictaque ab initio
de verbo ad verbum tam de incom-
prehensibili summæ Deitatis essentia ,
quàm de Incarnatione Domini Sal-
vatoris , paritèrque quòd iidem Pro-
phetæ sancti solùm inspirati gratiâ S.
Spiritus fuissent ad loquendum
omnia , quæ propheticè prædixe-
runt. Magnitudo hujus cœlestis vi-
sionis , & quantùm postmodum pro-
fecerit ex supernis illuminationibus ,
quibus tunc illuminata fuit mirabili-
ter à montibus æternis , irradianti-
bus in eam vehementer , sibi soli no-
tum extitit , paritèrque eidem Patri
lumi-

luminum , à quo bona procedunt omnia affluenter.

Nunc verò restat dicere, qualiter bonus Dominus Deus his, qui recto sunt corde, cujus deliciae sunt esse cum filiis hominum, hanc eandem sibi dilectam famulam, quam multis quoque gratiarum prærogativis singulariter in spe constituerat, adhuc ex excellentiori suæ largitatis munere insignivit. Tempore itaque secundum monasterii consuetudinem constituto, cum Sacramentum percepisset altaris divinissimum solita animi puritate, continuo extra se sursum rapta, omnibusque sensibus corporeis omnino consopitis per excessum mentis vidit spirituali animi visione luminosa multitudine Angelorum se circumdatam & vallatam, à quibus maximo cum honore ducebatur ad Dominum Majestatis. Qui eam protinus benigno ac sereno conspectu divinæ miserationis suæ intuens acceptavit eam nihilominus in sponsam sibi sempiternam coram adstanti multitudine Angelorum gloriosa.

riosa. Signis autem visibilibus, ut sibi videbatur, in illa supercoelesti visione subarrhata fuit ac desponsata Domino JESU Christo in hujus testimonium copulae, stabilimentumque æterni foederis & amoris. Finita fuit citius visio illa beata, sed in corde videntis finire non potuit visionis illa intima devotio, & ad Deum postmodum fiducia admiranda. Unde frequentius in Orationibus suis piâ confidentiâ ad Deum dixit: *O Domine Deus, bone JESU, reminiscere subarrhationis illius & desponsationis, quam tibi tam dignanter perpetuò subarrhasti coram Angelis tuis venerandis.* Tanto deinceps devotionis impetu in amorem dilecti sui Sponsi ferebatur, quod sibi profectò funditus desipuit, vilescébátque vita ista transitoria cum delectationibus suis, continuis desideriis cupiens dissolvi & esse cum Christo. Nec mirum: gustato enim spiritu desipit omnis caro.

Cæterum hanc divinam visionem cum cæteris superhis revelationibus, quas præmisimus, cuidam spiri-

spirituali valde & devotæ Sorori hac conditione patefecit, ut usque ad obitum suum silentio premerentur. Firmiter quoque asseruit, easdem supercœlestes visiones sibi multò clariùs excellentiùsque revelatas, quàm verbis exprimi unquam possent: quod & secundùm testimonium ejus procul dubio sic tenemus, præsertim cùm sancta conversatio ipsius talis extiterit, ut fidem dictis illius non adhibere nefas esse penitus putaremus. Tantà prorsus fidei virtutisque constantiâ hæc dilecta Deo & hominibus communita, corruptibilis carnis materiam exuit, [&] ad cœlestis Agni nuptias præparata introire promeruit, ubi se perpetuò habebit optimè in optimo. Ipsi Deo Regi Sæculorum, laus & honor sit in sæcula sempiterna, Amen.

Verùm post ejus obitum quædam honesta Soror nostri Monasterii vidit in visu noctis sepulchrum ejus patefactum, ut sibi videbatur, in quod cùm curiosè introspexisset, nihil in eo omnino conspexit nisi Cry-

Stallum valde magnam , ad corpusculi hujus defunctæ mensuram in magnitudine atque longitudine optimè conformatam. Eadem autem Crystallus præcincta fuit tribus circulis aureis argenteisque , supra claritatem Solis nimium resplendentibus, aliquantisper ab invicem disjunctis. Quæ evigilans recognovit, quòd Dominus præclara merita hujus beatæ Sororis hoc somnio voluit demonstrare.

CAP. XII.

De Sorore Gertrude de Columbaria dignæ memoriæ.

Plissimæ recordationis Soror Gertrudis de Columbaria nostri Monasterii Soror exstitit valde religiosa , & digna per omnia imitatione. Hæc itaque sanctissima Soror puræ ac innocentis vitæ tertio decimo ætatis suæ anno incepit Domino strenuè militare , portans jugum Domini suave usque ad obitum suum studio

studio indefesso. Ordinem suum integrè & perfectè cunctis diebus vitæ suæ conservare studuit, in nullo sibi condescendens. Rigorem quoque Conventûs tenens in omnibus continuè sequebatur in Choro, in Refectorio, in cibo & potu, vigiliis, jejuniis, in aliisque Ordinem atque regulam in se tenere strictissime contendebat. Insuper statuta jejunia omnia Ordinis sana pariter & infirma continuè observabat. Sanè per triginta annos carnem suam incredibili abstinence conterens & affligens carnes interim penitùs non comedit, neque saginata, nisi rarissimè, gustare voluit, licèt interea febribus valde gravibus aliisque corporis doloribus incommodissimè pluribus laboraret. Porro per hos triginta annos singulis noctibus quintæ feriæ in orationibus suis usque ad Matutinum consuevit continuè pernoctare, & nihilominus stans ad Matutinum alacriter cantans & vociferans usque ad coelum.

Denique in divinis exsequendis

erat promptissima & devota nimis, nec diebus neque noctibus requiescens. Officium incipiendi in Choro, scilicet Cantricis, multis annis strenuè ac laudabiliter administravit, tanta sedulitate mentisque sollicitudine huic divino officio intendens, aliisque omnibus, quibus intendere per obedientiam tenebatur, ut stupori, admirationique omnibus quidem esse poterat, paucis verò imitationi. Omnes quidem ad Chorum prævenire satagebat, summaque diligentia intendebat, ut Sorores omnes concorditer, altè ac solenniter Deo psallerent, sicut unicuique solennitati & tempori congruebat. Unde & ipsa voci minimè parcens assiduè cantabat, nec levem conscientia suæ jacturam reputabat, si quando raucitatis vel alicujus infirmitatis incommodo interveniente solennem psalmodiæ cantum minùs alacriter persolvisset.

Porro quotidie se ipsam disciplinis acerrimis verberabat, sedulitasque orationum suarum tanta tamque
conti-

continua fuit, quam si vellem scribere, humanum modum credulitatemque legentium fortè excedere videretur.

Cùm tantis bonorum operum, virtutumque exercitiis abundaret, placuit Domino JESU Christo hanc sibi dilectam famulam visione coelesti ac mirifica consolari. Itaque in die sancto Pentecostes, dum divinus hymnus: *Veni Creator Spiritus*, devotâ nimis instantiâ valdeque solenniter in Choro à Sororibus cantaretur, subitò huic Sorori beatæ, in cujus corde is, qui ignem venit mittere in terram, devotionis ignem accenderet vehementem, ostendit sua mirabilia. Vidit enim repentè visibiliter ignem divinum de cœlo magno cum sonitu advenientem supra sanctum Conventum Sororum Deo psallentium. Et replevit totum Chorum, ubi erant Sorores in Dei laudibus congregatæ, illuminans eas ad eò divinis splendoribus, ut omnes pariter igneæ apparerent. Radius in super cœlestis luminis singulas earum visibi-

visibiliter circumfulsit tam diu, quousque ille divinus Hymnus totus finiretur. Denique ipse Dominus Deus noster, qui ignis consumens est, in Sororibus suæ bonitatis præsentia tunc absque dubio consumpsit omnes sordes vitiorum, & corda earum efficiens receptacula munda, reddidit ea in sui amore flammantia vehementer. Siquidem amœnitas hujus cœlestis visionis tandem sublata est ab oculis intuentis, sed remansit in corde conceptæ devotionis immensa jucunditas, ita ut in recordatione hujus divinæ visionis postmodum mira semper devotione afficeretur, totaque in gaudium vertetur.

Cæterum huic Sorori sanctæ, de qua loquimur, apparuit visibiliter in Choro quædam juvenis soror hujus Monasterii, ante paucos dies defuncta, quæ officium, dum vixit, Cantricis tenuit, dono nobilissimæ vocis existens prædita. Hanc siquidem audivit corporeis auribus, atque vidit in Choro in loco sancto, in quo pecca-

peccaverat, justo quidem Dei iudicio dirissimè torqueri, ac diutissimè verberari tam graviter tamque crudeliter, quòd ex singulis flagellorum plagis deficere videbatur ac pariter interire. Cumque Soror, quæ hæc vidit, diris his animæ hujus cruciatibus medullitùs compateretur, prorrumperetque amarissimum in lamentum, per divinum oraculum instructa didicit hujus terribilis poenæ causam. Dictum enim fuit divinitus, quòd eadem defuncta Soror idcirco hæc tormenta terribilia pateretur, quia jucundæ vocis gratiam, quam à Domino acceperat, nimium parcendo vocibus, in divino officio ad communem cantum sæpius expendere neglexit. Insuper quia humanam gloriam interdum in cantu suo magis quàm Dei gloriam quæsierat, negligenter quoque ad Chorum veniens, inde verò citiùs recedere festinavit.

Hinc est nobis omni vigilantia laborandum, ut fidei sinceraque mentis intentione Domino serviamus, ne incau-

incautè in illam terribilem maledictionem Scripturæ dicentis incidamus: *Maledictus homo, qui facit opus Dei negligenter: efficiamurque in posterum exsortes præmii coelestis per vanæ gloriæ appetitum, secundum verbum Domini intonantis Matth. 6. in Evangelio: Amen dico vobis, receperunt mercedem suam.*

Sanè Soror hæc beata, cujus hactenus mentionem fecimus, ante obitum suum verbum bonum & dignum memoria de se protulit dicens: *Tria sunt, quorum executione in vita mea nunquam fui vel leviter attadiata, scilicet divino in Choro officio jugiter adstare, semper Orationibus insistere, communibus operibus sedulo inharere.* Et verè sic erat: hæc enim procul dubio vitâ & moribus evidentiùs comprobavit.

Cæterùm in Officiis plurimis hujus Monasterii utiliter atque laudabiliter usque ad ultimum vitæ suæ senium laboravit. Ad ultimum verò injunctum sibi fuit officium Circatricis, quod religiosè ac strenuè administrava-

nistravit corripiendo, admonendo opportunè, importunè, Zelo Dei viriliter insurgens contra omnes Sororum negligentias transgressionésque Regulæ & Constitutionum, murum pro Domo Domini se opponere non piguit. Igitur nec timore nec amore Sororibus in transgressionibus suis, etiam minimis, pepercit, sed eas in Capitulo continuò admonens viginti Sorores interdum uno in Capitulo satis asperè accusavit. Ergo instituta Ordinis & Regulæ in diebus illis optimè custodiebantur. Tandem beata hæc Soror & sancta, cujus memoria in benedictione est, pretiosam soluta in mortem spiritum Deo reddidit, accipiens coronam justitiæ à Domino JESU Christo, qui vivit & regnat Deus in sæcula sempiterna Amen.

Quædam de sororibus nostris juvencula fuerat aliquando pro suis excessibus accusata in Capitulo & punita. Unde tristis effecta post finem Capituli in Chorum continuò intravit, prosterneus se ibidem in orationem.

nem. Et leniter obdormiens vidit per somnium amitam suam, nuper defunctam, ad se venientem, cappô & velo amictam, quæ candelam etiam accensam filumque cannabinum in manibus gestabat, coepitque filum, quod in manibus tenebat, accendere cum candela, dicens juveni forori: *Suspice & vide.* Illa elevatis oculis vidit, quòd filum admotum lumini mox in favillam & cinerem solvebatur. Et ita defuncta soror actitabat, donec filum totum à lumine consumeretur, juvencula illa vidente pariter & inspiciente. Et iterum dixit illi: *Sic, sic à facie ignis correctionisque Capituli omnis culpa transgressionis coram oculis Domini consumitur & deletur, quemadmodum filum à lumine incensum protinus in nihilum est redactum. Quocirca noli de cætero contristari, cum accusaris pro excessibus tuis in Capitulo, atque puniris.* His dictis continuo recessit ab ea. Illa autem statim plenè à somno evigilans apertis oculis vidit manifestè amitam suam defunctam

Etiam ad recedendum iter suum dirigentem. Quam recedentem sequi ipsa juvencula velociter nitebatur: sed illa defuncta soror mox coram oculis videntis hæc disparuit, ut eam ulterius non videret.

CAP. XIII.

De religiosa conversatione sanctæ memoriæ sororis Tudæ de Egensheim.

Optimum & congruum æstimamus sanctæ recordationis sororem, nomine Tudam, dictam de Egensheim, tradere memoriæ posterorum. Hæc teneris sub annis incepit Christo Domino devotissimè in isto Monasterio deservire, vitæ & moribus decentissimè decorata. Rigidam & arduam vitam gessit, multis jejuniis, vigiliis, orationibusque sedulis & devotis castigans corpus suum spiritui servire cogebat. Hæc namque ita circumci-

sa & temperans erat in his, quæ ad usum corporis pertinere videbantur, ut omni voluptate ac vanitate depulsa ipsis quoque necessariis parcissimè uteretur. Hanc in choro orantem circa horam Primæ terrere diabolus nitebatur. Apparuit enim sibi visibiliter in specie porcæ, quam parvuli porcelli tanquam matrem suam, chorum intrantem, velociter sequebantur. Illa autem sus cum porcellis suis sancto Altari continuò appropians ibi tanquam in volutabro suo diutiùs est volutata, porcelli autem lac ipsius cœperunt fugere inhianter. Postea per gradus descendens venit ad lampadem accensam in medio chori, faciebatque ibi similia coram eadem sorore plurimùm admirante, quomodo sus cum tot porcellis nimirum ante Primam claustrum intrare potuerit. Ad se autem rediens recognovit, hoc esse immundi spiritûs figmentum, subitoque inhorruerunt capilli capitis ejus, & signo Crucis appposito machinamentum illud diabolicum per

per chori testudinem tanquam pennigerum animal cum porcellis evolavit, post se foetorem horribilem derelinquens.

Sanè inter plurima bonorum operum exercitia, quibus placere soli Domino cupiebat, eximios Ecclesiarum omnium Doctores, videlicet S. Petrum Apostolum, ac B. Paulum Coapostolum ejus speciales sibi elegerat in Patronos, quos in vita sua valde dulciter diligens, venerationis & devotionis eis obsequia sedulò exhibebat. Cui vigilantibus & oranti visibiliter apparuerunt vultu & habitu nimium gloriosi, in ea tamen constitutione & habitudine corporum, quâ ante, dum viverent, extiterunt, sicut pictura imaginum eorum edocet manifestè. Quam blando quoque sermone alloquuntur dicentes : *Noveris nos esse Domini Apostolos, quos sincere hætenus dilexisti, devotis orationibus tuis sedulò interpellans, missos à Domino, ut petitionem, quam volueris, insinues.* Ad quos illa, ex claritate tamen vul-

tûs eorum non modicùm stupefacta, ait: Domini Charissimi, si inveni gratiam in oculis vestris, primum peto, ut salva fiam, & ut post mortem meam vestris meritis sanctissimis & precibus à pœnis citius absoluta gaudiis perfrui merear sempiternis, pariterque quod per mortis exitum hinc non recedam ante obitum matris meae, cujus quoque beatam memoriam superiùs præmisimus, quæ hujus etiam Monasterii extitit soror nomine Benedicta de Egensheim, ante mortem suam jacens paralytica tempore valde longo. Ad hæc sancti Dei clementer protinus dixerunt: Scias sine dubio, quòd petitionum tuarum effectum nobis intervenientibus à Domino consequeris & de præsentì vita post defunctionem Matris tuæ te citius migraturam. Quibus promissis gratissimis & jucundis, per egregios Dei Apostolos acceptis, tanta jucunditatis affluentia perfusa est, quòd præ imensitate lætitiæ se ipsam capere vix posset.

Huic

Huic multas alias Dominus consolationes in abscondito faciebat. Sed quoniam verecunda nimis & humilis erat, voluit eas minimè revelare.

Ad ultimum verò in conversatione optima vitam præsentem finivit ærumnosam, laboris sui præmium coelestis regni gaudium à Domino perceptura secundum fidelem promissionem Beatorum Apostolorum, qui eam de salute sua æterna certam reddiderant, ac de celeri post obitum suum poenarum solutione, sicut præmisimus, pariterque quòd post matris suæ transitum foret de præsentis sæculo citiùs transitura. Nam ultra tricesimum diem obitus matris suæ per paucos dies supervivens migravit ad Dominum JESUM Christum, qui est benedictus in sæcula.

Amen.

CAP. XIV.

*De vita laudabili Beatæ
sororis Hedvigis de Stein-
bach.*

Religiosam & Deo devotam sororem nomine Hedwigem, dictam de Steinbach * præterire silentio non debemus. Hæc in Cœnobio, cognomento Steinbach Ordinis S. Benedicti ab annis puerilibus enutrita, postmodum autem ad nostrum Monasterium in principio fundationis ejusdem Monasterii nostri translata, multum in nobis laboravit, tradens nobis primùm scientiam sacrarum scripturarum, in cantu quoque divini officii diligentius nos instruxit. Angelicæ puritatis ac innocentiae extitit, admodum corpori suo dura. Rigidam profectò & arduam

* Steinbach seu Schœnensteinbach in superiori Alsatia propè Ensisheimium olim Ord. Cisterc. hodie Prædicatorum.

duam vitam gessit , continuis vigiliis , cæterisque abstinentiæ laboribus sedulisque orationibus attenuatum corpus suum divinis operibus mortificans & castigans : ideoque ad omne opus bonum promptissimum illud habuit & devotum. Quæ dum ad decrepitam ætatem pervenisset, viribusque corporis esset destituta, ut jam baculo sustentante vix incedere posset, nec tamen otio indulgere voluit , aut quietem aliquam suo corpori commodare. Chorum enim frequentavit sicut juniores sorores , continuis solitisque orationibus vacans, in quibus devoto nimis corde stare baculo sustentata diutissimè consuevit.

Porro pro peccatis suis nimium dolens, indiscreta quasi formidine plurimum torquebatur , graviter se peccasse clamitans, cùm tamen assentione suorum confessoriorum nullius lethalis criminis unquam sumpsisset contagium. A matris enim utero in ævum baptismi gratiam illæsam magno Dei munere

conservavit, retinens innocentiam munditiamque hominis utriusque. Denique cuidam sorori secretiùs fatebatur maximum peccatum suum, quodque graviùs omnibus excessibus suis iudicavit, videlicet, quòd stimulis invidiæ pulsata rancorem tacitè in corde aliquantulum tenuisset contra quandam suarum sororum, eò quòd ad divinum officium in Choro solebat eam frequentiùs prævenire.

Hinc ergo apertè colligitur innocentiae ipsius puritatisque mirae simplicitas, pariterque indefessae erga Deum vehemens devotio charitatis.

Sanè Deus omnis gratiae & totius consolationis ante obitum suum multo tempore dignatus est eam magnificè consolari prædicens ei ex hoc mundo tempus sui transitus. Cujus quoque benignissimâ indulgentiâ peccatorum suorum remissionem accipere promeruit, insuper admirabili suâ dignationis gratiâ clementer sibi promittens, quòd mole carnis

nis deposita , mox spiritus ad regna
sydereæ absque molestia evolarer.

His igitur divinis consolationi-
bus ac revelationibus ineffabiliter ro-
borata , omnique pristina trepidatio-
ne summotâ coepit indefinenter in
benedictionibus Domini exultare, ita
quòd ex sententia dicere posset, *se-
cundùm multitudinem dolorum meo-
rum in corde meo consolationes tue
centupliciter latificaverunt animam* Psal. 93.
meam. Igitur in extremis posita in
jubilum cordis & spiritûs exultatio-
nem prorupit dicens : *securam &
certam spem meæ æternæ felicitatis ha-
beo repositam in sinu meo ab eo , qui
mihi pignus spiritûs dedit.* Grandis
in morte fiducia justam & sanctam
eam proloquitur. Nam sicut fide-
liter vixit , sic nimirum feliciter
obiit plena dierum & virtutum, mi-
gravitque ad Dominum JESUM
Christum , qui est fons bonorum
omnium & origo. Ipsi laus & gloria
in sæcula sempiterna. Amen.

CAP. XV.

De ferventissima conversatione bonæ memoriæ sororis Mechtildis de Wincenheim.

Dirigatur nunc sermonis nostri intentio ad prædulcis memoriæ sororem nomine Mechtildem, dictam de Wincenheim *, quatenus exemplis ipsius eximiæ sanctitatis nostra ad amorem Dei devotio ampliùs accendatur, cujus rei causâ pauca de pluribus, exempli gratiâ enarrabo.

Hæc sanè bonorum memoriâ digna à primævo ætatis suæ flore usque ad obitum suum in sancta congregatione Monasterii sub Tilia Domino sincerissimè deservivit. Tantâ quoque virtutum omnium gratiâ radiavit, ut in omni vitæ sanctimonia mirabilis appareret, etiam perfectis

* Wincenheim est pagus Alsatia.

Etis quibusque. Carnem afflixit jugiter in labore multiplici, ordinem & regulam conservans integrè & perfectè, quantum à gravi corporis molestia & languore, quo & frequentius laborabat, sibi poterat extorquere, silentium quoque strictissimè tenuit secundum institutionem Patris sui Dominici, neque in omni vita sua unquam silentium fregit. Cum autem quadam vice finitis Matutinis æstivo tempore vidisset auroram diei illucescere, dixit sororibus: *Ecce dies!* Et quod tantum contra distractionem sui silentii protulerat, poenituit deinceps semper & doluit vehementer.

Denique otiosa & vana seu detractoria verba omnino evitabat, nec facilè cuiquam loquebatur, nisi necessaria ex causa & perutili. Verùm frugalitati & parcitati in tantum operam dedit, ut ipsis cibis, sibi in mensa oblatis, parcissimè uteretur, certam mensuram & permodicam singulis diebus sibi faciens, supra quam ulterius non edebat.

Nem-

Nempe oratio ejus supra modum fuit fervida, continua & devota. In diebus autem Dominicis & festivis in Choro orationi continuæ se dedit, habens faciem velatam, nec inde recessit propter asperrimum hyemis algorem, aut æstatis seu Solis nimium fervorem, sed sic fixa sine omni moru tanto temporis spatio permanebat. Contemplationis enim pennis rapta Dei flamine ad sublimia evolavit. Cui etiam Dominus revelare dignatus est magna atque multa de secretis cœlestibus, innumerisque consolationibus seu mente excedendo eam creberrimè visitabat, quæ si omnia literis mandarentur, magni voluminis comprehenderent quantitatem. Unum ex eis saltem simpliciter enarrabo, quod tale ac tantum est, ut ex hoc uno à piis mentibus cætera credi vel æstimari facile queant.

Apparuit sibi visibiliter vigilanti & oranti ille speciosus formâ præ filiis hominum, Dominus JESUS Christus, Verbum Patris, Filius Altissimi,

simi , in specie parvuli pueri circa altare diutius discurrens , ludendo cum duobus pomulis coram illa. Verùm ipsa tanto mentis fastigio in divinis contemplationibus suspensa, tantoque cœlestium consolationum nectare inebriata erat, quòd huic nimis gloriosæ apparitioni, foris apparenti, parùm ultra intendere poterat, seu illâ delectari aut magnopere jucundari. Porro quis dignè effari valeat aut æstimare gaudium & lætitiâ cordis ejus, cùm de torrente voluntatis æternæ interioribus animæ ipsius tot gratiarum stillicidia influxerunt, cerneretque oculis beatis humanitatem sanctissimam Christi JESU, in quem desiderant Angeli prospicere?

Cæterùm & duobus fratribus suis carnalibus, timore Dei postposito, rapinis, homicidiis, cæterisque nefandis operibus pertinaciter insistentibus, cùm essent positi in extremis, ardentissimo devotionis affectu Dominum diutiùs implorabat, ut verâ cordis contritione & pœnitentiâ ab
im-

impietatibus suis converſi perpetuam damnationem , jamjamque imminentem ſibi , evadere poſſent divinæ clementiâ bonitatis. Cujus Dominus preces & lachrymas benigniùs exaudivit, revelans ſibi vigilantibus am-
bos fratres ſuos propter orationum ſuarum instantiam conſecuturos miſericordiam ſempiternam. Poſt mortem verò illorum ab orationibus & lachrymis non ceſſavit , donec benigniſſimam Dei clementiam poenarumque ſolutionem eis à Domino impetravit, ipſo hoc ei in ſpiritu revelante. Unde cùm pro uno illorum poſt obitum ipſius attentis precibus Domino ſupplicaret, apparuit ei viſibiliter diabolus , vultu terribilis , portans eundem fratrem ſuum ſuper humeros , minaciterque fremens adverſus eam , dicens : infeliciffima ! ut quid in tantum ſolicita es pro iſto nequam & deteſtando peccatore ? Projiciens eum cum ira ſuper eam, ſicque abſceſſit. Illa autem magnæ molis ſuper ſe cadentis ruinam apertiffimè ſentiens cognovit

vit in hoc, eum à vinculis fore dæmonis liberatum. Hinc liquidò perpendere possumus, quantæ fuerit efficaciam virtutisque ejus oratio, quæ talem tantamque gratiam sceleratis peccatoribus potuit obtinere, ad quam ob enormitatem scelerum aliàs minimè valuissent de profunda mortis voragine respirare.

Hanc quoque quædam Soror valde devota de nostris Sororibus vidit à terra altitudine unius cubiti in sublime diutiùs sublevari, corpus terrenum & grave sursum spiritu devotionis & gratiæ attollente. Tandem educta est anima illa beata de valle præsentis miseriæ, introivitque in potentias Domini sui lætabunda, coelestibus ineffabilibusque bonis, quæ hìc horis momentaneis prægustare promeruit, perpetuò revelata facie fruitura.

CAP. XVI.

*De odoris mira fragran-
in obitu bonæ memoriæ Sororis
Stephania de Phirreto.*

Felicio memoriae Soror, nomi-
ne Stephania, dicta de Phirre-
to*, alto sanguine extitit gene-
rata. Fuit enim filia Friderici quon-
dam Comitis illustrissimi Phirreto-
rum, forma miræ pulchritudinis de-
corata. Quam cum parentes ejus
intenderent matrimonio copulare,
rogavit B. Virginem MARIAM at-
tentis precibus & devotis, offerens
sibi quotidie per annum CL: Ave
MARIA stando, genuflexiones at-
que venias faciendo, ut ipsa benigna
consolatrix omnium, aliquam sibi
notabilem corporis deformitatem
induceret, seu epilepticam eam fa-
ceret aut amentem, quatenus per
hæc inhabilis connubio inutilisque effe-

* Hodie Phirt. Estque Comitatus Songoja.

effecta, virginitatem suam Domino conservaret perpetuò illibatam. Hæc referre per ordinem solita erat. Porro piissima Dei Genitrix exaudivit preces ejus, cœpitque protinus mirabili corporis molestiâ in annis puellaribus ægrotare, perdens rationem, quam in vita sua minimè recuperare potuit, etiam multis adhibitis medicamentis. Quapropter parentes ipsius tradiderunt eam ad serviendum Christo Domino Creatori in Monasterio sub Tilia sub disciplina regulari. In quo per quinquaginta ferè vivens annos, tantis calamitatibus & miseriis continuis eidem corporis incommodo subjacebat, quòd nec unius diei spatio in his per omne tempus vitæ suæ habere potuit sublevamen. Unde meritò dicere potuit cum Propheta: *Defecit in dolore vita mea & anni mei in gemitibus.* Ps. 30.

Educta est tandem anima illa beata de conflatorio hujusmodi purgationis & miseriæ, velut aurum igne probatum munda & nitida, cum cæteris misericordiæ vasis translata est

ad palatium summi Regis. Scilicet multiplicis laboris & æumnæ ipsius erat remuneratio penes Deum sibi reposita copiosa. Nempe quàm pretiosa & dilecta sibi fuerit beata hujus Sororis anima, per odoris suavissimi fragrantiam Dominus ostendere dignatus est cuidam dignæ Sorori, accessionibus febrium graviter laboranti, in illa hora, quando tabula defunctorum in ipsius exitu pulsata est. Tanta siquidem dulcedine jucundi odoris, superantis, ut sibi videbatur, fragrantiam pigmentorum, in illa hora perfusa fuit, quòd viribus corporis & salute reparatis de sudore febrium consurrexit, persolvens totum officium tam nocturnum quàm diurnum defunctionis ejusdem devotâ valde animi instantiâ diligenter.

CAP.

CAP. XVII.

De felicissima Sorore Helvvige de Wigenheim.

Venerandæ & gloriosæ memoria Soror nomine Helvvigis, dicta de Wigenheim, monasterii nostri quondam Suppriorissa extitit, & postea Priorissa. Hæc revera beata & sancta quasi stella coruscans radiosa, in templo Dei hujus sanctæ Congregationis vita & moribus mirabiliter sic refulsit, ut odore virtutum omne respergeret monasterium abundanter. Florida conversatione redolens suavissimè velut rosa Paradisi vernantissima, de omni honestatis & Religionis observantia curam nimis habuit studiosam. Tantâ quoque constantiâ indeclinabilis intentionis limites regularis observantiæ conservavit, quòd nec minima de his visa aliquando fuerit negligenter præterire, sed Ordinis, se-

cundum instituta Patris sui Domini-
ci perfecta & præcipua extitit conser-
vatrix. Porro vigilandi & orandi
erat ei creberrima consuetudo. Hinc
multas animæ consolationes, multas-
que supernas visitationes accipere
promeruit à Deo salutari suo. Nem-
pe oratio ejus fuit nimium fervida &
accepta in conspectu Domini, quam
sine intermissione Deo obtulit, in
quam omnem spem suam contulit,
per quam gratiarum abundantiam
& misericordiam à divina clementia
facile impetravit. Verum hujus vi-
tæ sanctitas tanta ac talis extitit, quòd
omnem oris mei excedit facundiam
& sermonem. Idcirco de ipsius in-
enarrabilibus virtutibus malo humili-
ter tacere, quàm insufficienter am-
plius enarrare.

Redit tamen nunc ad mentem
magnæ sanctitatis beatæ Sororis hu-
jus quoddam miraculum, quod per
manum ejus, dum adhuc vixit, di-
gnatus est Dominus operari. Quo-
dam siquidem tempore infinita mu-
scarum multitudo, tanquam exa-
men

men apum, fortè propter recentem Chori testudinem, congregata eadem super altare testudini firmiter inhæsit, quòd inde avelli omnino non potuit vel fugari. Quo viso Soror beata, de qua loquimur, pro tali inconvenientia tam sacri loci doluit vehementer, timens, ne in Missarum solemniiis, ibidem celebrandis, ex fortuito earundem deorsum muscarum lapsu in calicem detrimentum & gravamen contingeret magnum valde. Quæ super his devotius Dominum exorans, sensit protinus quandam divinam virtutem menti ipsius cœlitus infundi, scilicet miraculum operandi. Nec distulit, sed mox signo crucis opposito, exemplò fugavit easdem in nomine & virtute Domini nostri JESU Christi, ita quòd ulteriùs minimè redierint. Non igitur mirandum super hujusmodi miraculi tam cito exitu & profectu. Nescit enim tarda molimina Sancti Spiritus gratia.

Tandem hæc Deo dilecta Soror in omni vitæ sanctimonia consum-

mata, virtutibus quoque in habitum sibi versis, quod nimirum esse constat multò fulgentius, magnificentiusque ipsis miraculis & prodigiis, speciosam resoluta in mortem, spiritum reddidit Deo Patri ad regna introiens gaudiosa. Amen.

CAP. XVIII.

De laudabili vita & obitu Sororis de Gundelsheim, Mona- sterii sub Tilia Priorissæ.

O Suavem mihi locum, ubi memorandi scribendique ex ratione deducti usque huc Ordinis facultas se contulit suavissimi odoris Sororem, Hedwigem loquor dictam de Gundelsheim*, Priorissam, piam matrem nostram, virtutis speculum, honestatis Religionisque formam perfectissimam. Nempe super candelabrum regiminis hujus sanctæ Congregationis per septendecim

* Gundelsheim pagus Alsatia.

cim annos continuos constituta, tanta morum honestate pollebat, tantoque divini fervoris impetu ferebatur, ut ipsam esse vas honoris & gratiæ, vas ornatum omni lapide pretioso verissimè attestemur. Denique in officiis Supprioratûs aliisque pluribus & diversis nostri Monasterii ita pacificè ac strenuè laboravit, quòd ipsius administratio in talibus & dispensatio complacuit Sororibus universis.

Verùm quantos & quales triumphos reportaverit gloriosos pro Virginitate & castitate, in Seculo viriliter decertando, divina sibi gratia mirabiliter opitulante, brevi sermone perstringere attentabo. Sanè divina providentia hanc beatam de spinis illecebrarum sæcularium sic extraxit. Fuit in villa Gundelsheim juxta Rubiacum, oppidum Alsatiæ, quidam paterfamilias, rebus, familia & progenie satis celebris & famosus. Hic eandem filiam suam, quam specialiter præ aliis suis liberis diligebat, cùm ad annos nubiles pervenisset, cuidam

sibi pari secundum morem sæcularium desponsavit. Cùm igitur tempus nuptiarum advenisset, congregatis ex utraque parte, sponsi videlicet & sponsæ, parentibus & cognatis, producta fuit memorata puella in medium, ipsius sponso coram adstante. Quæ requisita, utrum cum hoc in matrimonium consentiret, respondit, se nullatenus consentire, adjiciens, quòd nec huic, nec alicui alii vellet aliquatenus maritali copula sociari. Allatus quoque fuit secundum morem gladius, super quem posito utriusque pollice, sponsi videlicet & sponsæ, conjugalis sponsio firmaretur. Ipsa verò manu in pugnum convolutâ pollicem sic inclusit, ut à nullo etiam per vim excludi valuisset. Dicentibus autem quibusdam: quòd tota ipsius manus gladio superponeretur, in tantum restitit, quòd nullius viri viribus poterat è sinu extrahi vel evelli. Tunc indignati parentes cœperunt latera ipsius pungere, maxillas ejus alapis cedere, os pugnistundere, per crines

nes trahere, vestes laniare, dicentes eam fascinatam, ut non valeret aliter respondere. Acervus etiam spinarum ibidem congestus erat, in quem per capillos projecta ipsarum punctationibus cruentabatur.

Parentibus itaque tam immaniter in eam furentibus, nihil aliud poterat ab ea extorqueri, quàm Virginitatis votum, quod fecerat, immobiliter se velle servare, & potius mortem subire, etiam crudelissimam, quàm decus amittere virginale. Animadvertens autem sponsus Virginem tam firmiter in suo proposito persistere, compassus, quòd tam dirè torquebatur, renuntiavit conditionibus, super contractu matrimonii condictis. Et sic, qui convenerant, ad propria rediére.

Verùm patruus puellæ expetivit à patre eam sibi committi, si fortè ipsam blanditiis aut minis, sive cruciatibus ad consentiendum inducere valuisset. Acceptam igitur per transversum equo imposuit, sicut saccus ad molendinum fertur, & sic ferè

per quartam partem miliaris supra dorsum ejus fabricando, & latera ejus tundendo, ita quòd propter tunsiones assiduas, sanguis per os & nares virginis efflueret in immensum, ad domum suam ipsam perduxit funestus parricida. Cumque ad domum pervenisset, insatiabilis homicida, patruus ille, timore Dei postposito, consanguineæ immemor affectionis, ad perticam, quæ ad appendendas vestes seu mensalia ordinata erat, teneram illam puellam per digitos suspendit, donec sanguis per ungues ipsius erumperet, qui etiam ungues ad exitum vitæ suæ deformes atque despicabiles in testimonium talis suspendii permanserunt. Virgo tamen nihil horum curans, constans in proposito suo firmiter permanebat. Ac si diceret: *Suspendium elegit anima mea*, ut Christum lucrifaciam.

Denique jubet eam retrudi in haram porcorum, ut in illo squalore & foetore post tantos cruciatus pernoctaret. Ubi dum ancilla ipsius miser-

miserta inferebat lectum occultè, tamen illa Dei famula lectum non curans, flexis genibus inter porcorum stercora ab oratione, tota nocte per-vigil, non cessabat: quod ancilla mane factò ipsam ante lectum repe-riens, nullumque sui accubitûs in-dicium in lecto sentiens, cum admi-ratione non parva est protestata. Ex-tracta autem de hara gravibus tunfio-nibus attrita, foedis putoribus reple-ta, cœpit languescere, & usque ad desperationem vitæ graviter ægrota-re. Expavit homo, homo inhu-manus, homo truculentus, homo bestialis, cor habens ferinum, quip-pe cujus actus sæviores fuerunt fero-cibus bestiis, cùm illæ sibi simile di-ligant, iste verò sanguinis sui prodi-gus, suam neptem usque ad sangui-nis effusionem non timuit impiè cruciare.

Verùm languor invaluit: ille par-ricidam se fieri existimavit. Vocavit Confessarios, casum exposuit, emen-dam exhibuit, quæsit consilium, qualiter sibi & puellæ posset in tali pe-riculo

riculo providere. Vocati veniunt, parricidas asserunt, qui in puellam tam immaniter sævierunt, dignos eos poenitentia publica judicantes. Insuper tale dederunt consilium, quòd si puella periculum mortis evaderet, & sanitatem pristinam recuperaret, eam ad Religionem promoverent, cùm experti comperissent, eam nec minis nec blanditiis nec cruciatibus flecti posse, ut in matrimonialem copulam consentiret.

Consilium placuit, restitutam sanitati in Monasterio Sororum sub Tilia Columbariensis oppidi, fama & religione præcipuo, locaverunt. Ubi moribus & vita junioribus, paribus & senioribus in Conventu Sororibus ita placere studuit, ut bonis & religiosis moribus ejus omnes & singulæ congauderent. Maturitatem enim joco sic temperare novit, sic jocos seriò depingere, ut nec in maturitate severitas, nec in serio asperitas, nec in joco levitas appareret. Quamobrem ad officia sive obedientias Ordinis habilis existens, ita singula

gula solerti diligentia disposuit ordinatè , ut conversatione gratissimâ omnibus complaceret.

Tempore Prioratûs ejusdem beatissimæ Sororis defecerat quadam vice pecunia monasterio, ita quòd pretium non habebat pro conducendis messoribus in diebus messium , neque quò frumentum in horreum congregaret. Hinc ergo plurimùm conturbata , sedens in medio Sororum , lachrymis plena , prædictæ pecuniæ inopiam conquerebatur. Cujus moestitiam Sorores consolari cupientes dicebant: *Charissima Priorissa , nolite flere : Deus non derelinquet nos , sed nobis necessaria citius providebit.* Sanè sequenti nocte apparuit visibiliter sanctissimus Joannes Baptista Domini , singularis hujus monasterii Patronus , cuidam viro honesto , residenti in villa juxta oppidum Columbariense , Sororibus incognito & ignoto , vocansque illum nomine suo dixit: *Dormis , an vigilas ?* Tunc homo ille: *Non dormio , Domine mi , inquit , sed vigilo.* Et iterum
San-

Sanctus ait illi : *Pecuniam, quam habes in sacculo illo, cras mane pergens Columbariam dabis Priorissæ Monasterii, quod dicitur sub Tilia. Ipsa namque valde opus habet pecuniâ. Vir autem ille interrogans ait: Quis es Domine, & quod est nomen tuum?* Tunc Sanctus: *Ego sum, inquit, Joannes Baptista, Patronus illius Monasterii & defensor.* Mane autem facto venit homo ille cum pecunia, quindecim ferè libras valenti. Vocatâ Priorissâ ad fenestram, eandem ei pecuniam, ut S. Joannes jusserat, præsentavit. Priorissa autem acceptâ pecuniâ ingenti gaudio exultans requisivit dicens: *Amice unde habemus hanc pecuniam, aut quali intentione eam nobis dedisti?* Cui ille respondit: *Pro amore Dei & honore S. Joannis Baptiste hanc vobis pecuniam ministravi.* Itaque exorsus homo ille cœpit Priorissæ & Sororibus prædictæ visionis seriem per ordinem enarrare, effectus deinceps familiaris eis specialisque amicus.

Missi fuerant aliquando ad nostras

stras partes à Domino Apostolico legati pro decimis colligendis, quæ à nobis similiter, quemadmodum à cæteris Religiosis, possessiones habentibus, valde importunæ exigebantur à prædictarum collectoribus decimarum. Cujus rei causâ misimus literas ad curiam deprecatorias per Fratres Prædicatores, supplicantes remissionem solutionis decimæ supradictæ. Inter hæc verò soror quædam devota hujus Monasterii in Festo decollationis S. Joannis Baptistæ, nostri Patroni, pro eadem causa Domini misericordiam devotissimè imploravit, invocans etiam suppliciter ejusdem Sancti merita gloriosa. In ipsa autem ejusdem solennitatis nocte prædictæ Sorori, circa auro-ram aliquantulum soporata, videbatur, quòd idem Beatissimus Joannes Baptista Domini Chorum Sororum intraret, Hospitaliorum Fratrum habitu indutus, plaudens manibus, & dixit: *Boni rumores, sorores, boni rumores: ego vobis in curia obtinui plenam de dandis decimis remissionem.*

Nam

Nam Dominus Papa meis intervenientibus precibus vos ab isto gravamine supportavit. Quo dicto statim Sanctus recessit, & ipsa plenè vigilans invenit se plurimùm consolatam. Planè juxta verbum Sancti, sicut in visione isti Sorori prædixerat, totum est adimpletum. Nuntii namque ad curiam destinati non multò post cum gaudio repedabant, referentes causam nostram in Festo prædicto Decollationis S. Joannis Baptistæ fore prosperè expeditam, indulto insuper privilegio nobis ab eodem Domino Apostolico, ne causa consimili ulterius gravaremur.

Cæterùm Beata Soror Hedwigis annis XLII. & diebus quinque laudabiliter in ordine consummatis, post Epiphaniam Domini, tertio die, de hujus vitæ medio sublata non sine magno dolore gemituque Sororum & suspiriis migravit ad gaudia sempiterna.

Porro Confessarius ejus generalis F. Burchardus, graciosus Prædicator, strenuus & devotus, corpus ejus cum
ma-

magna devotione omnium ibidem
præsentium sepulturæ tradidit, atque
hos versus dictavit, qui ipsius quo-
que sarcophago sunt insculpti:

*Moribus ornata jacet hic Soror intum-
mulata.*

*Istud Prælata claustrum rexit bene
grata,*

*Est augmentata sub ea res, laus cu-
mulata.*

Epistola P. Burchardi Do-
minicani, nomine Conven-
tûs Sororum sub Tilia ad
R. P. Provincialem Conra-
dum Eßlingensem scripta,
quam visum est hic loci in-
ferere, quippe ad comenda-
tionem Sororis Hedvvigis
non parùm facientem.

Reverendo Patri Priori Provinciali Conventus filiarum suarum Monasterii sub Tilia affectum filialis reverentia cum debita & devota obedientia.

Molestissimis visceribus gemitibusque continuis vobis, piissime Pater, flebiliter nuntiamus, Sororem Heduvigem, speculum virtutum, zelatricem Religionis, piam Matrem, nostram Priorissam, post exactos laudabiliter in Ordine quadraginta duos annos & dies quinque, feriâ quartâ, Epiphaniam Domini proximè insequenti, obiisse. Cujus subtractio dolorem acerbi vulneris nobis inflixit: quia nunc probo dolor! regimine & solatio amatricis sanctæ Religionis, & conservatricis atq; auctricis mutua pacis orbata sumus. Laudabile meritum virtutum ipsius & beati ex hoc Mundo transitus multis devotionis indicis comprobatum est. Unde cum Dei dispensatione immensa cordis tristitia repleta simus (quanquam ejus gratiâ potius gauderemus, si magnitudo doloris id rationi permitteret) ad vestram
pieta-

pietatem solatii causâ confugimus, bonaq; fiducia obnixè vos ex fundo cordis nostri rogamus, ut animam illius vobis habeatis commendatam, Fratrumq; & Sororum Ordinis nostri precibus eam serio commendetis. Ad quod provida & fervens charitas vestra ed magis incitari debet, quandoquidem hac devota Ordinis alumna velut altera Martha extitit, pro virili sua fideliter seduloq; omnibus nostris undecunq; adventantibus Fratribus, præsertim novæ plantationi Fratrum nostrorum Colmaria inserviens. Eja hoc amantissime Pater, cor vestrum intimè moveat, quod paulo ante obitum exhilarata dixit: Confido in misericordia Salvatoris, Dominum Deum brevem rationem mecum positurum, nec diu post separationem animæ meæ à corpore dulcissimi vultûs sui claritatem mihi negaturum, si Pater Provincialis & alii strenui & fideles milites Christi, Ordinis nostri Fratres, meritis & orationibus suis mihi ante districtum judicem in trutina meritorum meorum subsidio

fuerint. O si vidissetis gratiosos ejus integris decem diebus, quibus decubuit, gestus & mores, externis mira devotionis argumentis liquidò purissimos interioris ipsius hominis affectus demonstrantes! Utinam audissetis maternas & saluberrimas illas exhortationes, quas loco fidelissimi Testamenti meditandas & perficiendas reliquit Fratribus nostris Colmaria, nostrisq; tam senioribus, quàm junioribus sororibus & etiam Fratribus laicis, singulis pro statu suo! Quae omnia nunc nobis, prohi dolor! subtracta sunt. Nostri autem tam acerbi doloris efficacissimum remedium hoc unum nobisq; gratissimum est, ut ejusdem vestrae in Christo filiae animam pia vestra vestrorumq; devotione apud Dominum juvetis (quod de vobis planè persuasum habemus) ut hac ratione, si quid mediæ vel impedimenti adhuc inter ipsam & Deum intercedat, citò tollatur, & ipsa ceu una & verè electa ex sapientissimarum Virginum numero ardenti lampade, oleoq; parato convenienter instructa, in potentias Domini amabilissimi

lissimi Sponsi sui, hoc est, preparatas Beatorum mansiones, ubi unum erit ovile & unus pastor, introire mereatur. Amen.

CAP. XIX.

De quadam nostri Monasterii Sorore nomine Hedvige, cognomento de Logelnheim, cui mirabilem consolationis gratiam Dominus indulsit revelando sibi secreta cœlestia, in cujus quoq; exitu latificare Dominus dignatus est Sorores tunc presentes per odoris insueti fragrantiam.

Venerabilis & laude digna Congregationis nostræ Soror Hedwigis, cognomento de Logelnheim *, ab ipsis infantia rudimentis divinis obsequiis, mancipata, mox perfectionis viam arripuit, Christo Domino cum omni aviditate & simplicitate cordis sui deser-

I 3
viens

* Logelnheim oppidum Alsatic.

viens velut singulare jubar sanctitatis emicuit. Tantæ siquidem mansuetudinis, humilitatis & patientiæ fuit, quòd nunquam eam vidimus iratam seu murmurantem, aut verba iracundiæ audivimus proferentem, quamvis ipsa verbis duris interdum fuerit provocata, tranquillo tamen animo perseverans, & quasi non habens in ore suo redargutiones sustinuit patienter. Verùm circa omnes Ordinis observantias valde extitit sollicita & devota, orandi habens studium indefessum; multis vigiliis, flagellorum plagis acerrimis, aliisque pœnitentiæ operibus corpus suum debile quotidie castigavit, per arctam & angustam viam gradiens omnem prorsus remissioris vitæ requiem declinavit. Porro morbo miserabili, scilicet caduco, pluribus annis oppressa graviter torquebatur, ita quòd ex hujus molestiæ vehementia seorsum tandem sequestrata à sororum consortio manebat. In his omnibus devotè gratias egit Deo, æquanimiter ferens flagellum ipsius Domini valde grave. Interea

Interea cùm quadam die sola in suæ mansionis cellula federet, volvens in animo suas calamitates & misérias, subitò magna procella gemituum in ipsius pectore consurrexit, ferens ingentem imbrem lachrymarum, eò quòd ab exsecutione divini officii in Choro aliisque Ordinibus institutis excludebatur, ad quæ æstu cordis incredibili exsequenda à pueritia aspirabat. Denique eadem horâ lux de cœlo, Sole splendidior, divinitus resplenduit in cellula, illustrans hanc beatam ineffabili claritate, irradiando in eam vehementer. Tunc verò sensit quasi quandam cœlestem virtutem sensibiliter ac manifestè in se ipsam introëuntem & penetralia cordis sui suavissimè perungentem. Cumque hac mira suavitate recreata & quodammodo renovata fuisset, ecce repente affuit ei benignus Dominus JESUS Christus, humilium consolator, dicens in auribus suis sensibiliter; *Constans esto omnino. Ego erò tecum, nec te deseram, sed post vitæ tuæ exitum assumam te ad*

me ipsum. In charitate itaq, perpetua temperaliter te affluxi, quia quos amo, arguo & castigo, nec in futuro ulterius te affligam. Facta autem hac voce in auribus Dei famulae subito extra se facta adventum summæ & individuae Trinitatis in anima sua scire & intelligere promeruit, ac feliciter experiri signis manifestissimis & apertis, operantis in ea mira quædam, ineffabilia, & omnino incognita inexpertis. Proinde quàm festiva & sublimia gaudia tunc duxerit, solius dantis & accipientis est nôsse, quamvis ex parte aliquantula & nobis innotuerunt ex eo, quòd illius jucunditatis affluentia, qua in prædicta nimis gloriosa visione perfusa fuit ac mirabiliter recreata, nec silentio reprimere valuit, nec sermone aliquatenus explicare.

Cæterùm adjecit pius Dominus secundò mirabiliter consolari famulam suam circa finem vitæ ejus, tum quadam vice positâ in tristitia & mœrore graviterque metuentem, se morte subitanea & improvisa præveniri

niri absque Sacramentis Ecclesiasticis, sicut similem morbum patientibus sæpius assolet evenire. Igitur apparuit ei visibiliter flenti & oranti Dominus JESUS Christus in specie divinissimæ humanitatis suæ, clementer eam consolans (quoniam *ipsi cura est de nobis* 1. Pet. 5.) omnemque cordis ejus tristitiam, formidinemque auferens, infudit ei pacem & gaudium spiritale, quod Mundus non novit, paternâ bonitate sua eam certam faciens, quòd minimè hinc esset per mortem subitam aut sine Sacramentis Ecclesiasticis transitura. Tandem visio illa nimis gloriosa ab oculis videntis continuò subtracta est: in corde autem ipsius remansit inenarrabilis gaudii magnitudo, ita quòd præ immensitate lætitiæ se ipsam capere vix posset.

Hæc nimirum beata, cum in corpore suo multa dolorum gravamina patientissimè sustinuisset, tandem longo cruciatu, tanquam aurum in fornace probata, pacatissimo somno in Domino obdormivit. Denique

in ipsius exitu omnipotens Deus novo miraculo ostendere dignatus est, quàm placita sibi fuerit anima ejus. Nam statim ut spiritum exhalavit, & etiam in ipsa hora expirationis illius sentire diutiùs cœperunt cunctæ Sorores tunc præsentibus naribus suis influentem peregrini cujusdam odoris nectaream suavitatem, omnium odoramentorum fragrantiam incomparabiliter superantem. Tunc Sorores, quæ aderant, de percepti cœlestis odoris fragrantia in jubilum & lætitiâ cordis excitatæ sunt tantamque devotionem mente conceperunt, ut beatorum spirituum præsentiam, atque ipsius Dei nostri benignum respectum ibidem adesse nullo modo dubitarent. Sic nimirum novit mira omnipotentis Dei clementia electos suos non solum in futuro, sed etiam in præsentî singulari honoris gratia sublimare, cui est honor, potestas & imperium per infinita sæcula sæculorum Amen.

CAP. XX.

*De veneranda & sancta
Sorore bonæ memoriæ, Bertha no-
mine, e Rubeaco Monasterii de sub Ti-
lia, quæ audire promeruit, dum ad-
huc vixit, Angelicam harmoniam,
quam etiam Dominus JESUS Christus
circa obitum suum invisere di-
gnatus est cum MARIA
matre sua.*

DE Virtutibus & laudabilis vitæ
præconiis venerabilis Sororis
piæ memoriæ, Berthæ nomi-
ne, cognomento de Rubeaco*, lo-
qui cupientes, pauca de pluribus ad-
juvante Domino proferemus.

Ex Nobilibus siquidem orta Na-
talibus divitiisque & honoribus hujus
 sæculi valde prædita, divina tandem
gratia inspirante Mundum, veris gau-
diis

* Rubeaquum seu Rubeacum antiquissima
inter Basileam & Argentinam Alsatia
Civitas Anno Domini 162. ut putatur,
edificata.

diis peraridum, cum flore suo defecruit, levi Christi jugo se subjiciens, Prædicatorum Ordinem Religionisque habitum in nostro Monasterio assumpsit, sub alas sanctissimi Patris nostri Dominici confugiendo, in quo contemptu sæculi præclara extitit & sublimis, qualiscunque temporalis consolationis refrigerium non requirens, sed sanctæ contemplationis studiis sine mentis tædio invigilans, diversorum charismatum gratiâ tanquam cœli sydus splendidum refulgebat.

Planè in semitis Domini nostri JESU Christi posuit vestigia pedum suorum, nec retraxit pedem, donec cursum itineris consummavit, imitando obedientiam, humilitatem, patientiam, charitatem cæterasque virtutes ejus, quas verbo docuit & exemplo. Itaque in via mandatorum Dei non solùm ambulavit, sed & cucurrit, imò potiùs volavit, ita ut omnes labores Ordinis, Regulæ & Constitutionum non solùm tolerabiles, sed delectabiles ei & appetibiles

biles nimis forent. Sanè hæc beata fuit una de hujus Monasterii columnis nobilioribus, firmiter in omni sanctimonia radicatis (de prioribus loquor sororibus, quarum zelo, studio, consilio & exemplo status Religionis ac sanctæ observantiæ cum decore virtutum, robur vigoremque maximum capiebant.)

Porro quàm strenua ac devota erga omnes Religionis observantias fuerit, quamque districta ac rigida sui corporis extiterit castigatrix, non est facilè dictu. Unum tamen ex laudabilibus factis ejus exempli causâ ponamus in medium, unde & cæteris tam prolatis quàm dicendis fides possit faciliùs adhiberi. Finitis Matutinarum solenniis, quibus interesse devotè & reverenter consuevit, postmodum in oratione pervigil pernoctabat, ad lectum per XL. annorum spatia, pausandi gratiâ non revertens (licèt infirmitatum molestiis interim sæpius gravaretur) sed matutinalis somni dulcedinem recusavit, præveniendò Dominum orationibus

nibus continuis & devotis, ut Christum plenius lucrifaceret in sua dulcedine & gratia abundanti. Cumque Domino infatigabiliter in Ordine usque ad ætatem decrepitam deservisset, utiliter quoque ac strenue in officiis laborasset monasterii plurimis & diversis, septuagesimum jam ferè annum agens, permittente Domino paralysis languore gravissimè est correpta. Ex quo nimirum omnium membrorum à cingulo deorsum usque ad plantam pedis usum amisit, ita quòd nec incedere, aut in lecto volvi, sive inde erigi valuit, nisi adjuta manibus alienis. Annis itaque in grabato plurimis carcerata, flagelloque divinæ misericordiæ humiliter subdita, semper gratias egit Deo. Et licèt infirmitate diutina ac nimis gravi oppressa, tamen interim servavit omnia statuta jejunia in Regula & Constitutione, nec etiam edebat interim saginata, nisi rarissimè, per obedientiam vix coacta.

Et quoniam in tanta necessitate se ipsam despexit, in nullo sibi condescen-

descendens pro nomine Salvatoris, idcirco benignus JESUS non est oblitus pauperculæ suæ, sed unctione sui Spiritûs intus in anima eam suavissimè perunxit, infundens ei divinæ consolationis gratiam abundanter. Porro omnipotenti Deo, cujus est totum, quod est optimum, placuit hanc beatam per duorum annorum spatia & ultra (ut opinor) ante ipsius obitum dono suæ magnificentiae mirificè consolari: in quibus singulis diebus, certis horis, scilicet infra Missarum solemnia, ac divini sermonis tempore ad Sorores, corporeis auribus quotidie audire promeruit cœlestem melodiam ineffabiliter suavem, beatorumque Spirituum Choros acutissimis vocibus & jucundis in æthere modulantes. Verumtamen supercœlestis hujus cantûs magnitudo tanta fuit, quòd eum intelligere non potuit, nisi tantum illa verba, in quib⁹ sub distinctione trium personarum unus Deus prædicatur & adoratur, videlicet *Sanctus, Sanctus, Sanctus Dominus Deus Sabaoth.* Hæc sola

sola auditu discernebat, eò quòd prædicta verba indefinenter repetendo, vocibus altifonis expressiùs deprimebat. Finitis autem prætaxatis horis hujus cœlestis harmoniæ amœnitas ejus auribus minimè insonuit, postquam à servitrice sua cœpit seu ab aliis Sororibus frequentari. Sed in ipsius corde concepta devotionis immensa jucunditas remansit, quæ eam totam interiùs tantæ suavitatis dulcedine quotidie reddidit delibutam, quòd infirmitatem suam, licèt gravissimam, exultans & lætabunda sufferret absque tædio deinceps & mœrore.

Denique appropinquante vitæ ejus termino mirificavit misericordias suas Altissimus cum illa. Apparuit enim sibi vigilantibus visibiliter idem pius Dominus, cujus misericordiæ non est numerus, cum MARIA Matre sua, Virgine gloriosa, & cum eo sanctorum Angelorum, aliorumque Sanctorum frequentia, & in pugna mortis dulciter eam consolans, abstulit ab illa omnem trepidationem & diræ

diræ mortis metum , infundens ei gaudium ineffabile suâ præsentia virtuosâ. Cujus quoque piissimâ gratiâ promissionem suæ æternæ salutis atque delictorum suorum veniam in illa hora sacratissima accipiebat. Sicque visio illa supercœlestis ab oculis videntis protinus subtracta est , relinquens ipsi consolationem & gaudium copiosum , mundana gaudia incomparabiliter superans.

Cumque Soror , quæ illi in infirmitate sua multo tempore devotè inservierat , vidisset illam sic in mortis angustia exultantem , flagitavit magnâ instantiâ , ut , si quid consolationis à Domino accepisset , sibi dicere dignaretur. Cui illa silere præ gaudio non valens : *Verè , inquit , accepi à Domino JESU Christo mira & ineffabilia bona , omnem loquendi excellentia facultatem.* Mox incepit totius visionis seriem ei per ordinem enarrare , qualiterque per duos annos cœlestis melodix dulcedine iustificata quotidie fuerat & refecta. Addidit quoque dicens , eundem Do-

minum Majestatis cum supradicto comitatu glorioso secundum benignissimam dignationis suæ promissionem sibi in hora sui transitus præsentialiter affuturum. Quibus servitrix sua auditis festinavit nuntiare hæc omnia diligenter Priorissæ & Sororibus universis. Convenientibus autem illis festinanter ad hanc beatam in extremis positam, illa læto ore, & jucunda facie retulit apertè omnia supradicta, quamvis ex imminuentis mortis articulo vix vocem emittere videretur. Quam Sorores cœperunt obnixius deprecari, ut cum Dominum JESUM præsentem videret, in signum ipsius præsentiae pollicem manus erigeret: cum verò Matrem Christi gloriosam advenire cerneret, extensione indicis demonstraret: cum autem sanctos Angelos cæterosque Sanctos adesse conspiceret, erectione seu elevatione omnium digitorum ostenderet illorum præsentiam venerandam. Quæ continuo innuens ad ipsarum preces se facturam, ex hilarata facie dixit circum-

stan-

stantibus: *Ubi est nunc Priorissa? En
adsunt mei superni Cantores cœlicam
mihi harmoniam suavissimè modulan-
tes.* Verùm percontata à Priorissa,
utrum corporali molestia graviter
premeretur, & an mortis angustiam
formidaret, respondit dicens: *Ego
mori non timeo, nec horrore mortis
concutior, ac mortis doloribus non af-
fligor.* Nimirum præventa jam erat
à Domino in benedictionibus dulce-
dinis, qui omnem ei mœrorem à
corde, omnem penè dolorem à cor-
pore tulit: Cúmque ultimum jam
traheret spiritum, gratiâ Dei illustra-
ta divinam adesse præsentiam ac san-
ctissimæ Dei Genitricis **MARIÆ** ad-
ventum & Sanctorum, prout roga-
ta fuerat, signis evidentibus de-
monstrabat. Sicque anima illa bea-
ta carnis ergastulo soluta requiescit
nunc à laboribus suis, in cœlestibus
regnis adepta præmium sempiter-
num. Per omnia benedictus Deus
in sæcula Amen!

CAP. XXI.

De beata Sorore venerabilis memoriae nomine Agnete, dicta de Herckenheim, hujus Monasterii fundatrice.*

Vertamus nunc stylum sermonis nostri ad venerandam ac Deo dilectam Sororem Agnetem, cognomento de Herckenheim, divae memoriae nostri Monasterii fundatricem, de cujus purissima, & verè in Domino sancta conversatione pauca de multis commemorabimus, quantum nobis dederit ipse Dominus, bonorum omnium distributor.

Erat siquidem nobilis progenie, sed fide & virtutibus multò nobilior. A cunabulis gratia Dei plena, coætaneis suis puellis, diem ludis expendentibus, nunquam se miscuit, neque his, qui in levitate ambulant, participem se præbuit. Huic
unum

* Herckenheim vicus Alsatia superioris.

unum à pueritia semper studium ac desiderium fuit, seipsum crucifigere Mundo & Mundum sibi. Quam Parentes valde invitam, maritalem subire copulam contra castum animi sui propositum compulerunt. Sanè quàm sanctam vitam duxerit, quantisque virtutibus bonisque operibus abundarit tunc temporis, superse-
demus dicere in præsentì, prolixitatem, matrem fastidii, evitantes. Verùm hoc unum secundùm veridicum ejus testimonium proferemus, quòd omnem sæculi pompam, Mundi gloriam & honorem velut stercora reputabat, erantque ei oneri valde. Insuper thorum viri sui, quàm diu ipse vixit, incredibiliter exhorruit, ejus consortium abominans, & in quantum licuit, declinavit; non quòd ipsum exosum habuerit, sed quòd castissimum illius pectus super omnia dilexerit continentiam castitatis. Genuit quoque duos filios, quos post mortem viri sui in ætate tenera constitutos ad Prædicatorum Ordinem studuit pro-

movere, scilicet F. Waltherum & F. Joannem, dictos de Herckenheim, probatos in Ordine, strenuos & devotos.

Horum Mater Soror hæc beata, tempore viduitatis suæ mente integra, & corde perfecto cum Deo ambulavit, ex omni quod scivit & potuit, devotè suo serviens Creatori. Tandem ex inspiratione divina hujus Monasterii extitit fundatrix, & sanctæ Congregationis, in qua nova bella elegit Dominus, & quæ se induit armaturâ Dei, dimicans contra antiquum hostem fortiter & constanter. Huic congregationi in diebus suis exemplar Religionis & speculum Sanctitatis se præbuit, virtutum floribus & famæ redolens, verbo & exemplis mirificè radiavit. Porro Conventum suarum Sororum totis visceribus in Domino dilexit, earum statum tam in spiritualibus, quàm in temporalibus materno affectu pro viribus satagens in melius promovere, jugiterque eas protexit orationum suarum clypeo devotarum.

Erat

Erat deinde provida & discreta in agendis, valdeque matura in omnibus rebus suis. Nempe cuidam Deo devotæ Sorori secretiùs confitebatur, lethalis criminis macula se nunquam fuisse in vita sua per Dei gratiam pollutam secundùm firmum judicium Confessariorum, licèt occasiones frequenter se ei ingesserunt graviter delinquendi, utpote in sæculo nuptæ, & aliis negotiis sæcularibus quàm plurimùm intricatæ.

Denique in Contemplationibus divinis devota erat incredibiliter & suspensa, omne in Deum transferebat desiderium & affectum. Idcirco justus & misericors Dominus, *qui Psal. 83. non privabit bonis eos, qui ambulant in innocentia*, consolationes sibi faciebat multiplices in secreto, revelans sibi profunda mysteria, inexperta plurimis, etiam perfectis, pariterque mente excedendo eam dulciter visitabat. Hanc quoque in excessu mentis diutiùs raptam vidit prædicta Soror, inquirere tamen aliquid ab ea, cùm ad se rediit, non

præsumpsit, licet manifestè sibi daretur intelligi, eam fore repletam bonis sublimibus & jucundis.

Aliud quoque bonum præmagnificum per decem annos continuos ante ipsius transitum sibi contulit benignus Dominus, quo singulariter in spe constituere eam voluit in præsentem: Certitudinem namque de salute sua perpetua ac de remissione omnium peccatorum suorum miris & occultis modis diebus singulis ei pius Dominus inspiravit: secreto quoque suavi susurro ejus, eam in conscientia sua quotidie certificavit, quòd mox gravi carnis deposito pondere spiritus illius absque quolibet obstaculo, libero volatu, ad regna esset sydereæ transiturus. Nimirum istud tam excellens & inæstimabile donum ipsa plus ponderavit, chariusque habuit omnibus aliis cœlestibus consolationibus atque donis. Sicque Evangelicum promissum suum complevit in ea Dominus, qui pro quolibet simplo, propter se relicto, promisit centuplum se daturum.

Matt. 19.

Acce-

Accepit enim veraciter à Domino in præfenti suum centuplum incomparabiliter augmentatum.

Consummatis igitur laudabiliter diebus vitæ suæ, debitum universæ carnis exsolvit, & quæ aliquandiu in lachrymis seminaverat, nunc in gaudio immortalis vitæ metit æternorum dulcissimos manipulos gaudiorum. Nempe ante defunctionis ipsius diem nocte præcedenti quædam Deo devota & fide digna Soror vidit in visu noctis per somnium arcam in claustro propè Capituli domum positam omnino ligneam & quadratam. Magnetem quoque prælucidum similiter conspexit in ea reconditum diligenter tanquam aurum purissimum, claritatis suæ radiis undique transparentem, cujus longitudo & latitudo replere eandem arcam videbatur. Prædictam verò arcam pariter cum lapide pretioso in defossam ibidem sepulturæ locum reponi continuò intuebatur. Porro post illius obitum corpus ejus in eodem loco fuit postmodum hono-

rificè reconditum & sepultum. Quod autem ibi sepelienda fuerat, Soror, quæ hæc videbat, minimè antea recognovit. Sicque quàm placita atque grata fuerit sibi anima hujus beatæ, per tale somnium declarare voluit benignitas Salvatoris, qui est Deus benedictus in sæcula sempiterna Amen.

CAP. XXII.

De beata Sorore Herburge de Herckenheim, bonæ memoria, quam Dominus in præsentī multis supernis consolationibus frequentavit.

BEATA ac laude digna Soror Herburgis, cognomento de Herckenheim bonæ memoriæ, magnâ Dei gratiâ prædita & virtute, celſique meriti fuit procul dubio apud Deum. Hæc siquidem in Monasterio Ordinis sanctissimi Patris nostri Dominici de sub Tilia, in quo vigor disci-

disciplinæ fervorque sanctæ Religio-
nis in diebus illis optimè custodieba-
tur, & usque hodie Domino adju-
vante præcipuè conservatur, usque
ad vitæ suæ terminum non solum sine
querela, sed & cum multa gratia con-
versata diu noctûque Christo Domi-
no devotissimè deservivit, magno
Dei munere conservans castitatis li-
lium incorruptum. Tanto quoque
pietatis affectu, compassionis beni-
gnitatisque erga omnes Sorores
abundabat, quòd omnis illa sancta
congregatio ad præsens memoriam
abundantiæ suavitatis illius cum gra-
tulatione eructet.

Rigidam insuper nimis & arduam
vitam gessit, continuis operibus bo-
nis durisque laboribus corpus suum
conterens & castigans. Super lapi-
des duodecim prægrandes multis an-
nis in nocte cubare solita erat in ho-
norem duodecim Apostolorum.
Porro tanto ardore pii ad Deum desi-
derii devotionisque impetu fereba-
tur, quòd sanguis frequentius uber-
tim profluxit de ipsius naribus atque
ore.

ore. Vanarum quoque cogitationum levitatem toto mentis conamine continuè restrinxit, ut cordis munditiam puritatèmque perpetuò retentaret. Et ut ipsius animus totus in Deum transfiret, ipsi jugiter per internam contemplationem inhærendo, non solum ab illicitis, verùm etiam à licitis omni diligentia abstinuit, quantum à fragilitate humana potuit extorquere.

Quapropter benignus & fidelis Dominus in omnibus verbis suis effudit copiosè supernarum consolationum abundantiam, super latitudinem cordis ejus, revelans sibi frequenter secreta cœlestia, abscondita à Sapientibus & prudentibus hujus Mundi. Quorum quidem plurima oblivioni sunt tradita, nec ad notitiam meam pervenerunt. Quæ verò scire potui, tanta tamque magnifica sunt, quòd ea veraci quidem stylo, Deo teste, sed simplicibus tamen verbis, quantum ingenii mei parvitas sufficit, litterarum monumentis tradere potissimùm æstimavi.

Omnia

Omnia namque inferenda huic operi & inserta tam de ista felici sorore, de qua nunc loquor, quàm de aliis sanctis sororibus, huic sæculo jam defunctis, diligentissimè investigavi, & percepi à sororibus fide dignis, quarum testimonia credibilia nimis, quæ mihi sub testificatione veritatis attestatæ sunt, hæc omnia se auditu proprio secretiùs percepisse ab eisdem Deo dilectis ac placitis sororibus, dum viverent, ad quas hæ supernæ revelationes, consolationesque multiplices divinitus sunt factæ.

Hæc idcirco dixi, quatenus omni dubietatis remoto scrupulo fides non dubia assertionibus his fidelissimis adhibeatur. Nunc verò ad propositæ narrationis seriem redeundum mihi est, à qua paululùm digressa sum.

Expleto quadam vice Completorio hæc devota Dei famula, causâ orationis secretum locum petiit: & ecce repente factâ manu Domini super eam rapta est in spiritu. Remansit igitur ibidem toto corpore prostrata sine sensu atque motu ab illa
hora

hora usque ad diei sequentis auroram cunctis per extasin sensibus corporeis attonitis pariter & consopitis. Interea nimirum aperti sunt ei cœli, ac revelatâ facie meruit inspicere gloriam Domini Majestatis. Cumque diutiùs cœli secreta duce gratiâ rimata fuisset, tandem ad se reversa est, & ad portam Monasterii progrediens, cui ex injuncto sibi officio intendere oportebat, mox cœli Regina, Angelorum Domina, oculis illius visibiliter apparuit, gestans in ulnis suis Regem gloriæ, parvulum suum Dominum JESUM Christum, amictu desuper humili palliata. Piissima verò Dei Genitrix MARIA parte pallii paululùm submota obtulit eidem forori ad videndum dulcissimam illam sarcinam, quam gestabat. Unde à conspectu gloriæ vultûs parvuli gloriosi speciosique formâ præ filiis hominum, paritèrque Christi puerperæ sanctissimæ, Soror, cui hæc videre concessa sunt, subitò inæstimabilis devotionis dulcedine, jucunditatisque lætitiâ perfusa est. Sic visio
illa

illa sanctissima sublata est ab oculis intuentis, mentem tamen suam adeò solidatam, & in Christo fundatam ex tunc & deinceps cognovit, quòd ab amore Domini, seu à puritate Christianæ fidei nullis tentationum impulsibus potuerit separari, etiamsi in terra fuisset infidelium ab illa hora usque ad suum obitum commorata.

Revera magnâ nimis charismatum eminentiâ in vita sua emicuit.

Deinde finitis quodam tempore Matutinis sola hortum ingressa devotione solitâ, sinceram in conspectu Domini orationem effudit, tantò ferventior, quantò & secretior locum sibi quæsierat, huic satî negotio opportunum. Cûmque in

contemplatione ardentissimæ devotionis ibidem staret suspensa, subito quædam mira animi tranquillitas, suavitas de cœlestibus inexperta, internum cordis gaudium, velutî fons vivus scaturiens ad interiora corporis & animæ suæ influens, utrumque ipsius hominem dulcore mirabili perfundebar. Ex quo miro sensibi-

lique

lique modo percepit, animam intra corpusculum suum in motum exultationis prorumpere manifestum instar aquilæ grandis, alas suas excutendo sæpius fortiterque reperiens. Talem siquidem motum in intimis suis experta fuit apertissimè. Ipsa verò tantæ jucunditatis lætitiâ feliciter superfusa est, quòd in terram cadens mente deficeret, ac ferre ulterius non valeret. Thesaurizârat enim super eam Dominus coelestium gaudiorum abundantiam in immensum, ita quòd ex sententia dicere *Psal. 118.* potuit cum Propheta: *Defecit in salutari tuo anima mea Domine.* Viribus itaque corporis in tantum exinde destituta fuit, quòd vix reptando manibus pedibusque ex illo loco usque ad primam diæ horam redire potuit, tanto temporis spatio, ad Sorores.

Adjecit quoque benignitas Salvatoris hanc Sororem, cui gustum supernæ suavitatis mirâ dignationis suæ gratiâ antea contulerat, respectu divinæ misericordiæ suæ mirabiliter visita-

visitare. Nunc verò miranda mirandis succedunt. Alio enim tempore in sui amorem mentem illius accendit vehementer nimis, totamque incanduit ipse Dominus, qui ignem salutiferum venit mittere in terram. Quapropter plures transigit noctes insomnes, nec somnum oculis suis multo tempore valuit indulgere præ amoris illius desiderio, ad quem votis omnibus aspirabat. Unde verbis Prophetæ eximii sæpius usa dixit sibi ipsi: *Quare tristis es anima mea?* Psal. 41. Quid vis, aut quid quæris? Nihil verò sibi aliud respondere noverat, nisi propemodum ejusdem Prophetæ verbum, qui sibi ipsi interroganti respondebat: Deum meum volo, ipsum desidero, ipsum solum quærit ex totis præcordiis suis anima mea. Cúmque querulosis vocibus ex desiderio, quo ardebat, sic continuè clamitaret, ecce pius Dominus advenit & replevit bonis omnibus desiderium animæ suæ, transfundens se non solum oculis suis mentalibus, verum etiam exterius

eam luce inæstimabili illustravit, reddens eam intus & exteriùs totam luminosam. Et dixit quoque in auribus ipsius corporeis sensibilibus & apertè: *Ecce ego sum Deus tuus, salus tua sempiterna: teneas & constringas me tibi in æternum ad tuum placitum voluntatis.*

Quis verò mentem hujus excogitare dignè valeat, seu pensare, quantis bonis ex adventu tanti hospitis abundaverit, quantaque festiva gaudia cum Dilecto suo tunc duxerit? Solius Dei notitia hoc comprehendit & illius, cui concessum est feliciter experiri. Ipsa namque de torrente æternæ voluptatis, de qua ad horam plenè potaverat, ebrietate æstuavit lætabunda in tantum, quòd in lectum decidit languens tempore valde longo. Sic itaque multifariè multisque modis immensa pietas Conditoris gratiam sibi hanc facere his donis præcelsis & similibus non destitit in præsenti, quibus eidem interminabilis in futuro cumulus procul dubio meritorum succrevit.

Tre.

Tremendum venerandúmque sacrosanctum Myſterium Corporis & Sanguinis ſui ipſe benignus Dominus JESUS pluries per cœleſtem huic nuntium miniſtravit , ardentiffimæ quoque ipſius devotionis affectibus dignatus eſt ſatisfacere in hac parte. Cujus quoque benigniſſimâ indulgentiâ ter in vita ſua percipere promeruit remiſſionem peccatorum ſuorum omnium. Quæ aliquando in Choro orans vidit corporeis oculis duarum vultus Sororum prope adſtantium ſplendidiffimis radiis, ſicut Sol lucet in virtute ſua , nimium coruſcantes. Quo viſo magni meriti eaſdem apud Deum fore minimè dubitavit.

Cæterùm quodam tempore obſidionis oppidi Columbarienſis magno timore exterritæ ſunt Sorores, exinde grave imminere periculum Monafterio formidantes. Iſta ergo ſancta & devota Soror totam ſe contulit ad deprecandum pro deſenſione loci beatam V. MARIAM , erga quam devotione ſemper præcipua fe-
L 2 reba-

rebatur. Accepit igitur imaginem ejusdem Virginis gloriosæ cum multa reverentia, ac pia nimis confidentia totum Monasterium ejusque omnes officinas tota amarissimis perfusa lachrymis tribus vicibus devotissimè circuivit. Sic itaque divina gratia suffragante per merita SS. Dei Genitricis MARLÆ, suis piis precibus & devotis obtinuit plenam liberationem ab instanti periculo non solum Monasterio, verum etiam toti pariter Civitati. Hæc enim in fine ultimæ processionis sibi clementer benignus Dominus demonstravit, revelans etiam ei propter devotarum preces Sororum, strenuè sibi in Ordine servientium, hoc Monasterium ab omnibus ingruentibus angustiis & periculis se clementer erepturum. Igitur quantæ virtutis & efficaciae ejus oratio fuerit, patuit per effectum. Nam supradictæ dissensionis atque discordiæ causâ citiùs sedatâ cives Columbarienses pacem continuò receperunt.

Deni-

Denique accessit etiam aliquando ad hanc beatam Sororem quædam de nostris sororibus tota perfusa lachrymis, rogans diligentissimè suspiriis gemitibusque immensis, quatenus divinæ pietatis clementiam sedulò interpellaret pro guerra * diutina, quæ nimis periculosè inter duos fratres suos germanos multo tempore versabatur, ne fraterna cæde interempti morte miserabili interirent. Cujus lachrymis plurimùm compassa promisit se protinus Domini misericordiam rogaturum instantiâ, quanta posset. Siquidem affluens valde visceribus pietatis erga compassionem proximi, & maximè sororum sui Conventûs, se totam mirabiliter effundebat. Hinc devotissimè pro causa supradicta Dominum exorabat tota nocte usque ad diei diluculum pernoctando. Verùm post matutinum stans immobiliter uno in loco usque ad primam diei horam, baculo tantùm fessos sustentans artus, utpote longo senio prægra-

L 3

vatos,

* *Id est*: bello.

vatos, ab oratione non cessavit, donec à Domino meruit exaudiri. Sancto enim Spiritu sibi revelante agnovit, quòd dicti fratres carnales nullam sibi forent corporis læsionem aliquando illaturi, Domino eos per ipsius preces conservante, quodque tandem, licèt ferò, essent ad pacem & concordiam redituri. Manè verò factò, germanæ horum fratrum, quæ desolata ante eam venerat, consolationis gratiâ hæc omnia per aliam sororem, valde devotam, postmodum Suppriorissam nostri Monasterii, significavit. Porro secundùm sermonem ejus Propheticum, ùt prædixerat, quamvis multis annis interim elapsis, omnia procul dubio eyenerunt.

Huic quoque accidit alio tempore satis admirandæ devotionis gratia, quam prætereundam fore nullatenus æstimavi. Tanta namque charismatum gratia perfuderat interiora animæ suæ benignus Deus in insigni die solennitatis & lætitiæ, scilicet Dominicæ Nativitatis, atque
musto

musto illo cœlesti eam fecerat æstuarere adeò vehementer, ut etiam artus omnes corporis sui sibi viderentur sic perfusi mirabiliter & repleti eadem gratiâ, quòd ulterius capere non valerent. Sic, sic spiritualibus referta delitiis ad Matutinum gratiosæ festivitatis, ut lectionem legeret, coram pulpito adstans aperto ore, ebria Dei spiritu, nullum verbum de *verbo Incarnato* proferre potuit. Putavit tamen valde solenniter se lectionem illam more solito decantare, prout postmodum cuidam sorori, admodum sibi familiari, secretiùs enarravit. Cumque moram silentii in lectione sic aliquantulum protraxisset, quædam soror defectum illius demum supplēvit.

Tandem expleto vitæ suæ termino migravit à sæculo, vivens cum Christo Domino, apud quem bonorum omnium abundantia perpetuò perfruetur timore malorum sublato. Per omnia benedictus Deus in sæcula sempiterna. Amen.

CAP. XXIII.

*De felice Sorore Adelheide
de Rhinfelda divæ memoriæ, hu-
jus quondam Monasterii Prio-
rissa.*

DE Venerabili prædulcis memo-
riæ Sorore Adelheide, cogno-
mento de Rhinfelda*, sanctæ
Congregationis hujus quondam
Priorissa loqui nunc cupimus ad pro-
fectum legentium, & ne in hoc li-
bello columnam splendidissimam
præcipuæ sanctitatis Religionisque
hujus Monasterii transiisse sub silen-
tio videamur. De cujus admirabili
quoque conversatione, singulari
sanctitate specialique virtutum præ-
rogativa, quantum ingenii nostri
parvitas sufficit, proferemus.

Hæc sanè cùm in sæculo multis
divitiis & honoribus redundaret,
utpo-

* Rhinfelda oppidum Rauracorum ad Rhe-
num.

utpote nobili prosapiâ orta, ætate adhuc juvenili corporis animique vigore pollens, divinitus inspirata, relictis parentibus, propinquis notis & amicis, omnique mundi gloriâ spretâ, ac solo patrio valedixit, quodque excellentius magnificentiusque fuit, maritum suum juvenem, Militem ac in rebus sæculi valde præclarum cum duobus parvulis liberis suis deseruit, Monasterium sub Tilia Ord. sanctissimi Dominici ingressa, ibique sub disciplina suscepti Ordinis perseveranter in omni vitæ sanctimonia Christo Domino militavit.

Prædictus verò Miles ad eundem Ordinem se transtulit, in quo functus sacerdotio, factusque Prædicator fervidus ac devotus, multis annis postea vivens strenuè Domino usque ad suum obitum deservivit. Reliquit autem domi parvulos suos, scilicet filium & filiam sub nutricis custodia, cunas infantia vix egressos. Denique filio citiùs hujus vitæ miseriis subtrahito, filiam *, quæ utrique

L 5

paren-

* De hac vide cap. 34.

parenti unica remanserat, in eodem Monasterio teneris sub annis matri nutriendam tradidit pater, divinoque servitio ibidem cum ampla rerum substantia perpetuò mancipavit. Sicque cum filia mater ex divitiarum suarum abundantis pauperum sororum inopiam in primævo tempore largissimè suppleverunt.

Porro quàm discreta circumspiciatque in omnibus actibus suis, quàmque sollicita in cunctis Ordinis observantiis prædicta matrona in Monasterio extiterit, nōrunt omnes, qui eam in corpore viderunt, quæ etiam odore sanctitatis illius vehementer affectæ, informari exemplis ipsius & virtutibus nitebantur. Perfectionis enim apicem in primordio conversionis suæ arripuit, effectoque fortiter adimplevit.

Cumque quotidianis virtutum succresceret incrementis, permisit Dominus mentem ejus, cujusdam tentationis stimulis aliquanto tempore acriter impugnari. Cujus tentationis molestia indies graviter augeba-

gebatur, nec eam precibus multis, lachrymisque ad Dominum effusis restringere, ut optavit, seu abigere valebat. Ibat igitur marcescens & contabescens miserabiliter præ afflictione spiritûs & violentiâ tentationis, nec requiem seu consolationem poterat invenire. Verum postquam advenit tempus miserendi ejus, misericors & miserator Dominus, qui post tempestatem tranquillum facit, affuit illi, dulciter consolans eam in tempore tribulationis & angustiae sua solita pietate. Apparuit enim sibi visibiliter quadam die soli in dormitorio consistenti benignus dominus JESUS veluti ad columnam ligatus, plagis totus lividus & cruentus, stigmata clavorum habens in manibus pedibusque, lanceâ quoque perforatus, ac si eadem die esset crucifixus, ita ut sanguis ubertim de recentibus vulneribus emanaret. Et conversus Dominus benignissimè eam respexit tanquam patienti medullitùs condolendo. Siquidem ex ipsius gratiosissimi Dei conspectu, cujus
nimi-

nimirum facies plena gratiarum, subito ab omni pristina tentatione libera effecta, divinæ consolationis gratiam ac securitatem infusam suo spiritui intellexit, adeò quòd omnis dolor & gemitus ex tunc ipsi fuit in gaudium & lætitiā commutatus.

Fuit quoque patiens valde & gaudens in tribulationibus, quas ex defectu victûs & vestitûs tunc temporis ipsa cum sororibus plurimis sustinebat, in quibus semper Deo gratias referebat. Sanè nunquam in vita sua pro cibo & potu aut lecto seu procuratione tenui, cùm esset sana vel infirma, extitit querulosa. Cibos verò in mensa sibi oblatos nunquam mutavit, nec alios requisivit, etiam cùm gustare de appositis non valebat, utpote valde aliter in sæculo educata, & aliàs semper debilis & infirma erat. Nempe observabat diligentissimè ut non delinqueret in lingua sua, semper de Deo vel cum Deo loquens, raroque aliàs loquebatur. Verbum autem otiosum vel nocivum, vel adulationis & fictio.

fictionis seu detractionis nunquam audivimus ex ipsius ore procedere, Deo teste. Falsitatis quoque & mendacii verbum in sæculo & in Religione nunquam ex ore ejus prodiit, ipsâ hoc secretiùs referente, cujus verbis credulitatem facilè adhibemus, cùm nimirum conversatio illius talis fuerit, quòd fidem dictis ejus non adhibere nefas esse procul dubio putaremus.

Porro legem silentii omni tempore districtissimè conservavit, etiam cùm febribus seu acutâ laborabat. A servitrice sua de vestibulis sive capitigiis, cùm deessent, sibi requirere post completorium præcavebat, malens propter Deum defectum ferre etiam valde gravem, quàm distractionem silentii uno tantùm verbo infringere tali hora.

Infra Missarum solemnia de Choro nunquam exivit vel ad horam, etiam corporali molestiâ plurimùm exigente, quibus etiam interesse multâ animi devotione continuè consuevit. In divino quoque officio

officio nunquam in vita sua attriata fuit ex quacunque morositate cantûs, nec etiam depressa somnolentia & torpore, nec aliàs in Choro sive in prædicatione dormivit. Tanto mentis fastigio divinis contemplationibus suspensa, atque in Deo adeò absorpta fuit, ut, cùm de Choro exivit, videns gramen, arbores, nec non Monasterii ædificia, miraretur ea, æstimans de novo omnia surrexisse.

Per claustrum quoque aliquando deambulans cœlum apertum videre promeruit, ubi tantum claritatis, luminis & gloriæ conspexit, quòd nulla lingua sufficiat explicare. Hæc quoque cùm communi operi insisteret, & filaret, cui devotâ semper curâ diligentissimè intendebat, tantâ aliquando divina consolationis dulcedine & gratiâ interiùs in anima delibuta est, quòd ejusdem cœlestis dulcoris & gratiæ exuberantia de interioribus animæ suæ ebulliens per digitorum ungues sibi effluere videbatur.

Hanc

Hanc etiam panem vitæ & intellectus scilicet vivifico Sacramento, absque humano ministerio divinitus sibi transmissio, aliquoties sensibilibus cibare dignata est mira & immensa largitas Creatoris. Ex hujus autem supercœlestis perceptione Viatici mirabiliter illustrabatur, mente proficiens sedula virtutum & gratiæ incrementis.

Præterea solius desiderio Conditoris jugiter inardescerebat, nec desiderabile quicquam aliud sibi fuit, nisi placere Deo semper, illius totis affectibus continuè inhærere. Sicque corpus suum despiciebat, ac præsentia universa, quemadmodum solet herba putrida jam contemni. Agebarur enim spiritu Dei. Liberum habens imperium carnis suæ, puram sibi in omnibus conscientiam studuit conservare. Hinc ergo magnas illi consolationes spirituales ac multiplices Dominus faciebat sive vigilando sive dormiendo, seu mente excedendo, ipsi plura abdita & secreta de cœlestibus ac futuris revelans, de quibus quæ-

quædam tantæ profunditatis excellentiæque esse fateor, quòd mentis meæ valde excedant intellectum, nec in libris propriæ experientiæ illa legi, quæ tamen suis locis perpaucis verbis minusque convenientibus, prout potero, per ordinem declarabo.

Huic quoque vigilantibus & orantibus defunctæ hujus Monasterii Sorores frequenter, etiam interdum clara luce visibiliter apparuerunt. Ex quibus quasdam inter cælum terramque conspexit in sublimi instar solis claritatis mirabiliter refulgentes. Cùm autem contigit interdum signum dari ad Chorum ad Horas, seu alicubi eundem secundùm Ordinis instituta, relictis ibidem visis defunctis sororibus, ad locum, ad quem signum factum fuerat, illico properavit. Tanti siquidem fervoris & studii circa omnes Ordinis observantias extitit, quòd propter hujusmodi visionem, nec alias, revocari aliquando potuit ab executione strictissimæ Regulæ & constitutionum, nisi infirmitate depressa corporis valde gravi.

Præterea

Præterea hæc Deo devota Soror, Reverendi fratris Rudolphi de Rhinfelda Domus Basiliensis Fratrum Prædicatorum, quondam strenui admodum in sæculo militis relicta, sicut præmisimus, cùm post ipsius obitum multùm pro ejus anima foret sollicita, divinumque auxilium invocare precibus & lachrymis non cessaret, vidit eum in spiritu in locis pœnalibus deputatum, & ibidem flammis ignium involvi acriter & vexari. Quo viso extemplò ad se rediit graviter ingemiscens, totis compatiendo visceribus patienti. Cui vigilantivisibiliter apparuit prædictus Frater Rudolphus, eisdem similiter pœnis miserabiliter afflictus, quibus sibi per visum ante fuerat demonstratus. Qui nimis tristis, vultúque lugubri eam diutiùs intuens, quasi orationum suffragiis petiit suppliciter adjuvari, statimque ab ipsius oculis elapsus est. Unde se totam ad deprecandum tamdiu devotissimè contulit, quousque plenam liberationem illi obtinuit à Domino JESU Christo. Post

hæc apparuit iterum eidem visibiliter & stupenti dictus Frater Rudolphus cum multa luminis claritate, vultu hilaris, & specie gloriosus devotas gratias ei egit dicens, quòd per orationum suarum merita à pœnis fuerit liberatus. Et requisitus ab ea, quomodo sese haberet, respondit dicens: *Modò benè mecum agitur, quia de cætero benè valeo expendere dies meos.* Quod verbum dum non intelligeret, ipse sibi exposuit dicens: *Æternâ Dei visione, perpetuo intuitu absq̃ vicissitudinis obumbratione felix perfruar a modo & usq̃ in sempiternum.* Et his dictis disparuit.

Alio quoque tempore rapta fuit in spiritu per mentis excessum ductaque ab Angelo ad loca horroris & pœnarum, plena miseriis, clamoribus & ejulatibus miserorum, in quibus infinitam hominum multitudinem utriusque sexûs, pariterque diversorum Ordinum Religiosos conspexit, graviter præ nimia multitudine se invicem comprimentes in tantum, quòd ad cumulum suæ misc-

miseriæ cruciatum inde permaximum sufferebant. Hi omnes culpis suis exigentibus, tormentis ibidem addicti gravissimis & diversis, quorum numerus per momenta singula crescebat, & decrescebat propter recedentium inde multitudinem animarum, & illuc per mortis transitum continuè alternatim advenientium. Vidit quoque ibi personas quasdam, quas, dum in carne viverent, noverat, familiaresque habebat, quæ similiter pœna horribili multo tempore acriter cruciatæ sunt per districtum Omnipotentis Dei iudicium, qui nullum delictum, etiam minimum pro humana æstimatione, transire patitur impunitum. E quibus quandam ibi cernebat, quæ veluti candens ferrum tota ex incendii ardore ignita effecta, de flammis consurrexit, torvo duroque valde aspectu hanc, quæ videbat, intuens impetum in eam facere conabatur. Ipsa mox signum crucis opponens fugavit eam, quæ statim in ignium

flammas corruens, sibi nocere amplius non valebat.

Plura quoque alia ibi vidit, quæ postmodum nulli voluit indicare. Cùm inde ad se ipsam reverteretur, audire protinus cœpit tumultum quasi magni exercitûs, cursu celeri lætanter alicubi properantis. Ipsa verò fenestram sibi oppositam aperiens, vidit turbam magnam beatarum animarum à pœnis purgatoriis absolutam, immenso lumine coruscantem, liberóque volatu per aëra ad regna cœlestia cum gaudio inæstimabili volantem. Vidit quoque has sanctissimas animas binas & binas in aëre pariter transcuntes, alias præcedentes, alias autem subsequentes, quas innumera Angelorum agmina comitabantur cum honore & lætitia magna valde. Audiebatur præterea ibidem suavitas harmoniæ cœlestis inaudita, & resonabat undique gratiarum actio & vox laudis. Nempe harum sanctarum animarum, cœlum petentium, felicitatis immensitas & lætitiæ jucunditas gloriæque magnitudo

tudo tanta ac talis extitit, quòd eam nec sensu corporis æstimare potuit, nec linguà explicare. Verumtamen intimæ devotionis affectu hujus gloriosæ visionis, quam oculis corporeis videre promeruit, ulterius à corde ipsius deleri non potuit.

Denique circa auroram cujusdam diei sopor Domini irruit super eandem, tenuis quidem sed divinâ gratiâ suavis. Videbatur siquidem sibi, quòd piïssima Dei Genitrix, Regina Coeli, Angelorum Domina, decore & gloria admirabili decorata, in domo laboricii * nostri sederet sororum hujus Monasterii, aliorumque hominum circumdata multitudine copiosa, ad quos benignissimè concionabatur, pia sollicitudine singulorum necessitatibus intendens, dansque eis consilia & auxilia opportuna. At verò soror, quæ hæc vidit, stans à longè propiùs accedere non præsumpsit. Cui sanctissima

M 3

Christi

* Laboricium seu Laborarium (ut alibi vocat) est domus vel officina, ubi Sanctimonialia opera communia perficiunt.

Christi puerpera, ut veniret, manu innuit virginali. Quæ cum reverentia humiliter accedens, quæsit dicens: *Piissima Domina, suntne dimissa mihi peccata mea?* Cui Virgo beata respondit dicens: *Filius meus remisit tibi peccata tua.* Quo jucundo nimis responso, per almam Dei Genitricem accepto, adeò gavisa est, quòd præ immensitate lætitiæ se ipsam capere non valebat. Sicque à somno protinus excitatur, recordaturque, quòd pro indulgentia peccatorum filia suæ, sororis Sophia*, minimè petierat Virginem gloriosam. Inde vehementer doluit, conversumque est sibi ingens gaudium subito in gemitum & mœrorem. Porro pia Virgo MARIA non deseruit diutiùs desolatam, & in se sperantem dignata est citiùs consolari. Nam sequenti nocte eadem horâ, qua priùs, apparsit ei Virgo sanctissima super peccatorum filia suæ remissione, certam eam, ut optavit, reddidit per soporem.

Magni-

* De hac infra cap. 34.

Magnificam reverà mirabilem-
que gratiam, paucis expertam, etiam
perfectis, ut opinamur, in medium
proferemus, quam eidem sorori ob
meritum sanctitatis suæ divina con-
ferre largitas dignata est. Cùm qua-
dam nocte ante sonitum horologii
ad Matutinas in stratu suo vigilans se-
deret, divinæ miserationis benignis-
simum respectum adesse sibi conti-
nuò intellexit, qui repente omnem
peccati scoriam in ejus anima excoxit
& consumpsit illo igne salutari, quem
ipse Dominus misit in terram, adeò
ut nullæ humanæ corruptionis ma-
culæ in ea, quæ animam aggravant,
residerent: Econtra nimirum cordis
sui secreta mundissima veluti cœlum
serenissimum relucebant. Hæc in
illa hora propriâ experienciâ eviden-
tius scire promeruit, ac feliciter ex-
periri. Cogitatio verò repentè men-
ti ipsius incidit, scire profectò desi-
derans, qualem statum gloriæ ejus
anima esset exuta corpore receptura,
cui tanta inerat munditia in præsentī.
Cumque hæc tractaret, subitò facta
M 4 est

est in excessu mentis, atque divino lumine adeò illustrata, quòd anima illa beata absque materiali forma se ipsam in suo simplici esse revelata facie spiritualiter promeruit contemplari, cernens quoque se in sublimi à corpore elevatam, quod infra se etiam positum prospiciens, suum esse corpus nihilominus recognovit. Semetipsam autem claritate incomparabili præfulgidam gaudens inspexit, tantisque meritorum dignitatibus adeò gloriosam, quòd hæc meditari, sive fari nullus sufficeret mortalium, sicut postmodum secretiùs referebat. Agnovit quoque in eodem raptu per divinam inspirationem, eandem se gloriæ dignitatem perpetuò adepturam, qua in visione coelica fruebatur. Finita verò visione illa felicissima ad se ipsam revertitur exultans gaudio ineffabili in cunctis bonis mirabilibusque Domini in se factis divinitus & ostensis.

Satagebat deinceps corpus suum possidere in sanctificationem, contendens cum omni libertate spiritûs
can-

tantam animæ suæ munditiam, à Deo sibi misericorditer indultam, conservare perpetuò illibatam. Denique prædictæ nimis gloriosæ visionis gratiam cum præcedenti animæ purgatione ab omni rubigine vitiorum, similique raptu, quemadmodum præmisimus, iterum sibi contulit altera vice mira pietas Salvatoris. Verumtamen anima illius in raptu iterato ampliore gloria & decore incomparabiliter radiavit ex multorum meritorum præmiis interim acquisitis per bonorum operum & virtutum continua incrementa.

Cæterùm in orationibus suis tanta divinæ gratiæ affluentia sæpius perfundebatur & illuminabatur in anima, incaluitque affectio ita, quòd conscientia suæ animæque secreta præter illas duas priores visiones ab omni prorsus macula contagionis expurgata, nitida & serena, persensit & liquidò intellexit, ex quo nimirum peccata sua clementer sibi dimissa ac deleta à facie piissimi Domini Salvatoris nullatenus dubitavit. Præ-

terea orante ea aliquando post Matutinas in sabbato sancto ante Dominicam Palmarum, repente quasi in ictu oculi in momento facta est vox paternæ pietatis: insonans suavissimè in auribus cordis ancillæ suæ dixit: *Ecce ego sum terminus tuus.* Quid autem hoc verbum tantæ dignationis importaret, ille, qui loquebatur in corde ipsius, continuò inspiravit ei dicens: Ego ipse omnem vitam, intentionemque cordis tui sic ad me converti, solidavique in me ipso in perpetuum, conformémque meæ voluntati adeò te feci, quòd mox peracto cursu vitæ tuæ ad me, qui *sum tuus terminus æternus*, absque retardationis obstaculo pervenies, mihiq; immediatè & æternaliter unieris. Profectò nullatenus dubitandum est, quin & ipse benignus Dominus & fidelis in omnibus verbis suis, eam juxta promissionem suam veridicam continuò ad se assumpserit, cùm decessit, quæ firmiter illi adhæsit, & non recessit retrò cor suum, nec declinavit à semitis justitiæ & per-

& perfectionis , quàm diu vixit , sicut liquidò cunctis , sanctam ejus in Domino conversationem intuentibus , apparebat.

Tempore Prioratûs sui eadem Soror beata in perturbatione quadam spiritali quandoque posita fuit & timore propter cujusdam Conversi nostri excessum , quem inprimis aliquantulum remissiùs restrinxerat , negligentiusque correxerat , quàm censura fortè justitiæ exigebat. Hinc ergò periculum sibi graviter pertimescens , & fratrem , nisi citiùs resipisceret , in anima perituum. Quapropter in Vigilia gloriosæ Nativitatis Domini tota devotione conversa est ad deprecandum pro eo Dominum , ut illum de præcipitio illius ruinæ clementer eripere dignaretur , sibi que piè culpam hujus negligentiae relaxaret. Tunc subito facto spiritu Domini super eam venit in mentis excessum , & ad contemplandum intellectualibus oculis summæ veritatis arcanum mirâ dignationis gratiâ altissimè elevata est , ubi æterna illa bona

bona & immensa cœlestium gaudiorum, quæ electis suis Deus reservavit in præmium sempiternum, in corruptibili vita prælibare quodammodo & prægustare, brevi quidem horâ ac parvâ morâ, promeretur. Porro cœlestium secretorum conscia jam effecta, & post istam supercœlestem visionem de incomprehensibili Divinitate beatis oculis videre meruit in eodem raptu in humanitate sua divinissima eundem Dominum Majestatis. Cernebat namque illum speciosum formâ præ filiis hominum Dominum JESUM Christum tanquam infantulum tenerrimum & pulcherrimum, recenter jam natum, coram se positum vagientem, cujus vultus incomparabiliter erat amabilis & decorus, corporis verò lineamenta & membrorum compositio supra humanæ naturæ formam venustate & pulchritudine radiabant. Huic dulcissimo Parvulo ardentissimo devotionis affectu adhæsit ipsa, quàm diu licebat, nec illius desideratissimi conspectus dulcedine poterat

rat

rat fatiari. Haufit quoque ex illius beatissimi Parvuli consortio & conspectu immensam divinæ consolationis dulcedinem & gratiarum abundantiam magnam valde. Certificata etiam per divinam revelationem in eadem visione de salute æterna superius memorati fratris Conversi, pro quo sollicitè & devotè Domino supplicârat, quem in gratia Dei, sanctæque Religionis proposito perseveraturum & salvandum in spiritu prævidit, certissimèque deinceps tenuit, nullatenus de salute illius dubitans, etiamsi ipsum postea lethale crimen admittere conspexisset, sicut ipsa, quibus voluit, secretiùs referebat. Credidit quoque ex tunc firmiter Dominum JESUM Christum in humanitate sua sanctissima, quam propter nos gerebat in hoc Mundo, talem in forma & pulchritudine per omnia extitisse, qualem eum in illa extasi beatis oculis tunc conspexit.

Præterea in Orationibus suis fervidis ac devotis aliquando præveniens faciem Domini in confessionibus

bus & obsecrationibus pro peccatis suis, repente spiritu divino mira in ipsius anima operante sensit quandam mentis cum Deo salutari suo dulcissimam unionem. Et hanc gratiam maximè ponderavit. Porro hujus felicissimæ unionis memoria ex tunc menti illius suavissimè sic inhaesit, ut post multos annos, cum eandem gratiam, in quantum possibile fuit, familiarissimis suis referret, præ nimio pietatis affectu etiam tunc non posset à lachrymis abstinere.

Cæterum quædam Conventus nostri Soror magnæ Religionis, perfectionisque, nomine Rinlindis*, in primordio conversionis suæ ad hanc beatam sororem frequenter venire consueverat, petens, ut pro sua suorumque salute Dominum exoraret. Quæ dum devotis precibus pro illa sorore, ut petierat, instanter divinam clementiam imploraret, subito benignus Dominus JESUS exaudivit lachrymas ejus, revelans ipsi,
ean-

* De hac vide c. 40.

eandem & omnes liberos ipsius, pariter cum marito suo, viro tam generis quàm mentis nobilitate conspicuo, hæredes regni cœlestis futuros post præsentis miseræ incolatum. Denique conversionem Neptis suæ, nomine Eligentæ, ad Prædicatorum Ordinem in nostro Monasterio devotis precibus à Domino impetravit: Cujus ingressum, cùm necdum ad sanctarum sororum foret recepta Collegium, longè antè similiter prævidit in spiritu atque prædixit, quod sequens probavit effectus. Intravit enim postmodum sanctum locum hujus Monasterii, in quo vitam laudabilem duxit, & in brevi feliciter consummavit. Quam in hora mortis suæ, cùm jam ultimum traheret spiritum, clausis oculis repente exhilarata facie in risum valde intimum prorumpere per horam aliquantulum nos omnes, quæ affuimus, cum gaudio conspeximus. Sicque anima illa beata gaudens & exultans corporeis vinculis absoluta est, immortalis vitæ gaudia æternaliter perceptura.

Por-

Porro benignus Dominus JESUS quædam de meritis virtutum felicitis Sororis Adelheidis revelare dignatus est cuidam valde religiosæ devotæque Sorori Monasterii hujus dicens: *Humilitas ipsius profunda atque vera exaltat eam semper in conspectu meo: Patientia verò ejus firma ac constans multiplicat eam valde in premiis meritorum: Caritas autem illius erga Deum perfecta fundat eam in gratia Dei & radicatur, nec adversitate aliqua commovebitur in æternum.* Adjecit iterum Dominus. præconium laudis hujus dilectricis suæ ampliùs eidem, cui supradiçta revelaverat, manifestare. Videbat namque illam beatam visibiliter oculis corporeis intus & exteriùs totam luminosam, & resplenduerunt cordis illius intima tanquam CrySTALLUS perlucida, mundissima prorsus ab omni macula. Et facta est vox de cœlo intonans in aure videntis hæc: *Talis est dilecta mea, nec mentis ipsius puritas poterit vitiorum maculis obfuscari.* Quapropter totius perturbationis commotio-

motionisque causa, quam contra hanc beatam mente conceperat, ab ipsius animo continuò submota est.

Denique orantem quodam tempore eandem Dei famulam circumfulsit lux de cœlo ineffabilis, irradians in mentem ejus vehementer infudit illi spiritalis consolationis & gratiæ dulcedinem immensam.

Licet autem beatissima illa Soror, de qua loquor, omnia peccata sua, tam quoad pœnam quàm quoad culpam benignissimâ Domini indulgentiâ jam dudum dimissa sibi sciret ipso Domino revelante: tamen quadam vice in fervore devotionis zelo justitiæ nimium accensa, contra omnes iniquitates suas severissimè insurrexit, & expetivit incredibili cordis constantiâ de illis à Domino ultionem, obsecrando, ut ipse in eam vindicando, quod deliquit, non parceret, imò juxta judicii sui æquitatem, quod meruit, sibi redderet in præsentî. Statuerat tunc in sereno cordis semetipsam contra faciem suam profunda consideratione, in-

tuens vias suas pravas , quibus Dominum aliquando irritaverat : displicuit sibi in illis vehementer atque in hunc modum se ream exclamando & vindictam de peccatis suis exigendo diutissimè ad modum duorum pugilum , contra se concertantium validissimè cum Domino luctabatur. Tandem benignus & misericors Dominus , qui delicta diligentium se vehementer non requirit , inspirando ei ostendit , quòd de excessibus suis jam olim à facie sua deletis , ulteriùs ultionem expetere non deberet.

Cæterùm tandem in optima conversatione vitam suam consummans obdormivit in pace , videbitque perpetuò revelata facie in gloria majestatis Deum Deorum in Syon.

CAP.

CAP. XXIV.

*De beata Sorore Gertrude,
dicta de Herckenheim, dul-
cis memoria.*

Dilecta Deo & bonorum me-
moriâ digna Soror Gertrudis
cognomento de Hercken-
heim, illiterata quidem & laica So-
ror fuit, prærogativâ tamen sancti-
tatis, qua plurimum excellebat, qua-
si gemma pretiosa in Congregatione
sanctarum Sororum singulariter ra-
diavit, repleta suavitate virtutum
valde. Germana quoque fuit felicitis
Sororis Herburgis, cujus beatæ su-
periùs * fecimus mentionem, eaque **Cap. 22.*
fide & devotione præcipua non infe-
rior. Perfuderat enim eam Deus,
cui placita erat vita illius, donis cha-
rismatum abundanter. Hinc mul-
tas consolationes & frequentes facie-
bat Dominus in abscondito, reve-
lans ipsi de secretis & cœlestibus ma-
gna

gna valde. De quibusquædam, perpauca tamen, admodum gloriosa ad ædificationem legentium in hoc opusculo intendimus literarum tradere monumentis.

Quadam die extra portam Monasterii, ut moris sibi fuit, ad hauriendam aquam egressa est: qua hausta statim in claustrum regredi festinavit. Huic revertenti apparuit Dominus JESUS Christus in specie leprosi, qui miserabiliter faucibus videbatur & ulceribus plenus dicens illi: *Vis mihi dare in nomine Domini de aqua hydria tua bibere?* Quæ respondens dixit ei: *In nomine Domini Dei nostri accipias nunc & bibas.* Qui statim ut bibit, ab oculis ejus sublatus est. Quo viso vehementer obstupuit. Verum Spiritus Dei revelans mysteria, dixit in corde videntis hæc: *Verè Dominus JESUS Christus est iste, cui potum de hydria dedisti.* Quæ continuo dulcedine & devotione ineffabili repleta accepit hydriam animo lætabunda & ad Monasterium rediens festinanter convocavit

cavit Sorores universas, quibus & totius visionis seriem per ordinem enarravit, exhortansque eas dixit: *Eja charissime Sorores, bibite nunc ex hac aqua omnes, quoniam Dominus JESUS Christus in veritate de aqua istius hydrie bibere dignatus est.* Quibus auditis Sorores certatim accurrentes biberunt omnes aquam cum devotione magna & lætitia benedictam.

Adjecit iterum Dominus hanc sibi dilectam famulam miræ dignationis suæ gratiâ magnificè consolari. Nempe quodam tempore ad portam Monasterii ex injuncto sibi officio properavit. Quam aperiens protinus conspexit parvulum pulcherrimum supra modum speciosum & decorum solum in januis stantem. Quem intuens diligenter, ejusque pulchritudinem admirans plurimum delectabatur, æstimans, quòd tantillus puer verba adhuc aliqua depromere non valeret. Alludens tamen ipsi requisivit dicens: *Amantissime parvule, unde es tu? Et*
N 3 *quis*

quis est, aut quomodo vocatur pater tuus, & mater tua? Qui statim perfectis verbis respondens illi dixit: *Pater noster ipse est Pater meus, & Ave MARIA mater mea est.* Quibus dictis puer ille beatissimus ab oculis ejus continuo ablatuſ est, & ulterius non comparuit. Illa verò mox intellexit, parvulum illum divinissimum, qui sibi apparuit, & cujus vocem beatissimam audire meruit, esse Dominum JESUM Christum omnium Salvatorem. Hinc ergo jucunditate inæſtimabili & exultatione repente perfusa, tota in amorem illius, quem viderat, incanduit vehementer, & quasi tota extra se facta se ipsam continere ulterius non valens coepit per omne Monasterium cursitando vociferari illa verba melliflua dulcissimi pueri, ac indefinenter dicere: *Pater noster est Pater meus, & Ave MARIA est mater mea.* Arctius enim sibi fuerant impressa ac dulciora animæ ipsius super mel & favum: ideo ab illis filere non poterat & cessare.

Dein-

Deinde magnificavit iterum benignus Dominus facere cum illa misericordiam visione mirabili & nimis gloriosa, visitans eam Oriens ex alto. Itaque tempore quodam in die celeberrimo Dominicæ Resurrectionis post Missarum solennia, devotione & Cantu præcipuo ritè celebrata, Sorores horâ debitâ ad prandium convenerunt, cum quibus beata illa Soror Gertrudis sedebat ad mensam in Refectorio lachrymis plena, revolvens in amaritudine animæ suæ Passionem Christi, & sepulturam sacratissimam pridie celebratam. Cumque tristis & mœrens ex piæ devotionis compassionisque affectu sine cibo & potu aliquamdiu consedisset, subitò apparuit ei visibiliter benignus Dominus JESUS Christus, verè mitis & humilis corde, in specie juvenis quasi triginta annorum, pulcherrimi nimiumque decori, stans in medio refectorii coram illa, & vultu placidissimo radiantibusque oculis eam intuens dixit: *Quare in die Resurrectionis meæ & latitia tristis*

es atq; ploras? Ego enim à morte verè hodie resurrexi, & non solus resurrexi, sed tu hodie quoq; resurrexisti mecum aternaliter in gloria victura.

Viso itaque Domino, qui omnes Angelos adimplet lætitia, gavisæ est gaudio magno valde, atque ipsius Domini eloquio ineffabiliter suavi, recreata & mirabiliter consolata, *Genes. 32.* quòd meritò exclamare potuit: *Vidi Dominum facie ad faciem, & salva facta est anima mea.* Sicque tota in jubilum rapta, & quasi extra se facta nesciebat in arcto temporis, quid agere deberet. Volebat namque in medium profilire, & apprehendere pedes dulcissimi Salvatoris, & retinebat eam pudor & reverentia Conventûs Sororum, ne velut insaniens reputaretur. Liquefiebat autem cor ejus pietate in semetipsa etiam præ immensa dulcedine amoris illius, quem intuebatur. Proinde visio illa cœlestis ab oculis illius continuò subtracta est. Ipsa autem præ immensitate lætitiæ & ardore pii desiderii mente deficiens cecidit, inde in Infirmi-

firmitorium delata, ibique jacuit aliquamdiu languens.

Præterea in festo Purificationis Virginis gloriosæ, dum Missarum solemnities in Choro valde devotè & solemniter à Sororibus peragerentur, vidit quoque corporeis oculis sensibilibiter illam Puerperam piissimam, Virginem MARIAM à parte altaris consistentem, vultu & habitu incomparabiliter splendidam & decoram. Proinde Virgo illa sublimis inde progrediens per gradus presbyterii descendit, portans in ulnis suis benedictum fructum ventris sui, prolem magnifici germinis: gradum ibi pauculum fixit, misericordes oculos suos ad Sorores convertens, quas benignissimè respexit. Deinde utrumque Chorum Virgo Benedicta decentissimè perambulavit, tenens virgineis manibus suis parvulum suum dulcissimum JESUM Christum, quem cuilibet Sorori obtulit mira dignationis gratià & favore. Ipse vero Puer beatissimus, delectabilis & nimium graciosus extensis brachiis singulas

Sorores & universas dulci amplexu sibi tenerrimè adstrinxit, manu quoque sua sanctissima illas benedicens. Dumque benigna Mater Dei ad quandam Sororem venisset, quasi faciem avertendo velociter pertransivit, nec illi filium suum regalem exhibuit ad amplexum. Ex qua re manifestè dabatur intelligi, illi scilicet Sorori devotæ, quæ hæc videre meruit, prædictam Sororem, quam B. Virgo pertransivit, aliquo præoccupari delicto, quod non deleverat puræ Confessionis contritionisque remedio salutari, sicut postmodum signis apertis deprehendit. Verumtamen apparitio illa cœlestis tamdiu duravit, donec Virgo beatissima cum parvulo suo Unigenito, Domino JESU Christo, utrumque Chororum piissimè, quemadmodum præmisimus, perlustravit.

Hæc Soror, de qua loquimur, in orationibus suis valde fervidis & devotis, & præcipuè quando Horas Canonicas persolvebat, vidit sensibilibiter flammam ignis veluti Solis radios

dios frequentissimè de ore ipsius egredientem, usque in cœlum conscendere.

Præterea quadam die cœnæ Domini cum cæteris Sororibus solita devotione accessit reverenter ad participationem Dominici Sacramenti secundum diei festi consuetudinem. Quo percepto benignus Dominus omnem devotionis gratiam illi subtraxit, piâ suâ haud dubiè dispensatione, ut ipsius desiderium amplius provocaret ad quærendum gratiam & misericordiam ferventiùs ab ipso Deo salutari suo. Cumque divinæ consolationis dulcedinem, ut consueverat, minimè experiretur, cœpit hoc peccatis suis & negligentis graviter imputare, se ipsam plangens lachrymis gemitibusque innumeris. Tandem conversa ad Dominum oravit dicens : *Benignissime Domine, redde mihi letitiam salutaris tui, & ne memor sis iniquitatum mearum, sed oblivioni perpetuæ illas tradas. Ostendere mihi quoq; digneris, obsecro Domine Deus, utrum ego indignè hodie*

die susceperim vivificum Sacramentum similiter sicut Judas quondam discipulus tuus, à te reprobatus, cujus non es memor amplius, & ipse de manu tua repulsus est. Cumque hæc verba amarissimis tota perfusa lachrymis indefinenter repeteret, pius Dominus misericordiâ motus super illam, nec ulteriùs continere valens inexhausta pietatis suæ viscera, locutus est sensibiliter in aure dilectricis suæ dicens: Non accepisti me hodie sicut Judas, inimicus meus, nec etiam tantum, ut ceteri amici mei, sed sicut intimi mei & gratissimi. Sanè ad hanc vocem Domini dulciorem super mel & favum inæstimabili gaudio & lætitiâ repleta tantam divinæ gratiæ affluentiam sibi infusam persensit, quantam antè nunquam fuerat experta.

Eadem Soror Gertrudis ad iracundiam aliquando concitata, unam de Sororibus plus debitò amaris invectionibus molestavit. Statim verò in se rediens & agnoscens culpam suam redarguit semetipsam valde,
pro-

prosternens se coram altari in Choro amarissimè flere coëpit, oransque ita ad Dominum dixit: *Benignissime Domine Jesu Christe, justum & dignum est, quòd vindices in me iracundia mea vitium, & non parcas: hoc tamen solummodo doleo & deplango, quòd ego infelix post tot tantaq; beneficia miserationum tuarum, quæ in me multipliciter explèsti, velut his ingrata, per impatientiam meam irritavi iram tuam, & malum coram te feci. Cumque his similibusque verbis semetipsam graviter accusando affligeret & humiliaret coram Domino nimis, audivit corporeis auribus Dominum desuper clara voce dicentem sibi: *Cessent jam oculi tui à fletu: quare mærore consumeris? Ad primas enim orationis tue lachrymas remisit tibi peccatum tuum.* Quo audito surrexit de terra ineffabiliter consolata, benedicens in lætitia cordis sui nomen Domini benedictum.*

Verùm hæc, quæ de ista felici Sorore protulimus & sub testificatione veritatis protestamur, comperimus

mus à Sororibus fide dignis, quæ ab ore hujus felicitis Sororis hæc omnia, & multò plura didicerunt, quæ tamen causâ brevitatis ad præsens sub silentio volumus præterire. Cæterum hæc beata Soror Gertrudis post plurima laudabilis vitæ suæ insignia, vocante Domino, obdormivit in pace, meruitque introduci cum prudentibus Virginibus ad agni nuptias æternales.

CAP. XXV.

De Sorore Adelheide de Apiaco bonæ Memoriae.

Venerabilis & beata Soror Adelheidis, cognomento de Apiaco *, felicitis memoriæ, à puerilibus annis religiosè & sanctè in nostro Monasterio conversata, strenuè fideliterque Domino usque ad ultimum vitæ suæ senium deservivit, strictam & arduam vitam gerens.

Cap.

* *Vulgò Effrich / pago Alsatia.*

Carnem suam afflixit jugiter multis vigiliarum atque abstinendarum laboribus, cæterisque bonis operibus ac disciplinis. Catenam quoque ferream ad carnem super nudo per tredecim annos continuos portavit pro nomine Salvatoris.

Erat ei etiam consuetudo creberrima vigilandi & orandi, modò usque ad Matutinum, modò verò post Matutinas usque ad horam diei primam, in orationibus suis, multùm devotis, pervigil sæpissimè pernoctavit. Porro trecenta millia *Pater noster* devotissimè oravit toto affectu, venerando illas horas sanctissimas & momenta, quibus Dominus JESUS in hac mortali vita nostrî pro amore degere, laborésque multiplices & ærumnas sustinere dignatus est. Hanc orationem difficilem & prægrandem ante obitûs sui infirmitatem breviter consummârat.

Petivit quoque à Domino multo tempore ardentique desiderio, ut sibi aliquo certo signo ostendere dignaretur horam illam sacratissimam, qua

qua pro nobis de aula uteri virginalis prodire voluit in hunc Mundum. Cumque quodam tempore in Vigilia Nativitatis Domini post Completorium devotione non modicâ foret in precibus fatigata, tandem lectum intravit caput reclinans paululùm ad quiescendum. Sicque inter soporem & vigiliam eâ constitutâ, subito advenit quidam, quem Angelum suum esse post non dubitavit, pulsans ad lectum illius tam fortiter, quòd ad sonitum illum perfectè evigilavit. Quæ expergefacta mox audivit vocem tanquam in sublimi dicentem sibi : *Surge velociter, ecce jam instat hora beatissima, in qua Dominus universitatis pro hominibus nasci voluit, homo factus.* His auditis continuò de stratu suo festinanter surrexit, procidens devotè gratias retulit Domino Redemptori, & sacras illas Vigiliis noctis, paritèrque diurnum officium tantæ solennitatis in suavitate & pinguedine spiritûs peregit alacriter & devotè. Notavit quoque diligenter horam illam bene-

benedictam, sibi divinitus præmonstratam, quam deinceps annuatim sollicitè observabat præveniendò eam sacris vigiliis & orationibus indefessis.

Fuit etiam beata hæc Soror ferè super omnes homines, quos unquam vidimus, cauta sollicitaque erga custodiam linguæ suæ, ut non delinqueret in ea, præcavens diligentissimè, ne Sorores aliquando exacerbarer verbo incomposito & indecenti, sed potiùs ipsa læsa semper tacuit, offensaque responsum nullum dedit. Silentium quoque strictè & devotè conservans locis & temporibus interdictis.

Sanè in officiis Monasterii plurimis & diversis multùm & utiliter laboravit, plures libros & præcipuè ad divinum in Choro officium pertinentes valde eleganter conscripsit. Denique cùm in extremis laboraret, requisita à Sororibus ibidem præsentibus, utrum consolationem aliquam à Domino accepisset, protinus respondit dicens: Piissima Virgo MARIA nunc ad me intravit, & cum ea

Sanctorum frequentia gloriosa, in pugna mortis dulciter consolans me, plurimum confortavit. Quapropter piè confidimus & speramus nullatenus dubitando, quin benigna Mater Dei illam secum clementer protinus assumpserit ad regna cœlestia, propter quam ad terram descendere dignata est.

CAP. XXVI.

De Sorore sanctæ memorie Agnete, Wallaria cognomento.

PIæ recordationis Soror Agnes, dicta Wallaria, in Monasterio hujus sanctæ Congregationis usque ad obitum suum, religiosè valde ac laudabiliter conversata est; fatagens quotidie semetipsam exhibere hostiam viventem, sanctam, Deo placentem. Ordinem suum, in quantum potuit, devotè & sedulò conservavit, corpori suo supra modum rigida atque dura.

Hæc

Hæc adhuc in sæculo maritata magni fervoris & devotionis ad Deum fuit, eleemosynis cæterisque devotè insistens operibus pietatis. Quæ cum rebus & divitiis competenter abundaret, incidit aliquando Deo permittente in manus quorundam Nobilium & potentum, qui eam in bonis suis plurimùm molestabant, inferentes ei damnum nimis grave. Verùm his ita gestis tempus non multò post instabat, quo percipere debuit Altaris vivifica Sacramenta. Itaque interrogata à Confessario suo, utrum priùs ex corde remitteret his, qui se læserant, dicente eo, quoniam aliter dare sibi minimè præsumeret sacrosanctum corpus Christi, tunc illa repente cum multa animi libertate respondens ait: *Si omnia Mundi hujus regna ditioni mee subjacerent, illis libentiùs renuntiarem, quàm unius momenti spatio carere vellem dulcissimo Deo meo. Idcirco toto nunc ex corde ignosco & remitto eisdem, quod in me deliquerunt.* Quibus dictis tantam talemque sibi vim intulit

remittendo, quòd sanguis mox de ipsius ore & naribus exilivit, Confario suo præsente & vidente.

Quoniam hæc devota Dei famula omnia Mundi prospera & adversa despiciens pro nihilo reputavit, ut Christum solum lucrifaceret, ideo gaudium & consolationem Sancti Spiritus multiplicem accipere meruit in præsenti & gloriam in futuro. Huic quoque jam in Monasterio existenti donum valde mirificum & gloriosum contulit immensa pietas Conditoris, quod præterire silentio congruum non putamus. Siquidem in nocte festivitatis sacratissimæ Nativitatis Domini, infra Matutinarum Missarumque solennia tunc pariter celebranda, retrò Chorum se collocarat, utpote debilis & infirma, nec valens cantantibus coæquari. Cumque interim orationibus ardentissimæ devotionis vacaret, subitò beatis oculis visibiliter videre meruit Dominum Sabaoth, in quem desiderant Angeli prospicere, in specie infantis tenerrimi nimiumque decori, qui sibi

sibi fuerat divinitus præsentatus. Quem jucunditate & lætitia ineffabili intuens, & cognoscens suum esse & omnium Salvatorem, anima ipsius tota liquefacta est præ immensa dulcedine, & amore illius dulcissimi Parvuli, eum sibi totis adstringere affectibus desiderans, & tamen Sanctum Sanctorum manibus contingere non præsumpsit. Erat quoque infans ille felicissimus aspectu delectabilis, & ineffabiliter graciosus, nitens toto corpore candore niveo, sed rubedine quadam præ nimia teneritudine aliquantulum circumfusus veluti infantulus recenter jam natus. Verumtamen visio hæc admirabilis & jucunda citius finita est: sed conceptæ devotionis mira suavitas deinceps in corde illius finire non potuit. Cæterum eandem visionem triduo, antequam de corpore migraret, patefecit cuidam devotæ ac fide dignæ Sorori, quæ mihi illam, quemadmodum simplicibus verbis expressi, per ordinem enarravit. Obiit autem beata hæc Soror feliciter, sicut & sanctè

O 3

sanctè vixerat , assumpta ad regna
coelestia à Domino JESU Christo ,
quem toto dilexit corde & pura
mente.

CAP. XXVII.

De Sorore divæ memoriæ Gertrude de Bruck.

Felicis Sororis Gertrudis' de
Bruck * religiosam & sanctam
in Domino conversationem
cum gaudio recordamur , quæ ma-
gnæ sanctitatis specimen in vita sua
Sororibus exhibuit universis, virtuti-
bus moribusque optimis adornata.
Fuit namque miræ mansuetudinis &
pietatis, profundæque humilitatis, se
ipsam in omnibus despiciens & hu-
milians pro nomine Salvatoris. Di-
dicerat revera per Sancti Spiritûs
magisterium esse mitis & humilis
corde.

Huic

* Bruck oppidulum Argoia in Helvetia.

Huic jucundum valde & omni acceptione dignum miraculum, accidit, Domino mirabiliter operante. Stabat namque quodam tempore in Choro ante imaginem Virginis gloriosæ, precibus & lachrymis immensis eandem Virginem piissimam devotissimè implorans, ut ipsa sibi delictorum suorum veniam & salutem animæ suæ clementer dignaretur à Filio suo dulcissimo impetrare. Cumque in fervore hujus orationis valde suspensa foret, invocando nunc nomen Domini JESU Christi, nunc verò matrem misericordiæ affectuosissimè interpellando, repente corporeis oculis visibiliter conspexit, quòd imago pueri DEUS, in gremio Virginis matris sedentis, manum suam elevando sibi porrexit, dicens clara voce admodumque suavi: *Accipe fidem meam in testimonium certitudinis, quòd à me & Matre mea dilecta nunquam separaberis in æternum, eroq; propitius peccatis tuis, neq; illorum amplius recordabor.*

Sanè ad hanc promissionem Domini gratissimam & jucundam repleta lætitia & exultatione ineffabili supponens manum suam continuò manui imaginis prædictæ eam in fidem gaudens suscepit. Tunc subito remansit in manu sua eadem manus pueri, quadam vi divina à corpore separata. In argumentum autem veritatis manus postmodum nulla potuit arte dictæ imagini restaurari, licèt sæpius fuerit attentatum. Sicque sancta illa imago* manu divinitus privata usque hodie in Monasterio reservatur.

Eadem Soror alio in tempore, divino in Choro assistens Officio devotâ nimis mente cœpit revolvere Passionem Christi sacratissimam, erga quam magno devotionis ardore continuò accensa piissimè movebatur. Cumque venisset hora, qua Sacerdos immolat Patri hostiam salutarem, subito

* Hanc testatur se vidisse Contr. Zittardus (qui obiit Anno 1606.) in Chron. suo Germ. fol. 143.

subitò audire cœpit sensibilibus diris-
simos illos fortissimosque malleo-
rum ictus , quos Dominus JESUS,
Mundi Gloria, pro nobis in cruce
clavis crudeliter perforatus susti-
nuit. Multa quoque alia passionum
Christi genera veneranda fuerunt
sibi miraculosè in illo temporis arti-
culo demonstrata , tanquam in præ-
senti Christum cerneret patientem.
Hinc ergo immensis doloribus ex
pio compassionis affectu nimium
fauciata, completo Officio divino
mox de Choro properavit egredi,
& secretum intrare locum, ut ibi-
dem ejulatu , & clamoribus, suisque
internis doloribus aliquatenus satis-
facere posset. Cùm igitur ad ostium
Chori venisset, statim in ipso egressu
præ doloribus mente deficiens valde
graviter supra petram corruit exa-
nimis. Inde in Infirmaryam veluti
mortua delata diebus plurimis ægro-
tavit. Hæc omnia supradicta postea
viribus receptis sibi que reddita Prio-
rissæ tunc temporis secretè per or-
dinem patefecit.

Vidit etiam aliquando quarundam Sororum devotarum vultus mirabiliter coruscantes splendoribus radiosus, ex quo intellexit easdem Sorores beatas magni fore meriti apud Deum.

Tandem hæc sancta Soror pretiosam resoluta in mortem pervenit juxta promissionem Domini fidelem ad requiem & pacem, quæ exsuperat omnem sensum & in hæreditate Domini morabitur in æternum. Per omnia benedictus Deus. Amen.

CAP. XXVIII.

De Sorore felicitis memoria Adelheide de Torolzheim.

Fuit quædam Soror nomine Adelheidis, nuncupata de Torolzheim * venerabilis vitæ, & parentibus orta nobilibus & honestis,

* Torolzheim vicus Alsatia propè Molsheimum.

stis, quæ puerilibus annis innocenter excursis, conservavit Dei munere virginalem pudicitiam perpetuò illibatam. Hæc cùm esset septem vel octo annorum, vidit presbyterum quendam superpelliceo & stola indutum, corpus Domini nostri JESU Christi ad infirmum in pyxide deferentem, quem sequebatur multitudo hominum copiosa, cum quibus ipsa venit, & adstitit proxima sacerdoti. Cumque presbyter ad infirmum sedisset, aperuissetque pyxidem, prædicta puella curiosius introspiciens vidit in ea puerum parvulum nimium formosum sedentem, amictum sacerdotalibus ornamentis, cujus capilli capitis crispi erant, colore aureo resplendentes. Quem mox ut vidit, ejulatu & clamore valido implevit totam domum, parvulum beatissimum illum, quem intuebatur, habere desiderans vehementer. Tandem pyxidem cum puero violenter auferre de Sacerdotis manibus nitebatur. Quam Sacerdos prohibens repulit à se. Sed ipsa

ipsa nihilominus à clamore & fletibus non cessabat, donec vidit, quòd idem presbyter accepit de pyxide speciosum eundem parvulum, & in os deposuit ægrotantis, sicque illum amplius videre non potuit. Ejulabat tamen postmodum aliquamdiu inconsolabiliter & plorabat. Porro visionem prædictam ipsa, postquam Monasterium intravit, referre solita erat.

Denique quædam nostri Monasterii Soror audivit nocte in somnis vocem tanquam de excelso dicentem sibi de eadem puella superiùs memorata : *Hac puella, qua in crastino ad vos intrabit assumens habitum Sororum, est procul dubio ab aeterno vas prævisum & electum, vas honoris & cælestis gratia.* Sicque Monasterium die crastina ingressa à primævo suæ juventutis flore Domino devotè usque ad obitum suum in Ordine deservivit. Cui etiam contulerat Dominus vocem cantandi nobilem & suavem, & injunctum sibi fuit incipiendi in Choro officium multis annis,

annis, quod & valde benè scivit & sollicitè exequebatur.

Accidit præterea, ut videret quadam vice visionem satis admirabilem, quam propter devotionis fervorem illius, qui manifestè in ea apparuit, referre congruum aestimavi. Cùm quodam die festo post primum signum ad matutinum de dormitorio in Chorum properaret descendere, vidit continuò ipsis gradibus, per quos eam descendere oportebat, diabolum in specie porci prægrandis consistere, qui dorsum & latera confricabat fortiter ad asseres & perticam propter fulcimentum inibi constitutos. Verùm ex altera parte, scilicet in immis, Sororem nuper defunctam stare similiter conspexit. Sanè ad hanc visionem terribilem nimium stupefacta, quid in tali necessitatis articulo ageret, ignorabat. Non enim aliam viam compendiosiore ad Chorum veniendi habuit. Tandem verò fidei constantia & devotionis vicit formidinem & timorem, transiènsque per illorum medium

dium venit ad Chorum nimiùm pavens & tremens, perstititque in defectione plurima, vixque in fine solennium illarum Matutinarum viribus aliquantulùm resumptis potuit respirare.

Multis infirmitatum incommodis & diversis febribus diuturnis, annis plurimis graviter cruciata, flagellum pii Patris, misericorditer ab ipso sibi inflictum, patienter portare studuit & devotè. Quæ cùm in extremis laboraret, vidit, nescio, quid terribile, ex quo tantum conversa subito in stuporem fuit, quòd vultu suo mirabiliter immutato, oculi quasi de propriis sedibus evulsi, motu volubili horribiliter rotabantur, saltum quoque per caput lectuli, in quo jacebat, facere nitebatur, sed prohibita est à Sororibus circumstantibus, eam retinentibus violenter. Deinde paululùm ad se rediens & requisita à Sororibus, utrum aliquam sibi fecisset consolationem Dominus, protinus exhilarata facie ipsis innuit, dicens, se benignissimè à Domino conso-

consolatam. Sicque morte interveniente vita caruit & languore, migrans ad Dominum JESUM Christum, qui eam sibi in sponsam elegerat sempiternam.

CAP. XXIX.

De duabus aliis Sororibus, videlicet Elizabeth de Junckholtz, pariterque Gertrude de Girsperg**, devotis valde & cum omni reverentia nominandis.*

PRæterea duæ sanctæ Sorores ac bonorum memoria dignæ in nostro quondam Monasterio extiterunt, vita & religione conspicuæ valde, probitatis exempla & virtutum non mediocriter relinquentes Sororibus universis: quarum una dicebatur Elizabeth de Junckholtz, hujus sanctæ Congregationis Supprio-

* Junckholtz vicus Alsatiæ cum arce.

** Girsperg arx in Turgoja propè Diesenhofen & Stain.

priorissa: Altera verò Gertrudis de Girsperg vocata, tenens etiam officium aliquanto tempore Prioratûs. Hæc sanè fuit supra modum Deo devota, fervens quoque & strenua in omni observantia regulari, & gratia charismatum plurimùm eminebat, magnas profectò cœlestes consolationes à Domino accipiens in secretis, cui placita erat procul dubio vita ipsius. Quæ cùm interdum divinæ illuminationis gratiam minùs solitò se habere conspexit, doluit vehementer, intransque statim in Capitulum seu locum quemlibet secretum, corpus suum tam diu hostiliter virgis durissimis verberavit, donec miserante Domino tantam divinæ gratiæ affluentiam præcordiis suis illabi subito persensit, quòd interiora utriusque hominis sui ab uberibus divinæ consolationis suavissimè in tantum delibuta essent ac perfusa, quòd ulteriùs ferre seu capere non valebat.

Hujus fratribus carnalibus, rebus & sæculi dignitate valde præditi, ex offensione Domini Regis Romanorum

rum de castris propriis olim expulsis, universaque eorum substantiâ ablatâ, quam potestas etiam publica diu postmodum usurpavit, sancta hæc Soror, germana ipsorum, mox ad solitum orationis suæ confugium cucurrit, prosternens se devotè ante altare, benedicens Dominum, eò quòd circa fratres suos factum fuerat, sicut ipsi Domino placuit, Hymnum *Te Deum laudamus* ex integro tunc orans, quamvis fratrum suorum damnum atque Castri exterminium ægerrimè sustineret. Sic, sic ipsa verè beata Soror orationibus piis & devotis ad Deum, humilium consolatorem, recurrere consuevit in prosperis & adversis. Cui benignus Dominus JESUS ante viginti fermè annos, quàm de corpore discessit, diem & tempus sui transitus revelare dignatus est. Quod postmodum verax probavit eventus. Nam viginti annorum spatio interim evoluto eodem die & tempore, quo obitus suus sibi fuerat revelatus, migravit ad Do-

minum JESUM Christum omnium Salvatorem.

Venerabilis autem & laude digna Soror Elisabeth de Junckholtz, cujus superius fecimus mentionem, magnæ puritatis & Religionis extitit, rigidam admodum arduamque vitam gerens, licet in sæculo delicata nimium foret, utpote nobilis valde, & abundans divitiis plurimis & honore. Ordinis quoque instituta & Regulæ districtè usque ad obitum suum observare studuit, sequens Conventum in omnibus & ubique. Quæ extrema laborans ægitudine retulit sororibus, ibidem congregatis, verbum bonum, atque memoria dignum dicens: *Ego per viginti annorum spatia, quibus Domino in Ordine deservivi, ita vixi, quasi quotidie essem de sæculo migratura, dirigens cursum vite meæ ad suæ voluntatis beneplacitum, nec reprehendit me conscientia mea in verbo & in factò.* Ipsa quoque prædixit Confessario suo & Sororibus, se post triduum fore ad Dominum ituram, quod & fa-

& factum est. Nam tribus diebus hominem exuit, mortemque perdidit, & vitam veraciter apprehendit.

CAP. XXX.

De felici Sorore bonæ memoriae nomine Giselhilde.

ERat inter primitivas sanctas hujus Monasterii Sorores quædam miræ simplicitatis & innocentia Soror, Giselhildis nomine, quæ per humilitatis & obedientia iter incedens sine querela velut agna mansuetissima in medio Sororum conversabatur. Carnis quoque spurcitas ab utero matris suæ usque ad diem mortis magno Dei munere, impolluto calle adeò transivit, quòd incentiva passionum carnalium in vita sua minimè fuit experta secundum testimonium suorum omnium Confessariorum. Ipsa namque ante obitum suum, quibus voluit, firmiter asserendo fatebatur, se ab omni ten-

tatione carnis per Dei gratiam cunctis diebus vitæ suæ ita liberam extitisse, quòd nec una quidem vice turpi aliqua cogitatione in anima pulsata fuerit, quam imaginari atque confingere se nescire, etiamsi veller, constanter affirmavit. Verùm sorores, quibus talia referebat, plurimùm admirantes beatam illam dixerunt ob tantam illius munditiæ puritatem. Ipsa autem tam excellens Dei gratiæ donum continuò ad humilitatis sibi retorfit meritum dicens: *Nōsse debetis in veritate, quoniam ex virtute Castitatis meæ non procedit, quòd ego ignoro de turpibus cogitare, sed est potius quædam animi mei stoliditas.*

Siquidem in ipsius pectore mundissimo ab infantia Sancto Spiritui dedicato, requievit idem Spiritus universæ consolationis, replevit animam illius splendoribus, inebriavit eam nectare suavissimæ contemplationis. Ideoque nihil aliud sibi sapuit in loco peregrinationis suæ, nisi memorari misericordiæ Dei solius, illique totis affectibus inhærere. Nec mirum.

mirum. Gustato enim Spiritu desipit omnis caro.

Præterea sedebat in Laborerio quodam tempore ad laborem, & tanta mentis dulcedine, spiritûs suavitate ac cordis jubilo subito perfundebatur, quòd se ipsam continere non potuit, sed prorumpens apertè in vocem exultationis & lætitiæ dixit: *O quàm benè est mihi modò cum Deo salutari meo! Videor enim jam in Paradiso Dei esse, conjuncta cælesti agmini Angelorum.* Sic benignus Dominus, qui non privabit bonis eos, qui ambulant in innocentia, de torrente voluptatis suæ ebriam illam valde fecerat ac potârât. Requisita ergo postmodum à Sororibus, utrum cor suum interdum in orationibus suis à se evagando ad cogitationes inutiles laberetur, eis ita respondit: *Ego in memoria suavitatis divinæ adeò semper afficior, illuminor ac delector, quòd illà nunquam satiari potui in vita. Idcirco ad vacandum cogitationibus vanis otiosisq; tempus minimè mihi restat, nec etiam menti meæ, nisi rarissimè, ap-*

*propinquant, quas de facili abigere prae-
valeo per gratiam Salvatoris.*

Habuit quoque incessanter studium orandi singulis diebus, dicens per multos annos Psalterium per totum, etiam cum officiorum occupationibus plurimis & diversis, in quibus se amabilem ac benignam exhibuit Sororibus universis. Denique appropinquante die mortis suae posita in agonia & sudore lethali, cum jam ultimum traheret spiritum, sororibus ibidem praesentibus & inspicientibus continuo, exhilarata facie ridere intimè coepit dicens: *O quantis dolorum aculeis nunc fatigor, & quàm benè & optimè etiam modò mihi est, habens bonam spem, magnamq; fiduciam de Domini pietate, quòd mox hujus gravi carnis sarcinâ depositâ ad ipsum sine dilatione pervenire debeam!* Sicque beata anima illa corpore resolvitur, videbitque in sempiternum bona Domini in terra viventium, quae sollicitè quæsivit in praesenti, ardentique animo concupivit.

CAP.

CAP. XXXI.

De felice Sorore Anna de Wineck prædulcis memoria.

Dilecta Deo & Venerabilis Soror Anna, dicta de Wineck, cujus memoria in benedictione est, nobilis erat genere valde, sed fide virtutibusque multò præclarior, à cunabulis divinitus inspirata, sanctitate & gratiâ plena. Hæc nondum à nutricis diligentia segregata, sæpe deprehensa est lectum dimittere, & in orationibus pernoctare. Subinde ad primam diei horam de lecto surgens, associata nunc parentibus, nunc sola, concita ad Ecclesiam properabat, ubi tamdiu in orationibus perstitit, multis genuflexionibus prostrationibusq; corpus suum affligens, donec mente sæpius defecit, corruitque velut exanimis super pavementum. Hujus mater, quæ illam præ omnibus liberis suis arctiùs dilexit, retinere

eam manè in lecto nitebatur, occludens cubiculi ostium & fenestras, in quo jacuit, diligenter obturavit, ne lumen diei de foris subintraret, & ita tali arte vix retenta, in cubiculo diutiùs pausaret.

Nempe in ætate puellari operibus pietatis devotè insistens, pauperibus, cæcis atque claudis, quos in platea obvios habuit, cum gaudio occurrens, deduxit illos per manus, quò volebant. In his humanitatis & humilitatis obsequiis præcipuè delectabatur, ludos fugiens puerorum, cæteraque vitia, quibus illa ætas implicari solet, sollicitè declinavit. Quam benignus Dominus, antequam aliquid mundanum ejus illaberetur animo, de vanitatibus sæculi extraxit, & in viridarium suum, sanctum scilicet Monasterium sub Tilia, manu sua piissima transplantavit, ubi inter albescentia suaviterque ibidem fragrantia lilia, tanquam flos rosarum in diebus vernis mirabiliter effulset, odorem depromens suavitatis.

Mona-

Monasterium mox ut ingressa fuit, in primævo ætatis suæ flore perfectionis viam arripuit. De virtute in virtutem mira celeritate progrediens, tantâ charismatum eminentia emicuit, ut universæ Sorores affectu vehementer gratularentur. Sicut enim lucerna splendens super candelabrum sanctum, ita in congregatione sanctarum Sororum singulariter radiavit exemplis eximiæ sanctitatis. Habebat sanè mirabilem gratiam tam apud Deum quàm apud Sorores omnes, quam mirabantur valde & intuebantur vultum ejus tanquam vultum Angeli stantis inter illas. Repleta namque fuit consolatione divina, abundans gaudio, semper hilaris, fervens spiritu, die ac nocte in lege Dei meditans, crebrò in cœlum suspiciens, puras manus in oratione levans, sollicita nimis conscientiae suæ observatrix.

Ad omnia vitæ hujus sancta exercitia non solùm ambulavit, sed & cucurrit, ut labores jejunii, vigiliarum Ordinisque observantiæ leves

ipsi atque dulces forent , & universa denique vitæ hujus austeritas sibi refrigerium videbatur. Totis affectibus dilexit Deum , qui fecit illam, laudans ipsum de omni corde suo in prosperis & adversis. Nempe suavitate morum conspicua fuit valde, nec alicujus Sororis animum verbo aut facto aliquando exasperavit, sed omnibus extitit obsequiosa benevola ac benigna , oculisque omnium gratiosa.

In sublevandis infirmarum debiliūque Sororum necessitatibus compatiens & misericors erat nimis, quibus pia sollicitudine studioque indefessò jugiter intendebat. Nec modò eis sedulò serviebat, sed ægroantium immunditias putredinesque ita dignanter & diligenter propriis manibus attrectabat, ut Christi fovere vulnera putaretur. Et verè sic erat, quia quidquid uni ex minimis suis exhibitum fuerit, hoc sibi reputat esse factum Matth. 25.

De quibus tres Sorores infirmas, quas sub cura speciali sollicitudineque susce-

fufceperat, proferamus in exemplum. Quarum una caduco morbo miserabiliter ab infantia laborabat (cujus vultum, ejusdem morbi violentia horribiliter deformaverat) sensu menteque privata. Cui hæc Dei famula devotè semper usque ad ejus obitum deservivit, sordes & immunditias infirmitatis ipsius manu propria contrectans diligentissimè abluebat. Quam etiam in ipsa hora, quando idem morbus eam arripuit, spumantem & ejulantem in sinum suum reclinavit, materno affectu eam fovens, donec dolore cessante sui compos efficeretur. Verùm post mortem hujus ægrotæ fatebatur secretiùs, quibus voluit, dicens: *Nunquam petii aliquid à Domino JESU Christo in habitaculo prædictæ infirmæ Sororis, quod non continuò assequerer juxta votum.*

Alteri quoque infirmæ Sorori, quæ præ nimia senectute mentis rationem similiter amiserat, piâ curâ, quàm diu vixit, & sollicitudine ministravit. In cujus transitu audire meruit

ruit corporeis auribus voces Angelorum suavi melodiâ in æthere personantium, & ipsius defunctæ Sororis animam ad beatitudinis requiem cum gaudio deferentium.

Tertia verò ægrotans Soror, cui etiam, quàm diu vixit, devotè servivit, fuit hydropica. Venter ipsius horribiliter intumuerat, jacens paralytica multis annis. Huic cùm hæc sancta Soror, de qua loquimur, propter Deum sedulò ministraret, accidit ipso Domino permittente, quòd eadem paralytica (quamvis & ipsa procul dubio sancta foret) ad tantam deveniret impatientiam præ acerbitate diutinæ infirmitatis; ut nullum sibi ejusdem servitricis suæ obsequium complaceret. Nec aliquid poterat ei pacificè loqui, sed convitiis eam sæpissimè objurgabat. Cumque talia opprobria sibi ab ipsa illata diu patientissimè sustinuisset, timens tandem, quòd illa languida Soror per impatientiam suam Deum graviter offenderet, accepit licentiam à Priorissa, & dans locum iræ recessit

fit ab ea. Moxque ut Sororem illam deseruit ægrotantem, sensit protinus sibi subtrahi & auferri omnem cœlestis dulcoris & gratiæ abundantiam, qua ante ad omne opus bonum promptissima reddebatur, & ad tantam gratiæ inopiam devenit, quòd vix aliquid boni absque gravi tædio facere prævaleret. Quod ubi advertit, ultrà quàm credi potest, obstupuit, anxie cum maxima cordis amaritudine intra se quærens causam tanti mali. Cumque nullius peccati conscia sibi foret, inspirante Deo cognovit, hæc se idcirco pati, quia infirmam illam Sororem reliquerat. Tunc festinanter recurrit ad Priorissam rogans, ut eandem sibi infirmam Sororem iterum committere dignaretur. Quo facto statim ut curam illius agere cœpit, repente solitâ gratiarum affluentiam in animo illustrabatur, quam paulò ante amissam inconsolabiliter deplangebat.

Hujus igitur Sororis beatæ exemplo salubriter admonemur, ne curam

ram infirmantium , quam propter nomen Domini & obedientiam suscepimus , ob amarius verbum deseramus, & inde incurramus offensam Domini, unde magnum possumus præmium promereri. Eadem Soror beata, Anna de Wineck desideravit multo tempore & ardentè in quodam Hospitali infirmis propter Dominum perpetuò deservire. Verùm quoniam corporaliter perficere illud non potuit, supplevit tamen piæ devotionis affectu, construens in mente tria Hospitalia, in quibus tria genera hominum collegit, scilicet peccatores, qui sunt in Mundo. Deinde illos, qui ex variis eventibus in mortis sunt periculo constituti. Postremò defunctos, qui in pœnis purgatorii justo Dei judicio cruciantur. His ita in spiritali mentis ædificio diligenter congregatis, cœpit eis orationum suarum suffragiis indefinenter succurrere ac subvenire, visitans illos orationibus ardentissimæ devotionis primò, quando de nocte ad orationem surrexit,

Præ-

Præterea etiam habuit aliam mirabilem valde devotionis consuetudinem, gratam Deo procul dubio & acceptam. Intravit namque singulis annis, videlicet in die sancto Parasceves, chorum, & ibidem flexis genibus oravit ad Dominum in hunc modum: *O Domine Deus, Clementissime Pater, suscipe hodie de manu ancilla tua sacrificium laudis, quod tibi offert devotio mea, piisq; oculis illud respicere digneris. Offero enim tibi misericordissime & Serenissime Domine, qui bonorum meorum non indiges, siquid dignum ex tua gratia per istius anni spatium tibi deservivi in Ordinis observantiis, quotidianis orationibus sacrisq; meditationibus, & omne deniq; quod ex piissima manu ductione tua benè operata sum, rogans ex intimis meis, quod quibuscunq; volueris, vivis aut defunctis, illud impertiri digneris, etiam me solâ inde exclusâ, si hoc tua placuerit bonitati.* Hanc consuetudinem firmiter in vita sua tenuit, offerens Domino, ut dictum est, bonorum operum suorum laborem

borem in holocaustum gratuitum annuatim. Cumque totum, quod habuit de divinis operibus, in Gazo-phylacium Domini obtulisset, novo mentis desiderio mirabiliter inardescens, coepit manum mittere ad fortia, laborando studio indefesso pro coelestium divitiarum opibus denuo comparandis, & priores labores, quos in divino desudavit servitio, nec momenti alicujus reputavit. Sicque Soror illa beata spiritualis pulchritudinis studium gerens profecit per, vitæ sanctæ exercitia in immensum, thesaurizans sibi in futuro thesauros ineffabilium præmiorum.

Præterea cilicium, quàm diu secretum esse potuit, ad carnem portavit, præcingens se quoque super nudo fune magno, & etiam catena ferrea, sub quibus carnibus corporis sui incisus undique & corrosus sanguis ubertim de vulneribus emanavit. Singulis quoque noctibus accipiebat manu propria de quadam catena ferrea & interdum de corrigiis nodosis

sis unam disciplinam, quibus innocens corpus suum usque ad sanguinis effusionem crudeliter laceravit.

Denique in oratione sua fervida & lachrymosa sæpe rugiebat à gemitu cordis sui, nec se continere valuit, quin devotissima vox plangentis eminus audiretur. Sanè inter alias plurimas orationes, quas Domino sincero corde quotidie offerebat, mille, sæpius duo millia *Ave MARIA* singulis diebus devotissimè oravit, nulla die usque ad obitum suum prætermittens ad honorem virginis gloriosæ, cui piæ venerationis obsequium sedulò exhibebat.

Fuit quoque miræ puritatis, & immunis prorsus à contagione peccati, quantum humanæ fas est fragilitati, ab utero matris suæ usque ad diem mortis retinens innocentiam munditiamque hominis utriusque, nec alicujus lethalis criminis unquam sensit contagium, quemadmodum Confessarii sui ipsi testimonium perhibebant. Unde cùm quadam die manè generalem Confessio-

nem facere decrevisset, videbatur sibi in nocte præcedente per somnium, quod vomitu laboraret, evomens tamen nihil aliud quàm lac pernitidum atque dulce. Itaque ex prædicto somnio liquidò potest considerari munditiæ illius puritas admiranda.

Huic quoque beatæ Sorori contulit mira pietas Conditoris donum mirificum & gloriosum valde. Stabat namque quodam tempore in oratione & repente ipse Deus omnis gratiæ effudit super eam tantam coelestis gratiæ affluentiam, omnino sibi antea inexpertam, interiora animæ illius unctione suavissima perungens, quòd se totam suavitate sensit ineffabili delibutam. Et hæc revera non ad momentum fuit ipsi divinitus collata, sed duobus continuis annis & dimidio eòdem nectare supernæ dulcedinis & gratiæ jugiter recreari meruit ac renovari. His igitur supernis visitationibus jugiter tanto desiderio inhiabat, totaque absorpta in spiritu fuit, ita quòd omnis

cor.

corporalis cura & refectio in fastidium sibi gravissimum vertebatur. Hujus tandem coelestis gratiae inspirationem subito perdidit ex eo, quòd permodicum vini melliti seu musti, de torculari allati, potum quadam amica familiaritate, per quandam Sororem compulsam, absque necessitate sumere praesumpsit, &, ut postmodum fatebatur, potus illius dulcedine etiam aliquantulum illecta consensum praebuit. Verum tamen praedictae gratiae suavitatem continuis precibus lachrymisque profusis ulterius minimè recuperare potuit. Itaque summam vigilantiam cavendum est his, quibus Dominus singularis gratiae affluentiam gustumque supernae dulcedinis indulserit in praesenti, ne continentiae & parsimoniae modum quomodolibet transgredi praesumant, ac per hoc donis sibi coelestibus misericorditer indultis in posterum priventur.

Porro Soror quaedam nostri Monasterii rogavit ipsam multam precum instantiam, ut Dei misericordiam ob-

nixiùs interpellaret pro matre ipsius, quæ extrema jam unctiōe fuerat inuncta, quòd ipse Dominus vitam ei dignaretur adhuc concedere, & salutem. Qua orante, vox divina corporeis auribus ejus insonuit dicens: *Exaudita est deprecatio tua, adjiciamq; dies & annos ad vitam illius matronæ, pro qua postulas, videbitque filios filiorum suorum.* Quod sequens postea probavit eventus. Nam viginti ferme annis postmodum supervixit, relinquens post se filios & nepotes.

Quamvis beata illa Soror in silentii observatione sollicita fuerit nimis, nunquam transgrediens & infringens legem silentii in vita sua, tamen cùm gratiam illuminantem, se minùs solito habere conspexit, strictissimum sibi ipsi silentium indixit, tanquam os ad loquendum, & aures ad audiendum non haberet, sicque omnes corporis sui sensus mortificavit, donec ad novam accendebatur gratiam illuminabatur in anima, gratiarum stillicidiis largissimis perfundebatur sic.

ficque in silentio & spe posuit fortitudinem & fiduciam suam. Ideoque à divina clementia citissimè obtinere meruit gratiam, quam quæsivit. Peracto demum laudabiliter cursu vitæ in pace in id ipsum obdormivit, stollam immortalitatis accipiens à Domino nostro JESU Christo, cui est honor & gloria per infinita sæculorum sæcula. Amen.

CAP. XXXII.

De Sorore Tuda de Columbaria beatæ memoriæ.

FELICIS recordationis Soror Tuda de Columbaria honestam & laude dignam vitam egit in sæculo, honorata filiis, consanguineis & amicis, possessionibusque abundans & divitiis copiosis. In senectute sua divinitus inspirata sæculum deserens ad Religionem sub alas sanctissimi Dominici in nostro Monasterio convolavit, in sinceritate spiritûs die ac nocte infatigabiliter deserviens

Domino Creatori. Cui Dominus inultas revera & magnificas de coelestibus consolationes & gratias in vita sua contulit admirandas, de quibus quædam, admodum pauca, ad devotionem legentium excitandam breviter intimabo, quemadmodum accepi narratione fidelissima Sororum, quæ hæc ab ipsa, dum vixit, secretiùs didicerunt.

Quadam nocte vigilanti & oranti in dormitorio apparuit illi visibiliter Dominus JESUS cum MARIA Matre sua, Virgine gloriosa, decore gloriæ ineffabiliter refulgentes. Quos ut vidit, subito per Spiritum adesse agnovit Dominum Salvatorem, & ipsius Domini Matrem sanctissimam. Ad tantæ nimirum dignationis præsentiam continuò mirâ suavitatis dulcedine perfundebatur, illustrabatur in animo, totaque liquefacta est igne divini amoris, quem ipse Dominus in corde illius accenderat vehementer. Tum benignissimus Dominus, qui ipsi apparuit, increpatione mississima pulsavit eam dicens: *Tu non
ita*

ita patienter & latanter portas crucem tuam , sicut olim fecit Andreas discipulus meus dilectus , sed potius remurmurando invita suffers illatas tibi molestias & adversa. His dictis visio illa coelestis continuò finita est, sed magnitudo conceptæ devotionis in corde illius deinceps finiri non potuit. Nempe huic correptioni divinæ non ingrata, devotissimè semper gratias agens Deo, mansuetudinis ac patientiæ studium ex tunc omni vigiliantia gerebat.

Altera die sequenti, cùm in contemplatione ardentissimæ devotionis valde suspensa staret, sonitum deambulantis audire cœpit, neminem tamen vidit. Unde inquirens ait: *Quis es tu?* Et facta est vox ad eam dicens: *Ego sum idem ipse , qui hesternæ noctis tempore apud te fuit apparens tibi.* Ipsa verò ex piissimi Conditoris præsentia continuò repleta est omni plenitudine spiritualium gratiarum, ex qua infusam quoque sibi copiosè persensit sanctarum intelligentiam litterarum, cujus ante omnino ignara

erat, nec ab homine aliquando literas didicerat. Mirifico autem hujus gratiæ dono per duorum continua annorum spatia potita est. Post hæc causâ verbi unius, incautè ab ea per arrogantiam prolata, mox eâdem gratiâ sibi præstitâ misericorditer à Domino privata est, qui *superbis resistit, humilibus autem dat gratiam*. Dixit namque quadam vice Sororibus valde dulciter colloquentibus de divina consolatione & præcipuè de speciali gratia, quam Dominus nuper cuidam Sorori contulerat, ita respondens: *Talis gratia etiam hominibus non multùm bonis assolet frequentius evenire*. Statim ut illud verbum solum de ore suo emisit, spoliata se sensit illo divino munere, quo perspicaci intellectu usque ad illam horam ac dilucidò intellexit, quicquid in divino officio, seu in lectionibus mensæ quotidie legebatur. Sanè lux divinæ gratiæ, qua illam Deus mirabiliter illustrârat, sicut præmisimus, nunquam tamen defuit cordi ipsius.

Præ-

Præterea alio quodam tempore rapta fuit in excessum mentis, ac duce gratia videre meruit gaudia cœlestia, adeò quidem mira & ineffabilia, quòd nullus sermo sufficeret enarrare: quibus in tantum delectabatur, totaque in Deum absorpta est, quòd seipsam corpore exutam credidit, ac æternaliter fruituram fore illa felicitate & dulcedine, quam gustabat. Tunc incidit illi repente cogitatio, quòd extremam unctionem minimè percepisset. Et dum hoc mente quasi in puncto revolveret, continuò corruptibilis vitæ motibus & sensibus se vallatam sentiens tantam beatitudinem nondum ad fruendum sibi collatam, sed ad excitandum in se cœleste desiderium prærogatam esse agnovit.

Orans quadam die devotissimè infra Missarum solennia pro filio suo naturali graviter ægrotante, vidit visibiliter in ipsa hora, qua sacerdos immolabat sacrosanctam hostiam Patri, dictum filium suum, tanquam in ipsius præsentia esset positus, spi-
ritum

ritum exhalare. Tunc commota sunt materna viscera illius super eum, & prorupit in clamorem & ejulatum immensum, eò quòd tenerrimè diligebat eum. Sororibus verò accurrentibus, causamque tanti fletus sciscitantibus, respondit: *Noveritis filium meum jam hâc horâ de corpore migrâsse.* Quibus contradicentibus illa constanter affirmabat, quòd viderit oculis suis. Miserunt autem nuntium in civitatem, ut perquiret rei veritatem. Qui veniens invenit eum eâdem horâ, ùt illa prædixerat, exspirâsse.

Fertur quoque orâsse ad Dominum pro filio suo alio, qui in malo statu fuit, vivens diu contra animæ suæ salutem, ut illum ipse Dominus de præsentis eriperet vita, si sciret ipsum perseveraturum obstinato animo in peccatis. Cujus preces misericors Dominus illicò exaudire dignatus est. Mox enim, ut orationem finierat, febris peremptoria eundem filium suum arripuit, & in brevi de medio sublatus est. Fuit enim procul

cul dubio sancta ejus oratio magnæ efficaciam & virtutis, per quam de facili à benignitate Domini impetrare valuit, quod petebat.

Cæterum sancta illa Soror demum vinculis corruptibilis vitæ absoluta migravit ad Dominum, omnium Salvatorem, qui est benedictus in æternum & ultra.

CAP. XXXIII.

De B. Sorore Gertrude de Rhinfelda bonæ memoriæ.

Venerabilis ac Deo dilecta Soror Gertrudis de Rhinfelda octennis à parentibus divino officio* mancipata, in Monasterio sub ** forte: servitio.* Tilia Ordinis B. Dominici, almi Confessoris, innocenter & religiosè degens, sub regulari tramite ab infantia usque ad senectutem suam strenuè & devotè Domino militavit. Literis quoque valde benè & competenter imbuta, scribendique tenens officium, multis annis libros Chori ad divi-

divinum officium pertinentes , & alios quàm plures magno studio & eleganter nimis conscripsit.

In his ergo cæterisque hujus Monasterii necessariis , & præcipuè in literarum dictamine , in quo plurimum excellebat , quàm diu vixit , ad communem utilitatem sollicitè laborare non destitit. Cujus manus dextera , quâ etiam scribere solebat , instar claritatis Solis mirabiliter refulgens , demonstrata divinitus est matri suæ carnali , Sorori istius Monasterii valde devotæ , cujus superius * fecimus mentionem. Quæ novitate miraculi hujus non modicùm stupefacta ex claritate cœlitus ostensæ sibi manûs veraciter intellexit ejusdem filiæ suæ laborem , quo in scribendo sedulò desudavit , gratum multùm & acceptabilem Deo fore.

* Cap.
XXIII.

Denique huic Sorori Beatæ Gertrudi , de qua loquimur , magnam consolationis gratiam contulit quodam tempore immensa benignitas Conditoris. Adveniente nempe aliquando festivitate sacratissima Natalis

talis Domini, ipsa noctem illam sanctissimam in Dei laudibus & orationibus ardentissimæ devotionis pervigilem ducebat. Matutinarum quoque solenniis assistebat, psallens tota animi alacritate atque vigilantia sacras illas vigiliis peregit in pinguedine spiritûs & fervore. Inchoato verò Responsorio Missæ, in nocte illa secundum morem celebrandæ, videre cœpit repente lectum pulcherrimum, in medio Chori positum, ornamentis optimis decoratum, in quo residebat singularis illa puerpera, & tanta venustate, tantaque claritate vultûs & habitûs radiabat, ut ex fulgore de ipsa procedente, totus Chorus mirabiliter coruscaret. Fovebat quoque in gremio parvulum suum, benedictum fructum ventris sui, pannis infantilibus involutum, qui ita corpore exiguus apparebat quasi eâdem horâ nuperrimè esset natus. Igitur ad tam gloriosum spectaculum illa, quæ hæc beatis oculis suis videre meruit, mira suavitatis dulcedine & gratia continuo perfun-

perfundebatur , & tota in jubilum cordis rapta est. Porro eadem apparitio tam diu duravit, quousque idem Responsorium morositate solitâ à sancto conventu usque in finem valde solenniter cantabatur.

Eadem Soror scire plurimùm desideravit, veritatem illius Verbi, quod B. Augustinus dicit, quòd omnia membra hominis post Resurrectionem fulgebunt sicut Sol in regno Dei, & ipsius laudes pariter resonabunt. Cujus desiderium benignus Dominus exaudivit. Nam cum Antiphona illa: *Adest dies celebris*, in festo ejusdem Sancti in Choro valde solenniter cantaretur, subito in stupore & extasi posita veritatem illius verbi, quod dictum est, qualiterve implebitur in futuro, scire & intelligere veraciter meruit & experiri. Quo facto statim ad se rediit, & certitudinem hujus Mysterii, quemadmodum acceperat, postmodum verbis expressis minimè potuit explicare.

Deinde oravit multo tempore
valde

valde devotè pro quodam viro Religioso, qui, ut ipsa firmiter credidit, fuerat falsò de crimine accusatus. Ex corde illi compatiens miseratione super eum plurimum movebatur. Cumque orationes plurimas, nimiumque profectò laboriosas ac difficiles pro illo diutiùs peregisset, accessit quadam die tempore Paschæ retrò Altare, atque ibidem pro ipsius salute & liberatione de instanti infamia preces valde importunas ad Dominum fundere non cessavit. Tunc subito audivit desuper vocem terrificam instar quidem tonitruum magni terribiliter intonantem & dicentem : *Vis omnino : quòd exaudiaris ?* Ad hanc vocem illa exterrita valde & compuncta commisit omnem illam causam humiliter divinæ voluntati. Quo factò denuo audivit corporeis auribus vocem blande leniterque dicentem sibi : Amodo certa esto, quoniam ego orationes tuas & lachrymas exaudivi, & ille, pro quo postulas, salvabitur. His itaque divinis à Deo perceptis consolationibus

nibus & responsis, ineffabili gaudio replebatur, immensas deinceps gratias divinæ referens bonitati.

Denique beata illa Soror ad ultimum, cursum vitæ suæ fine laudabili consummavit, hominem exuens mortem perdidit, & vitam invenit. Hæc quoque per annos ferme quindecim, priusquam discederet, tempus obitûs sui prædicere consuevit, videlicet quòd circa vindemiarum tempus in autumno foret de corpore migratura: sicque per idem tempus obiit, ut prædixit.

CAP. XXXIV.

De felici Sorore Sophia de Rhinfelda.

Nunc inferere huic attentabimus operi Sororem dulcis memoriæ nomine Sophiam de Rhinfelda, quæ ab ipsis infantia rudimentis divinis obsequiis dedicata, & in sanctuario Domini, Monasterio sub Tilia locata, virtutum multâ

multâ gloriâ florens jugum Domini
suave & onus ejus leve usque in
finem vitæ suæ infatigabiliter porta-
vit.

Miræ puritatis ac innocentiae gra-
tiâ pollebat, ab omni peccati con-
tagione divino munere â pueritia
usque ad obitum suum mundissima
conservata, nec lethalis criminis ali-
quando sensit contactum, secundum
suorum Confessariorum testimo-
nium. Unde peccatum suum, quod
pejus graviusque cæteris æstimavit,
cuidam Sorori in hæc verba tristis
referebat dicens: *Concupivi aliquan-
do in seculo, simplicitate tamen puerili,
ornari aureis ornamentis, vocariq; ab
omnibus Domina, quemadmodum puel-
la nobiles, quando nuptui tradeban-
tur.* Istam autem cogitationem so-
lebat postea semper in generali con-
fessione nimis dolenter & cum ma-
gna verecundia confiteri. Hæc id-
circo dixerim, ut munditiæ ipsius
innocentia singularis comprobetur,
& Deus in fidelibus suis, quoniam bo-
nus est, laudetur perpetuò & ametur.

Denique in observantiis Ordinis valde sollicita extitit & devota, Conventum sequens in omnibus, in Choro & in Refectorio, quamvis ipsa pulmentum de olere, quod solum diebus illis Sororibus apponebatur, omnino gustare non valeret, sed sic cum tantum panem frequentissime edens, & illo humillimo & tranquillo animo contenta gratias egit Deo. Rarò namque tunc temporis ova, rariusque pisces in Refectorio videbantur. Verum tamen tantæ necessitatis ac penuriæ inopiam cum cæteris sanctis Sororibus ipsa in primævo tempore propter spem, quam in Deum habebat, patientissimè sufferebat: Quod tamen valde laudabile in illa fuit, eò quòd nimis delicatè in sæculo fuerat enutrita, nimirum de parentibus nata multum locupletibus & generosis, quorum felicem memoriam superiùs * brevi sermone expressimus & succincto.

* *Cap. 23.*

Sanè inter cæteras animi ipsius virtutes, humilitatis atque obedientiæ gratiam in ea vidimus admirandam,

dam, ita quòd nec uno saltem verbo excusationis ad obediendum difficilem unquam se exhibuerit, sed absque contradictione voluntati in omnibus paruit imperantis.

Denique in ipsius obitu grande miraculum benignus Domin⁹ ostendere dignatus est. Cùm enim in extremis jaceret, mortisque signa evidenter apparerent, corpusculi ipsius resolutionem imminere nuntiantia, legerunt solito more devotæ Sorores continuò lytaniam. Tunc ipsa, nesciò, quid ineffabile de superna dulcedine, ad quam sine fine fruendam in proximo admittenda erat, prægustare meruit. Qua gustatà, tanquam musto cœlesti inebrieta, protinus erupit in jubilum preconii cœlestis, serenata facie quosdam hymnos & modulos delectabiles cantare cœpit per aliquanta horarum spatia de Deo ac Virgine gloriosa. Facta autem hac voce convenit multitudo Sororum videre cum grandi miraculo Sororem illam beatam in ipso mortis accessu sic tri-

pudiantem & psallentem , cui tandem potum aquæ refocillandi gratiâ offerebant. Quibus illa respondit: *Ego in presenti vita de cætero non bibam, donec de fonte vitæ bibam æternaliter in futuro.* Ad ultimum verò, resolutionis ipsius hora jam jamque imminente , indefinenter modulatis vocibus *Amen* dicere non cessavit. Requisita ergo à Sororibus, cur id solùm toties repeteret, respondens ait: *Fam loqui non valeo, neq̃, quàm diu vixero, psallere desinam, idcirco Amen sic repeto modulando, quatenus per hoc illud, quod mente de cælestibus concepi, modo exprimere valeam aliquali.* Sicque lætabunda & psallens beatam animam exhalavit felici absorptione in abyssum æterni luminis sine fine perpetuò absorbenda. Quam post obitum suum infra diem tricesimum quædam devota Soror in lecto suo quadam nocte quiescens, & tamen benè vigilans, splendore immensi luminis circumdatam coram lecto suo propiùs assistere conspexit, vultum illius in eodem splen-

splendore per aliquantulam horam
diligentiùs intuens & agnoscens. Mox
verò discedente lumine illa defuncta.
Soror simul disparuit coram oculis
hæc videntis.

CAP. XXXV.

*De duabus Sororibus feli-
cibus uterinis, scilicet Mechtilde
& Agnete de Apiaco.*

DUæ dilectæ Sorores, in quas
Deus omnem plenitudinem
contulit spiritualium gratia-
rum, videlicet Mechtildis & Agnes
de Apiaco*, ejusdem loci vocabu-
lum ambæ pariter sortitæ, in primæ-
vo ætatis suæ flore venerunt ad Mo-
nasterium hujus sanctæ Congregatio-
nis, vitamque ibidem per omnia
laudabilem peragentes, quasi duo
coeli luminaria floruerunt. Chari-
tate quoque mutua animis suavissi-
mè colligatæ, utpote quibus non so-

R 3

lùm

* Apiacum, vulgò Effich / pagus Alsatia.

lùm natura originis , verùm etiam unanimitas Domino famulandi germanitatis affectum multò effecerat dulciorem. Erant enim in divinis exsequendis promptæ & alacres nimis, tantâ piæ sollicitudinis instantiâ nocturnum in Choro officium & diurnum , quod morositate magna valde à Sororibus quotidie peragitur, frequentantes, quòd stupori & admirationi esse quidem poterant omnibus, vix verò imitationi. Finitis denique Matutinis & Completorio , per longissimum quotidianumque illius temporis spatium, quod conceditur Sororibus usque ad signum sacris ad vacandum meditationibus & orationibus privatis, illæ interim in precibus lachrymisque devotis immobiliter perseverantes, nulatenus de Choro ante signum propter hyemis algorem asperrimum, seu æstatis ardorem nimium discesserunt. Similiter Dominicis diebus omnibus & festivis faciebant, sine intermissione orantes, divinam misericordiam devotissimè implorabant,

bant, nunc diutissimè stando, nunc genua flectendo, nunc verò in faciem se humiliter prosternendo. Exceptâ horâ refectionis, in oratorio jugiter commanebant. Unde & Chorus, cui nunquam deerant, quam diu illis licuit, præcipua ipsarum devotione & præsentia veneranda videbatur optimè adornari. Gerebant procul dubio sollicitudinem jugiter de coelestibus & æternis, præsentium rerum affectum penitus resecantes, solo divini desiderii calore constriktæ, & ideo in Dei laudibus positæ die ac nocte non poterant satiari. Nimirum agentes vitam Angelicam super terram, veræ Religionis extiterunt in vita sua speculum & exemplar.

E quibus una, Mechtildis nomine, ab utero matris suæ corpore debilis & contracta duobus baculis sustentata incedens, nulli tamen in observantiis districtissimæ vitæ inferior fuit, observans integrè & perfectè in vita sua omnia Ordinis instituta, sequebatur Conventum in omnibus & ubique. Sanè incredibili vigilia-

rum & orationum labore supra modum & continuè afflixit debile corpus suum, pernoctando frequenter in orationibus, lachrymisque devotis. Ad Matutinum nihilominus stans devotè & alacriter psallens vociferata est usque ad cœlum. Dederat namque ei Dominus vocem magnam nimiumque suavem, quam fideliter expendere curavit in servitio largitoris. Fuit quoque cantrix incipiens in Choro annis triginta & ultra ex iuncto sibi officio, cui summâ vigilantia continuè intendebat, circuiens sedulò utramque partem Chori, tam in nocturno officio, quàm in diurno, excitando ac sollicitando Sorores non tam verbis, quàm exemplis, ut altè solenniterque canerent psalmodiam. Cæterarum autem negligentias & defectus cautè prævenire ac supplere ipsa cura pervigili satagebat, ita quòd omnia in Choro dicenda seu cantanda valdè ordinatè & expeditè absque quolibet defectu tunc temporis perficiebantur. Unde Sorores universæ, quæ eam in carne viderant, adhuc

huc beatam ipsius memoriam dignis laudibus prosequuntur.

Tanti fervoris & devotionis extitit ad Deum, quòd sæpissimè in orationibus suis rugiebat à gemitu cordis sui, nec continere se posset, quin devotissima vox fletuum ipsius eminus audiretur. Erat enim oratio ejus fervida & lachrymosa, ita quòd solum binæ pupillæ oculorum ejus raro quiescerent, sed tanquam de gemino fonte lachrymæ erumpentes ferè ubique in orationibus suis ipsius faciem irrigarent. Idcirco caligaverunt oculi ejus à fletu in tantum, quòd in libris legere vix poterat. Denique certitudinem salutis suæ perpetuæ ante obitum suum accepit per responsum cujusdam hujus Monasterii Sororis valde devotæ & sanctæ, cui Dominus hoc revelare misericorditer dignatus est.

Cæterùm cùm beata illa Soror Mechtildis in extremis laboraret, cum magna loquebatur confidentia dicens: *Ego luctam hanc mortis pœnamque purgatorii non timeo, vivere ta-*

men, si Deus concesserit, desidero & exopto, ut passionem ejus sacratissimam lachrymarum compassione defleam ampliori, serviamque illi aliquantulum diutius studio propensiori. O beatam Sororem, & in die obitus sui benedictam, quæ mortis acerbitem, dæmonumque crudelitatem non expavit, sed confidens de misericordia Dei ad mortem fiducialiter properavit!

Germana autem ipsius Soror Agnes, bonorum certè memoriâ digna, in officio bis extitit Supprioratûs, in quo quàm modestè & religiosè se habuerit multis annis laudabiliter, nimisque utiliter laborando, non facilè dixerim. Erat namque mansueta valde & matura in omnibus actibus suis, & omni denique morum elegantia & virtutum tam in naturalibus, quàm in gratuitis mirabiliter excelebat. Quæ quamvis miræ puritatis & innocentia à pueritia extiterit, nec mortalis peccati aliquando maculâ contaminata secundum suorum testimonium Confessoriorum,

rum, incidit tamen illi in primordio conversionis suæ quædam diffidentia impugnatione adeò gravis, quòd penè in desperationem lapsa, metuens æternis suppliciis ex occulto Dei judicio se post suum obitum deputandam. Igitur sub pondere hujus tentationis tota die contristata incedebat. Augebatur namque indies hujus molestissimi conflictûs angustia, nec invenit requiem. Intravit itaque quadam vice Chorum, & coram altari ad orationem se contulit, & quasi præsentem Dominum cerneret, cum multis lachrymis & singultibus ex immo cordis sui erumpentibus, taliter Dominum compellare cœpit dicens: *Benignissime Domine, qui contritorum non despicis gemitum, & mærentium non spernis affectum, qui miseras & necessitates miserorum non superficietenus, sed de ipsa radice miseriæ pensas, pie Domine, miserere mihi misera, succurre in angustia posita, consolare mærentem, & plue mihi mitigationes in cor, ut ad spem venia & salutis valeam*

leam respirare. Si autem (quod absit à te mitissime Domine) in finem iratus reservare decrevisti mala mea, & oportebit me perditum iri, nunquam tamen avertam cor meum à charitate tua, nec minùs seu negligentiùs tibi serviam in eternum. Vix verba piæ devotionis compleverat, & ecce continuò se mirabiliter consolatam à Domino persensit: jamque multò firmiorem spem ac certitudinem de salute animæ suæ habuit, quàm priùs dubitaverat, ita deinceps firmiter confidens in Deo, quòd si unus solummodo homo esset salvandus in Mundo, hunc seipsam profectò fore minimè dubitaret.

Cæterùm de duabus istis Sororibus beatis, de quibus perpauca, & meritis ipsarum non condigna hucusque locuta sum, ulteriùs profequi non intendo, quoniam intentio mea ad alia nunc festinat. Verùm tamen hæ sanctæ Sorores simul à pueritia in Monasterio conversatæ pari voto atque studio usque ad obitum suum Domino servierunt, inter quas Suppriorissa

priorissa beata prior obiit , deinde paucis evolutis septimanis germana sua sanctissima vocante Domino in pace pariter obdormivit. Et sicut in vita sua valde germanitus dilexerunt se, ita & in morte quoque non sunt diutiùs separatæ.

CAP. XXXVI.

De beata Sorore Hedvige de Laufenberg felicitis memoria.

ERat inter primitivas hujus sanctæ Congregationis Sorores quædam magnæ sanctitatis ac Religionis Soror, nomine Hedwigis de Laufenberg*, cui Dominus in diebus suis fecit mirabilia magna valde , mittens illi consolationes divinas multiplices & frequentes, atque revelans ipsi sæpius vigilando sensibili visione seu mente excedendo profunda mysteria de cœlestibus & æternis,

* Laufenberga oppidum Rauracorum ad Rhenum.

nis, quorum quædam, tamen pauca, mihi nota sunt facta fidei quidem narratione venerabilium Sororum, quæ hæc ab ore illius, dum vixit, percipere meruerunt: plura verò ita diuturno silentio & oblivione deleta sunt, quòd illa scire minime promerui. Quæ autem absque dubio & veraciter scire potui, breviter & simpliciter intimabo, ne res tam excellentes, tamque magnificæ similiter oblivioni tradantur. Credo enim firmiter & confido, illas ad ædificationem & profectum plurimis valituras, meque pro isto opere divinam assequi posse misericordiam, pariterque beatas illas Sorores, quarum dignam memoriam scripto tradere elaboro, propitias mihi fore apud communem judicem Dominum JESUM Christum. Cætera igitur felicitum actuum hujus beatæ Sororis, de qua modò loquor, prætermittens, explicare tantum debeo, quæ promisi.

Quodam sero post cœnam Sororibus minutionis tempore pariter
con-

confabulantibus in communi, illa nuper habitu Soror induta etiam affuit. Sed audiens eas cogitare cœpit, quòd consolationem recreationis illius propter Dominum relinquere, Chorumque intrare deberet, quod & continuo fecit. Cumque ad orationem ibidem se contulisset, factâ continuo manu Domini super eam, venit in mentis excessum, & in quemdam locum plenum cœlestium gaudiorum pacemque æternitatis protinus introducta est, ubi ab ubertate Domûs Dei repente suavitate ac dulcedine inæstimabili tota perfusa, speculari ad horam promeruit summæ gloriæ Majestatis. Vidit quoque in illo æternitatis statu animas beatorum, inter quos quosdam sibi, dum viverent, notos conspexit, & eos illic etiam recognovit, qui omnes claritatis gloriâ ineffabiliter refulgebant, læta Dei visione perpetuò perfruentes. Visione illa supercœlesti citiùs finita ad se rediens sibi que redita, exinde formavit sibi modum conversationis cujusdam cœlestis, & illi

illi veritati, illique æternitati, ad quam divinitùs ad horam assumpta fuerat, conformare se, in quantum potuit, nitebatur: agens profectò vitam sanctam deinceps & perfectam, facillimè postmodum caruit cunctis consolationibus alienis.

Quæ multis infirmitatum molestiis in vita sua attrita, usque ad exitum suum continuis & diversis corporis incommodis laboravit, suffere tamen cum patientia magna valde manum Benignissimi Domini, qui percutit & medetur. Ad quam ægrotantem & in dormitorio seu infirmaria decumbentem cùm humani solatii auxilium non haberet, solebant defunctæ Sorores visibiliter venire, eam placidè visitantes, horas quoque Canonicas, cùm necesse fuit, simul cum illa pariter alta voce dixerunt, alternatim sibi ad omnia respondentes.

Alio tempore, scilicet in insigni die solennitatis Dominicæ Nativitatis, sedens illa in domo Laborerii infra Matutinum in orationibus devotis

tis valde suspensa , subito corporeis oculis visibiliter conspexit cœtum sanctorum Patriarcharum , ex quorum germine Christus Dominus secundum carnem duxit originem , splendido cum lumine advenire , qui quodam novo & inæstimabili gaudio tripudiantes , veluti eidem festivitati pariter congauderent , illam Sororem , quæ hæc vidit , hinc & inde circumdabant reverenter. Cumque læta illa visione & præclarâ fuisset aliquamdiu plurimum delectata , nonum solennium illarum Matutinarum responsum Sorores inchoabant in Choro. Quo audito surrexit continuo , relinquens ibidem beatam illam ac jucundam Sanctorum , qui sibi apparuerant , societatem , ad chorum illico properavit mirabili devotionis dulcedine indefinenter revolvens altitudinem consilii divini super salutem generis humani. At ubi intravit in Chorum , audivit Dominum clara ac sensibili voce dicentem sibi : *Hic est filius meus dilectus , in quo complacuit mihi.* Et

Tom. VIII. S post

post pusillum iterum benignus Dominus loquitur secundò huic famulæ suæ dilectæ: *Aperi cor tuum & intellige*, in quanto charitatis affectu Unigenitum meum charissimum incarnari constitui, misique Mundum redimere. Facta autem hac voce Domini gratissima & dulciori super mel & favum in auribus corporeis hujus beatæ Sororis, repente per spiritum ipsius Domini extra se in extasim raptata fuit, & ad contemplandum intellectualibus oculis arcana consilia secretorum Dei, duce gratia in divinum lumen profundissimè introducta, in quo revelata facie brevi quidem hora contemplari meruit inæstimabili modo & omnino incognito inexpertis, in quanta charitate & dilectione Deus Pater Filium suum Unigenitum, factum hominem, misit in terras, similemque illum nobis per omnia fieri disposuit ab æterno. A divino quoque illo Consistorio iterum ad ipsam verè beatam Sororem mirabili dignationis gratiâ facta est paterna vox placidissimè dicens: *Sci-*

to & vide , quàm pronus & facilis sum ad ignoscendum homini omnia sua peccata in isto & propter istum Filium meum charissimum. Denique visio illa coelestis nimium gloriosa citius finita est. Et quamvis brevis ac momentanea fuerit , tamen adeò manifesta & efficax extitit , quòd magnitudo intimæ devotionis , jucunditatis ac lætitiæ in corde videntis hæc ulterius deleri non potuit.

Præterea quadam die , dum divina in Choro Mysteria agerentur , eadem sancta Soror subito mente excedens , extra se facta in illa hora , quâ sacerdos immolabat Deo Patri hostiam salutarem , vidit per interioris luminis radios profundissima mysteria individuae Trinitatis , quam scire , nōsse & intelligere vita est procul dubio sempiterna. In illam dulcedinem , in illam pacem , quæ exsuperat omnem sensum , duce gratia sublimius introducta , prælibare quodam modo ac prægustare meruit illa ineffabilia bona , quæ Deus electis suis in Patria reservat in præmium æternum.

Sicque adeò illuminato & liquido intellectu manifestiùs tunc intellexit, & apprehendit luminosæ Deitatis Trinitatem, quòd omnia dicta scriptaque S. Augustini, egregii Doctōris, quibus illam in libris olim pulcherrimè dilucidaverat, comparari ad unius temporis punctum minimè potuerint clarissimæ ipsius intelligentiæ, qua in divinam agnitionem in illa hora incomparabiliter illustrabatur per supercœlestis unctiōis gratiam. Sic enim postea, quando de extasi in se reversa fuit, cum omni fiducia, quibus voluit, referebat. Audivit sanè & vidit in illa visione divinissima, ùt dictum est, summæ Majestatis arcanum, quod non licet, neque fas est homini loqui. Ex contemplatione verò summi boni tanta sapientia Dei repletam & perfusam semetipsam persensit, quòd de ineffabilis Trinitatis essentia toti Mundo tunc prædicare potuisset lucidissimè & præclarè, quemadmodum postea firmiter assererat.

Alio quodam tempore, scilicet
feriâ

feriâ quintâ, officio Missæ de Spiritu Sancto in Choro à Sororibus solenniter inchoato, illa Soror beata, de qua loquor, interim rapta in spiritu vidit mentalibus oculis Dominum JESUM Christum coram altari ornamentis sacerdotalibus insignitum, Missarum ibidem solennia peragentem, cui sanctorum Angelorum adstitit frequentia gloriosa more ministrantium, hinc & inde circa eum sedulò discurrentium, qui ministerium suum cum gaudio inæstimabili perficere videbantur. Missâ verò illâ per ordinem sic peractâ, convertit benignissimum vultum suum pius Dominus JESUS ad Conventum Sororum, ut universæ accedentes participationem Sacramenti perciperent de manu ipsius Domini Salvatoris. Tunc imperialis Virgo mater Domini, vultu & habitu incomparabiliter resplendens reverentissimè processit cum paranympho suo singulari, sancto Gabriele Archangelo, ad altare, flectens ibidem ad dexteram partem altaris humiliter genua sua

sua sancta , ad lævam autem S. Gabriel Archangelus similiter flexis genibus consistebat , cui regalis Virgo mappam valde nitidam & plicatam , quam manu virginea tenebat , porrexit. Qui partem illius accepit reverenter. Sicque ambo expansam eam , quemadmodum moris est , tam diu sacris manibus tenuerunt , quousque illa Soror , quæ hæc vidit , primò accedens de manu dulcissimi Domini accepit vivificum Sacramentum. Deinde Sorores universæ per ordinem accedentes humiliter ab ipso Domino JESU Christo sacrosanctam Eucharistiam devotissimè perceperunt. His ita peractis continuo finita est illa visio gloriosa : in corde autem videntis hæc remansit consolationis divinæ immensa jucunditas . ita quòd in cordis jubilo stetit diebus plurimis.

Quadam die Completorio more solito celebrato prædicta Soror in contemplatione ardentissimæ devotionis interim valde suspensa loquebatur cum Domino ex pia confiden-
tia

tia dicens: *Pie & exorabilis Domine, qui preces invocantium te clementer exaudire dignaris, exaudi me in tua praegrandi misericordia, ut peccatorum meorum offensas, quibus bonitatem tuam offendi, satisfactione bonorum meorum operum & virtutum, si alicujus meriti sunt apud te, non deleas & abstergas, sed ea mihi reservari volo ac desidero in futuro ad augmentum potius premiorum. Attamen piissime Domine, nolo post obitum meum à gloria vultus tui ad momentum temporis retardari. Sicque in hunc modum pia praesumptione cum Domino diutissimè luctabatur, & post longam hujusmodi concertationem audivit corporeis auribus Dominum desuper clara ac mansuetissima voce dicentem sibi: *Crastina die offeram me ipsum sacrificium pro peccatis tuis, quando Missa celebrabitur, & tunc delebitur iniquitas tua in aeternum. Ad hanc promissionem Domini gratissimam, suavitate ac dulcedine divini amoris intus in anima adeò delibutam se sensit, quòd tota in gaudium**

S 4

dium vertebatur. Ergo promissæ diei exordium expectavit deinceps cum desiderio inquieto, & valde mane intravit in Chorum præveniens faciem Domini in orationibus fervidis & devotis. Eadem autem die, dum Missarum solennia apud Sorores festivè more solito agerentur, atque hora divini sacrificii instaret, tunc benignus Dominus JESUS, Verbum Patris altissimi, dignatus est huic famulæ suæ misericorditer adimplere, quòd promisit, & obtulit pro ipsa semetipsum Deo Patri in illa hora benedicta sacrificium acceptissimum in remissionem omnium peccatorum suorum, & absolutionem perpetuam à pœnis purgatorii post hanc vitam. De hac divina indulgentia, quam in prædicta hora divinitus percipere meruit, certificata est per Spiritum ipsius Domini, qui hoc tam præmagnificum donum prærogare illi ante obitus sui diem multo tempore dignatus est.

Habuit quoque beata illa Soror frat. carnalem, nomine Henricum,

cum, cognomento de Laufenberg, quem unice diligebat, qui valde bene literatus fuit, & præcipue medicinæ artis peritus & probatus habebatur, sæcularibus tamen actibus plurimum implicatus. Pro cujus conversione ad Ordinem sanctissimi Dominici, ad quam desiderio incredibili adspirabat, multâ precum instantiâ sedulo divinam non cessabat clementiam invocare. Quapropter B. Petro Martyri de Ordine Prædicatorum, qui noviter per idem * tempus fuerat canonizatus, ad quem devotionem habuit magnam valde, specialem quandam orationem per annum devovit diebus singulis se facturam, ut ipse suis sanctis meritis impetrare dignaretur à Domino, quod idem frater suus de sæculo conversus citò bonus frater fieret Ordinis, atque in eo usque in finem vitæ suæ devotus persisteret piis ipsius intercessio-

S §

nibus

* S. Petrum Mediolanensem in numerum Sanctorum retulit Innocentius quartus anno sui Pontificatus 10. hoc est anno Domini 1263.

nibus adjutus jugiter & protectus. Cumque orationem illam interim devotissimè quotidie faceret, completo jam anno, eadem die serò post completorium coram lecto suo in dormitorio in faciem prostrata iterum Sanctum Dei cordis gemitibus ac oris precibus, lachrymarumque nimium abundantiam incessanter invocavit. Tunc subito adstitit ei B. Petrus, qui leniter manu benedicta tangendo per scapulas, pulsavit eam dicens: Quare ita dolenter ploras? En ecce adduxi tibi fratrem tuum, pro quo me sedulò rogasti, & ipse me interveniente crastinà die mane Ordinem intrabit Prædicatorum assumendo habitum in Turego. At illa sursum aspiciens vidit corporeis oculis visibiliter S. Petrum quasi habitu Prædicatorum indutum, roseo vultu, facie rutilantem, quem & per spiritum protinus agnovit, pariterque germanum suum juxta se stantes, in quorum aspectu vehementer gavisa putavit se debere de ipsorum præsentia delectari amplius &

& gaudere. Sed ipsi mox declina-
verunt, & eos ulterius non vidit.
Ipsa autem diem illum diligenter an-
notavit, plurimùm admirans de tam
subita fratris sui conversione, quam
antè penitùs ignorabat. Paucis verò
post evolutis diebus supervenerunt
fratres de Turego, referentes per
ordinem, quòd germanus suus Or-
dinem assumpsisset, factus ibidem
Frater illo die, quo B. Petrus appa-
ruit sibi & hæc prædixit.

Porro germana supradictæ Soro-
ris similiter extitit in Monasterio hu-
jus sanctæ Congregationis, nomine
Mechtildis ab infantia sanctæ & inno-
centis vitæ atque in omnibus mori-
bus suis perfectæ. Quæ in brevi
complevit tempora multa de præ-
senti vita in ætate florida assumpta,
quoniam Deo placita fuit anima il-
lius. Quam post obitum suum vi-
dit illa Soror sancta frequenter, vigi-
lans in orationibus suis stantem co-
ram lecto suo, seu sedentem in fene-
stra ejusdem lecti sui. Et cùm præ
gaudio eam sibi vellet adstringere &
tenere,

tenere, tunc manus ejus, quibus illam tangere nitebatur, per vacuum æerem defluerunt, & eam contingere non valebat. Cui defuncta Soror germana sua subridens dixit: *Putas, quòd palpare me valeas, quæ caro non sum sed spiritus?* Apparuit tamen illi semper in eadem forma corporisque habitudine, quæ fuit, dum vixit, de statu quoque suo, ac de aliis multis eidem Sorori suæ requirenti retulit plura vultu placido & sereno.

Comes illustris de Habsburg, Godefridus * nomine, sedebat aliquando ad fenestras Sororum, & prædicta Soror ibidem etiam affuit, cujus orationibus idem Comes attentius & humiliter se commisit. Quem divina pietas devotioni ipsius ita impressit, quòd memoriæ illius postmodum multo tempore in orationibus suis non potuit oblivisci. Itaque cùm quadam die pro salute animæ

* *Est hic Godefridus primus qui vixit anno 1271. vide Franc. Guillimanni Habsburgica. lib. 7. cap. 2.*

animæ ipsius Comitis Domino cum lachrymis devotissimè supplicaret, apparuit illi visibiliter Dominus JESUS Christus in humanitate sua sanctissima, stans illam, expandensque manus suas, quasi ostendens ei. Porro in ejus beatissimis palmis & pedibus loca clavorum ac lateris transfixio evidentissimè apparebant, in quibus pariter eundem conspexit Comitem residere. Viso itaque Domino Soror gavisa est gaudio magno valde, sed obstupescens præ fulgore & reverentia Majestatis illius clausit oculos. Non enim audebat respicere contra Dominum. Quæ etiam tunc clausis oculis sicut apertis vidit eum, & in singulis quibusque vulneribus his sanctissimis Comitem supradictum. Hæc tam dulci tamque mirabili revelatione per aliquantulam horam lætificari meruit ab ipso omnium Salvatore: Certa quoque deinceps de æterna salute jam dicti Comitis, quem in hujus tutissimi portûs gremio tam dignanter videbat collocatum.

Eadem

Eadem Soror quadam vice sola in Choro orans subitò beatis oculis videre meruit quasi tres viros reverendissimos, vultibus roseis renitentes, quos Angelos Domini esse per ipsius spiritum mox cognovit. Quorum unus, qui præcedebat, formâ venustior, staturâ procerior, & tanquam Sacerdos insigniter adornatus apparebat: Alter verò, qui Sacerdotem proximus sequebatur, veluti Diaconus Dalmatica præfulgida decoratus: tertius autem, quasi Subdiaconus, amictus pretiosa tunica videbatur. Qui per gradus presbyterii altaris moderatis gressibus pariter ascendentes, accepta ibi pyxide cum Sacrosancta Eucharistia reverenter, continuò per eosdem gradus sanctuarii descenderunt. Porro Diaconus & Subdiaconus ardentes cereos in manibus præferentes antecedeabant Sacerdotem, sicque recto itinere ad infirmitorium tendebant. Sacerdos ille cum ministris ingressus est ad infirmam quandam Sororem magnæ sanctitatis, illic graviter ægro-
tantem,

tantem, quam cum magna reverentia communicavit. Et his ritè peractis Angeli Dei, qui apparebant, mox evanuerunt ab oculis hæc videntis. Quæ postmodum à prædicta infirma Sorore secretiùs requisivit, utrum vidisset aliquid, aut specialem divinæ consolationis gratiam percepisset à Domino in prædicta hora, qua eam communicari viderat. Illa verò considerans, demonstratum de se fuisse à Domino ipsi Sorori, noluit eam celare, & dixit: *Exterioribus quidem signis per revelationem nihil vidi, percepi tamen intus in anima miræ suavitatis dulcedinem, & gratiæ affluentiam, qua me totam ita delibutam persensi divina largitate, quòd ulterius capere non valebam.* Tunc illa exposuit ei per ordinem, quæ viderat, quomodo ipsam communicari conspexerat per sanctorum ministerium Angelorum.

Soror illa Sancta, de qua Sermone primitus incepti, portam Monasterii frequentare ex officio obedientiæ tenebatur. Quæ quadam
dic

die ad dictum officium de Choro, divino nondum completo officio, egredi compulsâ doluit multum, quòd solitæ devotionis suæ contemplationem interrumpere cogebatur, qua quotidie infra missæ celebrationem valde dulciter cum Domino fruebatur, complens tamen officium suum propter obedientiæ bonum. Et dum iret, apparuit interim sibi visibiliter beatissimus S. Joannes Baptista, qui agnum nive candidiorem in manu dextera præferebat. Reductis ad illam oculis benignissimè intendebat in eam. In cujus aspectu & præsentia gloriosa tantum devotionis & gratiæ ipsa Soror mente concepit, quòd nulla jam tristitia afficiebatur, sed potius gaudebat, quoniam amplius per ineffabilem Christi gratiam adeptam se, quam per devotionis suæ interpolationem jam amiserat, intellexit.

Eadem Soror beata ob devotionem & reverentiam passionis Christi sacratissimæ, ad quam toto fervebat spiritu, dira pectori suo in modum
crucis

crucis magna vulnera impressit ligno præacuto, quod ipsa ad hoc aptaverat diligenter. Eisdem quoque vulneribus frequenter recentia vulnera prædicto inflixit instrumento, ne faucium pectus aliquando reciperet sanitatem. Quod sancta illa Soror facere solita erat in vita sua tempore valde longo, ut memoriam passionis & Crucis Domini nostri JESU Christi mente & corpore jugiter rentaret.

Cæterum cum in ægritudine ultima diutiùs laboraret, apparuit ipsi vigilanti visibiliter benignus Dominus JESUS Christus cum multitudine Angelorum gloriosa, antequam de corpore migraret, dulcissimè consolans eam. Quam etiam divinissimis manibus suis in eadem hora pretiosi corporis & sanguinis sui alimento satiare dignatus est. Cui extremæ quoque unctionis Sacramentum pariter ipse Dominus Rex omnium sæculorum per se piissimè ministravit. Post hæc mandavit illi mansuetissimè dicens : Quamvis hæc tibi

à me collata susceperis Ecclesiastica Sacramenta , tamen illa suscipere à presbyteris secundùm ritum Ecclesiasticum ne refuses. Insuper promisit se affuturum illi in hora transitus sui, ut secum eam transferat ad sempiterna gaudia. Et his dictis continuò benedixit illi, atque recessit ab ea dulcissimus consolator.

Die autem altera cuidam Sorori devotæ, sibi admodum familiari, quæ dudum in officio extiterat Prioratûs, hanc revelationem per ordinem patefecit, & qualiter sacram communionem atque sacram unctionem à Domino susceperit Salvatore, & quòd ipse Dominus JESUS Christus sibi dederit in mandatis, ut eadem Sacramenta denuo recipiat à sacerdote. Tandem illa bona Soror & sancta in Domino obdormivit, promissa sibi gaudia veri Sabbathi post hujus vitæ suæ vesperam cum electis Dei perenniter sortita.

CAP.

CAP. XXXVII.

De venerabili ac bonorum memoriâ digna Sorore Eli- sabetha de Senheim.

ERat in hujus Monasterii felici congregatione Soror sancta, ac totius gratiæ & virtutum bono repleta, Elizabeth nomine, de Senheim *, cujus memoria in corde sororum omnium, quæ illam in carne viderunt, sicut mel in ore adhuc mirabiliter dulcescit. In sanctitate enim & virtutum redolentia adeò præcellere videbatur, quòd divinam super ipsam effloruisse sanctificationem fiducialiter profitemur. Cujus nimirum conversatio & vita, quàm plena virtutibus & bonitate extiterit, ipsis rebus evidentissimè monstrabatur. Præcipuè tamen fulsit in ea obedientia eximia & humilitas immensa. In humilitatis namque & abjectionis

T 2

operi-

* Senheim oppidum superioris Alsatie propè Thann.

operibus cunctis diebus vitæ suæ delectabatur sicut in omnibus divitiis. Despectiones & injurias perpeti non refugit, semper vultu placido & tranquillo animo persistebat. Nunquam irata visa est, nunquam litigavit cum aliqua, nulli unquam detraxit, seu injurias alicui verbo aut opere irrogavit. Inerat verò ei econtra larga benignitas ac suavis pietas erga omnes, & in cunctis necessitatibus tam mentis quàm corporis omnibus subvenire pro viribus satagebat. Verùm ipse benignus Dominus, qui dicit: *Ego, quos amo, arguo & castigo*, permisit illam in ægritudinem quadam vice incurrere valde gravem, de qua tanquam in frixorio miserabiliter afflicta, & diuturno languore contabescens periculosè plurimum laboravit. At ubi infirmitas illa coepit aliquantulum remitti per misericordiam Domini Salvatoris, statim ad consueta orationum suarum suffragia devotissimè recurrebat. Cumque quadam die valde esset intenta orationi, subito datum est

est ei divinitùs audire corporeis auri-
bus voces psallentium, harmoniam
coelestem dulcissimè ac præclarè ni-
mis in æthere personantes : quarum
videlicet vocum suavitas ac jucunda
amœnitas tanta tamque ineffabilis
erat, quòd omnimodum genus or-
ganorum & omnia dēnique carmina
hujus Mundi illis minimè potuissent
comparari. In hac ergo coelica ac
præclara melodia plurimùm delecta-
ta, mira devotione ac dulcedine af-
ficiebatur.

Altera quoque die adhuc valde
debilis & infirma orationi devotione
solita intendebat, & ecce repente
corporeis auribus audire meruit Do-
minum JESUM Christum clara vo-
ce desuper dicentem sibi : Scias, quòd
commendavi te Lucae Evangelistæ
medico, Capellano matris meæ, ut
ipse ex nunc curet omnes infirmita-
tes tuas. Ex illa ergo hora omnis
dolor ejus fugatus est, & sanitatem
integram extemplò recuperavit. Por-
rò inspirata quoque divinitùs in ea-
dem hora, & novo ferè miraculo

illuminatus est intellectus ejus , cœpitque sensu profundo ac lucido intelligere sacram Scripturam illius libri , quem in manibus tenebat , in quo horas de die dicere consuevit , quæ ante intelligentiam sanctarum non habuerat Scripturarum. Denique S. Lucam Evangelistam , cui ab ipso Domino specialiter commendata fuerat , ex tunc in veneratione ac devotione maxima habebat , quem etiam in sui auxilium deinceps fiducialiter invocabat.

Cùm tempus transitus ejus advenisset , accessit ad lectum ipsius quædam Soror hujus Monasterii , quæ per annum & amplius gravi & intolerabili capitis ac dentium dolore continuò vexabatur. Et cœpit devota mente cum fide divinam misericordiam exorare , ut per merita hujus sanctæ Sororis sanitatis sibi conferre remedium dignaretur. Statimque ut felicem animam exhalavit , accepit cervical , super quod illa obiecit , adhuc calidum ac totum madefactum ex sudore lethali , quem in
extre-

extremis defudârat, atque imposuit capiti suo, adstringendo illud sibi fortiter circumquaque. Quo facto sentire cœpit protinus sublevamen. Denique tulit digitos utriusque manus defunctæ Sororis, & immisit illos successivè in os suum, super dolorem dentium ponens eos. Qui continuò consolidati atque confirmati sunt, qui antè fuerunt attriti & quasi de propriis sedibus evulsi. Et ita à dolore tam capitis, quàm dentium plenè liberata per merita hujus beatæ Sororis percepit sanitatis beneficium utriusque.

CAP. XXXVIII.

De felici Sorore Eligenta de Sulzmat.

IN Congregatione sancta hujus Monasterii fuit quædam religiosa Soror & sancta, nomine Eligenta de Sulzmat*, quæ in ætate puellari à

T 4

paren-

* Sulzmat est Alsatia pagus.

parentibus suis in matrimonium viro tradita est, strenuo Militi & honesto. Post cujus obitum tres filias Virgines, quas genuerat, divino obsequio in eodem Monasterio mancipavit, quæ sanctitatem maternam sollicitè æmulantes soli Domino vivere contendebant, quarum conversatio Deo procul dubio fuit accepta, & grata Sororibus universis. Quas illa pia mater citiùs secuta cum omni substantia sua semetipsam hostiam sanctam obtulit Domino Creatori. Per semitas justitiæ indeclinabili mentis proposito incedebat, omnia sancti Ordinis atque Monasterii instituta conservans omni tempore integrè & perfectè, totius gratiæ muneribus repleta. Erat quippe summæ humilitatis & obedientiæ, & pia semper gestans viscera. Didicerat enim per divinæ gratiæ magisterium esse mitis & humilis corde. Pacem quoque cum omnibus habere studuit. Ita namque benigna & mansueta omnibus apparebat, ut nunquam aliqua nostrum viderit eam iratam seu turbatam, sed inter

inter prospera & adversa semper tranquillo animo perseverans in medio Sororum velut agna mansuetissima versabatur. Porro in orationibus assiduis, vigiliis & abstinentiis debile corpus suum incredibiliter affligebat.

Omni denique die de oblatis sibi in mensa nunc ab uno, nunc ab alio præcipuè sibi delectabili & sapido abstinebat, licèt mensa Conventualis illis diebus fuerit valde parca. Nempe quicquid sibi ita subtraxit, noluit dilectis filiabus suis, proximè sibi assidentibus impertiri, sed potiùs ad alias trans mittebat. Igitur super hoc Sororibus admirantibus, causamque requirentibus respondit: *Si, quod mihi adimo pro nomine Salvatoris, dero filiabus meis, de quarum multò plus, quam de mea refectiione gaudeo & exulto, quid mercedis ultrà ab ipso accipiam?* Hoc audito Sorores ædificatæ sunt plurimùm in illo verbo.

Denique ipsa & alia antiqua Soror, illi specialiter familiaris, condixerat sibi, ut pariter venientes sin-

gulis diebus certâ horâ post Matutinum in Capitulum ibi acciperent disciplinam. Quod multis annorum spatiis pio studio egerunt, semetipsas quotidie cum flagello graviter verberantes. Diabolus verò terrere & impedire suis astutiis conatus est. Finitis enim quadam vice Matutinis in Choro, venit dæmon in specie hujus beatæ Sororis, innuens manu illi antiquæ Sorori, ut veniret, submissâ voce vocando eam, *Commater, Commater*. Sic etenim se dictæ Sorores appellare consueverant. Illa autem vocantem se continuo secuta est, veneruntque pariter ad Capituli ostium. Mox illa simulata Soror velut fumus evanuit & nusquam comparuit. Antiqua illa Soror plurimum mirabatur: suspicans tamen, quòd illa, cum qua venerat, ad alium locum divertisset, & ipsa similiter sine effectu operis rediit ad locum, in quo se ad orationem primitus collocarat. Verum diabolus quod cœperat, secundo & tertio iteravit, semperque coram ostio Capituli disparuit,

paruit, & ingredi non præsumpsit, & illa ad loca orationis toties reversa disciplinam non recepit. Ad ultimum autem venit ad illam hæc beata Soror, de qua loquor, annuens manu, ut veniret. Ipsa iterum concitò surgens secuta est eam. Et intrantes pariter Capitulum acceperunt more solito disciplinam. Mane verò facto requisivit eadem antiqua Soror ab illa, cur sibi post Matutinum toties illusisset. Ipsa autem econtra firmiter asseruit, se nunquam venisse, nisi tantùm illâ horâ, qua intrantes in Capitulum acceperunt pariter disciplinam. Tunc manifestè cognoverunt inimici fuisse deceptiones & fallacias, qui toties ipsi apparuerat impedimentum eidem in suis orationibus inferendo.

Huic B. Sorori erat cum Deo familiaritas ac fiducia magna valde, suæ salvationis indubitata spem constanter absque alicujus hæsitacionis formidine tenens, de benignitate pii Conditoris firmiter præsumendo, se ab ipso prædestinatam fore misericordi-

corditer ad salutem. Cujus menti desperationem seu pusillanimitatem diabolus incutere suis tentationibus nitebatur. Apparuit enim illi in visu noctis per somnium quadam vice in specie cujusdam matronæ dudum defunctæ, dicentis sibi: *Tu nunquam salvaberis. Jam enim locum tuum paratum habes cum damnatis perpetuò in inferno.* Quo audito tota contremuit, subito evigilans à somno præ angustia & pavore. Nempe à voce tonitruï hujus formidabat adeò vehementer, quòd quasi tempestate convulsa omnem penè consolationem & spem perdiderat. Timebat enim nimium, ut per somnium audierat, se ex occulto Dei judicio à facie ipsius dulcissimi Domini perpetuò reprobari. Cumque spiritu diffidentiae graviter tentaretur, accidit quodam tempore infra Matutinarum vigilias, quibus solebat in Choro continuè interesse, ipsam acribus ejusdem diffidentiae stimulis impugnari. Tunc internis clamoribus invocabat divinam clementiam dicens:

Mise-

*Misericordissime Domine Deus misere-
re mihi indigna, & ne projicias me
à facie tua in presenti & pariter in
futuro. Et iterum quasi requirendo
voce flebili aiebat: Piissime Domine,
possumne aliquando salvari? aut quid
decrevisti mihi dare post hujus vite
mea exitum? Tunc motus miseri-
cordiâ benignus Dominus piè respi-
ciens tribulationem ancillæ suæ, di-
gnatus est eam dulcissimè consolari
dicens: Me ipsum tibi tradam, &
omnia, quæ ego & Pater meus cæle-
stis habemus, tibi dabimus in eter-
num. Hæc verba Domini Salvato-
ris ita manifesta fuerunt, quòd cor-
poreis auribus ea apertissimè audivit.
Porro ad hanc dignissimam divinæ
misericordiæ promissionem inenar-
rabili gaudio repleta, atque de ani-
mæ suæ salute per divinum respon-
sum mirabili dignationis gratiâ certi-
ficata, fuit ab omni tentatione pro-
tinus liberata. In tanta denique ani-
mæ jucunditate & lætitia deinceps
continuè versabatur, quòd ex sen-
tentia potuit dicere cum Psalmista:*

Secun-

Psal. 93. Secundum multitudinem dolorum meorum in corde meo consolationes tuae laetificaverunt animam meam.

Alio tempore ad Matutinum stans in Choro devotione solitâ, cœpit infra lectiones valde dulciter meditari de sanctissima Dei Genitrice Virgine gloriosa, & in semetipsa loquebatur in corde suo dicens: O Mater Dei clementissima, quid tibi debeo ego indigna, quæ non nisi per aridum *Ave MARIA* novi quotidie præsentare? Verum necdum hæc verba finierat, & ecce mox tactu sensibili sentiebat manum blandè leniterque mentum ipsius stringentem quasi blandiendo sibi, & insuper audivit corporeis auribus in instanti vocem mansuetissimam dicentem sibi: *Mea dilecta, tuum Ave MARIA valde bonum est & acceptum mihi omni tempore.* His auditis commota sunt omnia viscera illius ad clementissimum sanctæ Dei Genitricis respectum, quem sibi adesse evidenter conspexit, talemque ac tantam cœlestium gratiarum dulcedinem menti il-

ti illius illabi sentiebat, qualem quantamque antea nunquam fuerat experta.

Denique venit ad eam aliquando non multo tempore, priusquam de corpore migraret, quædam Soror magnæ religionis, tunc temporis Priorissa, quæ sanctam illius conversationem optimè noverat, non dubitans illam sæpius à Domino visitatam. Sciscitari ab ea cœpit ac petere magnâ instantiâ, quòd sibi panderet, si quid consolationis & gratiæ spiritualis in vita sua à Domino percipisset. Illa verò, ut erat obedientiæ magnæ valde, non præsumpsit ei aliquallyter contraire, ac prædicta per ordinem patefecit. Cui etiam inter cætera hoc secretiùs referebat, dicens: *Nunquam petii aliquid à Domino in vita mea intimo cum affectu, quod non continuò affecuta sim juxta votum.* In argumentum autem hujus rei retulit hæc, quæ sequuntur. Ita enim agebat: Deprecata sum adhuc in sæculo existens attentis precibus Dominum Salvatorem, quòd
me

me citò absolvere dignaretur à jugo copulæ maritalis , ut tantò liberius ipsi possem intendere & vacare. Et continuò exaudivit Dominus vocem orationis meæ. Nam febris prævalida mox arripuit maritum meum, qui paucis diebus postea supervivens Ecclesiasticis Sacramentis devotè susceptis de corpore emigravit. Deinde rogavi Dominum JESUM Christum, ut per suæ gratiæ largitatem pecunia quinque librarum nunquam mihi deesset ad usus necessarios pro expensis. Et ita per gratiam ipsius Domini sufficientiam in bonis temporalibus modo habui competentem, ita quòd quinque libræ denariorum ex tunc minimè in domicilio meo ac deinceps defuerunt. Præterea postulavi divinæ bonitatis clementiam toto corde, quòd ego cum tribus filiabus meis ad hujus sanctæ Congregationis consortium citius pariter promoveremur, quod postea obtinui in brevi Domino opitulante.

Denique eadem Soror sancta regulæ mihi quoque jam diu in Monasterio

sterio conversata, quòd ipsa tres denarios pro emendo *Pater noster* habere desideravit valde quadam vice. Cumque illos à Procuratrice seu à Priorissa petere non auderet, dixit in semetipsa: *Utinam pie Domine Deus, haberem nunc istos denarios, quos affecto!* Mox conspexit ad pedes ipsius tres denarios divinitus positos, quos veraciter scivit, quòd ibidem ante non jacuerant, præsertim cùm jam pridem eundem locum scopis mundaverat diligenter. Postremò illa verè beata Soror naturæ debitum solvens, de hujus valle miseriæ ad regna cœlestia transmigravit, possidens cum gloria bonorum omnium affluentiam in Christo JESU, Filio Patris, qui est Deus unus in tribus Personis benedictus in sæcula Amen.

CAP. XXXIX.

*De Sorore bonæ memoriæ
Heilrade de Horburg.*

Fuit in hac Congregatione sancta quædam Soror laica, nomine Heilradis, admirandæ procul dubio sanctitatis, quæ infra annos juveniles viro honesto in villa, quæ dicitur Horburg*, residenti in matrimonium copulata est. Ambo iusti coram Deo, bonum testimonium ab omnibus vicinis suis habentes, devotè misericordiæ operibus insistebant. Porro cives forenses tunc temporis prædictam villam nocturnis incursibus graviter infestabant, irruentes armati in illam, & populum illic repertum cum præda pariter auferentes. Cujusdam verò noctis horâ iterum ad eandem villam venientes armata manu irruerunt etiam in domum prædicti viri, quærentes illum

* Horburg Latine Argentuaria vicus Alsatiæ propè Colmariam ad Ellum.

lum cum ardentibus faculis, ubique crebrò discurrentes ante cubiculum quod tamen nutu Dei minimè intraverant, in quo ipse cum uxore sua erat, ambo invocantes adjutorium Altissimi maximo cum timore. Sicque illo per Dei gratiam minimè invento quicquid ibidem repererunt, rapuerunt, scilicet equos, oves, boves, vaccasque quàm plurimas, quas coram se minantes, itinere, quo venerant, rediêre, Post quorum recessum ille statim Ecclesiam intravit, ibique in orationibus nihilominus pèrnoctavit. Circa verò diei auro-ram animalia pecudesque omnes ab hostibus sibi ablatae ordinatione divinâ ante portam curiæ suæ stantes numero integro inventæ sunt. Hæc, quæ præmisimus, tantùm posita sunt ad testificationem sanctitatis & meriti apud Dominum utriusque. Tandem uxor illius viri, mulier sancta cum filia sua, virgine juvencula, ad collegium sanctarum hujus Monasterii Sororum recepta, & eis, ut diximus, adunata in mansuetudine &

humilitate præcipua Domino usque ad obitum suum strenuè deservivit.

Habuit quoque consuetudinem vigilandi & orandi creberrimè. Mil-
le ferè *Pater noster* cum totidem *Ave*
MARIA plurimis solebat annis die-
bus singulis orare cum occupationi-
bus & ministeriis Sororum continuis
& diversis, & etiam, cùm acutâ, seu
febris graviter æstuavit. Deni-
que laborans illa aliquando ægritudi-
ne valde gravi, quadam die tunc
temporis audire meruit corporeis au-
ribus harmoniam cœlestem in æthe-
re suavissimè resonantem omnium
musicorum genera sua dulcedine in-
comparabiliter exsuperantem.

Ad hujus revera cœlestis melo-
diæ dulcedinem, quam audivit tan-
tummodo brevi horâ, excepit eam
inenarrabilis quædam jucunditas ac
suavitas, cunctis etiam animæ suæ af-
fectibus protinus nectare Sancti Spi-
ritûs adeò superfusis, quòd præ im-
mensitate lætitiæ exultare in gaudio,
& quasi extra se salire cœpit anima in-
tra corpusculum. Sentiebat quoque
in

in ipsa hora quasi quandam coelestem virtutem sensibilem in se ipsam introëuntem & penetralia cordis ejus adeò suavissimè perungentem, quòd viribus corporeis extemplò reparatis de lecto continuò sana surrexit. Nempe illud tam excellens donum terrena desideria in ipsius beata anima potenter extinxit, & spiritualia vehementer accendit, & illam igne divini amoris totam liquefcere fecit. Neque hoc ad momentum tantùm concessum ei est, sed tribus continuis postea diebus his divinis renovari ac perlustrari influxionibus & irradiationibus gavisà est. Porro ejusdem consolationis gratiam postmodum Priorissæ tunc temporis per ordinem referebat, maximo devotionis affectu, ita inquit ad eam: *Dico vobis bona Priorissa, quòd tanta magnificentia gratiam à benignitate Domini percepi in illa hora benedicta, qua mihi satis superque verè fateor recompensatum fore pro omnibus laboribus, quibus unquam in illius servitio desudavi, etiamsi per quadraginta annos*

continuos fuisset suspensa in equuleo pro ipsius Salvatoris nomine.

Deinde vigilans ea & orans seu aliud quippiam operis faciens audivit similiter corporeis auribus duabus aut tribus vicibus, sed diverso tempore, sanctorum multitudinem Angelorum, melodiam ineffabiliter suavem in aëre modulantium, qui crebrò *Sanctus, Sanctus, Sanctus Dominus Deus Sabaoth* cum summo lætitiæ tripudio modulatis vocibus resonabant. Porro in hoc glorioso concentu Angelorum delectata vehementer nimis ac in jubilum lætitiæque cordis mirabiliter concitata ad consortium civium supernorum votis omnibus aspirabat.

Præterea festivitate aliquando sacratissimâ Natalis Domini adveniente, ipsa noctem illam sanctissimam more solito insomnem ducebat, orationibus interim ardentissimæ devotionis insistens ac laudibus pueri JESU nunc diutissimè stando, nunc verò genua flectendo per tanti temporis spatium non cessavit. Tandem illuc-

cescen-

cescente die ipsa, his divinis operibus fatigata, super scabellum resedit, aliquantulum requiescens. Tunc repente audire meruit Dominum JESUM clara ac benignissima voce dicentem sibi: *Pete à me, quod vis.* Verùm ad hanc vocem Domini Dei, plenam totius gratiæ omni festinatione surrexit, se ipsam in sereno cordis, in feryore spiritûs & in ardore liquefactæ charitatis totam effundens in conspectu altissimi, causas suas, suorumque in illa hora tantò efficacius finaliusque proponens, tractans definiensque apud divinæ misericordiæ pietatem, quantò ab ipso jubente Deo mira dignationis gratiâ fiduciam petendi acceperat & meritum impetrandi.

Denique die quadam Communionis tempore accedens ad Altare percepit cum debita devotionis reverentia vivificum Sacramentum. Quo percepto subtraxit ei ipse benignus Dominus omnem devotionis & consolationis dulcedinem, qua per ipsius gratiam in perceptione Dominici Sa-

cramenti semper valde dulciter fruebatur. Quapropter supra modum exterrita & turbata est, metuensque nimis, ne fortè hoc suis culpis exigentibus pateretur; cœpit inconsolabiliter plangere ad aures pii Conditoris. Tunc misericors Dominus, humilium Consolator, piè respexit afflictionem ancillæ suæ, dicens illi voce mansuetissimâ & apertâ: *Quid ultra debui tibi facere? Dedi enim tibi hodie charissimum Filium meum.* Et subitò ipse pius Dominus effudit super eam in beneplacito misericordiæ suæ spiritualis consolationis dulcedinem magnam valde, replens animam illius delitiis cœlestium gaudiorum. Denique peracto tandem cursu vitæ suæ, felicique agone consummato mortem fiducialiter subiit, non ab ipsa consumenda, sed de ipsa gloriose in perpetuum triumphatura.

CAP.

CAP. XL.

De religiosa Sorore Rinlinde de Biseck piæ memoriæ.

Non putamus silentio esse trans-
eundam matronam venerabi-
lem, bonorumque memoriâ
dignam, nomine Rinlindem de Bi-
seck, nobili genere exortam, virtu-
tibus autem ac religione animi multò
nobiliorem. Hæc divinitus à Deo
inspirata maritum suum, militem
nobilem, ac in rebus hujus sæculi
conspicuum ac potentem, venusta-
te quoque ac pulchritudine valde de-
corum cum octo liberis suis, quos illi
genuerat, æquè pulcherrimis, in
ætate parva ac tenera pro nomine de-
seruit Salvatoris. Et quamvis sum-
mo amoris affectu tam liberos, quàm
maritum diligeret in tantum, quòd
vitâ illos gratiores ac super salutem
omnemque jucunditatem atque pro
luce haberet, attamen pro tantis af-

U 5

fecti-

fectibus non poterat amor Dei ingens & hac in re modum excedens in corde illius tepescere, sed constanter eis valedicens commisit illos omnipotenti Deo tota perfusa lacrymis. Ipsa mundo funditus moriebatur, & in monasterio hujus felicitis Congregationis Christo Domino vivere feliciter cœpit, conversationem procul dubio sanctam agens, virtutum morumque redolentiâ decorata.

Porro miles prædictus de Biseck, vir magnificus, Sancti Spiritûs gratia similiter illustratus, Mundi pompam & voluptatem deseruit, leni iugo Christi se subjiciens, Ordinem Dominorum Venerabilium Teutonicorum cum duobus filiis parvulis intravit, eorum sanctum habitum assumendo; sex autem filias suas Virgines juvenculas Christo Domino dedicavit: tradens eas in diversis Sororum Monasteriis Ordinis FF. Prædicatorum in omni vitæ sanctimonia imbuendas. Pia verò mater & sancta à dulci liberorum & mariti consortio

sortio separata duas tantum filias in solatium sibi retinuit, cum quibus Religionis & virtutum studium gerens devorum famulatum Christo Domino quotidie exhibebat. Erat enim circa Ordinis observantias & custodiam cordis sui sollicita nimis & timorata, conscientiam suam per Confessiones lavans assiduas & frequentes.

Mirabantur igitur Sorores & precipue Confessarii sui tantam instantiam vel potius importunitatem ipsius, qua eos quiescere non sinebat, sicut nec ipsa quiescere poterat, plangendo & plorando de levibus minimisque excessibus, si quando vel raro illi subreperent, seipsam scrupulosissime dijudicabat. In multis quoque, in quibus nullam omnino culpam contraxerat, semetipsam miserabiliter plangens quasi de crimine arguebat. Sanè de oculis suis quasi quendam fontem lachrymarum effecerat: in omni loco orationum suarum lachrymas fundere non cessavit. In Matutinis verò, & in Missa
stans

stans in Choro in ordine suo flebat uberrimè & psallebat.

Finitis quadam vice Matutinis intravit in domum laborerii causâ orationis , ibique solito more immensis lachrymis & singultibus implevit aures piissimi Redemptoris. Tunc repente & subito sentire cœpit manifestè quendam suavissimum motum tactumque sensibilem , qui divinitus in interioribus animæ suæ fiebat. Audivit quoque pariter ipsum Dominum summæ pietatis voce benignissima de intimis animæ suæ dicentem sibi: *Cur ploras, & quam ob rem affligitur anima tua; Ego enim praesto sum tibi & in aeternum tecum ero, nec te deseram, eroq; merces tua sempiterna.* Hæc verba Domini plena omnium gratiarum, ita clara & aperta fuerunt , quòd ea Soror illa beata corporeis auribus etiam audivit. Omni denique pristina trepidatione & metu continuo depulso requievit super eam Spiritus universæ consolationis , & utrumque hominem suum rore cœlestis gratiæ totum adeò sensit

sic

fit delibutum, quòd præ immensitate lætitiæ seipsam capere non valebat. Porro hujus cœlestis gratiæ consolationem postmodum cum magno gaudio retulit filiæ suæ per ordinem in secreto.

Præterea post diutinos agones, quibus in divino servitio constantissimè desudârat, appropinquante vitæ suæ termino dignatus est eam Dominus benignus denuò in suo exitu mirificè consolari, ut inferiùs postmodum plenius dicetur. Referam tamen nunc, quod in conspectu nostro factum esse novimus & lætatae sumus. Cùm enim in extremis agonizaret ultimum jam trahens spiritum, vultu placido & sereno intimè aliquoties ridere cœpit. Quam filiæ suæ rogabant, ut eis causam suæ diceret lætitiæ atque risûs. Quibus ipsa manu innuit, ne jucunditatis suæ gaudium interromperent vel impedirent. Paulò post convertit se ad filias suas & dixit eis: *Quid voluistis requirere?* Cui respondentes dixerunt: *Mater charissima deprecamur,*
ut

ut reveles nobis, utrum acceperis aliquam consolationem à Domino specialem. Quibus illa nutu capitis innuit, se esse à Domino consolatam. Post paululum verò cœpit iterum ridere, & post modicum exspiravit. Sicque beata illa anima gaudens & exultans corpore resolvitur, perceptura promissum sibi præmium sempiternum, Dominum JESUM Christum, in quo est tota merces & beatitudo Sanctorum omnium.

Denique F. Wernerus de Erlebach, vir religiosus, in Ordine probatus, Confessarius suus, qui pridie eam inunxerat oleo infirmorum, audito sonitu tabulæ defunctoriæ in morte ipsius, surrexit continuò ad orationem, devotè commendans animam illius Domino. Ipsa verò mox ut beatam animam exhalavit, apparuit eidem vigilantibus & orantibus visibiliter in similitudine habituque Sororis stans coram illo placida facie & jucundâ. Quam de statu suo ac præcipuè quomodo sibi in exitu suo de corpore fuerit, requirere sollicitè cœpit.

coepit. Cui defuncta Soror respondens ait: *Piissimo respectu miserationis sua respexit me Dominus in illa hora expirationis meae, & contulit mihi firmam certitudinem salutis meae perpetuae, pariterque suam benignissimam indulgentiam omnium peccatorum meorum. Insuper de torrente voluptatis sua tanta dulcedine replevit, quod si ego sola omnium hominum mortes & universa denique Martyrum Christi genera suppliciorum in meo pertulissem corpore, pro his omnibus verè plenissimè illà unà horâ retribuisset mihi Dominus, nec essent omnino condigna passiones ad illam dulcedinem, illamque supercælestem consolationem, qua tunc ineffabiliter fructa sum.* Tunc ille iterum requisivit ab ea, utrum absque poenis foret statim ad regna cœlestia volatura. Ad hæc ipsa inquires dicebat: *Triginta dierum spatiis, trium autem minus, in poenis secundum divinam sententiam demorabor; post hæc absque omni dilationis obstaculo perveniam ad Creatorem meum, gloriâ vultûs sui*

sui perpetuò satianda. Quam idem frater attentius rogavit, ut post circulum illorum dierum ad se rediret. Et pollicita est illi, se postmodum redituram. Finitis verò diebus prædictis venit ista defuncta Soror ad dictum fratrem, Confessarium suum, apparens vigilanti illi visibiliter, induta veste luminis ultra Solis valentiam coruscantis, unde reverberatis oculis ipsius in eam nullo modo intendere prævalebat. Splendor namque claritatis ejus, sicut eidem fratri videbatur, tantæ immensitatis extitit, quòd etiam de facili potuisset per murum ferreum transparere. Porro illa verè beata anima clarâ quoque voce locuta est Confessario suo dicens: *En præsto sum, ut vobis promiseram. Et ecce nunc venit hora, qua ad cælestem sum patriam transitura.* His dictis statim ad regionem sine fine feliciter viventium evolavit. Nempe frater iste, cui prædicta revelata sunt, postmodum sorori Gertrudi, filiae ejusdem defunctæ Sororis secretius ad fenestram confessionum per ordinem patefecit.

CAP.

CAP. XLI.

*De B. Sorore Adelheide de
Muntzenheim, dulcis me-
moriam.*

EXtitit quondam in Brisaco puel-
la quædam juvençula, virgo
sancta, nomine Adelheidis,
pulchra & decora facie, corpore de-
cens, & oculis omnium gratiosa.
Quam utroque parente orbatam
consanguinei & amici ejus viro diviti
& honesto in matrimonium tradere
nitebantur, eò quòd parentes ejus
amplam rerum substantiam reliquis-
sent. Ipsa autem conceperat Deo
inspirante, virginitatis propositum.
Et ideo nequaquam voluit illis con-
sentire. Virgo igitur hæc tenera &
delicata tertium decimum ætatis an-
num agens statuitur à suis cognatis &
propinquis ante conspectum quon-
dam Venerabilis Domini Episcopi
Tridentini, qui per idem tempus
Tom. VIII. X ibi.

ibidem morabatur, ut per eum ageretur, quòd ipsa in matrimonialem copulam consentiret. Conveniunt multi de civibus ac religiosæ quoque ac literatæ personæ, ipsius certamen spectaturi. Cujus mentis constantiam volens idem Episcopus probare, cœpit eam verbis, quantum poterat, à suo proposito revocare. Mens verò hujus beatæ puellæ ita in Deo solidata erat & fundata, quòd ab intentione sua sancta penitus moveri non potuit. Tanta quoque diffusa est gratia in responsis verborum ejus, tantaque in corde ipsius inventa est constantia, quòd versa est omnibus mirabilem in stuporem. Tunc Venerabili Domino Episcopo judicante & omnibus præsentibus ibidem pariter consentientibus servire permissa est Domino Creatori, felici Collegio Sororum hujus Monasterii sociata.

Mox verò, ut ingressa est Monasterium, in ætate teneriori gravitatis & sapientiæ canos cunctis mirantibus induit, nec in verbis aut factis suis

ſuis geſſit aliquid puerile. Erat enim ſanctis moribus & optima converſatione decorata, cœleſtium chariſmarum gratiâ tanquam cœli ſyduſ relu- cens. Sanè diebus ſacris, quibus per licentiam lectionibus non vacabat, in Choro ab hora nona uſque ad veſperam remanebat, diutiſſimè ſtando ſeu genua fleſcendo ſanctæ contemplationis ſtudio ſine mentis rædio invigilans.

Ab iſſis converſionis ſuæ rudi- mentis ſilentium ſecundùm regula- riſ formæ traditionem ſtriſtiſſimè te- nuit, nec aliquando modico quidem ſermone audivimus eam legem ſilen- ti transgredi, nec reprehenſibilis ſeu negligens in aliquo apparebat.

Quædam alia devota Soror vidit quadam vice per ſomnium beatiffi- mam Dei Genitricem in quodam lo- co Monafterii in throno ſublimi con- ſedentem, & ineffabili decoris glo- ria radiantem. Ante cujus conſpe- ctum glorioſum ſtabat illa Soror bea- ta, de qua loquor, quam Virgo il- la ſublimis benigniſſimè reſpexit, pro-

ferens de sinu suo sancto tres coronas, auro & lapidibus pretiosis mirabiliter intextas, quas manu sua virginea posuit super caput ejusdem Sororis decentissimè coronans eam, & dixit illi: *Hoc anno ibis ad gaudia sempiterna.* At illa Soror, quæ hæc vidit & audivit, admirans plurimùm requisivit dicens: *Clementissima Domina mea, dic mihi, obsecro, in quo promeruit Soror hæc has coronas pretiosas?* Cui B. Virgo: *Unam, inquit, ex merito pudicitie Virginalis promeruit: alteram verò ex singulari certamine, quo pro amore castitatis fortiter decertavit: tertiam autem ex devota Ordinis observantia lucrata est.* Post hæc illa Soror à somno propius excitatur. Et mane factò retulit eidem Sorori per ordinem, quæ de ipsa viderat & audierat. Sicque eodem anno illa beata Soror felici defunctione de præsentī miseria sublata est, quemadmodum per somnium de ipsa fuerat revelatum, percipiens coronas perpetuas, promissas sibi per Virginem gloriosam.

Porro

Porro in ipsius exequiis viderunt pariter corporeis oculis duæ fide dignæ Sorores globum immensi jubaris super altare in sublimi ineffabiliter coruscantem, qui paulatim per chori testudinem in cœlum conscendere videbatur. Verùm Sorores hæc videntes firmiter crediderunt, hujus defunctæ Sororis animam beatam tali fore lumine divinitus illustratam.

CAP. XLII.

De felici Sorore Elisabeth de Rubeaco sanctæ memoriæ.

HOnesta Domina quædam vidua, juvenili ætate florens, dives & delicata nimis, nomine Elisabeth, habens domicilium in Rubeaco, à Spiritu Sancto præventa sprevit universas Mundi pompas ac voluptates. Seculo igitur cum actibus suis renuntiavit, petens ad felix Sororum hujus monasterii consortium admitti, quod & Domino concedente citiùs impetravit.

Ingressa itaque Monasterium in humilitate & mansuetudine Domino sincero corde servire studuit, tantò perfectiùs in omnibus semetipsam despiciens & abjiciens, quantò in sæculo in delitiis vivens delicatior extiterat. Porro diebus singulis vasa coquinæ & scutellas propriis abluebat manibus cum ancillis, adjuvans eas sedulò, in quibus potuit, in cæteris ibidem etiam faciendis. In his & similibus operibus delectabatur sicut in omnibus divitiis. In tanta namque mansuetudine radicata erat, quòd quælibet ipsius verba & facta sanctæ humilitatis indicia redolebant. Habuit quoque incessanter orandi studium, & in oratione mirabilem affluentiam lachrymarum.

Huic in primo anno conversionis mirabilem ac magnificam consolationis gratiam largiri dignata est immensa pietas Salvatoris. Nempe quodam tempore, cùm esset novitia, adversa valetudine correpta, aliquamdiu febribus laboravit. Cumque quadam nocte ardore febrium urere-

ureretur graviter, & sitiret, aquam frigidam, ut refocillaretur, ardenti desiderio concupivit. Et cū à nullo in tali necessitate præstari sibi auxilium cerneret, graviter ingemiscens lachrymata est. Tunc repente affuit ei benignus Dominus Deus, humilium consolator, apparens illi visibiliter in specie pulcherrimi pueri ac decori nimis benignissimè visitavit eam. Porrò lampas accensa prope lectum ipsius pependit, ex cujus lumine clarè in faciem ejusdem pueri beatissimi intendere prævalebat. Puer autem super lectum residens ægro-tantis, manibus suis sanctissimis tetigit labia illius, crebrò ducens eas per vultum ejus more blandientis. Interdum quoque super grabatum hinc & inde deambulavit, multisque modis ac gestibus puerilibus per totam noctem illam consolationes eidem multiplices faciebat, auferens ab ipsa omnem dolorem febrium atque sitis suâ præsentia gratiosâ.

Verum ipsa omnino nesciebat, quia Dominus esset. Idcirco cum

admiratione requirens ait: *Unde præter consuetudinem aliorum parvulorum intrare potuisti monasterium puer optime?* Ad quam puer divinus: *Ego, inquit, cum essem magnus & sublimis in excelsis, propter te factus sum humilis & parvulus super terram.* Statimque tinnitum fecit horologium ad Matutinum. Et ait iterum puer Dominus JESUS: *Ecce modo intrabunt ad te Sorores, habebisque consolationis humana auxilium, ideo me amplius non videbis, tecum autem manebo per gratiam in æternum.* Et hæc dicens ulteriùs minimè se illi præbuit ad videndum. Mox Novitiarum Magistra veniens visitavit eam, cui per ordinem enarravit, quanta sibi in nocte illa fecit Dominus atque ostendit.

Verùm quia veraciter scriptum *Apoc. 3.* est: *Quem diligit Dominus, corripit & flagellat, nunquam huic devotæ Sorori paternæ misericordiæ correptio defuit, sed cunctis diebus, quibus vixit in monasterio, usque ad extremum suum de corpore discessum*

sum gravibus & diuturnis incommo-
dis flagellata est. Ad ultimum hy-
dropica effecta, ac monstruosè in-
flata diu languit in grabato miserabi-
liter cruciata. Erat enim doloris im-
mensitas patientis animi intolerabilis,
& quot horis vivebat, totidem inter-
itionibus subiacebat. Sed reposita
ei erat copiosa retributio pro tantis
doloribus penes Dominum Salvato-
rem. Sanè antequam de miseria, &
de luto facis educeretur, rapta est in
visu in quoddam coelicum palatium
miræ pulchritudinis & splendoris, in
quo odor suavissimus & delectabilis
nimis spirabat, ex quo ipsa in tan-
tū delectata est, quòd omnium,
quos pertulerat, dolorum oblivisce-
retur. Vidit quoque Dominum cœ-
li & terræ in solio Majestatis suæ se-
dentem & Reginam à dextris ejus in
throno gloriæ consedentem, quibus
sanctorum Angelorum, aliorumque
Sanctorum multitudo infinita assiste-
bat, vocibus altisonis laudem Domi-
ni resonantes. Throni & sedes sub-
limes ac gloriosæ erant etiam ibidem
dispo-

dispositæ circumquaque, auro & gemmis pretiosis coruscantes, super quas nullus præsumpsit adstantium residere. Inter quos unus erat thronus eminens pulchritudine & ornatu incomparabiliter universos, super quem ad imperium Domini Regis illa Soror, quæ hæc vidit, per sanctos Angelos est protinus sublimata. Illa autem renitens, ac ultimum sibi eligens locum dixit ad Dominum: *Non sum digna tanti honoris gratia, nec unquam ista promerui.* Ad quam Dominus blandè locutus est dicens: *Si non meruisti, sustinuisti tamen in vita tua misérias & dolores, quibus multipliciter te affluxi.* Tunc ipse Spiritus Sanctus, qui est Magistorum optimus, repentè & subito immisit in os ejus canticum novum, carmen Deo nostro, videlicet quosdam hymnos rhythmicos delectabiles valde de Deo, & de patria illa coelesti Hierusalem, quos nunquam antè audierat, seu didicerat. Et illos, postquam ad se rediit, ac sui compos effecta est, benè tenuit, & in

in memoria jugiter retinuit. Sicque futuræ mansionis suæ locum gloriæ antè ostendere illi dignata est mira benignitas Creatoris, ad quam mox carnis mole deposita piè eam credimus per ineffabilem Christi gratiam exaltatam, cui est laus & gloria per omnia sæcula sæculorum Amen.

CAP. XLIII.

De quadam devota Sorore Laica, Mechtilde nomine, de Columbaria, pie memoria.

Virgo quædam devota, Mechtildis nomine, in suburbio oppidi Columbariensis residebat, quæ virginitatem suam Domino consecrârat. Hanc quidam de civibus ejusdem oppidi in uxorem legitimam concupivit. Quodam igitur fero assumptis secum sociis quibusdam adolescentibus venit armatus cum illis ad domum Virginis, & effractis foribus circa horam conticini in ipsam irruit violenter, & intravit

vit in cameram, ubi puella quiescebat, accedensque propius ad lectum promissis ac blandimentis multis instat, persuadet ac exorat, ut sibi velit in matrimonium consentire. Cui ipsa respondit, se nullatenus velle consentire, adjiciens, quod nec illi, nec alicui alii vellet aliquatenus maritali copula sociari. Cumque ille videret, quod nihil proficeret, minis & terroribus sævis eam aggreditur, mortem eidem graviter comminans, ut ipsam induceret ad matrimonium contrahendum. Tandem gladium excutens de vagina posuit illum ad guttur virginis dicens: Nisi illico mihi consenseris, immergam gladium in guttur tuum. Inter hæc nihil aliud poterat ab ea extorquere, nisi votum virginitatis, quod fecerat, inviolabiliter se velle servare, & potius mortem subire, etiam crudelissimam, quam decus amittere virginale. Virgo itaque in supremo necessitatis articulo constituta, & ut mortem evaderet, atque ille homo malignus ab ea discederet, pro-

promisit ei, quòd si unquam ad matrimonium contrahendum consentiret, illi potius vellet præ omnibus copulari. Quo audito ille continuo surgens resumptis sociis recessit. Sicque Virgo fidem castitatis inter gladium & minas hostis atrocissimas intrepida conservavit.

Homo ille iniquus fraudis suæ commenta adversus virginem impigrè agere cœpit, jurans se cum illa matrimonium contraxisse, falsis super hoc testibus accersitis. Puella econtra acerrime negavit. De judicio ad judicium citatur: ad ultimum autem causa delata est ad Curiam Basiliensem, & ipsa Virgo compulsæ est se conspectui Domini Episcopi præsentare. Ibidem causâ diligentius pertractatâ, examinatum est & probatum, Domino auxiliante, hominem illum nihil juris habere in Virginem. Et ita cum gaudio ad propria est reversa.

Cujus tribulationes & angustias Sorores hujus Monasterii miserantes, in suum eam consortium pro Sorore
laica

laica receperunt. Quæ sæculum perfectè deseruit, & se totam divinis obsequiis mancipavit, in justitia & sanctitate veritatis usque ad exitum suum Domino deservivit. Hæc inter cætera multa bona & virtutes, quibus non mediocriter pollebat, orare solebat creberrimè & indefinenter, etiam in quolibet officio & labore, specialiter pro defunctis orationes assiduas & devotas ad Dominum fundere non cessabat, pro ipsarum liberatione legens sine intermissione Vigilias & Psalteria, quorum non erat numerus. Et ita orationibus, jejniis, vigiliisque supra modum corpus suum castigabat.

Ad ultimum multis variisque infirmitatum incommodis attrita, cœpit diu ac graviter ægrotare, ita quòd defectum cordis ferè quotidie & multo tempore pateretur. Et hujus doloris molestiam in præsentia Sororum in tantum dissimulavit, quòd se continuit à gemitu, ne ex compassionis ipsarum affectu consolationem reciperet aliqualem, & ob
hoc

hoc detrimentum præmii cœlestis aliquantulum incurreret in futuro.

Huic consolationem suavitatis supernæ valde magnam, ob meritum devotionis suæ, largitas divina prærogare dignata est. Nam, cùm in oratione pura & devota sursum mente à phantasiis vanarum cogitationum per sanctam contemplationem elevata, divina desuper aspirante gratia, soli Deo intenderet, suavissimo nectare cœlestis dulcoris & gratiæ sæpius ita perfundeбatur, quòd utrumque hominem suum etiam sentiebat mirabiliter delibutum tantâ revera affluentia, quòd ulterius, ut sibi videbatur, nequiverit perferre.

Cuidam quoque Sorori sibi specialiter familiari, prædixit obitum suum per annum, antequam de corpore emigraret. Denique stabat etiam aliquando cum eadem Sorore in cœmiterio defunctorum, loquens illi iterum de dissolutione corporis sui in proximo imminente, cui pede ostendit locum sepulturæ suæ, in-

quiens

quiens ad eam: *Hoc in loco procul dubio sepelietis me.* Et ita impletum est verbum illius. Non multo post tempore obiit, & in eodem loco, ut prædixerat, sepulta, in Domino requiescit à laboribus suis amodo & usque in sempiternum.

CAP. XLIV.

De quadam Sorore Conversa devota, nomine Agnete de Blotzenheim felicitis resurrectionis.

Fuit in Conventu hujus beatæ Congregationis spiritualis quædam Soror Conversa, nomine Agnes de Blozenheim*, magnâ Dei procul dubio gratiâ prædita, cui Dominus consolationes de supernis & cœlestibus magnas & multiplices mittebat, revelans illi secreta plurima & futura. Hæc inter alia bona, quæ pura devotione faciebat, erat

* Blozenheim *Vicius Alsatia.*

in sublevandis debiliū & infirmarum Sororum necessitatibus promptissima & misericors nimis, quibus tanquam Christi membris per annos plurimos sedula ministeria sollicitè exhibebat. Siquam morbidam, siquam ulcerosam, aut sanie defluentem aspiceret, huic omnem pietatis operam impendebat abluendo, tergendo, atque refocillando, tanquam mater ægrotanti filiæ jugiter assistebar.

Solebat etiam omni tempore vitæ suæ circa horam nonam secretiorem locum causâ orationis adire, in quocunque detinebatur ministerio & labore, gratias de omni corde suo agens Domino Redemptori, quòd mortem subire, & in Crucis patibulo illa hora expirare pro hominibus dignatus est. Vitam quoque suam & exitum divinæ clementiæ diligentissimè commendavit. Cumque quadam vice iterum gratias Deo agendo more solito & tempore sic oraret, vidit repente corporeis oculis lucis radium splendidissimum, lu-

Tom. VIII. Y ci

ci corporeæ omnino dissimilem, à
cœli fastigiis prodeuntem, & usque
ad pectus ipsius immediatè veluti vir-
gulam quandam directivam, splen-
dore nimio attingentem: qui etiam
continuò cordis ipsius penetralia sua-
vissimè introiens igne divinæ charita-
tis illam succensam liquefecit mirabi-
liter & refecit. Erat nempe miri fer-
voris & devotionis erga Deum, orans
diutissimè stando, tota suspensa at-
que in amorem dilecti sui absorpta.
Cui ipse Dominus, gratiarum
omnium benignissimus distributor,
dulcedinem mirabilem & gratiam in
orationibus suis jugiter infundebat,
thesaurizans super eam tantam cor-
dis jucunditatem & exultationem,
quòd videbatur sibi, sicut ipsa inter-
dum secretiùs referebat, quasi in cor-
de Altissimi sederet, & tanquam ipse
omnium oblitus illi soli intenderet.
Talibus siquidem divinis influxioni-
bus, de promptuariis supernis eru-
tantibus, feliciter inebriata, meruit
in hac lachrymarum valle creberrimè
relevari.

Omnia

Omnia denique, quæ Redemptor noster JESUS Christus tempore gloriosæ passionis suæ pro nobis perferre dignatus est, fuerunt huic Sorori beatæ in quadam visione circa obitum suum divinitus demonstrata. Vidit namque in prædicta visione manifestè Dominum JESUM Christum, quasi iterum pateretur, à Judæorum multitudine comprehensum, crudeliter ligari atque vilissimè tractari. Qui diris clamoribus & tumultu traxerunt eum de judicio in judicium, illudentes ei colaphis, & alapis frequentibus cædentes & conspuentes in faciem ejus, spinis quoque coronatum, flagris acerrimis, usque ad sanguinis effusionem flagellabant eum. Ad ultimum verò poenis innumeris afflictum, saturatumque opprobriis & derisionibus perfidorum cruci illum crudelissimè affixerunt. Ipsa autem Soror, quæ hæc vidit, etiam corporeis audivit auribus apertè, crebris atque diris malleorum ictibus, transfusionibusque ipsius Domini manus pedesque sacra-

Y 2 cra-

cratissimos perforari. Finita verò visione diu velut exanimis effecta præ animi dolore jacuit sine motu. Nempe gladius Passionis Christi amarissimæ, quam in visione prædicta mentalibus oculis conspexerat universam, tanto compassionis dolore ipsius animam pertransiit, quòd post hæc diutius vivere non valebat. Arripuit namque eam in instanti febris peremptoria, cœpitque gravi corporis ægitudine languescere, & erat languor fortissimus, ex quo non multò post ad hujus labentis terminum perducta, ad perennis vitæ introitum feliciter properavit.

CAP. XLV.

De devota Christi famula

Adelheide de Sigoltzheim

beata memoria.

IN villa, quæ dicitur Sigoltzheim prope Columbariense oppidum sita, quædam sancta fœmina & devota, Adelheidis nomine, residebat.

debat. Quæ cum viro suo, cui à parentibus suis invita infra annos juveniles in conjugium fuerat copulata, degens, annis viginti & amplius virginitatem suam perpetuò incorruptam, magno Dei munere conservavit. Elongavit enim se à viri thoro singulis noctibus, in orationibus devotis persistens devotissimè vigilando. Quando verò præ lassitudine somni corpore depressa esset, super nudam humum seu super scamnum dormire solita erat in hyeme & æstate, & lecti molliem non quæsivit. Propter hoc ergo vir ille exosam eam habuit, fame, siti, frigore & nuditate continuè affligens illam, innumeris injuriis molestavit. Ipsa verò Sancti Spiritûs gratiâ roborata, patienter cum gaudio hæc omnia sustinebat propter spem retributionis æternæ, & desiderium castitatis. Mente siquidem Deo infatigabiliter adhærens à bonis operibus non cessavit, corpus suum duris laboribus abstinentiisque jugiter conterens, spiritui servire cogebar.

Cumque virtutum exercitiis grater polleret, accidit quadam die, tempore vindemiarum, quod Fratres de Ordine Prædicatorum & Minorum venirent ad eandem villam, in qua ipsa morabatur, discurrentes lassī valde petendo vinum à mane usque ad vesperam ostiatim: quorum verecundiæ ac labori ipsa piè compassa allatas quatuor amas* vini continuò de carrota** dedit Fratribus prædictis viro suo penitus ignorante. Cujus furoris sævitiam plurimum pertimescens infudit statim aquam in vas prædictum, implens usque ad summum. Quo impleto prece supplici deprecata est Dominum dicens: *Domine Deus, qui non derelinquis præsumentes de te, invoco & flagito divinam clementiam tuam, quatenus aqua ista, in hoc vas nunc infusa, protinus in vinum virtute tue potentia convertatur, ne paterfamilias veniens in ira sua interficiat*

* Ama amphora continens octo congios seu 24, mensuras.

** Carrota, biga.

ciat me, si recognoverit factum meum. Statim ad preces ejus aqua illa à Domino conversa est in vinum tam nobile & pretiosum, quòd plus eidem patrifamilias postmodum valuit apud mercatores, quàm vina reliqua, quæ habebat. Et ita res gesta virum latuit, ipsa autem sancta femina per miraculum ibidem divinitus operatum imminens sibi evasit periculum.

Defuncto autem prædicto viro ipsa Columbariam properavit, vocans Priorissam hujus Monasterii obtulit sibi & Sororibus universis omnia mobilia & immobilia, quæ habebat, tradens ea in æternum simpliciter & absolutè pro amore Domini Salvatoris. Postea petivit humiliter & instanter, ut reciperetur in Monasterium ad coquinæ servitium, quam diu degeret in hac vita, quod & continuo impetravit, licèt admitti pro Sorore laica si desiderasset, procul dubio à Priorissa & Sororibus de facili obtinuisset. Elegit tamen potius abjecta esse in præsentì, ut in

cœlestibus apud Dominum ampliori gloria radiaret. Quæ in coquina & in aliis Sororum servitiis cunctis diebus humiliter serviens ad magnam vitæ perfectionem sanctitatemque divina gratia opitulante pervenit. Cibum unà cum ancillis sumens, vilibus semper & abjectis vestibus utebatur.

Matth.
19.

Huic profectò beatæ pius & misericors Dominus cumulatiùs in hac vitâ exsolvit, quod in Evangelio repromisit, videlicet pro quolibet simplo, propter se relicto, centuplum se daturum. Contulit namque illi multas divitias spirituales, consolationes de cœlestibus & æternis admirabiles, securitatem quoque de remissione peccatorum suorum, nec non & de dimissione pœnarum omnium, inspirans etiam illi regni cœlorum certitudinem. Et hæc fanè super omnia transitoria centupliciter, millies, & incomparabiliter amplius ponderavit. Insuper dulcedine mirabili gratiarumque affluentia in orationibus suis sapissimè semet-

metipsam in tantum sensit superfu-
sam, quòd videbatur sibi, quòd
omnia membra corporis sui ipso
Deo forent repleta, quemadmo-
dum ipsa hæc omnia ac superius ex-
pressa, & etiam sequentia, quibus
voluit, secretiùs patefecit. Habuit
quoque frequentius tantum cordis
fervorem ad Dominum, quòd erum-
pebat exteriùs in pectore & in mem-
bris aliis per sudorem. His itaque
donis cœlitus sibi collatis divinæ mi-
serationis respectum ipsi adesse cer-
tissimè deprehendit.

Fuit quoque supra modum sibi
ipsi aspera atque dura, multis vigi-
liis, laboribus & operibus bonis affli-
gens corpus suum incredibiliter &
castigans. Flagellis spineis nimis
asperè usque ad sanguinis effusio-
nem corpus suum debile quotidie fla-
gellavit, ita quòd crebris spinarum
punctionibus laceratum & conscif-
sum miserabiliter consistebat. Siqui-
dem prædicta flagella, quibus se-
ipsam verberabat, post ipsius obi-

tum inventa sunt cruore ipsius planè intincta & respersa.

Porro novum diri supplicii ac afflictionis genus exæstuantis ipsius animi devotio excogitavit, quo non semel, sed pluries obtulit se ipsam holocaustum gratuitum Domino: Tempore siquidem hyemis, quando frigus maximè est intensum, vestimentis suis depositis in flumen, glacie coopertum, priùs facto foramine, nudam singulis pene noctibus se immerfit, moram ibidem tam diu faciens, donec carnes ipsius congelarentur. Postmodum de aqua ascendens, unica tantùm tunica reinducta, ante Chori ostium, nudis pedibus super lapidem stans in contemplatione ardentissimæ devotionis suspensa, usque ad matutinum, sive usque ad auroram diei continuè persistebat. Interim sanè habuit divino munere tantum cordis calorem, quòd erupit exteriùs in pectore, & in aliis membris per sudorem in tanta copia, quòd omne corpus illius sudoris guttis uberiùs perfundebatur.

Sunt

Sunt autem & plura alia nobis de sanctitate hujus Dei famulæ comperta, quæ legentium devotionem excitare possent: Sed ea silentio premo, & fastidiosis lectoribus consulens nolo sermonem ulterius prolongare. Hæc ergo beata & sancta sicut fideliter vixit, ita feliciter obiit, & migravit ad Dominum JESUM Christum, qui est merces suorum fidelium magna nimis.

Denique post obitum ejus quædam sancta Soror, Adelheidis nomine de Rhinfelda, cujus superius* * *Cap. 23.* mentionem feci, vidit illam aliquoties visibiliter corporeis oculis, clara dici luce in æere à terra sublimius elevatam, quæ etiam miri decoris gloriâ circumamicta, adinstar claritatis Solis refulsit, inæstimabili tripudians gaudio & exultatione.

CAP.

CAP. XLVI.

De devota Sorore Gertrude, orta de Civitate quadam Westphaliae, Provinciae Saxoniae.

Sermone brevi & admodum compendioso, quantum mihi donaverit bonorum omnium distributor, & ingenii mei parvitas permiserit, huic inferere operi procurabo quaedam pauca de multis mihi comperta de conversione ac laudabili vita Sororis Gertrudis de Saxonia, nuper de nostro Conventu defunctae; admirandae procul dubio sanctitatis. Quam divinae pietatis providentia de remotiore regione Westphaliae, Provinciae Saxoniae ad peregrinum & omnino sibi incognitum locum, videlicet Monasterium Sororum de Underlinden in Columbaria Ord. S. Dominici egregii Confessoris mirabiliter evocavit. Siquidem ipsa Soror beata exemplum
illius

illius quondam præclari Abrahæ Patriarchæ sancti, ad vocem jubentis Domini exeuntis de terra & cognitione sua, ac venientis in terram sibi ab ipso Domino demonstratam, per omnia est plenissime imitata.

Nam cum esset adhuc ætate florida ac juvenili, videlicet quinto lustro nondum plenè peracto, divinitus inspirata, omni Mundi hujus voluptate & gloria spreta, exivit corde & corpore de terra & de cognitione & progenie sua nobili atque præclara, venitque in dictum Monasterium Columbaria, ut præmissi, locum sanctum, divinitus sibi, haud dubium, præparatum. Proprios quoque duos filios suos ac filiam, quos affectu summo diligebat, in Provincia Saxonix parvulos & orphanos dereliquit, deferens insuper inibi maritum suum, virum bonum & honestum, ab ejus consortio & solamine deinceps usque ad obitum suum elongata.

Ipse vero in terra sua similiter in eodem Ordine divino servitio mancipa-

cipatus, Laicorum habitum humilem assumpsit, in quo & perseveranter usque ad obitum suum Domino militavit. Cui adhuc in sæculo degenti bonisque operibus ac virtutum studiis sollicitè insistenti admirandam divinæ consolationis gratiam dignatus est misericors Dominus prærogare, quam etiam breviter indicabo. Quadam siquidem die juxta consuetudinem suam propiùs adstans Sacerdoti, Missarum solennia celebranti, ecce corporeis oculis videre meruit manifestè in ipsa hora elevationis divinissimæ ac Sacro-Sanctæ hostiæ Dominum JESUM Christum in specie pueri parvuli quasi trium annorum, præ filiis hominum speciosi, in cruce clavis manibus & pedibus perforatum, manibus ejusdem sacerdotis in altum ad conspectum omnium ibidem præsentium elevari. Puerum quoque illum beatissimum, qui sibi apparuit, ex crebris oculorum suorum motibus, quos benignissimè sæpius ad populum convertebat, certissimè vivere liquidò deprehen-

prehendit. Sicque certificatus est, visionem illam non esse imaginariam sed veracem. Visionis hujus coelestis dulcedine degustata, suavissimo charitatis divinae ardore succensus, magnificas gratias egit Domino Salvatori, qui cum dignatus est tam glorioso miraculo consolari.

Præterea dum adhuc uterque, ipse videlicet & uxor ejus, Soror illa beata, de qua pridem loqui incepti, simul in terra natalitatis suæ commanerent, accidit quadam vice, Domino permittente, quòd cuncta domûs illorum ædificia circumquaque cum omni suppellectili & rebus, ignis consumpsit incendium & vastavit. Ipsi autem ex illo casu plurimùm aporiatæ necessitatem ex bonorum inopia non modicam pertulerunt. Quapropter reverendus Pater beatæ memoriæ Hermannus, dictus de Havelberg, de Provincia Saxoniæ, quondam Provincialis per Teutonium, ejusdem felicitis Sororis patruus, vir eximiæ sanctitatis, qui fertur etiam post obitum miraculis claruisse, cœ-

pic

pit pro hujusmodi infortunio non mediocriter contristari, metuens, ne ipsa maritusque ejus ab ingressu Religionis, quem mente conceperant, propterea tardarentur.

Cumque de his tractaret secum animo gembundo, subito totus extra se raptus vidit per interioris hominis radios juvenem splendidissimum, coelestique gloria decoratum, ad se venientem, qui sibi obtulit pannum candidissimum diligentius complicatum. Idem verò Prior Provincialis requisivit dicens: *O juvenis, cur mihi pannum istum defers?* Cui ille mox inquit: *Expande & vide.* Quo expanso conspexit in eo crucifixum aureum, pulcherrimè in eo depictum panno: faciem quoque ejusdem neptis suæ, nequaquam imaginariè depictam, sed verum vultum ejus cum cute, carne, ossibusque supercor ipsius crucifixi clavis undique confixum fortiter intuebatur. Quo viso B. Prior Provincialis, cui hæc videre divinitus concessa sunt, vehementer nimis obstupuit, nec ultra

ultra jam habens spiritum cum admiratione clamavit dicens: O Domine Deus, quem cæli terraq; fabrica contremiscit, quid est homo, quia tanti reputas eum, ut ponas illum proximè juxta te, cum sit terra & cinis? Et dignum ducis super hujusmodi pietatis tue oculos aperire? Eja dic mihi, quæso, benignissime Domine JESU, utrumne homo inhereat tibi, qui solus habitas lucem inaccessibilem, tanto taliqu; agglutinationis compagine unitus, quanto qualiqu; conspicio eum nunc connexionis vinculo tibi inseparabiliter colligatum? Cui benignus Dominus JESUS de cruce, mitissima claraque voce respondens ait: Noveris pro certo, multò mihi propius fore hominem conjunctum, quàm unquam videre valeas, qui tantum foris vides in facie. Ego enim secretissimè in divinitatis meæ thesauris absconditis reconditum habeo hominem, quem creavi. Finità citiùs visione illa cœlesti magnitudo conceptæ devotionis in corde videntis & audientis hæc deinceps finiri non potuit.

Unde
dum

dum aliquando eadem Domini verba, omni suavitate & gratiâ plena, devotione solita ruminaret, præ immensa divini amoris dulcedine spiritu deficiens, nec ulterius sufferre valens tantæ devotionis ardorem, pallidus & exsanguis corruit super terram, sine voce & sine motu, velut mortuus diutius permanebat. Cæterum quomodo vel cum quibus comitibus de terra sua longinqua remotaque ad nos Columbariam pervenerit B. Gertrudis, superius memorata, seu quanta sibi in itinere constitutæ bona contulit benignitas Conditoris, nunc breviter indicabo.

Præfatus Frater Hermannus de Havelberg, patruus ejus, tunc temporis Prior Provincialis, comes itineris ipsius fuit individuus & laboris, adhærendo illi inseparabiliter, donec eam hujus Monasterii Sororibus præsentavit, per cujus sanè beatam comitantiam ac sanctarum orationum suarum suffragia perventionem habere meruit optato itinere cum salute. Ipse quoque fuit vir prudens & provi-

providus in agendis cum viatoribus quibusque honestis ac mercatoribus. Interim cautè comitabatur cum suis sociis Prædicatoribus, pariterque cum curru, super quem eadem neptis sua sedebat, ut illorum consortio in via, qua ambulabant, protecti existerent tutiores.

Accidit proinde, ut ipse & sui quadam vice adjuncti quibusdam mercatoribus, & euntes pariter tendebant ad oppositam civitatem ante solis occasum maturius pervenire. Die verò ad vesperam vergente mercatores illi propter nocturni temporis timorem ad oppidum, unde recesserant, ac hospitium sunt regressi. Prior Provincialis autem, & qui cum ipso erant, nolentes regredi, progredi, licèt frustra, potius nitebantur. Nam tenebræ paulatim ingruentes omnem extemplo progrediendi copiam denegabant. Tunc illi animo consternati, ac nescientes, quidnam in tali necessitatis articulo agerent, seu quò se verterent, circumspicere sollicitè cœperunt, sicubi divertendi

locus congruus appareret. Et ecce subito nutu Dei in ipsa ejusdem loci planitie, in qua erant, quandam aulam miræ pulchritudinis eminus contemplantur. Gavisi sunt Fratres illuc continuo properantes. Mirares ! Quò cum venissent, cernunt omnes portas & seras pariter patefactas penitus & apertas. Verum totum illius palatii ædificium erat intus & exterius nitidum & fulgidum nimis, quasi de novo in illius diei curriculo consurrexisset. Ingredientes autem illi necessaria quidem ad usum vitæ invenerunt illic reposita copiosè, nullum tamen omnino ibidem hominem reppererunt. Porro ipsi pariter confederunt, præstolantes adventum dominorum illius ædificii. Cumque diutius expectassent, ecce Matrona quædam, quasi valde nobilis, vultu roseo renitens decora regalibus indumentis, ingreditur sola, benignissimeque salutando eos dixit : *Benè ad me venistis hospites mei chari.* Cui reverenter assurgentibus Fratribus ac prædicta Sorore Gertrude,

de, & cum humilitate exponentibus ei, quòd causâ hospitii obtinendi venerint illâ horâ, illa læto vultu respondens inquit: *Gaudium mihi est, quòd ad me divertere voluistis.* His dictis hortari cœpit eos ad cœnandum, ponens ipsa mensam, propriisque manibus eisdem necessaria administrans. Protulit quoque idem Prior Provincialis pisces & caseos de pera sua, quos in itinere secum detulerat, ac posuit super mensam. Post hæc conversus ad matronam dixit: *O Domina, si precipere dignaremini pullum assum preparari juvenula ad edendum* (loquens de nepte sua) *hoc enim necessario indigeret.* Ipsa enim de regione longinqua proficiscendo, & ad istos applicando terminos plurimum laboravit. Ad quem matrona illa extenta manu ad mancipium neptis ipsius dixit: *Fube servum illum, qui hic præstò est, ire in talem locum, accipereq; pullum, quem voluerit, ac domina sua preparare.* Prior Provincialis ergo dixit ad servum: *Vade & fac citius, quod*

Dominā dicit. Qui festinus ad designatum locum perrexit, fecitque, quod sibi fuerat imperatum. Allatam gallinam apposuit diligentius paratam dominæ suæ. Discumbentibus quidem illis matrona quoque cum eis cibum pariter degustavit.

Coenantibus autem illis subito juvenis quidam solus ingreditur ad eos splendidus, qui supra humanum modum mirabilis apparebat, & cui similem in omni elegantia ipsi nunquam viderant. Facies enim illius singulari venustate refulgens, Angelum potius quam hominem indicabat. Porro idem juvenis Priorem Provincialem & ipsius socios, pariterque neptem ejus cum gaudio salutavit, invitans eosdem benignissime, ut comederent satis. Post hæc conversus est ad matronam illam, familiariter tanquam ad matrem suam, diutiusque ambo pariter loquebantur. Fratribus & eadem Sorore Gertrude audientibus quidem vocem colloquentium, sensu verò sermonum eorundem minimè percepto.

Nec

Nec etiam attendere voluerunt propter verecundiam & honorem. Finito quoque sermone juvenis ille dulciter hospitibus suis vale faciens exivit continuo, nec visus est ulterius ab illis. Matrona illa benignius confabulando cum ipsis consolationem mirabilem exhibebat. Verba enim oris ejus omni suavitate & gratia plena erant.

Et coenâ factâ, cum de mensa surrexissent, præfata matrona introduxit Priorem Provinciale & ejus focios in cubiculum ad quiescendum, in quo erant lecti operimentis bonis ac nitidis præparati. Quibus benedictione datâ, & admonitis blandè, ad somni requiem degustandam protinus recedebat. Deinde apprehensa manu hujus beatæ Sororis Gertrudis, de qua loquor, duxit eam secum per gradus ad superiorem pulcherrimam domum, ubi similiter lectus fuit de plumis sericisque coopertoriis præparatus. Quem ut ipsa ascenderet, innuit ei benignè matrona prædicta, quam vestibus

cooperiens propriis manibus diligenter, pariterque benedicens illi, inde illico descendebat.

Porro diluculo facto prætaxata domina ingrediens in cubiculum, in quo idem Prior Provincialis cum suis fociis quiescebat, leniter excitavit eos dicens: *Surgite, ne tardetis. Ecce enim appropinquant mercatores, cum quibus hesterno die proficisceremini, & estote parati, ne prætereant.* Quibus auditis Prior Provincialis gavisus valde surrexit cum fociis suis festinanter, parati ad proficiscendum cum mercatoribus supradictis. Matrona similiter post hæc ascendebat domum, in qua manebat beata illa Gertrudis, & à somno blandè excitando illam dixit: *Surge citius, ecce aurora est, ut profisciscamini cum mercatoribus, vestris comitibus: jam propè sunt.* Qua velociter surgente accurrum suum protinus ascendente, tam ipsa quam Prior Provincialis & Fratres devotè gratiarum actiones eidem dominæ referentes pro multimodis beneficiis sibi ab ea collatis & exhi-

exhibitis, valedixerunt ei humiliter
abeuntes. Nunc mirandis plus mi-
randa succedunt.

Cùm de aula prædicta paulò lon-
giùs recessissent, reductis post ter-
gum oculis contra idem palatium
mirantes super his, quæ ibidem vi-
derant, quæque sibi acciderant, ec-
ce tota machina illius nobilis palatii
ita in nihilum repente fuit redacta,
quòd nec vestigium alicujus ædificii
illic apparuit. Quo viso stupore &
admiratione nimia repleti cernunt
obviam sibi venientes quosdam equis
sedentes nobiles terræ illius, à qui-
bus idem Prior Provincialis attentius
requirere coepit, utrum in loco illo,
in quo præclarum illud palatium
conspexerant, aliquando viderint
seu audierint à narrantibus ædificium
aliquod extitisse. Qui firmiter asse-
rebant, nullum omnino ibidem ali-
quando ædificium extitisse. His au-
ditis ipse, & qui cum illo erant, stu-
pore miraculi, quod fecit Dominus,
& ostendit eis, magis magisque at-
toniti reddebantur, voce unanimi

laudantes magnalia Salvatoris. Credidit sanè dictus Prior Provincialis, matronam illam fuisse Matrem Domini nostri JESU Christi, quæ tantâ benevolentia eos in suum palatium susceptos misericorditer in suis necessitatibus procurârit. Denique

Psal. 134. ipse Dominus, qui producit ventos de thesauris suis, ipse quoque pro solamine ac salute suorum fidelium, videlicet ejusdem viri sanctissimi & neptis ejus, hujus felicis Sororis Gertrudis, regale illud palatium voluit subito fieri & concessit, quod sicut sub unius noctis tempore repente absque humano opere esse cœpit, ita crastina diei luce exorta ad nuntium imperantis in nihilum est reductum. Sicque tandem, ut præmisimus, multis terrarum spatiis peragratis cum difficultate & labore Columbariam pervenerunt. Ipsa verò ad consortium hujus sanctæ Congregationis recepta est cum gaudio in Sororem ob reverentiam & honorem ejusdem sancti patris ejus, qui nos paternè in vita sua rexit, atque fovit

spe-

specialis dignationis gratiâ & favore.

Mox ut Monasterium est ingressa, novum hominem, qui secundum Deum creatus est, induit, de prisca conversatione, licet valde laudabili, multò melior effecta, in veritate sanctitatis & justitia omnibus diebus vitæ suæ ex tunc Domino deservivit, ejus pro amore advenam & peregrinam se constantissimè exhibens huic Mundo.

Verùm quia quem diligit Dominus, corripit & castigat, ipsi nunquam ferè, ex quo ad nos venit, paternæ misericordiæ correptio defuit. Per plures namque annos gravibus ac diuturnis est incommodis flagellata. Nullâ tamen infirmitatis molestiâ potuit à cursu desiderii sui, quo tota in Deum pergebat, aliquatenus retardari. At invalescente aliquando infirmitate corporis, & ipsa quadam animi præter solitum depressâ angustia & mœrore, pro eo, quòd Ordinis observantias, ut vehementer desiderabat, exequi non valebat,
aures

Apoc. 3.

aures benigni Conditoris querelis piū
murmuris pulsavit , dicens: *Nonne
propter tuum nomen , Domine Deus
meus , terrā omniq; cognatione meā re-
lictā huc peregrinata sum , ut tibi
soli serviam & inheream totā mente?
Nunc verò quotidiano languore tabe-
scens inutilis facta sum , minimè va-
lens aliis Sororibus in laboribus Ordi-
nis coequari.* Tunc repentē divino
ad se factō oraculo audivit corporeis
auribus vocem dicentem sibi: *Non-
dum est finis pressura tua , angustia
& doloris. Scias pro certo, scias, quia
sicut leo captam feram suis conteren-
do ungulis atque morsibus crudeliter
laniat: sic, sic revera Dominus Omni-
potens salubri dispensatione sua non so-
lū aufert salutem corporis , verū
etiam nudum reddit hominem ab omni
huius vite delectabili & jucundo , cui
gustum internæ suavitatis in presenti
decreverit elargiri, & in futuro glo-
riā vultus sui in perpetuum satiare.*
His sanè divinis verbis susceptis cum
gaudio magno valde , tantam secu-
ritatis gratiam de salute sua perpetua
à Deo

à Deo sibi cœlitus infundi sentiebat, quòd se ab æterno præviam misericorditer ad salutem à Domino ulterius minimè dubitavit. Manum quoque Domini ex tunc, quantumvis graviter se tangentis, portavit humiliter ac devotè.

Alio tempore sedebat in lecto suo in dormitorio, utpote debilis & infirma, & subito audire coepit sensibiler divinum quiddam voce mitissima nomine proprio se vocans & dicens sibi: *Desolata, desolata, Gertrudis absq; consolatione!* Et eadem secundo vox illa divina repetiit verba. Tunc illa, cui hoc audire divinitus est concessum, suspiciens, scire volens, quæ esset, quæ sibi talia loqueretur, sciscitando dixit: *Quid est hoc?* Cui protinus per divinum oraculum respondetur: *O si scires, quàm bonum, utile & salubre est homini desolatum esse super terram, & carere consolationibus infirmorum!* Hac cœlesti voce admonita terrenas consolationes, præter necessaria, sine quibus ista vita aliter transigi non potest,

potest, devoto animo recusavit. Unde veraciter dicere potuit cum Psal. 76. *missa: Renuit consolari anima mea, memor fui Dei, & delectata sum.*

Porro satis admirabilem divinæ dignationis suæ gratiam benignus Dominus huic in primordio conversionis suæ prærogare misericorditer dignatus est. Admirabatur sanè tunc temporis multùm nimis, cur hoc nomen *JESU* præ aliis nominibus impositum fuerit immenso & excelso Domino, quando visibilis in terra apparuit factus homo. Cui cum admiratione sæpius hoc tractanti suavis ac mitis Dominus, clarâ sensibilibique voce loquens linguâ Teutonicâ injunxit, ut imponat sibi nomen aliud, videlicet nomen novum, quod os Domini nominavit: *Tu*, inquit, *vocabis me: Æternus, paternus amor plurimus.* Et dixit: *Hoc mihi nomen est.* His mellifluis Domini verbis gratissimè perceptis cor ejus in semetipsa liquefiebat præ immensa divini amoris dulcedine, nec suavitate illius sanctissimi Nominis

Salva-

Salvatoris, tantâ dignatione sibi commissi, potuit aliquatenus satiari.

Accidit præterea ei in insigni die solennitatis Dominicæ Nativitatis quoddam miraculum per omnia memoria dignum largâ Dei benignitate. Nam cum sacratissimæ illius noctis vigilias in longum nimis, ut moris est, protelatas psallendo & orando in Choro cum Sororibus devoto animo transegisset, finitis omnibus ad divinum officium pertinentibus lectum intravit ante auroram parvâ temporis horâ, ut divinum diei servitium deinceps peragendum exsequeretur animo promptiori. Sicque in somnum quidem tenuem, & quasi semivigilans resoluta, audire coepit vocem excitantem se & dicentem: *Surge velociter, ne moreris, quia agape seu larga eleemosyna nunc in Ecclesia largietur.* Ad hanc vocem à somno protinus excitatur, & respondens voci excitanti se dixit: *Non est verum. Agape enim nunquam est apud nos aliquando, præsertim in Ecclesia nostra, & hac horâ temporis,*
dispen-

dispensata. Cui iterum per divinum oraculum voce sensibili responderetur & dicitur: *Absque dubio verum est, quia F. Wernherus de Erlebach* (qui etiam Confessor tunc temporis Sororum hujus Monasterii fuit) *Agapen mox in Ecclesia ministrabit, & si continuo non surrexeris, fraudaberis illa.* Et idem divinum oraculum adjecit iterum, & ait: *Scias, quod Agape sive solennis Eleemosyna postmodum de die vobis in Choro similiter dispensetur.* Quibus auditis citius surrexit, & festinatò venit in Chorum audiens Missam ad auroram: *Lux fulgebit*, jam inceptam fuisse in Choro à Sororibus ac cantari, & eundem nihilominus Fratrem, de quo dictum sibi fuerat divinitus, quod foret in Ecclesia Agapen dispensaturus, eandem Missam pariter celebrare. Ex quo aperte cognovit per largam eleemosynam tam in Choro, quàm in Ecclesia ministrandam secundum celestis oraculi denuntiationem, veraciter designari vivificum Altaris Sacramentum, quod in Missis omnibus

bus

bus ritè celebratis consecratur & offertur nobis gratis liberali munificentia Redemptoris.

Accidit ei præterea altera vice huic quiddam simile non minùs forsitan memorabile & motivum. Ipsa namque die quadam retro Chorum ad orationem se tempore divini officii collocarat, non valens ex infirmitatis suæ crebra molestia cæteris Sororibus ad psallendum stantibus coæquari. Canone verò Missæ incipiente repente somnus arripuit eam. Et vidit per somnium sacerdotem quendam insigniis sacerdotalibus indutum de Ecclesia chorum intrantem, qui tenebat in manibus suis calicem eburneum candidiorem nive, in quo carnes erant aureæ. pariterque colore roseo gratissimè micantes, in parvissimas tales incisæ minutias, quales carniū minutia solent in die Paschæ in Ecclesia benedici. Et hunc his delectabilibus refertum epulis calicem eidem Sorori sacerdos ille benignè obtulit ad videndum. Quas ut vidit, ardentè nimis ex eis

refici desiderans, multis instabat precibus supplicando dicens: *Obsecro vos Dei pro amore, Domine Reverende, quòd prabeatis mihi de his nimium delictiosis carnibus ad edendum.* Cui ille respondens ait: *Modò ad vescendum tibi minimè concedentur.* Verùm ipsa potiùs instabat obnixiùs implorando. Econtra sacerdos semper denegabat ei, quod petebat: *Non enim fas est, inquit, tibi, quòd modò eas accipias & manducées.* At illa: *Cur degustare eas modò mihi non licet?* Tum sacerdos ait illi: *Propterea his carnibus non vesceris, quoniam dum excocta fuerunt, illic præsens minimè extitisti.* His auditis statim visio illa disparuit, & ipsa à somno protinus excitatur. Intellexit utique per aureas roseasque carnes, sibi per somnium demonstratas, divinæ & humanæ naturæ substantiam certissimè designari, quæ in Altaris vivifico Sacramento verissimè continetur, seque fore donis illis coelestibus defraudatam: quia in hora consecrationis & oblationis hujus

jus divinissimæ hostiæ sopor sibi irreperat, nec debitâ vigilantîâ divinis, sicut oportuit, intendebat.

Mirificavit adhuc benignus JESUS misericordiam suam in illa sua solita pietate. Quodam namque sero, finito quidem in Choro Completorio, conspexit duas juvenes Sorores seorsum in secreto multo studio pariter colloquentes. Quo viso plurimum mirabatur, quòd illæ in hora extraordinaria conferrent ad invicem sic attentè. Et dixit: vadam & auscultabo procul dubio, quid loquantur: seipsam tamen cohibuit propter Deum, nec accessit ad illas, ne & ipsa similiter transgrederetur silentii disciplinam. Sicque diu multumque reluctando evicit curiositatis suæ desiderium, & fugiens festinatò lectum intravit. Tunc repente effudit super eam spiritum consolationis & gratiæ mira largitas Conditoris, replens omnia interiora ejus suavissimo nectare dulcedinis divinæ, ita quòd præ immensitate hujus gratiæ spiritualis ore fortiter obdurato, vestibus

applicatis vix semetipsam continere aperto valuit à clamore. Cui insuper totius confabulationis causam & verba colloquentium post Completorium Sororum ipse benignus Dominus condescendens mitissimè revelare dignatus est. Verùm ipsa hæc omnia postmodum cuidam fide dignæ consorori suæ secretiùs patefecit. Qua nimirum causam hujus extraordinariæ colloctionis attentius requirente, illa respondit & dixit: Nihil aliud fuit, quod ad invicem conferebant, nisi verba frivola & vana, & confabulatio fuit puerilis.

Denique apparuit aliquando visibiliter eidem Sorori sedenti in lecto suo quædam juvenis nuper tunc temporis defuncta Soror de nostro Monasterio, vultu hilari & jucundo, & in anteriori parte ejusdem lectuli sedebat, ad ipsam subridendo dicens: *Dilecta Soror Gertrudis, noveritis indultum mihi esse ad vos à Domino redire. Loquamini ergo mihi, obsecro, quicquid vultis: mea enim presentia procul dubio minimè vobis nocebit.*

Verùm

Verùm ipsa nimio terrore correpta, nec unum verbum loqui poterat. Videbat quoque diabolum sub specie terri nimis clericuli ac deformis eandem defunctam Sororem à longe sequentem, qui se abscondit latitans sub vestibus ibi super perticam dependentibus, quasi videri erubesceret. Cumque defuncta Soror aliquantulum expectâssset, ut sibi loqueretur, & illa nihil omnino respondere posset, dixit ei: *Caveatis vobis, bona Soror Gertrudis, ne de cetero brachia vestra de manicis exuta, super nudum corpus vestrum ponatis, sicut hætenus facere consuevistis, & orate pro me, quia nondum promerui videre faciem Salvatoris.* Et his dictis statim recessit ab ea. Clericulus autem, qui videbatur, confestim subsecutus est eam.

Sanè illa beata, de qua loquor, in divinis consolationibus & gratia charismatum plurimùm eminebat. Sedens namque propter continuas infirmitates suas in grabato suo die ac nocte, interim meditans atque orans,

frequentius persensit utrumq; ipsius hominem ineffabili suavitate coelestis consolationis & gratiæ totum ita mirabiliter delibutum , quòd nulum membrorum sui corporis seu etiam minimum movere digitum prævaleret præ immensa , ut dixi, hujus gratiæ dulcedine, qua feliciter debriabatur de torrente voluptatis divinæ , superna desuper aspirante gratia. Videbatur fanè insuper sibi in illa hora felici, quasi totus circumquaque lectus ejus, in quo sedebat, divinæ charitatis ardore ac dulcedine pariter plenus foret. Dumque tali fruitione divinitus sibi concessa felix potiretur , repente immisit in os ejus largitas divina quædam mirifica nova rhythmyca verba , profectò jucunda nimis & melliflua de summæ Trinitatis gloria & de Humanitate Christi sanctissima & de gaudiis coelestis Hierusalem , quæ antea non noverat, nec in cor ejus aliquando ascenderant, quæ tamen postmodum firmiùs retinens dulcissimè ruminabat. Unde non immeritò & ipsa dicere

dicere quoque potuit cum Propheta:
Inmisit in os meum canticum novum, Psal. 39.
carmen Deo nostro. Eadem tamen
verba illi divinitus inspirata postmo-
dum à nobis attentius rogata cum
devotione nobis maxima differebat.
Erant enim verba procul dubio fer-
vida & ignita flaminis * Sancti Spiri- * *f. leg.*
tûs, corda omnium nostrum, cûm flammis.
audivimus ea de ipsius ore, incen-
dentia vehementer. Inerat quippe
ei cum Deo familiaritas magna nimis,
& tanta de ipsius pietate confidentia,
quòd humanis verbis nequeat expli-
cari.

Tandem beata illa Soror vitam
suam in bona conversatione consum-
mavit, illique est conjuncta, quem
in terris posita tota devotione
concupivit ac jugiter re-
quisivit.

CAP. XLVII.

*De Sorore Gertrude de
Hattstat, bonæ memoriæ.*

EXtitit quoque in hujus Monasterii sacrario, quædam sanctæ memoria Soror, nomine Gertrudis, dicta de Hattstat*, à pueritia divino servitio à parentibus tradita, in quo sub cura Ordinis & patrocinio almi Patris nostri S. Dominici usque ad obitum suum Domino deservivit. Fuit revera miræ puritatis & innocentia, & virginitatem mente & corpore integrè Dei munere conservavit: erga Deum devota & timorata valde, conscientiam suam scrupulosissimè examinans & dijudicans, etiam in minimis negligentis & peccatis, quæ dilluere ac purgare per confessiones assiduas non cessabat.

Mira-

* Hattstat arx fuit in Alsatia uno miliari distans à Rubeaco civitate, in alto monte sita, sed anno 1466. destructa. Hodie vicus est.

Mirabili quoque ingenio erat prædicta. prudens, discreta, decens & composita in moribus, affabilis & in omnibus gratioſa valde, prolesque nobilior illustrium Comitum Phirretorum.

Huic beatæ, cùm in ultima ægitudine, qua & mortua est, diutiùs laboraret, ante plures defunctionis suæ dies, accidit per divinæ consolationis gratiam quoddam admirandum & omni acceptione dignum miraculum, quod verbis perpaucis breviter intimabo. Cùm ergo morbi violentia de die in diem gravissimè invalesceret, & ipsa in defectione magna quadam die decumberet in grabato, repente sentire cœpit, non per somnium, sed plenè vigilans, sensuque per omnia vicens inæstimabilis dulcoris suavitatem faucibus suis infundi, super mel & favum incomparabiliter dulciorem, quæ veluti fons vivus in ore illius scaturiens, utrumque ipsius hominem mirabiliter penetrando suavissimè perungebat. Tunc illa eandem infusam sibi cœli-

rus dulcedinem labiis & linguâ quasi fugendo cœpit sæpius transglutire cum admiratione dicens: *O Domine Deus Pater misericordiarum, unde est mihi hujus ineffabilis, & prorsus antè inexperta suavitatis dulcedo, quam experior?* Cui mox benignus Dominus clara & mansuetissima voce desuper respondens ait: *Ego, Ego ipse consolabor te.* Ad hanc benignissimam Domini & impreciabilem promissionem tota in ipsa liquefacta est anima ejus igne divini amoris, & tantâ jucunditatis affluentia perfusa, quòd præ immensitate lætitiæ se ipsam vix caperet.

Alio quoque tempore ante paucos dies, quàm de corpore emigraret, dignatus est eam iterum benignus Dominus mirificè consolari. Quadam nempe die in doloribus suis ad Deum clamans, conspexit subito se involutam densissimis tenebris ac vallatam. Cumque paveret nimium ac doleret, mox stella præfulgida, aureos de se radios emittens, exorta emicuit, quæ lucis suæ fulgore ex-
templò

templò prædictas tenebras effugavit, locum, in quo beata illa Soror erat, magno lumine perlustrando. In cujus conspectu ipsa exultavit lætitiâ magna suspiciensque vidit Angelum Dei splendidum & coruscum facie apud eandem stellam propiùs consistere, quem cùm admiratione diutius intuebatur, in ipsius visione plurimùm delectata. Ipse verò Angelus dulci ac suavi nimis melodix incepit altissimè canere: *Absterget Deus omnem Lachrymam ab oculis Sanctorum, & jam non erit amplius neque luctus, neque clamor, sed nec ullus dolor.* Tria autem verba, quæ sequuntur, videlicet: *Quoniam priora transierunt*, intermittens idem Angelus non cantavit. Quo apertè dabatur intelligi eidem Sorori divina gratia inspirante, quòd adhuc oporteat eam pati acerbitates, mortis angustias & dolores, quibus superatis fugeret ab ea dolor & gemitus, deincepsque gaudium & lætitiâ sempiternam obtineret Dei gratia opitulante. Ista visio gloriosa, quæ huic Sorori divinitus

nitus est concessa, duodecim vicibus est repetita, quam toties vidit tenebris dictis præcedentibus, & luce stellæ cum fulgore & cantu Angeli pariter subsequente.

Hæc beata Soror gravibus infirmitatum molestiis pœnè omnibus diebus vitæ suæ multipliciter afflicta durum nimis & diuturnum martirium duxit. Cursu tandem præsentis vitæ peracto salutis suæ certitudinem tali prognostica visione, quemadmodum præmissi, meruit prævidere, atque Paradisi gaudia nunc possidet cum gloria. Amen.

CAP. XLVIII.

De Sorore Hedvige de Geuviler, felicitis memoriæ.

Dicere vel breviter quædam, admodum pauca de multis, mihi comperta, cogit me laudabilis conversationis sanctitas beatæ hujus quondam Monasterii Sororis Hedvige

Hedwigis de Gewiler *, cujus felix memoria tanquam favus mellis adhuc in nostris cordibus indulcescit. Agebat sanè à prima die, qua intravit Monasterium, usque ad obitum suum strictam & arduam nimis vitam admirandam multis, paucis reverà imitabilem, quietem corpori suo minimè accomodans. Ordinem Patris sui S. Dominici devota semper sollicitudine conservavit, nec retrò recessit cor suum à tramite justitiæ, quam incepit. Mitis tamen erat omnibus & benigna, affabilis & jucunda, bonis denique moribus & virtutibus decorata.

Porro ad divinum officium in Choro summâ stabat semper vigilantia, devotè intendens psalmodiæ altè canendo sine intermissione: studioso suo ac jucundo cantu replevit Chorum, & dum vixit, præcipuè sublevabat, & astantes Sorores ad psallendum pariter excitabat. De-

derat

* Gewiler *Vicini Alsacia non longè ab Urs-*
vier.

derat etenim ei Dominus vocem bonam & sonoram, quam in ejus servitio expendere pro viribus satagebat. Et licet in multis semper foret officiis occupata, divino tamen officio in Choro interesse devota solitudine continuè nitebatur.

Multâ & assiduâ profectò abstinentiâ, aliisque pœnitentiæ operibus Soror hæc beata, de qua loquimur, corpus suum acriter castigavit, sibi, minimè condescendens pro nomine Salvatoris. Rarò namque pitantias, seu ova ad refectorium sibi oblata, sicut & cæteris Sororibus, comedebat, nisi interdum per obedientiam compulsâ : tunc gustavit parùm de eis potius quàm edebat, sed simplici pulmento, cum butyro condito, seu legumine contenta. Sanè in ætate tenera monasterium istud ingressa est, in quo per quadraginta annos Domino laudabiliter deservivit, omnia statuta Ordinis jejunia, & Ecclesiastica interim servans, nec cibos mutavit refectorii. Carnes quoque interim non edebat, nisi acutâ sive aliâ

aliâ gravi ægitudine laboraret. Tamen per decem & septem annos continuos, ante obitum suum omnino carnibus nunquam vescebatur, licet interim sæpius doleret, essetque debilis & infirma, & tali recreatione pluries eguisset, nisi quod propter Deum vim sibi intulit vehementer.

Habebat bonam consuetudinem atque sanctam, quam in vita sua indeclinabiter servavit, videlicet quod in sacratissima Dominicæ Nativitatis nocte, neque post completorium, neque finitis matutinis lectum intravit ad pausandum, sed in devotis orationibus atque hymnis per totam noctem illam & diem immobilis & pervigil perdurabat: Sicque in sanctissima Parasceve nocte ac die similiter faciebat, tamen in Choro nocturno officio & diurno interfuit, cum multa vigilantia & devotione psallens & vociferans incessanter. Pietas quidem Domini contulit ei in prædictis bonis operibus & his similibus magnam perseverantiæ virtutem,

tem, quibus illi profectò accrevit multiplex in futuro cumulus meritorum.

Insuper pius Dominus sæpe consolatus est eam dulciter in secreto in suis orationibus, quas illi creberri-
mè obtulit & devotè. Orans nam-
que ea quadam vice devotissimè co-
ram Altari prostrata pro anima fra-
tris sui, nuper defuncti, multis la-
chrymis & suspiriis invocavit diutiùs
ipsius clementiam, ut parcere illi
â pœnis, quas promeruit, dignare-
tur, culpas ejusdem, quas contraxit
in præsentī, misericorditer relaxando.
Cumque diutiùs sic orâsset, protinus
audire cœpit corporeis auribus sensi-
biliter Deo largiente de Altari in sub-
limi tanquam vocis fratris sui cum
gaudio dicentem sibi: *Portio mea in
terra viventium.* Facta hac voce
in auribus ejus ineffabili gaudio exul-
tavit, totis præcordiis gratias agens
Domino, qui eam per illud divinum
oraculum certificare voluit de salute
animæ fratris sui, de qua deinceps
dubitare minimè potuit.

Prio-

Priorissa nostra tunc temporis in quadam animi posita fuit tristitia non modica & dolore causâ Monasterii, cui tunc præfuit. Eidem verò illa sancta Soror, de qua hætenus locutæ sumus, totis præcordiis medullitus compatiebatur, modis omnibuseam, quibus poterat, consolando, quia illam valde specialiter diligebat propter admirandam vitæ ipsius innocentiam & optimam conversationem à pueritia. Unde omni precum instantiâ cœpit indefinenter Domini misericordiam implorare devotissimè supplicando, quatenus eandem Priorissam ab omni tribulatione dignaretur clementiùs liberare, causam suæ mœstitiæ in gaudium sibi convertendo. Et cùm à precibus omnino non cessaret, affuit illi benignitas Salvatoris suâ solitâ pietate, dicens ei piissimè his verbis : *Cur sic incessanter instas importunis precibus obtinere, ut Priorissa, pro qua rogitas, hac tribulationis adversitate careat, quæ illi ad salutem procul dubio à me imposita est, præsertim cùm illi sit utilis &*

Tom. VIII. B b salu-

salubris. Sanè illa Soror beata, quæ hæc verba Domini pretiosiora super aurum & lapidem pretiosum audire meruit corporeis auribus, dictæ Priorissæ postmodum consolationis gratiâ per ordinem enarravit. Ut autem ipsa audivit omnem tribulationem, quam patiebatur, piâ sibi dispensatione Domini accidisse, qui quos diligit, misericorditer corripit & castigat, ineffabiliter extitit consolata, devotissimè gratias referens pro adversitate prædicta, quam & postmodum lætanter & patientissimè sufferebat.

Tandem beata illa Soror Hedwigis de Gewiler, quæ pretiosum monile in isto Monasterio extitit, cujus religiosam conversationem & sanctam brevî sermone describentes finivimus, migravit ad Dominum Redemptorem, qui est merces suorum fidelium magnanimis.

CAP.

CAP. XLIX.

*De beata quondam hujus
Monasterii Sorore, Margareta
de Brisaco felicitis recordationis.*

INserere huic operi necessarium
dixi quædam mira & memoriâ
procul dubio digna, veridicâ mi-
hi relatione comperta, ad præco-
nium admirandæ sanctitatis, feli-
cissimæ quondam Monasterii de Un-
derlinden in Columbaria Sororis
Margaretæ de Brisaco* prædulcis me-
moriæ, quæ tamen multo tempore
scribere distuli contra animi mei pro-
positum, diversis causis ab his, quæ
mente conceperam, in isto opere
sæpius impedita. Fuit enim Soror
hæc beata, de qua loquor, fortis
columna Dei, forma & exemplar
prælucidum totius Religionis ac per-
fectionis, Regularis observantiæ
conservatrix præcipua & Zelatrix.

B b 2

Non

* Brisacum civitas Brisgoia, in monte posi-
ta ad Rhenum.

Non piguit ergo eam ponere se murum pro domo Domini insurgendo acriter contra cunctas Sororum huius Monasterii transgressiones & negligentias arguendo, admonendo, & instanter in Capitulo proclamando, modis omnibus elaborans, ut status sanctæ Religionis in hoc loco, quem Dei dextera procul dubio plantaverat, inviolabiliter in perpetuum conservaretur.

In primo siquidem ingressu suo in Monasterium de sub Tilia supradicta Soror Margareta viam perfectionis ita arripuit, ut meritò possit in perfectorum numero computari. Porro ab omni recreatione, solamine & confabulatione hominum penitus se subtraxit, ut quasi peregrina esse ac solitaria videretur. Silentium namque, quod sanctæ Religionis est fundamentum præcipuum & ornamentum, in omni vita sua strictissimè tenuit. Præterea arctum nimis silentium per unius anni spatium sibi indixit, in quo nec unum quidem modicum verbum locuta est, licet in officiis

ciis gravibus esset interim continuè occupata , exceptis duntaxat horis Canonicis aliisque orationibus suis devotis & Confessionibus, tempore debito faciendis.

Erat Soror hæc beata , de qua loquimur, in contemplatione divina ad Deum jugiter suspensa , licèt se dare per obedientiam exterioribus actionibus continuè deberet. Exteriores namque & interiores sensus ejus omnes ita indeclinabiliter in Dei servitio captivârat, quòd nunquam in omni vita sua permisit scienter in corde suo varias cogitationes & inutiles pervagari , quemadmodum ipsa ante obitum suum secretiùs retulit firmiter asserendo.

Rigidam profectò nimis & arduam vitam duxit. Corpus suum continuis vigiliis , jejuniis aliisque abstinentiæ operibus incredibiliter castigavit, in nullo sibi condescendens, de quibus pauca subjungam, ut sciatur, quanto labore ac corporis castigatione , nec non perenni animi puritate hæc Deo dilecta Soror

regnum Dei legitimè certando expugnauerit & acceperit per gratiam
Matt. 11. Salvatoris secundùm illud: *Regnum*
cælorum vim patitur, & violenti rapiunt illud. Ipsa namque singulis
 noctibus super lapides prægrandes,
 positos cautè in lecto suo, unâ tantùm
 superstrata matta, quiescere solebat
Gen. 28. instar Jacob Patriarchæ. Somni
 requiem maluit ita commutare sibi
 in laborem potiùs & dolorem super
 lapides duros cubando, quàm quietem
 aliquam suo corpori comodare.

In virtute abstinentiæ incomparabiliter eminebat. Erat enim in cibo & potu temperantissima. In prandio siquidem pariter & cœna tantùm tribus vicibus perparum valde bibe-
 bat, & his contenta sitim suam postmodum nullatenus aliquo potu sedare voluit. Sanè in refectiōe sua semper aut cinerem prælibabat, aut uvarum vinacia atque acinos vel pomorum aliorumque fructuum purgamenta projecta de ore cujusdam infirmæ Sororis, cui ipsa ex obedientiæ officio ministravit, in cibum sum-

sumpsit in scutellæ suæ edulium secretiùs permiscendo. Hoc revera ideo faciebat, quatenus tali facto cibus, quem sumptura erat, magis sibi fieret horrore quàm delectationi, semetipsam durè nimis pro nomine Domini affligendo. Denique in prandio Sororibus duo pulmenta sibi apposita edentibus, ipsa uno tantummodo contenta, aliud in omni vita sua, scilicet per quadraginta annorum spatia, abstinendo sibi subtraxit pro nomine Salvatoris. Interim verò per tanti temporis spatia nunquam pisces, nunquam pitantias aliquas, sibi in mensa oblatas, nec racemos, neque aliorum quorumcunque fructuum poma gustare voluit, sed de omni cibo delectabili, quod palatum posset allicere, abstinit diebus omnibus vitæ suæ, nisi cùm nimis graviter ægrotaret.

Finitis Matutinis in Choro statim nudis flexis genibus super lapides prope Altare procumbens, diutissimè in oratione ad Deum maxima fervoris devotione suspensa immo-

biliter permanebat usque ad signum, quod solet dari Sororibus, ut intrent locum dormitionis. Illud autem tempus, scilicet post Matutinarum finem usque ad dictum signum tantæ prolixitatis est, quòd integrum psalterium interim dici possit, præsertim tempore hyemali. Verùm prædicto signo dato dormitorium ipsa ascendit, nullum calefaciendi se postmodum requirens remedium tempore brumali. Sicque per multos annos etiam in nimio caumate æstatis similiter faciebat. Recreationem refrigerandi se ad ventum habere noluit. Sanè omnibus diebus Dominicis & feriatis tam in hyeme quàm in æstate nunquam de choro recedebat, sed in devotione præcipua ibi, quamdiu sibi licuit, permanebat, ita ut Chorus videretur quodammodo adornari ex ipsius veneranda præsentia. Postmodum diebus aliis sedens in laborerio intenta semper ac fideliter nimis operi manuum ad communem utilitatem serviendo, nunquam interim per quadra-

draginta annos voluit se ad parietes
seu ad asseres appodiare. *

* i. e. re-

Præterire silentio non debemus clinare.
magnam nimis & admirandam divi-
næ consolationis gratiam, per paucis,
ut credimus expertam, quam huic
Sorori, verè beatæ, de qua loqui-
mur, benignitas concessit Salvatoris.
Raptam namque se usque ad præsen-
tiam summæ Majestatis firmiter, qui-
bus voluit, secretiùs assererat, atque
supra homines altissimè duce gratiâ
elevatam usque ad conspectum sum-
mæ Trinitatis, ubi experiri ac frui fe-
liciter & degustare sibi concessum
fuit parvâ horâ & brevi morâ illud
incomprehensibile bonum, quod
Deus est, & quod solum electis in
patria reservatur in præmium. Sanè
in illa supracœlesti visione in tantum
deificata extitit per unionis Dei con-
formitatem, quòd miro modo &
ineffabili esse in illo raptu meruit per
gratiam, quod Deus est per natu-
ram, & ita felici experientia in se ple-
niùs comprobavit veritatem Sacrae
Scripturæ dicentis: *Ego dixi: Dii Psal. 81.*

Bb 5

estis

estis, & filii Altissimi. Supradictorum mirabilium excessuum gratiam huic Sorori beatæ veraciter per omnia, ut retulit, contigisse minimè dubitamus, præsertim cum sancta ejus conversatio talis extiterit, quòd fidem verbis non adhibere nefas esse putaremus.

Restat adhuc dicendum nobis de mirificis gratiarum donis, quibus hanc dilectam suam multo tempore ante obitum suum pius Dominus singulariter in spe constituere dignatus est. Ipsa namque quodam tempore in oratione posita, lachrymosis cœpit precibus Domini clementiam invocare pro animæ suæ salute sempiterna devotissimè supplicando. Cui humilium Consolator benignus Dominus affuit sua solita pietate, ac benignissimè consolabatur eam certificando, quòd æternæ felicitatis gaudia, quæ sibi ab æterno dare disposuerat, foret procul dubio carne exuta corruptibili adeptura.

Adjecit iterum quoque Dominus facere misericordiam suam magnam

gnam cum illa. Apparuit enim ei in Humanitate sua sanctissima evidenter & apertè, & clementissimâ indulgentiâ suâ remisit illi omnia peccata, quæ commiserat: sicque omnibus peccatis hujus beatæ Sororis omnino consopitis & deletis à facie Domini ipsius mitissima bonitate veraciter facta est una ex illis beatis, de quibus Propheta proloquitur dicens in Psalmo: *Beati, quorum remissa* Psal. 31. *sunt iniquitates, & quorum tecta sunt peccata.*

Porro benignus & suavis Dominus omnibus invocantibus eum, iterum divinæ miserationis suæ respectu per divinum oraculum magnificè lætificavit eandem, prædicens ei, quòd carnis suæ onere deposito absque pœnis purgatorii ad cœli gaudia foret volatu libero transitura, ineffabili ipsius clementia largiente. Verùm super hæc Majestatis Dominus repromittere dignatus est huic Sorori, verè beatæ, quòd in hora expirationis suæ divinâ suâ præsentia adesse sibi vellet, animam quoque ejus admirabili

mirabili dignationis gratiâ in ulnas suas suscepturus, dulci Divinitatis suæ amplexu sibi associando in æternum & ultra. Sanè his pro maximis & nimis pretiosis consolationum donis, divinitus acceptis à Domini benignitate, exultavit Spiritus ejus in Deo salutari suo in immensum, nec valens pii amoris lachrymas præ magnitudine lætitiæ continere, multo stetit tempore in cordis jubilo.

Denique oratio ejus fuit fervida multùm & efficax coram oculis Salvatoris, per quam de facili obtinuit, quod petebat. Oranti igitur pro matre sua defuncta apparuit ea sibi vigilanti visibiliter & stupenti, poenis graviter cruciata. Super cujus afflictione Soror, quæ hæc vidit, vehementissimè movebatur, compatiens medullitus patienti, & cum lachrymis diutiùs oravit ad Dominum devotissimè supplicando, quatenus matrem ipsius à poenarum vinculis absolutam ad requiem perduceret sempiternam sua clementissima bonitate. Cujus preces & lachrymas benignus Domi-

Dominus, qui non despicit gemitus contritorum, continuò exaudivit sua solita pietate. Nam non multò post apparuit ei iterum mater sua visibiliter splendida & gaudens, gratias eidem referens plurimas dixit, quòd propter orationum suarum esset instantiam liberata, moxque in Domini gaudium intratura. Et his dictis ab oculis videntis, & audientis hæc disparuit, & ulterius non vidit eam.

Præterea frater suus carnalis, nihilominus defunctus, apparuit visibiliter eidem Sorori vigilanti & oranti altera vice, quasi totus igneus ex flammarum incendio, quæ de ipso erumpebant. Ex cujus visionis horrore Soror, quæ hæc vidit, tota contremuit timore nimio & pavore. Et interrogavit dicens: *Quis es tu?* Et ille: *Ego sum frater tuus, ait, qui in his flammis pessimè crucior sine intermissione, & harum molestias penarum usq; ad diem judicii sustinebo, justo Dei judicio exigente.* Cui illa pia compassione faucia vehementer condoluit toto corde, gemituque & lachry-

lachrymis replevit aures Domini, die ac nocte indefinenter Domini clementiam implorando, ut misero fratri suo in suis dignetur angustiis & miseriis subvenire, culpas, quibus iram meruit, misericorditer relaxando. Cujus preces respexit misericors & miserator Dominus, nec despexit lachrymas ejus, sed fecit misericordiam celerem ad preces illius cum fratre suo, liberans eum de sævis tormentorum pœnis, quas usque ad diem judicii peccatis suis exigentibus debuit sustinere, longissimo illo pœnarum tempore in dies paucissimos breviato, suâ clementiâ largiente. Paucis siquidem diebus postmodum evolutis idem defunctus apparuit visibiliter iterum eidem Sorori coruscus facie, niveis vestibibus indutus de magna Dei misericordia facta in illum, per ordinem ei, ut prædiximus enarravit, gratias eidem referens valde magnas. Sicque ipsa eum ulteriùs non videbat. Et ita eadem Soror tribus aliis defunctis plenam liberationem de pœnarum tormentis,

mentis , quæ diutiùs pati debuerant in purgatorio , suis devotis à Domino precibus impetravit.

Postremò sancta hæc Soror cursum vitæ suæ laudabiliter consummavit & dulcissimo Domini nostri JESU Christi amplexu felix fruitur sine fine. Amen.

Sciendum sanè , quòd sanctissimum Monasterium de sub Tilia perfectis & omni Religione consummatis Sororibus claruit , quas benignus Dominus de futurorum cognitione in hac vita nobilitavit , ac suorum effecit participes secretorum , de quibus pauca , quæ dicta sunt , ad præsens sufficient.

Ego Soror Catharina ex Gebeswiler , à pueritia in eodem Monasterio educata , hoc opus exegi.

*Finis Libri Dominae Catharinae ex
Gebeswiler de vitis primarum sanctarum
Sororum Cœnobii
sub Tilia.*

Summa sit Gloria Regi.

Appen-

Appendix.

CAP. I.

** Vita Margaretae Kentzingensis, Sororis Laicae Monasterii sub Tilia auctore R. P. Joanne Majero Ord. S. Dominici.*

MArgareta, Kentzingâ oppido Brisgoiæ oriunda, parentes habuit divites & honestos, à quibus benè profectò, sed omnium tamen optimè à Spiritu Sancto, qui eam in benedictionibus dulcedinis suæ prævenit, instituta & educata est. Ut ad nubilem pervenit ætatem, cognaticus valde pio & opulento mercatori illam nuptui dederunt. Ipsa verò ab infantia Deum timere, sacramentalem confessionem frequentare, sacris interesse concionibus edocta est.

Post.

** Exstat Germanicè in MS. Codice Cœnobii S. Agnetis, Friburgi Brisgoia.*

Postquam maritus eam domum traduxit, quædam provectioris ætatis virgo gravis, & rei familiaris perita illi adjuncta est, quæ curam ejus gereret, ipsam erudiret, & in omnibus dirigeret, cujus instructioni & directioni prorsus illi parendum foret. Pia fœmina propriæ ancillæ tam humiliter subjecta & morigera fuit, ut nusquam, ne ad propriam quidem matrem sine ejus permisso ire præsumeret. Negatam interdum à Virgine matris invisendæ licentiam modestè tulit, & ita obsequentem se præbuit, ut ejusmodi facultatem non peteret amplius, sed expectaret, donec ipsimet Virgini visum esset illam concedere. Hoc modo famulæ suæ obedientiam præstitit, & in sæculo adhuc matrimonii vinculo constricta propriam voluntatem fregit ob amorem & honorem obedientiæ, quam Dominus noster JESUS Chri- *Philipp. 2.* stus Patri suo cœlesti usque ad mortem, mortem autem Crucis acerbissimam nostri causâ exhibuit.

Maritus ejus, vir prudens & Senator civitatis Kentzingensis æquo animo tulit, quin etiam vehementer approbavit, quicquid illa boni egisset. Erat enim & ipse morum probitate ac pietate insignis. Hanc quoque gratiam contulerat illi Deus, ut quandocunque in Senatu de flagitioso aliquo ad ultimum supplicium condemnando agebatur, is interim innocentissimam Christi passionem & mortem animo revolveret, adeo ut ad rem propositam non multum adverteret, ac vix interrogatus respondere posset. Ita inter hanc beatam matronam & maritum ejus sanctum conjugium fuit, ut Christo Domino, omnium mundanarum animarum sponsa esset acceptior. Consoeverat etiam singulis hebdomadibus semel conscientiam suam exomologesi perpurgare.

At post mariti è vita decessum optimam & tutissimam strenuè sancteque Domino Deo serviendi viam eligens, saluberrimum Christi consilium, jubentis ad perfectionem aspiranti

Luca 18.

ranti vendere omnia & dare pauperibus ac se sequi, arripuit. Nam unicam filiam suam in Monasterio quodam Ord. S. Claræ divino mancipavit servitio, traditis propter Deum eidem Monasterio omnibus facultatibus suis. Dehinc voluntarium amplexata exilium quinque annis in peregrinis regionibus ostiatim victum emendicavit, magnamque sui abjectionem & contemptum cum multifariis tribulationibus & miseriis perpeffa est. Venit autem Marpurgum, ubi in Nosocomio, à sancta Elisabeth extructo, ægrotantibus inservivit.

Interim vitæ non minùs contemplativæ exercitiis dedita, petiit à Deo gratiam, ut omnium mortalium despectissima & abjectissima fieret. Quocirca singularem illi Deus afflictionem & infamiam, sicut plerumque suis amicis solet, accidere permisit. Nam furti & aliorum quorundam criminum insimulata est. Cùm autem nihil opponeret, sed Domino Deo totam se resignaret, atque ad ipsam etiam mortem offer-

ret, capta & ad iudices pertracta est, qui sententiâ latâ eam aquis suffocandam decreverunt. Dum verò homines, ut fit, undique concurrerent, divina dispensatione contigit quendam venerandum sacerdotem, popularem ejus, ob causas aliquas eò loci agere. Cùm is hanc sanctam matronam jamjam ad mortem duendam diligentissimè contemplaretur, statim eam agnovit, & de tanto illius infortunio obstupuit, judicique & aliis dominis retulit, quàm honesta persona ipsa esset, quamque spectati & pii homines parentes & maritus illius fuissent: Non igitur verosimile esse tantis ipsam sceleribus sese obstrinxisse. Illi diligentiore inquisitione facta, ejusque innocentiam comperta in pace illam dimiserunt.

Sed quandoquidem verè humiles gloriam momentaneam fugiunt, & ab hominibus laudari renuunt, immò teste S. Gregorio, à Mundo prædicari animum ipsorum excruciat, idcirco beata foemina Margareta ex illa regione discessit, secum,
quid

quid posthæc sibi faciendum, deliberans. Verùm animum illius subiit sese ad magnum Dei amicum cum sociis suis in superiori Germania, in monte Vosago degentem, conferre, de quo supra modum multa laude digna inaudierat, nempe, quòd à puero devotissimè Domino Deo serviisset, & jam senex omnium rerum divinarum & ad animarum salutem pertinentium maximam haberet cognitionem atque experientiam. Et prorsus ita erat. Nam hic vir Dei unus illorum quinque sanctorum virorum est, de quibus libellus quidam tractat, immò sanctitate & perfectione præcipuus illorum. Hic est sanctus ille vir, qui Magistrum* Theologiae Ordinis Prædicatorum, saluberrimum spirituale Alphabetum juxta seriem literarum edocuit, eumque virum sanctum effecit. Intimus Ruolmanni Meerschwinii amicus fuit, quem re & consilio juvit, ut religiosa vita ad sanctum Joannem in Viridi

Cc 3

Warda

* Jo. Thaulerum *Prædicatorem Colonia celeberrimum.*

Wærda Argentinæ institueretur. Multa quoque alia supernaturalia & sublimia Dominus Deus per hunc dilectum amicum suum operatus est, uti magna ex parte Latinè & Germanicè in memorata religiosa domo Wærdæ Viridis literis * consignatum est.

Ad hunc sanctum virum magno labore B. Margareta profecta est, quem ex singulari Dei dispensatione in propria mansione reperit; aliàs eum adire non potuisset. Totam illi vitæ suæ seriem aperiens consilium petiit, uti deinceps in via Dei progredi, & quodnam vitæ genus, quod Deo acceptissimum & honorificentissimum foret, complecti deberet. Respondit ille, præter Monasterium Stainbacense in Alsatia aliud Cœnobium monialium esse Colmaria, sub Tilia dictum, Basiliensis diœcesis, ad disciplinam monasticam juxta omnes Ordinis Prædicatorii constitutiones perfe-

* *Quedam etiam habentur in vita Jo. Thauleri, præfixa operibus ejus à F. Laurentio Surio Latinè redditis.*

perfectè reformatum : consulere se, ut sub obedientia illic viveret, Ordinemque ceu humilis soror laica susci- peret.

Possent hìc quispiam cogitare, quo pacto Dei amicus in superiori Germania, qui Ruolmanni Merschwini familiaris amicus dicitur, huic Sorori æquævus fuerit, qui tamen omni sanctitate multò antè in florida sua ætate legitur claruisse, videlicet anno Domini millesimo trecentesimo, quinquagesimo, qui fuit jubilæus tempore Clementis * Papæ. Sed sciendum, hunc amicum Dei diu admodum in hoc sæculo vixisse usque in profundissimam senectutem. Longè namque centesimum ætatis annum prætergressus, est, quod dudum ei Dominus prædixerat, simulque monuerat, sese hac in parte resignaret, tantamque vitæ prolixitatem libenti animo perferret.

Margareta hujus sancti viri consilio acquiescens, in prædicto Mona-

CC 4 sterio

* Fuit hic Clemens sextus, creatus anno 1342, mortuus anno 1352.

sterio sub Tilia Soror laica facta est anno ætatis suæ quadragesimo, ubi postquam aliquot annis religiosè sancteque vixit, illinc ab Ordine cum aliquot aliis Sororibus Basileam missa est pro Cœnobio ad Lapidem ibi reformando. Posita fuit Senioribus ejusdem cœnobii Sororibus in exemplum Religionis & sanctitatis. At illa indignam se isto honore duxit. Tam autem conspicuam virtutibus ibi vitam egit, tantaque universas charitate prosecuta est, ut de beata ejus conversatione Sorores plurimùm fuerint ædificatæ. Officia Rotulariæ & Vice-Procuratricis illi demandata sunt. At cùm sæpius, quando Procuratricem in computis, scriptionibus & aliis hujusmodi externis operibus juvare debebat, ex fortissima sui introversione & Spiritûs mirabili devotione à sensibus corporis abstraheretur, ea illi officia iterum adempta sunt. Crebras in mensa, & post sumptam S. Communionem ob æstuantissimum superamabilis Dei amorem extases passa est. Die, quo
sacro-

sacrosanctum Altaris Sacramentum perceperat, parùm comedebat. Ple-
risque temporibus in Choro orationi
vacabat, ubi propter frequentes
mentis excessus clausa illi sedes con-
structa est. Porro paucos aliàs sin-
gulares modos & consuetudines præ
reliquis Sororibus habuit, nisi quod
rarò locuta est, neque ad rotam aut
fenestram collocutoriam, etiam à
nobilibus & honestis personis vocata,
priùs se contulit, quàm id ad con-
scientiæ suæ pacem & tranquillitatem
cessurum intra se sensisset. Quando
externum vel verba saltem promere
audivit, statim Dei munere intelle-
xit, quo in statu vel gradu merito-
rum is apud Deum esset. Unde plus
minusvè cum illo conferre poterat.

Dum in Vigilia quadam Nativi-
tatis Christi magnum Capitulum ce-
lebraretur, & verba omni acceptio-
ne digna, quibus annuntiaretur sa-
lus nostra, sacratissima Verbi Patris
æterni Nativitas secundùm carnem,
altiori voce legerentur, nimirum:
JESUS Christus Filius Dei in Beth-

leem Juda nascitur, ipsa Soror dulcissima hæc verba & mirabile nuntium summa percepit devotione, & secum studiosissimè perpendit, quàm stupenda charitate Deus propter nos miseros peccatores homo factus esset, quamque profundè celsissima ipsius Majestas nostri causâ se demisisset atque exinaniisset. Hinc anima ejus è tam stupenda divini operis contemplatione, tanta admiratione obruta, tantaque suavitate perfusa est, ut eâdem Vigilia in mensa alta voce exclamârit: *JESUS Christus Filius Dei &c.* Interim caput inclinans, & mentis excessum patiens. Sicque Spiritu absorpta usque ad Vesperam ad mensam refedit.

Cùm autem Dominus Deus charissimam filiam suam propediem ex hoc Mundo ad se vocare destinâset, priùs eam sibi optimè præparare voluit. Unde gravibus eam morbis afflixit; maximè autem sacro igne, ut vocant, seu carbunculo alterum ejus crus foedè intumuerat, è quo tam putida sanies diu noctuque emanavit,

navit, ut crebrò Sorores ei inservientes inde in morbum inciderint. Quantumvis autem acerbos atque intolerabiles dolores pateretur, nunquam tamen ad impatientiam concitata est, nec eos sibi à Deo mitigari poposcit. Immò si ipsi placuisset eodem modo etiam alterum crus excruciarì, id illi perquam gratum fuisset. Quando Sorores eam, alioqui proceræ staturæ fœminam, lecto deponentes fortè fortunâ duriusculè crus malè affectum contrectassent, vel aliquò impegissent, & ipsa vœ vœ! exclamasset, admodum severè propter hoc verbum se increpabat dicens: *Vilissima peccatrix, & fœtide sacce, quare non recolis, quàm miserabiliter & dolorosè Dominus noster JESUS Christus tribus clavis transfixus in cruce pependerit?* Cùm verò Deus finem doloribus ejus imponere, sanctamque conversationem in cœlis remunerare vellet, perceptâ SS. Eucharistiâ (qui ultimus ejus cibus fuit) nocte sacratissimam Nativitatis Christi Vigiliam, qua magnum
Capi-

Capitulum celebratur, præcedente,
beato fine quievit Anno à Christo
nato MCCCC.

CAP. II.

*Vita Sororis Elisabeth
Kempfin Colmariensis, dulcis me-
moriam, à quadam sanctimoniali* Un-
derlindensi, ejus aequali, Latine
scripta.*

COgitanti mihi nuper sollicitius
iterum atque iterum, quomo-
do & quibus verbis vitam de-
scriberem matris nostræ prædilectæ,
felicis memoriæ, Sororis Elisabeth
Kempfin, cogitatuque meo in diver-
sa vagante, dum in me tandem re-
versa essem, menti incidit verbum
hoc in prologo libri *vitas beatarum
Sororum hujus Monasterii* conscri-
ptum, hoc videlicet, beatum Mona-
sterium nostrum, sub Tilia dictum,
benè

* Habetur in M. S. Codice Monasterii Un-
derlindensis, unde hic datur stylo im-
mutato.

benè nominari posse *Hortum conclusum*, & *Hortum deliciarum*, ut scribitur Cantic. 4. *Hortus conclusus es*. Et in eodem libro. Cap. 6. *Dilectus meus descendit in hortum suum ad arcolam aromatum, ut pascatur in hortis, & lilia colligat*. Dilectus hic, quasi sæpissimè abiens, descendit in hunc suum hortum aromatum, colligens ac decerpens rosas liliaque, ubi invenit rosam unam odoriferam, omnique suavitate redolentem. Rosam velim, intelligas, patientiæ & castitatis eam, ut piè credimus, sibi assumpsit, atque cœlestis Patriæ in gloriam transvexit, transplantandam, conferendamque in cœlestis gloriæ coronam, felicem hanc matrem nostram Elisabeth Kempfin putaverim, de qua sermonis nostri fuit initium.

Beata hæc Soror à sexto ætatis suæ anno usque ad annum septuagesimum vixit in hoc à Deo benedicto Monasterio sine quarumcunque Sororum querela. In ætate quoque puellari mirandæ extitit devotionis, atque

atque in Dei, supra quàm credi potest, ardebat dilectione, quem totis præ cunctis hujus Mundi delitiis gaudiisque optavit conatibus adipisci. Cumque aliquando, ut moris est, aliis suis consodalibus post completum divinum officium, cæterasque ceremonias Ordinis, data fuisset licentia à Magistra Novitiarum ad hortum, ad habendas recreationes, optavit esse cunctis hujus Mundi spre- tis delitiis in choro cum dilecto suo crucifixo Christo. Et quanquam ab aliis sæpè rogata atque illecta, eas ta- men sequi noluit, quamvis etiam sæpius verberata atque tentata. Quæ omnia patienter atque libenter, quia patientissima erat, sustinuit. Cùm etiam nonnunquam à Magistra sua correpta, atque disciplinata propter parvos quoscunque excessus fuisset, totum hoc in Christi ordinabat pas- sionem atque flagellationem: quæ sine fletu ita patienter sustinuit, ut Magistra sæpius admiraretur quàm plurimùm.

Beata hæc Soror Elisabeth quàm pluri-

plurimis à Deo dotata erat beneficiis & gratiis. Magnæ erat sapientiæ, magnoque ingenio atque intellectu pollebat vivacissimo, ita ut muliebrem intellectu atque sapientiâ visa sit excellere naturam.

Notabiliter etiam erudita erat in Scripturis, uti apparet in quàm plurimis libris, quos de Latino transtulit in vulgarem, in earum consolationem Sororum, quæ Latinum ignorabant, & adeò magistraliter, ut à nullo literas sciente in aliquo, etiam minimo, queat reprehendi, in quibus non pauca Sororum Provinciæ Teutoniæ Monasteria consolantur, illustrantur, lætificanturque.

Beata hæc Soror in Magistrum ac Doctorem sanctum elegit Augustinum, quem magno habuit in honore, summeque dilexit, ita ut brevi temporis spatio suam præcelleret Magistram, ut sæpius à discipula sua informaretur. Ut autem ostenderetur, quantum S. Augustino ejus, quam ad eum habuit, placeret devotio, ostensum est ei in quadam visione,

sione, qua vidit S. Augustinum ad se venientem in ornamento Episcopali, qui apprehendens manum ejus dulciter & amicabiliter allocutus est eam, dicens: *Tu semper mecum eris.* Quæ è contrario respondens inclinato capite, hilarique vultu maternâ linguâ dixit: *Hoc mihi det Deus.*

Sed quàm accepta & dilecta fuerit Deo, demonstratum est in tribus annotatu dignis, nobis notis signis, quanquam haud dubium majora ei Deus dona, quæ nobis subtrahit, præstiterit: plena enim erat omni humilitate, ut eam florem dicere possim humilitatis. Quadam vice eâ humiliter in venia jacente in Choro coram Altari, Soror quædam stellam pulcherrimam supra caput ejus conspexit. Quæ videns retrò altare processit, ut eò certiùs cognosceret, quid hoc esset. Ubi vidit beatam Sororem Elisabeth elevatam de venia, & faciem ejus gratiosam splendentemque tanquam faciem Angeli. Habuit enim à natura faciem gratiosam, ita ut desiderabilis valde esset cum

cum ea habitantibus. De qua etiam aliquæ Novitiarum, de quibus certitudinaliter comperi, tam magnificè sunt illustratæ ejus in cohabitatione, ut videretur eis, se habitare cum Sancta vivente, & eis omnis eò levior fieret labor.

Erat quædam Novitia quàm maximè tentata de exitu Ordinis, ita ut omnino in Monasterio perseverare nollet. Quodam igitur tempore ea in ambone coram imagine Virginis gloriosæ orante, & B. Sorore Elisabetha etiam ante Altare in devotione jacente, vidit columbam nivei candoris super caput ejus sedentem: & ab eo tempore discessit à Novitia omnis sua tentatio, ut magno cum gaudio beatam se diceret, si morari cum tam sanctis hominibus posset, & mansit in Monasterio usque ad diem obitus sui.

Tertium signum ostendens, quàm dilecta, quamque fuerit accepta Deo, hoc erat. Soror quædam gravi decumbebat infirmitate, cui videbatur, quòd Angelus suus ad se

diceret: *Veni mecum ad Chorum, ubi Redemptor, Conservatorq; Mundi in propria persona Missam est celebraturus.* Et factum est Deo Missam celebrante, ut unusquisque Angelorum sibi commissam Sororem ad Altare duceret ad offerendum, Angelusque B. Sororem Elisabeth etiam adduceret. Et accepit eam Dominus JESUS intra divinum suum brachium, & vertendo se ostendit eam Conventui dicens: *Ista est, quæ à vobis contemptui habetur, nulliusque est reputationis: verumtamen magna est in conspectu meo, mihiq; acceptissima.* Quo dicto amicabilem eam amplexatus est dicens: *Non diutius sic permanebit.* Sicque cum magna reverentia Missa finita est. Dixitque Angelus ad Sororem illam infirmam, cui hæc ostensa sunt: *Ut scias, hæc, quæ vidisti, non somnium, sed vera esse, quinto decimo die ab hoc seculo migratura es.* Quod & factum est.

Nos igitur timebamus (dixerat enim Dominus: *Non diutius sic eam permittam*) ne nobis auferretur. Sed voluit

voluit eam Dominus ponere super candelabrum, ut lumine suo nobis luceret. Sicque per candelabrum regiminis hujus sanctæ Congregationis sedit annis sedecim continuis in officio Priorissæ, in quo lucebat magna cum reverentia bonorum operum & morum, nobisque præfuit, laudabiliterque rexit, ita quòd administratio sua in rebus tam spiritualibus quàm temporalibus Sororum displicuit nulli. Quam ob rem in magna à Superioribus nostris habita est reverentia & honore.

Accidit quoque quadam vice Magistro nostro Reverendissimo Conrado Ast*, in Monasterio nostro visitante, ac cum ea Latinè loquente (ignorabat enim idiomatis nostri loquelam) magnificavit eam dicens, se non putasse, talem posse inveniri mulierem. Quæ multa erga eum instituit petitione pro sua absolutione ab Officio Priorissæ. Et cùm eam contristare nollet, dimisit ei in scriptis

D d 2

abso-

* Fuit hic trigesimus Generalis Magister Ord. Predicatorum, electus anno 1462.

absolutionem. Qua perfecta tanta inter Sorores exorta est turbatio, ut sine mora ad Vicarium mitteretur nuntius, reelectaque fuerit à toto Conventu, & denuò confirmata in officio, quanquam multùm resisteret, in quo fideliter laboravit, quàm diu vires suppetebant.

Cùm autem juxta dictum Salvatoris Apoc. 3. quos amat Dominus, arguit & castigat, annis plurimis, multis magnisque decubuit pœnis diversisque infirmitatibus depressa, ut diceret se non majorem habere consolationem suis in infirmitatibus, quàm memoriam inferni & purgatorii pœnarum, ac considerare, quòd Deus disposuerit eam sic hìc castigare pœnis temporalibus, ut ei parceret in futuro, eamque custodiret ab aeterna damnatione. Omnem autem suam infirmitatem doloremque tanta sustinuit patientia, ut plurimùm miraremur, eoque ei ampliùs compateremur, & Sorores omnes ad fletum commoverentur. De tam vehementi autem dolore in tantam bis deve-

devenit infirmitatem , ut nulla esset spes de vita ipsius. Nos autem tantâ erga Virginem gloriosam , Domini Matrem institimus petitione , quatenus nobis impetrare dignaretur à dilecto Filio suo, ut nobis dilectam matrem nostram diutiùs dimitteret. Quæ benignè respondens taliter nos affata est : *Dominus iterum exaudivit preces vestras , vultq; me diutius vobiscum permanere.*

Beata autem hæc Soror tantæ erat gratiæ & bonitatis , ut omnes Sorores in cunctis suis adversitatibus & tribulationibus ad eam confugium haberent singulare , ita ut eam in infirmitate fatigaremus. Ipsa autem patienter & libenter sustinebat , & nullam sine consolatione à se discedere permittebat. Quare eam dilectam Deo & hominibus benè dixerim, cujus nunc memoria in benedictione est.

In omni vita sua illam habebat consuetudinem , cum quibuscunque esset personis , aut loqueretur , ut semper suos sermones temperaret

cum nomine Christi JESU crucifixi, ne à corde suo ejus discederet memoria. In omnibus etiam suis & Conventûs necessitatibus primum suum confugium habuit ad dilectum suum Crucifixum, & ad Matrem ejus, quam in summa habebat dilectione & devotione, uti apparet in quàm plurimis pulchris, quos de Latino ejus in honore collegit, libris, sicuti cùm quis flores odoriferos ex prato colligit superabundanti.

Demum termino vitæ suæ feliciter completo in gravem incidit infirmitatem. Sed nos iterum, ut ante feceramus, pulsabamus & implorabamus misericordiam Christi, infinitam fiduciam habentes servandi matrem nostram dilectam. Quòd cùm vidisset, benignè nos allocuta est in hunc modum: *O filia charissima quiescite: Ego enim jam delibor, & tempus resolutionis meæ instat. Bonum certamen certavi, cursum consummavi, fidem servavi: in reliquo reposita est mihi corona justitiæ, quam reddet mihi Dominus in illa die justus judex.*

*judex. Dominus Deus & Sancti ejus
hac pro causa nolunt exorari. Qua-
propter securissimè ab hac discedam vi-
ta, nec amplius ab hac resurgam in-
firmitate. Quo dicto præparavit se,
& se ipsam sine juvamine cujusque
ad lectum posuit, à quo non disces-
sit, donec feliciter Deo redderet spi-
ritum, cum quo nunc vivit, & in
quo æternaliter fruitur abundantia
omnis boni. Benedictus Deus, qui
facit mirabilia magna solus, cui est
honor & gloria in sæcula sæculorum
Amen. Beata hæc Soror discessit ab
hac vita in ipso die beati Dionysii
Martyris Doctorisque egregii,
Anno Incarnationis Do-
mini 1485.*

CAP. III.

*De Elizabeth de Neüstat ,
Virgine Adelhusana Ord. S.**P. Dominici, **

SOror Elizabeth ex Neüstat , pago Herciniæ sylvæ , vixit septuaginta circiter annos in Monasterio Adelhusen propè Friburgum Brisgojæ. Longo tempore paralytica decubuit. Propter diutinam infirmitatem peculiare ei conclave attributum , in quo maxima ex parte solitariam vitam egit paucis ad eam ventitantibus , & ferme non nisi extrema necessitate postulante. Deus autem manifestè in ea declaravit se omnium afflictorum & humano solatio destitutorum amatorem ac consolatorem , ùt ipsa cuidam Sorori , frequentius eam visitanti retulit. Hac interdum sciscitante , an adhuc rerum

* *Ex MSS. Vitis Sororum Monasterii Adelhusani , de quibus vide cap. V. hujus Append.*

rerum secularium meminisset, respondit: *Omnia oblivioni tradidi, Dei verò assidue suaviterq; recordor. Ab hominibus derelictam non me dereliquit Dominus Deus. Multa quidem gratiarum charismata semper mihi contulit. Nunc verò in me tam debili & infirma excellentius operatur.*

Quærente altera, num dolores corporis ei molesti essent, respondit: *Tam benè habeo atque ullus hominum in terris. Recreavit me Deus afflictam & miseram, quod deinceps nunquam intermittet. Quis homo Deum conspiciens molestiam sentiret? Exhilarat me Dominus, & omne tadium à me profligat. Interrogavit Soror, an interioribus vel exterioribus oculis Deum videret? Respondit: utroque modo. Uter conspectus præstantior, exterior vel interior, & qualis esset interior? Exterior, inquit ægrota, nihil est respectu interioris. Interior valde perfectus est & res admodum præclara. Divina visio est, de qua nemo loqui novit, nisi cui contingit, sed nec hìc facile. An mente*

comprehendi valeat , percontatur altera. Respondit: *Tunc temporis non mihi præsens sum. Ignoro etiam, ubi mens & cor existant nisi in ipso. Anima mea sese in Deum immergit, in quo omnia amittuntur. Tum animam meam ab omni labe immunem totamque puram conspicio.*

Quæsivit Soror, an Divinitatem cerneret? Ita, inquit. *Patrem & Filium ac Spiritum Sanctum cognosco, verum non perfectè sicut in aeterna beatitudine, sed quantum homini mortali possibile est. Et quando ad me redeo, impatienti ejus desiderio crucior. Ipse autem me consolatur, asserens, se brevi accepturum me ad se, ut eternum sim cum eo, suisq; dilectissimis amicis me connumeraturum.*

Quæsivit, qua forma appareret, quando ipsum corporeis oculis intueretur. Respondit: *Specie pulcherrimi atque amabilissimi juvenis, & conclave hoc Angelis & Sanctis totum repletur. Assidet, ac dulcissimè arripet mihi: Angeli autem omnes coram illo stant reverentissimè. Nunquam*
solus

solus venit, sed semper Angelis comitatus, dicitq; ad me; non desinam te invisere: brevi etiam te ad me transferam, atq; omne in avum nunquam me à te separabo. Deinde suavissimè animam meam amplexatur.

Sorore percontante, quo habitu indutus esset, & quis in eo color fulgeret, diversos enumerans colores. At nulli eorum similem dixit, sed relucere in eo, quidquid ipse vellet. Interrogavit, quidnam ipsa loqueretur cum eo, tam amanter sese præsentante. Respondit: *Anima mea se coram eo usq; ad terram inclinat, & pro tantis beneficiis gratias agit.*

Circa Primam erat valde quieta in lectulo, tanquam dormiret usque ad Sextam. Sorore postea quærente, quando Dominus eam visitâisset, respondit: *circa Primam. Tum enim non dormiebam, sed ita quievi, ne ipsum offenderem & expellerem. Nam inquietos & incompositos homines non dignatur invisere, & sic tractare. Sorori roganti, aliquid sibi de Deo dici,*

dici, respondit quandoque : *Modo nihil tibi referre possum. Si eo tempore venires, quo tanta gratia perfundor, possem sanè aliquid narrare. Quando enim Spiritus Sanctus mihi adest, docet me omnia.* His auditis sæpe eam adiit, quando divinitus visitata & gratiæ plena erat. Tum, quidquid hìc scriptum, ex ea percepit.

Eadem Soror Elizabeth ingenti desiderio Domini sui flagrabat : præsertim aliquando valde tristis erat : *Recessit, inquit, Dominus meus à me, monstravitque cor suum vehementissime ipsius desiderio angì. Solabatur eam altera, sed frustra. Circa vespèras quæsiuit, quomodo haberet. Respondit : Benè. Dominus pollicitus est se brevì ad me reversurum. Si enim diu tantopere ejus gratiâ affligerer, sicut hodie, non possem salvâ vitâ perferre.* Sequenti nocte è lecto decidit cum magno cruciatu, non valens seipsam juvare, ceu membrorum usu destituta. Redcunti ad ipsam Sorori cum hilaritate recensuit suum casum, & quòd Dominus
ad

ad eam venisset ac promississet, se nunquam deinceps talem casum permitturum: quod etiam præstitit. Quæsiuit Soror, an non indignaretur ei; quòd permisisset tantopere ipsam excruciaci. Respondit: *Ita diligo illum pro omnibus, quæ mihi transmittit patienda, ac si beneficia præstaret.* Etenim sic voluntatem suam unierat cum voluntate Divina, ut neque vivere neque mori vellet, nisi juxta ejus beneplacitum. Interdum affirmavit, se libenter istos cruciatus usque ad diem judicii passuram, si Dei voluntas esset.

Quando peculiarem perceperat gratiam, valde hilaris erat, atque amantissimè de Deo loquebatur: *Deus, inquit, est in me, & ego in eo. ipse meus est, & ego ipsius. Ille mihi & ego illi. Anima mea pulchra & nobilis est, siquidem gratiam suam mihi impertivit, & diligor ab eo, quod etiam secretò mihi revelavit.*

Sciscitante altera, qualis esset sermo ejus, respondit: *Sermo ejus tam dulcis & amorosus est, ut nemo possit*

poſſit exprimere. Tam efficaciter loquitur , ut intimum anima & cordis fundum penetret. Sæpe etiam hæc protulit: Deus in corde & anima mea eſt , ac rarò à me diſcedit. Quandoq; fugit , ſed valde ſuaviter, & ego animo ac deſiderio ipſum inſequor , & cum ingenti letitia clamo: Dilecte mi, amor cordis mei! Hæc & id genus multa alia ſuavia de Deo ſolebat proferre.

Interrogavit Soror , unde cognosceret, Deum in anima ſua eſſe, reſpondit: *Ex gaudio & jubilo , quo me replet , exhilarat , & dilatât cor meum, patefacit, ac dulciter afficit animam meam. Quæſita, quo pacto ad hanc ſecretam Dei familiaritatem pertingere liceat, reſpondit: Quando ipſe purè in omnibus intenditur & queritur, cuncta peccata devitantur, & in omnibus atque ex omnibus laudatur Deus.*

Interrogata , an timeret diabolum: *Nequaquam, ait. Spiritus Sanctus mecum eſt. Hunc diabolus tanto-pere metuit, ut mihi appropinquare non auſit.*

ausit. An autem timeret Deum? *ita* planè, inquit. *Hic timendus, donec amplius non peccetur.* Quid igitur ipsa peccaret? respondit, quòd multas bonas cogitationes, quas habere posset, negligeret. Hoc non leve ducebat peccatum.

Quando singulariter à Deo erat visitata, tam expeditè ac sapienter ad omnes quæstiones Sororis respondebat, ac si eruditus sacerdos esset. Adeò affecta ætate & valetudine erat, ut solis naturæ viribus non potuisset loqui ipsamet testante ac dicente: *Nihil scio, nec loqui valeo, nisi quod & quomodo me Deus docet. Omnia namque me docet præter peccata & vitia, quæ corrupta natura docet.*

Cupiebat aliquando Soror audire, quid Deo maximè displiceret. Respondit: *Superbia & virginum crebra atq; proluxa cum viris colloquia & nimia familiaritas. Hanc multùm odit, sicut in ipso vidi, & plura scio, quàm tibi unquam patefaciam. Deus nunquam illis tam familiaris vult fieri, nec tam libenter preces earum exaudire,*

audire, quemadmodum si hanc intermitterent: & nisi fecerint, è manibus ejus excident.

Quædam etiam secreta huic Sorori revelavit, quæ in corde versabat, & nemini præterquam ipsi soli cognita erant. Rogata, unde illa sciret, respondit: *Sape te in Deo video, multa de te scio. Quomodo igitur Deum pro me oras, Mater? Magna, inquit, importunitate insto, ut Deus te castiget. Tamen charam me habes, Mater. Quomodo ergo petis, ut me castiget? Qua intentione hoc facis? Respondit: Ex puro amore id facio, quia ceteris Sororibus charior mihi es. Qui enim hic non castigatur, postea in purgatorio, vel fortè etiam in inferno pœnas luet. Et quid prodest, quòd hic illis Deus pepercit?*

Aliquando dixit ad hanc Sororem: *Vidi, quòd te Deus indignabundè aspexerit, nimis circa consanguineos tuos occupatam (tum namque sollicita & distracta erat circa fratres suos seculares) Deus solus cor possidere, nec cum sanguine junctis quibuscunque dividi vult.*

Soror

Soror tantas in ea gratias animadvertens cupiebat ſcire, quidnam ſibi faciundum, ut Deo placeret. Reſpondit infirma : *Deo te ſubmitte: voluntatem tuam cum ipſius voluntate conjunge, & quidquid adverſi occurrit, patienter ſuſtine. Hoc millies ei gratius, quàm ſi propriam voluntatem impleres. Te quoque ad ipſum converte, & in eum demerge, ut is viciffim ad te convertatur, & ſeſe tibi impertiat. Ipſum ſolum ama, & ubicunq; potes, ei famulare. Omnem curam & ſolicitudinem è corde tuo excludere. Nihil niſi ipſum cura, & in illo ſolo delectare. Gratiſſimum ei obſequium præſta, cujuſmodi eſt, id omne fugere, quod ipſe non eſt.*

Ait Soror : ſi mihi nuntiaretur, pium aliquem præclarè de Deo loqui ad fenestram collocutoriam, utrum Deo acceptius eò ire atque auſcultare, vel in clauſtro manere? Reſpondit : *Licet tibi audire verbum Dei. At ſi in clauſtro manſeris, majorem mercedem ac pretioſiorem coronam percipies. Rectè, inquit, dixiſti Mater. Si enim*

ad prædictum locum me conferrem aliquid de Deo auditura, forsitan quippiam audirem, quod præstitisset non audivisse. Ad quod illa: *quavis non nisi bona audires, tamen nihil Deo tam gratum, quàm sese ab omnibus his terrenis avertere, & cor suum illi soli dare. Interroga omnes doctos & illuminatos, hi testimonium perhibebunt me tibi vera dixisse.*

Non multò ante obitum dixit ad eam Soror: ah quid in te vivit Mater? Ait: *Deus vivit in me & ego in eo.* Postmodum interrogata, quomodo haberet, indicavit, quantum poterat, se magnos quidem dolores perferre corpore, spiritu verò gaudere. Quæſita, unde gauderet: *de Deo,* inquit, *quòd ipse meus, & ego ipsius sum. Nuntiavit mihi, quòd me ad se vellet recipere, quocirca omnis timor & horror mortis omniumq; suppliciorum procul à corde meo remotus.*

Percontante Sorore: quomodo ego & alii speciales tui amici te morien-

riente debemus esse affecti? respondit: *gaudere & exultare debetis, quia mihi apertum cælum.* Deinde oculos clausit & quievit veluti dormiret: negabat tamen se dormire, sed *requies mea*, ait, *in Deo est.* His dictis coepit admodum cruciari & ad mortem urgeri. Monuit illam Soror, cruciatum omnem patienter ferre, Deum brevî finem impositurum. Respondit, se ad eundem, quamdiu Deo placeret, sustinendum paratam.

Ita sanctè obiit, spe ac fiducia mox ad Deum evolandi plena. Testata est ipsamet, Deum tantas gratias & dona sibi contulisse, ut nunquam ausa fuisset id sperare, nesciret etiam, quomodo majora sibi largiri potuisset.

CAP. IV.

*De Adelheide de Brisaco,
ejusdem Monasterii Adel-
husani Sorore.**

SOror Adelheidis Brisacensis tam sanctæ vitæ fuit, ut mirabilia in ipsa liceret animadvertere. Feria quinta nocte adeò intentè ac profundè passionem Christi meditabatur, ut inde ægrotans non posset sequenti feria sexta Missæ interesse, immò ne surgere quidem. Propterea durè à Patribus Dominicanis in Capitulo reprehensa atque hæretica appellata fuit. Ipsa verò tota gaudio perfusa Capitulum egressa est subliens, & Psalmum : *Laudate Dominum omnes gentes* decantans : ad quam omnes puellæ quæ in Monasterio erant, congregatæ cum illa cantabant.

Sumptura aliquando cum aliis
Soro-

* *Ex iisdem MSS. Vitis.*

Sororibus sacram communionem, cum peristylum transiens consideraret, ad quas nuptias iret, quodque Deus cum ipsa uniri deberet, flexit genua ad labrum ibi inversum animo gratias Deo pro tanto beneficio agendi. Labrum autem super eam cadens totam intra suam concavitate[m] recepit & abscondit. Ubi extra se rapta cum Sponso suo in spiritu unita, & ad dulcissimum amplexum & osculum admissa fuit usque ad Vesperas. Quæsita ab infirmaria usque-
quaque, nusquam reperta est. Circa Vesperas audiens se ab infirmaria vocari, prodidit se sub labro jacentem, quo remoto narravit eidem magna devotione, quid sibi accidisset.

Hæc Soror Adelheidis plurimum doluit ob amissam virginitatem (nam vidua erat) pro qua recuperanda die ac nocte plorabat. Quod cum multis annis fecisset, venit ad eam Angelus Domini dicens: *Age, Deus vult te exaudire, quantum possibile est.*

[Et] levavit eam in aëra , ubi alii quidam Angeli erant habentes torcular, eamque prelo subiectam tam fortiter presserunt, ut putaret nullam omnino sanguinis guttam in corpore suo reliquam, dicentes: *Omnem sanguinem, qui in te peccavit, expressimus: jam virginum sanguinem tibi infundemus, & virginibus similis eris, quoad fieri potest. Ut autem denuo virgo fias, impossibile.* Restituta sibi tota fuit sanguini immersa. Manè Soror laica, Treburgis nomine, cui cura infirmarum commissa erat, transibat, à qua subsidium & vestium suarum lotionem poposcit. Hæc sub attestatione veritatis asseruit, se orcam sanguine plenam eluisse. Resciscens autem, quod accidisset, valde doluit, quòd in rei insolitæ ac stupendæ indicium eum in vestibus non reliquisset.

Soror Adelheidis in ultimo agone constituta iussit se deponi super mattam, & tabulam defunctoriam pulsari. Jacuit supra mattam, donec

nec Psalterium legeretur usque ad Psalmum: *Domini est terra.* Tum aliarum adminiculo erexit se in genua dicens: *Cedite & laudate Deum: omnis sapientia hinc est & Dei Mater, item S. Dominicus ac totus exercitus cælestis.* Elevatisque manibus spiritum reddidit. Orta inter Sorores quæstione, sub quo Versu animam exhalâssent, quædam sancta Soror continuo ait: verè animam ejus ex ore sicut rosam vidi prodeuntem sub Versu: *Attollite portas principes vestras.*

CAP. V.

De statu, gratiis & virtutibus Sororum Monasterii Adelhusani.

* **I**N Vitis primarum Sororum, quæ in Monasterio Adelhusiano propè Friburgum Brisgoia præclaris donis a Deo fuerunt exornata, scriptis

Ee 4

Germa-

* Verba sunt V. P. Mathie Thanneri.

Germanicè a quadam ejusdem Cænobii Sorore, & succinctè & valde simplici stylo, quæ extant ibidem manu scripta, postquam scriptrix multas hujusmodi Sorores enumeravit, inter quas fuit quadam Lucia Leschera, quæ ex intentâ & profunda Dominica Passionis meditatione vulnus in pectore contraxerat sanguine manans, quod, quando circa res terrenas erat occupata, pellicula tegebat, quando verò ab his abstracta, semper recens manebat, subjicit generatim, quàm sanctè ac religiosè ante trecentos annos in eodem Monasterio Sorores vixerint: quod ad multorum, maxime Religiosorum edificationem visum est hic commemorare. Scribit igitur in hæc verba.

Tam devotæ atque introversæ erant Sorores, ut quotidie in claustro in tantum esset silentium, quantum ipsa Parasceve. Post Completorium adeò erant assiduæ ac ferventes in orationibus & terræ osculationibus (quas venias appellant) tam in choro quàm in dormitorio ante lectulos suos,

suos, ut tales sacræ actiones eminus audirentur. Sub quibus quædam extra se raptæ, aliæ deliquium animi passæ, nonnullæ ex abundantia gratiarum altum vociferatæ sunt.

Magni meriti Soror Anna Turnera, naturâ ad fletum durissima, videns maximam lachrymarum vim a sanctis hisce Sororibus profundi, ingens concepit desiderium lachrymandi. Aliquando sub oratione tantam sibi vim intulit, ut tandem unicam ex oculo lachrymam extorserit, quam in spiritu conspexit duos Angelos è coelo lapsos aureo poculo excipere, ac Deo præsentare.

Quædam Sorores Dei amore & desiderio fursum actæ & semicubitum supra terram elevatæ fuerunt. Nonnullæ passæ sunt, se ardentissimo Dei amore, nisi officiis & rerum externarum administratione temperatus fuisset, vitam cum morte fuisset commutaturas. Conventu sacram synaxin percipiente aliquibus concessum est videre, cujus quæque

Soror apud Deum meriti esset, quando Divinum epulum sumebat.

Jugem omnium virtutum exercitiis novabant operam, præsertim humilitatis. Nullum enim opus tam vile & abjectum, neque tam laboriosum erat, quod non hilariter & cupidè perficerent, tantoque magis, quantò altioris status priùs in seculo fuerant, sic implentes, quod in Constitutionibus scriptum : *quantò major es, tantò magis te humilia in omnibus.*

Singulare in eis studium fuit ægrotantium, quantumcunque morosæ & inquietæ essent, curam suscipere, quibus sanè tam promptè ac ferventer, tanquam ipsimet Christo inservierunt. Fuerunt ergo multæ, quæ activam vitam cum Martha, multæ, quæ contemplativam cum Maria, quædam, quæ utramque simul strenuè exercerent.

Paupertatem voluntariam perfectissimè servârunt. Non paucæ omnia ad votum habere potuissent, nolue-

noluerunt tamen, sed elegerunt pauperes esse propter Deum. Nulla apud stratum suum scrinium habere voluit, quod vel duobus nummis comparari potuisset.

Rigor Ordinis adeò illis placuit, & in consuetudinem versus fuit, ut etiam senio & morbo affectæ nihil de eodem remittere voluerint. Complures jejunia ab Ordine instituta ne semel quidem intra multos annos solverunt. Multæ provectioris ætatis ab esu carnum plurimis annis abstinuerunt, etiam gravibus infirmitatibus depressæ. Quando verò nimia debilitas ad earundem esum ipsas adegit, plus de iis, sicut & aliis delicatioribus cibis non sumpserunt, quàm nuda postulabat necessitas. Si quando vinum ministratum, quædam sal injecerunt, ut eò minus delectationis perciperent.

Ad cultum divinum alacres atque ferventissimæ erant, tanto desiderio & gaudio ad chorum properantes, ac si magna solemnitas celebrare-

braretur. In Vigiliis post Matutinas preces protendendis tantus inerat eis fervor, ut aurora prodeunte ac Prima appropinquante exterritæ atque mœrore affectæ fuerint, eò quòd sic devotio ipsarum impediretur atque interrumperetur. Quædam in-tempestivè ante Matutinas surrexerunt, & orationi vacârunt. Quibusdam in somnis non contemnendæ gratiæ collatæ fuerunt. Quando convenerunt, omnis earum consolatio & recreatio erat de Deo miscere sermones.

Priorissæ ingenti studio in hoc incubuerunt, ut Conventus in ista religiosa & austera vita constanter perseveraret, ad hoc eum seriò exhortantes, præsertim in Capitulo, ubi quædam spiritalibus oculis viderunt Priorissis, zelosè ac ferventer Sorores admonentibus, Schedas proponi, e quibus sermones suos legébant.

Nonnullæ spiritu prophetiæ clauerunt, & quæcunque in vita & sub
obitum

obitum prædixerunt , ita evenêre. Quædam non longè ante obitum lucis instar radiârunt, & puræ ac pel-lucidæ fuerunt sicut crySTALLUS.

Dominus JESUS cum sua benedic-ta Matre & aliis Sanctis, multis So-roribus, ex hac vita migrantibus ap-paruit, easque ad se evocavit. Quas-dam etiam de æterna beatitudine certas reddidit. Sciendum, mediam partem gratiarum, his Sororibus concessarum, non esse litteris confi-gnatam. *Hactenus scriptrix*

Adelhusiana.

CAP.

CAP. VI.

*De Elizabeth de Eycken,
Sorore Monasterii Ottenbacen-
sis Ord. S. P. Dominici.*

SOror Elizabeth de Eycken, pago Comitatus Rhinfeldensis in Superiori Germania, anno ætatis suæ sexto ingressa est Cœnobium Ottenbacense, Constantiensis Diœcesis, in quo usque ad annum ætatis suæ quinquagesimum primum tam religiosè ac sanctè vixit, Christique crucifixi, Sponsi sui amore tam immanes cruciatus sustinuit, ut verbis explicari non possit.

Scripsit ipsamet Germanicè, quo pacto Deus eam a teneris annis traxerit, duxerit, instituerit. Quæ institutiones adeò sublimes sunt, ut non paucaë illarum a paucis, etiam Religiosis, intelligantur. Tantum divinum amorem spirant, ut vel durissima corda emollire, Deique amo-
re

re accendere queant. Noluit talia scribere. Sed coëgit eam Deus: *volo, inquiens, manifestum evadat, quàm amanter & suaviter te in Divino corde meo ante Mundi constitutionem gestaverim.* Appellat ipsam jucundissimum objectum oculorum suæ Divinæ Majestatis, gratissimum Divini cordis sui delitium. Affirmavit, se animam ejus efficere purum speculum sanctissimæ Trinitatis, amabilissimam & splendidissimam imaginem, in qua oculi Majestatis suæ sese pro immenso desiderio jucundissimè æternùm sint oblectaturi. Voluit ipse unus esse amor ejus. Non permisit illi ullius hominis amorem aut favorem, nec ullius creaturæ solatium, ut nusquam cor ejus hæreret, aut in ulla re creata delectationem perciperet, sed in Deo solo.

Vixit hæc Angelica virgo circa annum Domini MCCX. claruit post mortem miraculis. Habentur ipsius scripta in Cartusia Friburgensi.

CAP. VII.

*De Mechtilde de Stans,
Sorore Cœnobii Tösenfis , ejus-
dem Ordinis.*

SOror Mechtildis ex Stans , pago Helvetiæ , pia & religiosa virgo, Ordinem S. Dominici professâ est in Cœnobio Töse. Quod cùm primùm esset ingressa relicto propter Deum seculo, seipsam eidem ex intimo corde obtulit dicens : *Domine Deus meus, nunc tui amore totum Mundum, & quidquid me oblectare ac consolari poterat, reliqui. Per immensam igitur bonitatem & misericordiam tuam te obsecro, ut tu deinceps meum sis solatium. Non enim ignoras, me nullam aliam habere in terris consolationem.* Hanc orationem fudit cum multis gemitibus & lachrymis.

Non multo post nocte quadam, dum absolutis precibus Matutinis rediret

diret ad stratum suum, apparuit ei quidam reverendus dominus cum multis aliis honorabilibus viris, e quibus quidam grandem crucem, instar crystalli pellucidam ferens, blandè dixit ad Mechtildem: *ne timeas: nihil mali patieris: sequere me audacter.* Præcessit ergo cum præclara cruce ad chorum, sequentibus aliis, & devotè cantantibus hymnum: *Pange lingua*, qui in Parasceve cantari solet. Hos secuta est hæc beata Soror usque ad chorum.

Bajulans crucem perrexit ad altare, alteque ipsam levavit reliquis admodum devotè cantantibus, & ad singulos Versus genua flectentibus, ut fit in Parasceve. Repleta ingenti admiratione Mechtildis suspexit viditque Dominum nostrum Jesum Christum de coelo descendentem cruci sese applicare. Qui amanter ipsam intuens mitissima voce interrogavit: *Soror Mechtildis, credis me verum Deum & hominem?* Respondente: *credo Domine*, ait: *accede.*

Accessit cæteris ei cedentibus. Et Dominus seriò ad eam : *Soror , inquit , Mechtildis , nihil desideras solatii præter meum solius amorem ? Respondit : nihil Domine .* Tum placidè subjunxit : *quandoquidem præter mei amorem nihil expetis , & omne aliud solatium relinquere cupis , ego ipse consolabor te meo sacratissimo corpore , sanguine , anima & Deitate , omnisque consolationis , quam discipulis meis in ultima cæna impendi , te participem reddam .* Scito , me corporis & anime tue curam habiturum , regnumq; cælorum , quando ex hoc Mundo migraveris , te possessuram . *Æternam meam benedictionem tibi impertior : Quam hilariter ac devotè ipsa percepit .* Tum Dominus disparuit , eamque ingenti gaudio plenam reliquit.

Sedulò intererat publicis Divinis officiis , neque ab ullo prorsus emanebat . Cùm ad labores communes pulsaretur , statim è choro ad eosdem prop-

properabat, paratissimè, quidquid imponeretur, perficiens. Mitissimi cordis erat. Cum flentibus flebat, cum gaudentibus gaudebat. Feria sexta semper erat in Choro. Perpetuò, nisi ægrotaret, ante Matutinas preces & ante Primam surgebat ab Angelo excitata.

Multas tentationes & terrores passa est a spiritu maligno. Solemnioribus festis post completorium præ nimia devotione alta voce lachrymabatur. Solitudinem & silentium singulariter diligebat. Qualibet feria sexta, & percepta sacra communione, itemque per totum Adventum & Quadragesimam nihil penitus loquebatur. Maximo fervore meditari solebat amarissimam Passionem & mortem Domini nostri JESU Christi. Quæ meditatio tam profundè penetrabat cor ejus, ut viribus omnibus destitueretur, cibumque capere non posset.

Omnis Mundana delectatio ipsi
amara erat instar absinthii. Dolo-
res crucifixi Sponsi sui in corpore suo
pertulit. Claruit post mortem mi-
raculis. *Ex Conradi Zittardi Ger-
manico Chronico Generalium Magi-
strorum Ordinis Predicatorum*
fol. 166.

Finis Appendicis.



VEN.

VEN.

IRIMBERTI

ABBATIS ADMONTENSIS

DE

INCENDIO MONASTERII
SUI, AC DE VITA ET MORIBUS
VIRGINUM SANCTIMONIALIUM
PARTHENONIS ADMONTENSIS

Ord. S. Ben.

NARRATIO,

*Excerpta ex inedito Ejusdem
Commentario in libros Regum ad Cap.
XIV. vers. 7. Libri IV.*

1871
1872
1873

1874
1875
1876

1877
1878
1879
1880



Ven. Irimberti de incendio Monasterii sui, ac vita & moribus Virginum Sanctimonialium Parthenonis Admontensis Narratio.

I.

Non habemus hinc manentem civitatem, sed futuram inquirimus. (a) Quæ sententia Doctoris gentium quanta veritate fulciatur, in ea, quæ nobis accidit, rerum permutatione declaratur.

II. FERIA namque secunda mediæ Quadragesimæ Expositionem meam seriò hinc dimiseram, eamque in crastinum in gaudio Sancti Spiritus repetere proposueram, quia ad finem Operis hujus ardentè festinabam: cùm ecce nocte sequenti feriæ tertiæ gravis & intolerabilis mihi occurrit luctus tristitiæ, ut jam cum Job meritò possim exclamare: (b) *Versa est in luctum cythara mea, & organum meum in vocem flentium.*

F f 4

III.

(a) Rom. XIII. 14. (b) Job. XXX. 31.

III. Cùm enim Matutinorum solemnitas pervigili intentione & distincta Psalmodiæ compositione in choro celebraretur, ego & Frater, qui mihi ad scribendum adjutor fuerat deputatus, in Capella S: Mariæ Matutinalibus expletis Laudibus Cursum ejusdem Dominae nostræ usque ad lectionem decantaveramus. Cùm ecce clamorem servi cujusdam audientes obstupescimus: quia in Admuntensi loco nocturno tempore aliquem perturbationis strepitum audire non consuevimus. Ille secundò exclamavit, iteratoque clamore mali alicujus suspectos nos esse fecit. De Capella concitè eximus, & nihil quidem videntes, strepitum magnum circa domum infirmorum audivimus. Servus enim, qui exclamaverat, domum infirmorum calefaciebat. Sed eo negligentius agente ventus vehemens, utique e regione deserti irruens, eandem domum exterius invaserat, & flamma jam insuperabiliter mira celeritate vento impellente excreverat.

IV. Curro in Monasterium. Psalmum: *Quid gloriaris in malitia*, jam in choro psallebant distincta valde melodia. Fero invisa signa, foris jam conflagrare incendia. Excurrunt primi Fratres exteriores (a), quos omnes ferè inveni sollicitè in orationibus stantes. Sic enim moris eis est Psalmodiæ nocturnæ invigilare, ne contingat eos continuè sedentes, somni tepore marcescere. Flamma supra modum excrescens, a domo infirmorum Capellam Sanctæ Mariæ cœpit acriter laniare: quia pro incen-

dii

(a) i. e. laici.

fecit, eisque exeundi licentiam dedit, si periculum incendii declinari non posset.

VII. Quem cū Domna Agnes, filia Comitis Ottonis, Frarris Episcopi Ratisponensis lachrymabiliter inquireret, quorsum ire deberent, lachrymabiliter & ipse respondit: *quocunque vos miseratio summi Patris duxerit.*

VIII. Jam tempus miserendi venerat: quia cœlestis Pater in ira misericordiæ memor esse debuerat, ne de habitatione sui Monasterii tot Sorores, claris ortas natalibus, nocturno tempore contingeret ejici, quæ se pro amore Filii Dei custodiæ mancipaverant carcerali. Cujus custodiæ distractionem non debeo silentio præterire. Sed prius cœptum ordinem incendii volo transire.

IX. Flamma cū omnia Monasterii, Capellarum ædificia, & omnes officinas Monachorum & Fratrum exteriorum consumpsisset, cellarium superius devoravit, & per ostium ingrediens interiores trabes invasit, & si ibi prævaluisset, consumptis stipendiis, quia Monasterii situs valde est invius, dubium non esset, quin & multitudo Monachorum & Fratrum in loco subsistere non posset, Monasterium Sororum, quod ex opposito stabat, incendio periret. Vicerunt Dei Filium lachrymæ Sororum, & ait Angelo percutienti populum: (a) *sufficit, nunc contine manum tuam.*

X.

(a) II. Reg. XXIV. 16.

X. Monachi , Fratres & servi ultra modum tota nocte defatigati, circa mane cellarium liberant, sicque Sorores sopito incendio securæ in Monasterio perseverant. Vento enim Aquilonari, qui ante medium noctis insurrexerat, ex quo Matutinorum solemnitas cœperat, & tota nocte illa flammæ accendendo dilataverat, circa diei crepusculum alius se ventus opposuit, qui omne periculum flammæ a cellario & a Sororum Monasterio removit.

XI. Ut autem de hoc ipso Monasterio Sororum, sicut promisimus, aliqua succinctè dicamus, beatæ memoriæ Domini Chuonradi, Salzpurgensis Archi-Episcopi temporibus, ipsius consilio & auxilio undecunque venientibus Sororibus hoc præparavit & ordinavit Domnus Abbas Wolvoldus. Introitus Monasterii uno solo ostio, altari opposito, clavibus tribus obseratur, idque solummodo tunc aperitur, vel cùm Soror aliqua ad conversionem ingreditur, vel cum mortua ad sepulturam effertur. Duas claves habent duo Seniores in sua providentia, tertiam interiùs habet Soror Magistra in sua custodia. Ut de aliis Fratribus taceam, nec ipsi Abbati nec Priori licet ipsam aperire januam, nisi ad Sororem in lecto communicandam, vel sacri olei inunctione ad exitum promovendam, vel ad confessionem ejus in extremo vitæ ibi recipiendam. Nec tunc quidem vel ipsi Abbati vel Priori patet introitus, nisi sub duobus vel tribus testibus.

XII. Simul sunt, ubicunque sunt, sive in Conventu sedeant, sive in Choro Deo serviant, sive in Refectorio, sive in Dormitorio lassitudinem suam reficiant. Nulli mortalium nisi ad fenestram Conventus sui loquuntur, ubi earum Capitulo a solo Abbate vel Priore, rarò tamen, præsidentur. Ibi exhortationis verbum ad eas dirigitur, ibi omni Sabbatho alternatim de uno choro soli Abbati vel Priori confitentur, sicque ad communionem sequentis Dominicæ omni studio ac diligentia præparantur. Nulli licet earum ulli mortalium sive Abbati sive amico vel propinquo solam loqui cum solo, nisi sub duarum aut trium Sororum testimonio, excepto solo Confessionis secreto.

XIII. Toto anni tempore, æstate vel hieme, ad sonum campanæ ad Vigiliis Matutinas cum Fratribus surgunt, ordinemque Vigiliarum toto tempore hiemali usque in diem extendunt. Idem jejunium, idem silentium cum Fratribus per anni circulum agunt. Nulla earum lineis vestibus utitur, nisi solæ infantulæ, siquæ inter eas nutriuntur.

XIV. Capitulum suum inter se quotidie habent, Magistra vel ejus Vicaria præsidente. Et in festis diebus, cum Abbas ad eas non poterit venire, sunt inter eas personæ ad verbum exhortationis faciendum dispositæ. Valde quippe sunt litteratæ, & in scientia sacra scripturæ mirabiliter exercitatæ. Cum enim post primum introitum nunquam de Monasterio egrediantur, nisi vel mortuæ efferantur, vel vivæ

vivæ forsitan in aliud Monasterium transponantur, ubi simili custodia muniuntur: Cumque nihil unquam de Mundi vanitatibus videant, rarò aliquid de secularibus audiant, cur non scientiam cœlestium mysteriorum habeant, quæ ab omni communione mundanorum gaudiorum jejunant?

XV. Cumque nobilissimorum Principum filia, & alia præclaris ortæ natalibus inter eas consistant, magnæ inter se humilitatis conflictu ad invicem dimicant: quia valde detestabilis haberetur, si qua inter eas alicujus elationis vel jactantiæ nota respergeretur.

XVI. Habent per se vestimenta sua ad omnem necessitatem, ad nullam superfluitatem de Camera sua disposita. De Fratrum cellario dantur eis, non ut Principum filiabus, sed ut Christi famulabus, charitativa stipendia. Nulla ad fenestram accedit loquendi gratiâ nisi à Magistra accepta licentia, nisi Abbatem adesse videant, cui soli ut filia patri loqui audeant. Sunt inter eas certæ personæ designatæ maturiori ætate, quæ ad fenestram loquentium adsint audientiæ in quorumlibet advenientium spiritalium sive secularium amicorum salutatione.

XVII. Hunc ergo disciplinæ ordinem, Sancto Spiritui disciplinæ, ut credo, placentem, à primo fundatore Monasterii sibi contraditum, diligenter observant, & cum multa superadjiciant, pauca, immò nulla distractionis jura relaxant. Unde quæcunque inter eas de hac vita subtrahuntur, in magna secu-

securitate moriuntur. Nec immeritò: quippe quæ quoptidie propter Christum sicut oves occisionis jejuniis, vigiliis & spontaneis flagellis mortificantur.

XVIII. Mortuæ in Monasterio suo per noctem conservantur, & à reliquis Sororibus summo studio exequiæ diu noctuque celebrantur. Facto manè Missa Defunctorum pro defuncta apud Sorores celebratur, eaque peracta Conventu Monachorum & Fratrum religiosâ frequentiâ adveniente funus de ecclesia Sororum ad Monasterium Fratrum venerabiliter transportatur. Hoc autem Responsorium in exportatione funeris à Conventu Fratrum inchoatur, quod nunquam sinè multis Sororum lachrymis decantatur: *Quomodo confitebor tibi Domine Deus meus, quando veneris in judicio tuo: quia cor meum mundum non custodivi, animam meam in carne positam pollui, templum corporis mei de opere iniquitatis coinquinavi? Precor te Domine, antequam discutias me, miserere mei. Tibi soli peccavi, misere-re mei!* Sic Fratres susceptum funus studiosissimè procurant, & celebratis Missarum solemniis & consuetis exequiis in communi cimiterio officiosissimè terræ commendant, ubi ex una parte Fratrum sepultura, ex alia Sororum est designata.

XIX. Qualiscunque sit illa dies, pro defuncta Sorore omnes tam Sorores quam Monachi & Fratres cum multa devotione flagella suscipiunt, idemque pro Monacho vel Fratre defuncto communiter omnes faciunt. Similiter cum obitus Fratris appropin-

propinquare per tabulam nuntiatur, à Sororibus ad ecclesiam festinatur, ejusque transitus Divinæ pietati intentissimè commendatur.

XX. Cùm ergo his atque aliis multis spiritualis vitæ commodis se Sorores religiosissimæ privari pertimescerent, si eas flammarum incendia de quiete sui Monasterii exturbarent, quanti, putatis, in earum cordibus amaritudinum & dolorum fluctus versarentur? Proinde audivit Filius Dei gemitus compeditarum, & solvit filias interemptorum. Factum est autem istud incendium lugubre Admuntensis Monasterii V. Idus Martii, qua nocte sequenti instabat festum beati Gregorii.

XXI. Transacto itaque tantæ desolationis infortunio, Abbas habito cum Senioribus consilio, statuit secum omnes retinere in loco, ne si huc & illuc disseminarentur, animarum suarum pericula fortasse paterentur. In domum ergo hospitem se omnes contulerunt, ibique quò meliùs poterant, sicut & in Monasterio soliti erant, ordinem suum in Divino servitio, & in silentio, & in cæteris omnibus servare decreverunt.

XXII. Diversi forsitan diversa loquuntur, & cùm inscrutabilia esse Dei judicia Apostolus protestetur, ipsi Divinorum judiciorum scrutatores esse moluntur. Proinde negligentiam vel superbiam tantæ desolationis forsitan non verentur asserere causam, & super Divinæ castigationis plagam suarum lingua-

rum

rum addunt percussuram. Cæterum si quis spiritualis propositi conscius & amator ante incendii excidium illius Monasterii statum vidisset, quantus in Divino servitio fervor diu noctuque flagraret, quanta inter se invicem continentia & humilitate decertarent, hoc profectò de eis iudicium dare non dubitaret, quòd adversum se Leviathan suscitassent, & instar beati Job tentatoris manibus non ad condemnationem, sed ad probationem traditi fuissent. Quid alii sentiant, nescio. Ego unum scio, quia qui prius continentiae operam dabant & humilitati, cincti flagello Dei magis magisque in continentiae & humilitatis decore sunt compositi: *quoniam juxta Apostoli testimonium diligentibus Deum omnia cooperantur in bonum.* (a) Sed jam tempus est, ut ad Expositionis nostrae ordinem redeamus &c.

(a) *Rom. VIII. 28.*

VEN.

VEN. JOANNIS
DE ELLENBOGEN
ABBATIS WALDSASSENSIS
Ord. Cisterc.

De

VITA
VENERABILIIUM
MONACHORUM
MONASTERII SUI
LIBER.

*Ex MS. Cod. Academicæ Bi-
bliothecæ Basileensis.*


Tom. VIII.

G g

DEPARTMENT OF THE ARMY
OFFICE OF THE ADJUTANT GENERAL
WASHINGTON, D. C.

ADJUTANT GENERAL
OFFICE OF THE ADJUTANT GENERAL
WASHINGTON, D. C.

ADJUTANT GENERAL
OFFICE OF THE ADJUTANT GENERAL
WASHINGTON, D. C.



JOHANNIS ABBATIS WALD-
SASS. AD DOMINUM PETRUM
ABBATEM AULÆ REGIÆ
EPISTOLA.

In Christo sibi sincerissimè perdi-
lecto Domino Petro, Abbati Aulæ Re-
giæ, Frater Johannes Abbas in Waltsas-
sen, perpetuæ constantiam charitatis.

Quoniam sæpius mihi præsentì ore tenus,
absenti verò paginatenus, vitam,
mores & exempla devotarum vestri
Monasterii personarum pro mea edi-
ficatione consolabiliter declarastis, de
quibus, quantum Dominus donavit, mihi virtutis
& proficiendi in melius materiam assumpsi, & ex his,
quid mihi deerat, & imperfectionem meam melius
intellexi (semper enim hujusmodi auditio aut lectio
aliquem attulit mihi fructum) igitur consimilem vicis-
situdinem, si non ex toto, tamen ex tanto & aliquali-

G g 2

ter

ter refundere Dilectioni vestra cupiens, sciens vos in
hujusmodi plurimum delectari, quaedam mihi in domo
nostra *Waltsassen* comperta de *Vita* venerabilium
Monachorum per me conscripta, vobis per Fratrem
Conradum, meum Secretarium volui destinare, ut lu-
minaria Divini ignis ardore succensa, simul pariter
in domo Domini super candelabrum posita, nobis, qui
vivimus, & qui venturi sunt post nos, lucem præ-
beant, qualiter nos securius in viis & mandatis Do-
mini oporteat ambulare. Valete in Domino, qui est
via, veritas & vita. Orate pro me, ut fiant
mea novissima horum similia, quos
descripsi.

INCI-

INCIPIT LIBER DE VITA VENERABILIIUM MONACHORUM
MONASTERII WALDSASSENSIS. (a)

CAP. I.

Primorum Patrum Waldassensium vita aspera & tribulationibus plena. Mors Fratrum sonitu arcæ Reliquiarum plerumque nuntiata. Ex iisdem male viventes aut ad seculum redierunt, aut vitam infelicitate finierunt.

QUoniam secundum Gregorium beatum plus docent facta quam verba, & magis movent exempla quam prædicamenta, idcirco ego Johannes Abbas tertius, licet indignus, ad provocandum devotos, ut in melius proficiant, & ad monendum minus devotos, ut mores corrigant, & devotionem concipere valeant, facta & exempla patrum & prædecessorum nostrorum Waldassensium notare curavi, maximè quæ à senioribus & veridicis domus istius audiui, & præcipuè à Rudigero quondam Priore, qui magnus & devotus inquisitor talium extitit, cum diligentia didici.

G g 3

Primo

(a) *Cod. hunc titulum præfert: Descriptio quorundam miraculorum peractorum in Waldassen.*

Primò namque sciendum est, quòd nostri prædecessores in magno rigore paupertatis & ferventi devotione Domino servierunt, & in multis tribulationibus semper fuerunt, ut in eis prophetia foundationis verificaretur, qua dicitur, quòd loci hujus incolæ ad æterna gaudia non nisi per multas tribulationes debeant pervenire. Illis tamen tribulationibus Dominus aliquoties consolationes suas immiscuit, sicut electis suis facere consuevit, quos in tribulationibus nunquam dereliquit, quia ipse dixit: (a) *Cam ipso sum in tribulatione.*

Prima namque consolatio est, quòd Dominus specialiter hunc locum elegit ad serviendum sibi & beatæ Virgini, Matri suæ, atque sancto Johanni Evangelistæ; quorum patrocinio iste locus est specialiter insignitus, sic quòd in loco isto cultus Divinus non deficiet ex toto, quàm diu Domino placet Divinus cultus Ecclesiæ militantis; prout in exordio foundationis plenius habetur [&] invenitur. Unde præsumendum est, quòd Dominus eos, qui sibi in hoc loco devotè serviunt, nullatenus derelinquat. Quare futuros & præsentés in Domino admoneo, ut Domino serviant in timore.

Est & alia consolatio familiaris & magna, quam Dominus nostris prædecessoribus ac etiam meis temporibus ostendere dignatus est, & utinam perseveret præsentibus & futuris! Nam rarò vel nunquam aliquis mortuus est, nisi priùs sonus de arca Reliquiarum in summo Altari ab aliquo vel aliquibus sensibilibiter

(a) *Psal. 4.*

liter audiretur: quæ ego referentibus credere nolui. Tunc accidit, quod, cum in nocte S. Mathiæ Apostoli Conventus esset in Matutinis, & Invitatorium cantaret, & ego tunc essem Prior, & starem in stallo Prioris, quidam ex devotione ante Altare summum cereum ardentem locaverat. Et [cum] ex radiis illius cerei offenderer ipsos radios ferre nolens, ad altare accessi, & cereum retro altare posui. Tunc sonum in arca audivi, & adhuc dubitavi retro altare stans cum admiratione. Tunc secundariò magis validum sonum sensibiliter audivi, & infra quindenam duo mortui sunt subsequenter.

Præterea audivi à senioribus, qui sollicitè notaverunt, quod illi, qui in loco isto indevote vixerunt, & mores corrigere noluerunt, vel ad seculum redierunt, aut ultimum vitæ suæ malè finierunt. De quo quidam visionem vidit. Vidit enim beatam Virginem Mariam super Altare summum sedentem, & in gremio puerum Jesum bajulantem, & quasi radios Solis ab oculis pueri, exceptis tribus, super capita singulorum & omnium in Choro stantium procedentes, quos ille diligenter consideravit, agnoscens, quod hi tres in brevi confusibiliter ad seculum redierunt.

CAP. II.

*De duobus Monachis, quorum
alter felicem suum decessum prædixit,
alter mirabili visione admonitus consilium ab
Ordine deficiendi abjecit.*

Retulit Rudigerus Prior, quòd quadam vice ante Matutinas tabula ad designandum mortuum fuit percussa in absentia Abbatis, & ipse cum Conventu in Infirmitorio Conversum mortuum invenerunt. Super quem dum exsequias debitas peragerent, alter Conversus infirmus Priorem vocavit dicens: Prior audiat confessionem meam, & expeditis me ad futuram vitam, quia amplius non durabo. Cui dixit Prior: Frater, jam sum impeditus cum presenti defuncto, & occupari non valeo vobiscum, sed postea ad vos libenter veniam, & expediam, prout possum. Ad quem Conversus: Non, bone Prior, quia expectare non possum. Nam anima presentis defuncti ad regna cœlorum non veniet sine mea. Vidi enim animam presentis defuncti quasi in forma pueri super corpus exanime fluctuantem, & multos demones in forma corvorum animam rapere laborantes. Tandem antequam Conventus intraret, gloriosa Virgo Maria est ingressa, sub cuius pallium anima continuo transiit, & adhuc ibi latitat, & meam animam expectat. Et habeatis pro intersigno: quàm citò expeditus fuero, spiritum exhalabo.

Quem

Quem Prior expedivit, & super cilicium secundum consuetudinem ponifecit. Et cum letaniam & alia ad hoc debita devotè explessent, mox spiritum exhalavit, & ipso die ambo in uno tumulo tumulati [sunt].

Retulit Rudigerus Prior: Fuit hic quidam juvenis Monachus, cui displicebant spiritualia, & carnalia sapiebant, sic quòd ad seculum redire disponebat, sed adveniente termino exitus sui pluries ex ordinatione divina impeditus fuit. Tandem quia gravabant labores Ordinis, deliberavit finaliter in Ordine non manere. Et colligens res suas ad lectum suum, expectavit (a) noctem & ad recedendum tempus sibi aptum, habens tamen in veneratione Virginem gloriosam taliter, quòd rarò vel nunquam in Monasterio altare quodcunque transiret, inclinando semper dixit: *Ave Maria, gratia plena.* Et cum sic inanis pausans tempus egrediendi dormitando præstolaretur, visionem vidit. Vidit enim, quòd juvenis quidam venit de Monasterio [ad] lectum suum, [qui] tanquam comes itineris sui eum excitavit, & ad Monasterium duxit. Ambo transierunt (b) omnia altaria, quasi valedicerent Sanctis Dei: & quoties transierunt aliquod altare, toties Monachus inclinando secundum consuetudinem dixit: *Ave Maria* &c. Tunc toties juvenis, qui præibat, se vertit & Monacho arrisit.

Tandem per ostium, quod prope altare S. Catharinæ est, ascendendo cœmiterium super foveam
G g 5 igne

(a) Cod. expectans. (b) Cod. transientes.

igne & sulphure intus ardentem perduxit. Et Monachus foetorem de fovea ferre non valens abire voluit. Tunc juvenis eum arripuit, & quasi eum in foveam præcipitare vellet, perduxit. At Monachus ejulando clamavit: *Mi Domine, finite me abire nam ferè mortuus sum præ foetore.* Et juvenis: *Tu foveam intrabis: quia jam aliquanto tempore ingredi questivisti. Nam omnes apostatae, & specialiter domus istius in ista fovea ardent, & perpetuò torquebuntur: & tu unus ex illis eris, si mores tuos non correxeris. Nam ego sum Angelus, ad custodiam tibi deputatus. Et propter devotionem, quam ad beatam Virginem habuisti, tibi hanc præmonitionem impetravi: (a) & quia tibi in dicendo Ave Maria arripisti, letitiam, quam tota cœlestis curia inde habet, arridendo ostendi.*

Tunc Monachus evigilavit, & statum suum periculosum advertere cœpit, propositum apostatandi abjecit, mores correxit, & laudabiliter profecit, ac hanc visionem præ oculis semper habuit.

(a) Cod. impetravit.

CAP.

CAP. III.

Christanni, Supprioris Waldsaffensis fervor & constantia in oratione, illusionibus diabolicis impetita, ejusdemque apud Deum meritorum præstantia.

Fuit hic Monachus quidam, nomine Christannus, qui triginta duobus annis optimè rexit officium Supprioratus. Hic magnus & devotus orator extitit, ita quòd singulis diebus, horis Canonicis & aliis orationibus exceptis, ex integro Psalterium perlegeret. Hic in consuetudine habuit, quòd adductis funeribus, quantum hora permisit, Psalterium legit. Et dum quadam vice noctis tempore cuidam interfecto, ante altare sancti Bartholomæi locato, Psalterium legeret, diabolus charitativis operibus invidens effecit, quòd corpus interfecti surrexit, & Monachum cum uno brachio amplexatum inspexit. At Monachus magna constantia armatus non curavit, sed legit, & se fiducialiter Domino commendavit. Quam constantiam diabolus ferre non valens, ipse interfectus super feretrum se reposuit, & Monachus ad dormitorium rediit.

Habuit etiam in consuetudine æstatis tempore, quòd post Completorium in cœmeterio deambulavit, & pro defunctis oravit. Et quadam vice sic deambulando vidit Monachum cum muliere concumbere. Et cum vidisset, recessit, & pro eo oravit. Sed dum

tertia

tertia vice iterum hoc vidisset, commotus cogitans, quod hujusmodi maleficium vellet mulieris impedire, accessit, & Monachum cum pede trudere cœpit, [sed] pedem in foetidissimo stercore inquinavit: & visio disparuit, & Monachum in lecto suo dormientem invenit: & sic dæmonis figmenta, qui eum in devotione sua sæpe impedire nixus est, efficaciter recognovit.

Quodam tempore cùm Monachi super cœmeterium essent in labore, & ligna inordinatè incedendo pro calefactorio deportarent, contigit, quod Monachus unus non directè incessit, sed pluries deviavit. Super quo cùm alii eum signis arguerent, respondit, quod talem locum, quem digito in semita incedentium designavit, nullo modo posset pedibus conculcare. Quæ cùm prædicto Suppriori dato *benedicite* referrent, Supprior requirendo eum sic esse cognovit, eique dixit: *Frater, expedias te, quia non poteris diu vivere.* Et ipse se Sacramentis expedivit, & in ipsa hebdomada exspiravit.

Cùm prædictus Supprior sepeliretur, quidam Monachus ex devotione ejus sepulchrum notabiliter signavit. Et contigit longo post tempore, quod quidam Monachus, sicut mihi narravit juramento confirmans, apostema periculosum, ita quod penè de vita desperaret, in sinistro latere haberet. Et cùm curam & consilium non haberet, sepulchrum ejus aperuit, & caput ejus accipiens confidenter hæc verba dixit: *Domine Jesu Christe, si iste homo tibi unquam grata servitia fecit, te rogo, ut me ipsius meritis sanare digneris.* Ac caput ad apostema applicuit,

cuit, & sanitatem pristinam recepit, Prædictum verò caput postmodum in veneratione habuit, & adhuc in Monasterio notabiliter servatur.

CAP. IV.

*Vox mortui audita, querentis
nimiam dilationem pleni gaudii post re-
surrectionem corporum futuri. Rudigerus
Prior Waldsassensis à B. Maria V. lactatus.
Alterius Monachi anima à beatis spiri-
ritibus suscepta.*

REcule mihi Venerabilis Pater, Dominus Jo-
hannes Episcopus Babenbergensis, quòd,
cùm quadam vice quidam Monachus in devo-
tis orationibus ante altare majus obdormisset, vo-
cem audivit sic perquirentem: *Sunt montes & val-
les, & arbusta, ariste ac decursus aquarum, sicut
consueverunt?* Et ille respondens ait: *Ita.* Tunc
illa vox rursus: *O quantum tunc differtur plenum
gaudium meum!* Et Monachus: *Quis es tu, qui lo-
queris? Es tu in pœnis, vel quo modo differtur gau-
dium tuum?* At illa vox dixit: *Ego sum talis nomi-
ne, & sum magnus in conspectu Dei, corpusque meum
retro chorum in cœmiterio Waldsassensi suaviter re-
quiescit.* Hæc prædictus Episcopus à patre suo au-
divit, utpote qui officialis & familiaris Monasterii
fuit, & ipse Episcopus per personas & res Monasterii
promotus est & à pueritia educatus. Retu-

Retulit Rudigerus Prior, quod cuidam Monacho, ut prædicaret in Capitulo, fuit commissum. Et quia prius non prædicavit, magis timuit. [Itaque] ad gloriosam Virginem Mariam, quam semper in veneratione habuit, orationibus confugit. Et cum ante diem prædicationis in Infirmitorio secundum consuetudinem quiesceret aliquot dies, contigit, quod in meridie in lecto, quem mihi monstravit, meditando de Sermone obdormivit. Et vidit, quod B. Virgo Maria Puerum Jesum ante lectum materno ubere lactavit. Et Puer ad Matrem ait: *Mater charissima, da etiam isti Monacho.* Et aperiens os Monachus, & beata Virgo mammam comprimens, & sic illi in os, quod apertum habuit, modicum de lacte influxit. Tunc Monachus nimiam dulcedinem sentiens evigilavit, & postea constanter frequentius prædicavit, & ab omnibus libenter audiebatur. Et ego ipsum Rudigerum personaliter suspicor fuisse, eo quod non fuerit magnæ litteraturæ, sed multum graciosus in sermone, ita quod ab omnibus libentius cæteris audiretur.

Cum quidam Monachus ad ostium, quo de dormitorio intratur Monasterium (a), noctis tempore ex consuetudine frequentius oraret, quadam nocte videbatur sibi, quod in prædicto ostio staret orando: & vidit gloriosam processionem albatorum de summo altari quasi per ambitum procedentem. Et ipsa visione [durante] tabula pro mortuo percussa fuit, & Conventus in Infirmitorio unum Monachum, trahentem ultimum spiritum, invenit. Et sic arbitror, animam

(a) i. e. basilica.

animam ipsius Monachi albatos, id est, Sanctos in ipsa hora, qua exspiravit, in suum consortium feliciter assumpsisse.

CAP. V.

Avis importunior ad imprecationem sacrificantis Monachi mortua. Aranea cum Domini sanguine in Missa sumpta, inter unguem & carnem manus sacerdotis egressa. Visio Macharii Monachi Waldsassenensis de instante pestilentia.

Quidam Monachus ad altare S. Andreae Missam legit. Et cum existeret in Canone, quædam avis, quæ *Specht* dicitur, ad fenestram advolavit, ac vitrum in fenestra adeò pupugit cum rostro suo, quòd Monachum in devotione sua impedivit, & ad ultionem sic provocavit cogitando: utinam esses mortua, quæ me in devotione mea impedire taliter præsumpsisti! Cum verò Missam perfecisset, ac calicem reportasset, & ad altare secundum consuetudinem rediisset, aviculam jacentem ante altare mortuam adinvenit.

Cum quidam Monachus ad altare S. Bartholomæi Missam legeret, contigit, quòd post corpus Domini sumptum, sanguinem sumere vellet. [Verùm] aranea in sanguinem decidit, & Monachum perturbavit, sic quòd, quid faceret, penitus ignoravit. Nam araneam cum sanguine sumere magnus ei horror fuit:
ejicere

ejicere autem iram Dei timuit. Tandem in simplicitate magna de Dei adjutorio præsumens, sanguinem cum aranea sumpsit. Et cum Missam perfecisset, ac calicem reportasset, & ad altare secundum consuetudinem rediisset, digitum annularem circa unguem fricare cœpit, & inter unguem & carnem aranea visibiliter sine læsione egressa fuit.

Fuit hic quidam Monachus, nomine Macharius, satis religiosus. Hic dum quadam vice in Infirmitorio debilis, quasi raptus, jaceret, vidit Dominum Deum in nube venientem, & in throno per omnia simili Salomonis throno residentem, Angelorumque sanctorum magnam multitudinem circumstantem: & Angeli thronum accedentes totaliter confregerunt, ac in terram dejecerunt: & quidquid dejiciendo tetigerunt, subito interiit. Tunc eodem anno magna mortalitas seu pestilentia hominum istius districtus notabiliter fuit subsecuta.

CAP. VI.

Monachi Puerum Jesum deosculantis mira felicitas. Vita sanctitas & beata mors Ernesti Monachi Waldsassenfis.

Quidam Monachus in visione ante summum altare orare venit, & super altare gloriosam Virginem Mariam stantem & Puerum ludentem discurrendo sæpius de cornu ad cornu altaris, & unum

& unum Monachum ante altare invenit. At ille, cum tam speciosam & pulcherrimam Virginem cum Puerο vidisset, speciositas utriusque eum attraxit, propiusque accessit. Et dum accederet, Monachus, qui ibi prius fuit, agnoscī timens, retro altare se abscondit. Cū verò ad altare accessisset, cum venia (a) dixit: *ave Maria*. Et Puer sibi appropriavit, & ipse Puerum arripere volens, ad Matrem confugit. Secunda vice cū salutando *ave Maria* diceret, & Puer iterum ad eum accederet, sic quòd arripere speraret; similiter ad Matrem confugit. Sed cū tertio cum venia promeret *ave Maria*, Puer ita accessit propè, quòd eum arripuit, & ipsum Puerum amplexando deosculabatur, & omni dulcedine satiabatur, & sic satiatus suo desiderio cum magno gaudio hunc dimisit.

Erat hic venerabilis senex, nomine Ernestus. Hic apud Capellam Pendorf ferè triginta annis morabatur, totam regionem illam fama sanctitatis suæ perlustrans, adeò quòd etiam Rex & Regina Romanorum eum per Austriam, Bavariam, Sueviam & Elsatiam (b) coactum per obedientiam Abbatis sui secum ducerent, ut ipsi eorumque nati & omnes dilecti consanguinei ex integro sibi possent confiteri.

Qui dum extremæ vitæ suæ sibi appropinquare terminum sentiret (c), in Balerbach pro Cantore misit, ut cum Sacramentis Ecclesiæ communiret. Quæ cū devotè explèssset, ad Monasterium suum rediit, & devotus Ernestus in Capella ante altare jacendo in

Tom. VIII.

Hh

venia

(a) *i. e.* inflexione genu. (b) *ita Cod.* (c) *Cod.* sentiens.

venia per Fratres mortuus est inventus. Tunc Fratres, qui erant subtus Capellam in grangia (a), ipsum vase inclusum versùs Monasterium duxerunt. Et cum iter agerent, contigit eos in villa Monasterii, quæ Pirch dicitur, pernoctare, & ibidem noctis tempore in vase, in quo sancta gleba claudebatur, luminaria ardentia à pluribus sunt visa sensibilibiter & expressè.

Eadem quoque nocte cum nulli de Monasterio de morte constaret, quidam Monachus in visione vidit, quòd altare novum in medio Chori crevit, in quo novus & integer Sanctus claudebatur. Et cum de mane Ernestus esset adductus, & per Conventum secundum consuetudinem expeditus, ad locum, ubi altare cum Sancto visum est, fuit cum feretro collocatus. Tunc Monachus esse ipsum Sanctum in altari ex visione sua intellexit, & pro eo Dominum colaudavit.

CAP. VII.

De prophetico spiritu Johannis Cartusiensis, Monachi & Cantoris Waldsassenfis.

Fuit hic Monachus Johannes Cartusiensis, in observantia Ordinis rigidus & austerus. Hic Cantoriam quadraginta annis laudabiliter & strenuè rexit, ac omnibus exemplaris vitæ (b) semper

(a) grangia est prædium, villa rustica. (b) loc. corruptus.

per familiaris servus Dei fuit. Nam multas tribulationes [&] revelationes a Deo habuit, de quibus unam mihi manifestavit.

Contigit, quòd quosdam Monachos morituros prædiceret quibusdam secretè, & illi hoc ad me deferrent: & tunc in febribus laboravi. Ipse Cantor me accessit, quia semper me dilexit, tanquam ægrum visitando. Tunc ab eo fidenter, qui essent morituri, quæsi. Et ipse humanam laudem fugiens non libenter expressit, sed dixit: *non curetis, quia non estis unus ex illis.* At ego dixi: *vobis, Cantor, præcipio, quod Missam non legatis, quousque mihi ex integro reveletis.* Et ipsam non libenter intermittebat, quia omni die cum devotione semper legit. [Tunc] quatuor robustos tunc temporis Monachos mihi nominatim sic expressit, videlicet quòd unus post unum, subsequenter omnes quatuor Monachi & duo Conversi in brevi tempore finaliter essent morituri.

Et cùm quærerem, unde hoc sciret, mihi dixit, quòd [dum] illi sex in visione ante lectum suum ordinatè starent, vox quædam ad eum ait: *sicut vides illos in ordine stare, ita in brevi secundum ordinem morientur.* Tunc ego dixi: *ista fortè non evenient in re, sed indigent interpretatione.* Et ipse: *Non Domine: quoties hæc vox aliqua mihi dixit, ita semper habuerunt in re absque omni significatione.* Et sic ego comperi in prædicta narratione, quòd omnia, prout dixerat, ad litteram evenerunt.

CAP. VIII.

*De miris rebus Gerhardi
Monachi.*

ERat hic senex Monachus, simplex & pius, nomine Gerhardus, multis annis existens portarius. Qui dum quadam vice per Nobiles, qui castrum Liebenstein hæreditariè possederant (quod nunc auxiliante Domino Monasterium habet) pro audiendis confessionibus & Sacramentis expediendis vocaretur, ivit ex jussu Abbatis, & secum sacrosanctam hostiam tulit. Quos cùm expeditivisset, rediit intendens nocturnum in curiam, quæ sita est in piscina Tursenreuth, habere. Venit ad aquam, & invenit aliquammodo congelatam. Mox de equo descendit habens adhuc partem hostiæ sacrosanctæ in collo pendentem [&] equum post se trahens, aquam usque in curiam pertransivit. Quem dum Magister conspexisset, multum stupefactus cum admiratione quæsit, quomodo illuc intrasset. Qui respondit: *sicut me incedere cernitis, sic intravi, & equum mecum duxi.* Tunc Magister piscium manu eum ducebat ad aquam, & modicum lapillum superjaciens glaciem confregit, & lapillum merfit. Quod cùm Monachus vidisset, Dominum benedixit. Et Magister ait: *Domine, iteratò transite.* Et Monachus: *non tentabo Dominum. Nam si sic fragilem conspexissem, Dominum utique non tentâssem.*

Contigit tempore meo, quod prædictus Gerhardus

duus infirmabatur, & ego compatiens eum accessi ei-
que dixi : *pro peccatis vobis injungo, ut carnes com-
edatis.* Qui respondit : *bone Domine, non præ-
cipiatis, quia usum non habeo.* Nam a quinquaginta
annis *et amplius non comedi.* Tunc ab eo quæsi-
vi, si posset pisces comedere. Respondit : *possum, si
ministraveritis, pisces salsos comedere et recentes.*
Statimque procuravi, ut sibi carnes vaccinæ & vi-
tulinæ Husonis loco, & aliæ carnes nomine piscium
dabantur. Et ipse in sancta simplicitate ferè per men-
sem consolabiliter manducabat, credens firmiter se
pisces manducasse.

Cùm verò ipse Gerhardus septuaginta duobus
annis sine querela in Ordine vixisset, finem vitæ
suæ sentiens, vix inductus ad Infirmitorium se de-
posuit una tantum nocte. De mane in die sanctæ
Epiphaniæ in ambitum veniens, & ad altare sanctæ
Trinitatis quidam Monachus Missam legit, cui signi-
ficavit, ut eum sacra communione communicaret.
Qui sibi annuit signis, ut secundam Missam exspe-
ctaret, & ad majus altare communicaret. Tunc
Gerhardus signa intermisit, & silentium rupit di-
cens : *non possum expectare.* At ille sacra commu-
nionem eum procuravit, & Gerhardus at Infirmito-
rium rediit, moxque spiritum exhalavit.

CAP. IX.

*Ira defunctorum in Cœnobitas,
qui debita illis officia & preces negligunt,
binis visionibus ostensa. Tepidè in choro
psallentes demonibus ludibrio
sunt &c.*

R Etulit Rudigerus Prior, quòd quidam desidio-
sus orationes debitas pro mortuis, seu in
Capitulo injunctas ex quadam incuria inter-
misit. Tandem eum Dominus infirmitate tetigit,
quòd lecto decubuit adeò graviter, quòd de vita
penitùs desperavit. Tunc negligentias suas revol-
vit, ac multùm timuit, & quasi raptus vidit, quòd
innumerabilis multitudo animarum ad ipsum venit,
quælibet anima ad ipsum seriòse debitum suum re-
petens sic dicendo: *solve mihi Psalterium*: Alia se-
ptem Psalmos, alia *Miserere*. Et sic singulæ acce-
dentes, quasi totaliter ipsum discerpere vellent.

At Monachus ingemuit & cogitavit: *si Domi-
nus mihi vitam concederet, omne neglectum persolve-
rem juxta posse*. Moxque ad convalescendum se
disposuit, & sanitate recepta pristina saccum lineum
sub cuculla collo alligavit, & orando quasi semper
incessit: & quoties psalterium, septem Psalmos, ac
alia debita orando persolvit, toties lapillos secundùm
æstimationem debiti in saccum misit. Qui dum
saccum lapillis implèssset, ad cœmiterium venit, [&]
saccum aperiens lapillos sparsit dicens: *dividite in-
ter vos, & unaqueque anima suam recipiat portio-
nem*. Fuit

Fuit hic quidam Monachus, qui, quoties servitium (a) dabatur, septem Psalmos seu alias orationes debitas dicere non curavit. Sed contigit, quòd, cùm in quodam servitio foret optimè procuratus, quasi raptus vidit se super sepulchrum residere, & effossi mortui coxam integram masticare. In cujus masticatione tantum horrorem habuit, quòd postea omnes suas negligentias & alias orationes injunctas devotus & benevolus semper solvit.

Quidam Monachus post Nativitatem Domini inter Matutinas Capellam Sancti Michaëlis intravit & oravit, & in ipsa oratione dulcissimum odorem sensit, & tam magnam gratiam habuit, quòd antea nec post similem est expertus.

Quodam tempore cùm Monachi ad psallendum infra laudes Matutinas in Choro starent, & nimis depressè & tepidè in choro Prioris legerent Psalmodiam, quidam ex debilitate dormire cœpit, & vidit, quòd dæmon per sedes Novitiorum pertransivit, & ad chorum Abbatis ire voluit. Cùm autem in choro Abbatis strenuè & alacriter psallerent, mox cùm dæmon ad chorum Abbatis posuisset pedem, transiliit quasi cum fuste in frontem lethali-ter foret læsus, chorumque Prioris pertransivit, & tepidè psallentes ibidem diversimodè subsannavit.

(a) i. e. cibus & potus Monachis præberi solitus ob solemniora officia & sacra pro defunctis.

H h 4 CAP.

CAP. X.

Vexillum Monasterii Waldsassenensis cur armis Passionis Dominicæ insignitum sit? Leupoldi Monachi perenne studium orandi. Singulares gratiæ, quibus Puer JESUS, ejusdemque sanctissima Mater quendam ibidem Monachum dignati sunt.

CUM quodam tempore pauperes Monasterii spoliarentur, & clamor ad Monasterium perveniret, quidam tunc intus erant hospites, qui cum famulis Monasterii spoliatores sunt viriliter insecuti. Et cum pannirium (a) non haberent, quidam amiculum suum, quod *Kutzplahen* dicitur, cujusdam mulieris cuspidi alligavit, & spoliatores pugnâ comprehendentes honorificè devicerunt. Et quia multò plures erant numero spoliatores, quàm insequentes, quæsitum est ab eis, quare a paucioribus essent victi? Responderunt, quod Passionem Domini nostri JESU Christi in prædicto amiculo vidissent sensibiliter & expressè: Quæ visio taliter eos consternasset, quòd se defendere non valerent. In cujus rei memoriam in Pannirio Monasterii Passio Domini est depicta.

Fuit

(a) aliàs panerium, seu bannerium, vexillum.

Fuit quidam Monachus senex, nomine Leupoldus, magnus & devotus orator. Qui dum in extremis laboraret, servitor eum respexit. Cui dixit: *non est opus me ista vice respicere, sed vade, comede, & circa horam nonam, cum videris libellum (quia incessanter orationes legit) de manibus meis cadere, tunc scias mihi vitæ ultimum imminere.* Quod & factum est. Nam libellus prædicta hora de manibus suis cecidit, & ipse mox spiritum exhalavit.

Quidam Monachus in servitio Beatæ Virginis Mariæ longo tempore devotus, specialiter diligens disciplinam regularem, ut puta, quem a triginta annis novi & ultra strenuum Ordinis zelatorem, inter multas visiones, quas mihi fiducialiter revelavit, subscriptas solum memoriæ commendavi. Contigit, quod quodam tempore in sanctis meditationibus obdormivit. Et visum est ei, quod in choro staret. Directo vultu ad altare vidit, quod beata Virgo Maria ludendo crebrius Puerum sursum projiciens in manibus delitiosius capiebat. Tunc prædictus Monachus de casu timens Pueri ad altare cucurrit dicens: *O dilectissima Domina Maria, age cautè, ne Puer cadat: subinferens: Ave Maria gratia plena, Dominus tecum, benedicta tu in mulieribus.* At Puer Monachum præveniens dicebat: *Et benedictus fructus ventris tui. Ego sum speciosus forma præ filiis hominum, pluries iterando.*

Præterea cum idem Monachus in Octava Epiphaniæ specialem devotionis gratiam ad Puerum Christum haberet, visum est ei, quod in choro esset. Et dum cantaretur: *Christus apparuit &c.* vidit bea-

H h 5

tam

tam Virginem Mariam gloriosam cum Puero super altare. Et Puer discurrebat ludendo multoties de cornu altaris ad cornu, Matre stante immobili. Tunc accedens ad altare geniculando dicebat *Ave Maria* per totum. Et post finem salutationis Puer osculum dedit Monacho, & toties, quoties dixit *Ave Maria*, in fine osculum offerebat, quàm diu Invitatorium & Hymnus in Choro cantabatur, tanto temporis spatio perdurante.

Eidem Monacho in visione apparuit infra Missam sub Canone, dum genicularet ad altare in loco, ubi consuetum est communicare, beata Virgo Maria [&] cum Puero super altare sedit, & Puer concitus ad Monachum cucurrit. Tunc Mater sequebatur Puerum, quasi timeret de casu ejus, nudum arripuit ac tenuit sub ascellis (a), prædicto Monacho ad osculum offerendo tot vicibus, quot *Ave Maria* ex integro peroravit. Amen.

Explicit.

(a) ascella pro axilla.


ANO-

ANONYMI SUBLACENSIS

Ord. S. Ben.

DE
CONSUETUDINE ET
MODO VIVENDI COENOBII-
TARUM MONASTERII SUI ANNO
MCCCC.

*Ex MSS. Cod. S. Udalrici &
Afræ August. Vindelic. & Mel-
licensi.*



(a) Incipit Epistola , totum
processum conversationis Mona-
sterii Sublacensis conti-
nens.

DEsiderâsti a me dilectissime in ultima
propositi mei manifestatione, omnem
ordinem eventuum meorum tibi
quantocyùs declarari. Quare nove-
ris, quòd in Vigilia Lucæ feria tertia,
circa Horam Vesperarum (b), veni in Monasterium,
quod dicitur Sublacus, & statim interfui Vesperis, &
deinceps Completorio & Matutino. Et sic cum ad-
jutorio Omnipotentis Dei ac ejus gloriosissimæ Ge-
nitricis perseveravi usque in præsens incolumis, vi-
ribus corporalibus sustentus in omni observatione,
ut ibi fieri solet. Nec non eadem voluntas, quam
tibi (c) soli patefeci, hucusque mihi verè immerito
&

(a) *ita Cod. S. Udalric.* (b) *uterque Cod.* dum horam
Vesperorum. (c) *uterque Cod.* illi.

& ingrato inconcussè permansit. Quapropter tuam fraternitatem charitatemque intimè rogo, ut in gratiarum actionem pro me Missas, unam de Sancta Trinitate, unam de Beata Virgine, unam [de] Sanctissimis Spiritibus, unam [de] Patronis Lamperto &c. unam [de] sanctissimo Benedicto, unam [de] Omnibus sanctis legere digneris, supplicans meorum peccatorum innumerabilium remissionem & voluntatis Dei conformationem (a), ac in finem vitæ conservationem.

Cæterum verò si vitam ibi viventium nôsse volueris, non hoc plenariè, sed in parte declarabo, præsupposito tamen principaliter, quòd Regula secundum meam simplicitatem mihi videtur juxta statum hominum, pro nunc existentium, satis convenienter observari (b), & perfectiùs observabitur per augmentum personarum. Pestilentia enim locum in personis aliquammodo devastavit. Insuper inter personas regentes & subditos talis est differentia & convenientia (c), excepto Abbate (d), qui semotus est, quòd quilibet Priorum (quia duo sunt Monasteria & unus Conventus) seu vice Priores vel Vicarii, ut dicitur, in absentia Prioris eadem utitur potestate, ut, quidquid mandaverit reliquis Officialibus, seu alicui personæ subditæ, ab omnibus fieri consuevit. Et illi duo Priores cum duobus Præpositis seu Cellariis habent omnia spiritualia & temporalia regere & ordinare solùm ad unum annum: quia
singuli

(a) *Cod. Udal.* Confortationem. (b) *amb. Codd.* observetur. (c) *Cod. Udalr.* communitas. (d) *nunc fortè jam Commendatario.*

singulis annis in die SS. Philippi & Jacobi ante com-
estionem electio fieri consuevit. Nihil tamen fit,
quod est notabile, quod non consilio Capituli omnium,
seu Seniorum consensu antea tractetur. In choro
verò, in mensa, in habitatione cellarum, in labore
omnes consimiles sunt, nisi legitima causa quem-
quam exceperit. Quemlibet tamen in Divino of-
ficio, uti & in processionibus, in sessionibus ordi-
nem suum, ut Regula docet, observare oportet.
Quod ideo dico, quia ibi sunt duo Doctores, unus
Pragensis Theologiæ Sacræ, qui stat sub me & sub
omnibus aliis, post quos venit ad locum illum: al-
ter verò Doctor Decretorum, qui est homo satis
senex, sub omnibus aliis stat junioribus, qui eum
præcesserunt in adventu, & hic est Gallicus, & cre-
do Boloniensis.

In Horis Canonicis talis modus observatur, quòd
Cursus Beatæ Mariæ quasi submissa voce ac prolatio-
ne (a) secundum nostrum morem profertur: Horæ
vero altiùs modicùm leguntur distinctè secundum
debitas pausas, non tamen nimis protrahendo, ex-
ceptis Laudibus, Tertiâ, Vesperis & Completorio,
quia cottidie canuntur. In festivitâtibus verò prin-
cipalibus totum canitur, excepta Sexta. Et cottidie
Missa principalis dici cantatur. Stat autem omnis
Congregatio ad omnem Psalmodiam omnium Ho-
rarum, & nunquam sedent nisi sub Lectionibus Ma-
tutinalibus & Epistolis seu Lectionibus Missarum: &
feriatis diebus, cùm legitur unus Nocturnus cum
Lau-

(a) *Locus in utroque Codd. corruptus. Fortè leg.*
protelatione.

Laudibus de Vigiliis mortuorum, tunc etiam sedent. In Quadragesima verò ferialibus diebus citra Matutinas & Laudes leguntur tanquam Cursus Virginis Mariæ septem Psalmi Pœnitentiales cum Letania flexis genibus, & post Completorium sedendo leguntur Quindecim Gradus, & preces fiunt secundum nostrum modum ad omnes horas. Per totum verò annum fit confessio ad Completorium & ad Primam, diebus verò festivis ad Primam non, aliis verò semper.

Vigiliæ verò secundum Regulam fiunt semper tam æstate quàm hieme post Matutinas, & illæ tam benè temperantur per ordinationem horarum, quòd nullus somnolentus securè illo tempore dormire potest: quia tempore æstivali fit semper breve intervallum feriatis diebus inter Matutinum & Laudes: hiemis verò tempore prolixius. Cùm autem est duodecim Lectionum officium, protrahitur prolixè quasi ad diem in hieme, semper autem in æstate: & tunc parvo intervallo Primæ pulsantur, & sic sequitur pulsus, quòd volens dormire nunquam est securus, & cum hoc est inhibitum. Pulsatur autem tam ad Laudes quàm ad Primam, & fit semper intervallum inter pulsum & pulsum. Et sic de pulsatione fit reliquis horis præterquam ad collationem, quia tantùm semel: & festivis diebus ad Vesperas & ad Matutinas ter pulsatur. Et fit semper intervallum, ut supra. Nunquam autem conceditur dormire de die nisi tempore æstivali, nisi necessitas cogat infirmitatis. Dormitio in die quasi durat tres horas illo tempore.

Jeju-

Jejunium verò taliter fieri solet, ut per totam hiemem, id est: a Festo sanctæ Crucis usque ad Pascha, excepta sola die Natalis Christi & diebus Dominicis [jejunetur], & jejunatur semper usque ad bonum meridiem. In Quadragesima verò jejunatur usque post Vesperas, & fit tunc accessus ad mensam ad minus ad duas horas post meridiem vel quasi ad tres. Et omnibus diebus jejuniorum fit collatio potûs brevissima ante collationis lectionem in Refectorio. A Pascha verò reficiuntur cottidie bis usque ad Vigiliam Pentecostes. Reliquo verò tempore æstivali jejunatur quarta & sexta feriis omnibus septimanis, & jejunia Ecclesiæ. Et in talibus diebus jejuniorum dormitio diei, quæ debet fieri post prandium, fit inter Tertiam & Sextam ante officium Missæ, vel aliquando post Missam inter Sextam & Nonam.

Refectionis modus ita temperatus est, quòd non nimium nec nimis modicum datur, [sed] datur sufficientia: in pane, & vino est abundantia, quantum quis comedere & bibere potest. Duo dantur fercula, & unum est de generibus seminum ut videlicet fabarum vel lentum &c. aliud verò de oleribus vel ovis coctis in patella. Ad hoc additur de leguminibus, ut unum pomum vel duo, si sunt parva, vel quatuor nuces, vel ficus, vel castanea, vel allium vel cepe. Ad cœnam verò modicum ministratur, & ut plurimum (a) cruda olera cum aceto & oleo: & si aliquid coctum, tunc in parva quantitate, ita ut sit una consolatio, cum dantur duo ova mollia (quod tamen rarò fit) & portio casei.

Tom. VIII.

I i

Tem-

(a) *Cod.* in plurimum.

Tempus autem comestionis sic temperatum est, quòd non diu protrahitur: ita quòd gulosus, si esset aliquis, non potest omnia comedere, nisi nimiùm festinaret. Pauci autem sunt & quasi nulli, qui non in omni comestione aliquid sibi subtraherent de istis, quæ apponuntur, & quibus licitè uti possent. Dictum est mihi a Patre uno, quòd Frater valde antiquus illo tempore feria secunda festivitatis Pentecostes, me ibi existente, solùm semel in die, & unum ferculum comedit. Sunt autem scutellæ, in quibus ministrantur fercula, ut quasi medium octale vini mensuræ Salzpurgensis contineant. Nunquam autem fiunt tempora consolationum nec minutionum, nisi quando est aliquod principale festum: tunc fit una additio per specialem haustum vini melioris, vel additio alicujus panis, additio piscati vel confecti, & rarissimè in anno, ut in maximis festivitibus. Et aliquando fit additio per unum ferculum vel duo, & tunc fit in minori quantitate.

Cellæ autem Fratrum conjunctæ sunt & ita patientes, ut pertransiens videre possit, quid faciat inhabitans. Continent lecti suppodia, & cervicalia non sunt de plumis, sed de lanis, ut credo, ovium. Cooperimentum lecti sunt duo faga quasi capacia.

Labores quidam sunt speciales, quidam generales. Speciales injunguntur secundum ordinem, & quidem spirituales, ut sacristæ, qui habent pulsare debitis temporibus ad omnes horas, & ornare Ecclesiam luminaribus & aliis, Sabbatis officia singulorum ad hebdomadam [ordinare], ut Lectoratûs, Acoly-

Acolythatûs & consimiles. Quidam temporales, ut coquinarii, ministri mensæ. Coquinarii habent lavare omnia vasa coquinæ per hebdomadam septimanæ ordine suo : Sabbato præcedens & sequens cum ministris seu servitoribus mensæ & intrante & exeunte lavare pedes in mandato (quod fit omni Sabbato) omnium fratrum : & præparare omnia vasa & aquam ad lotionem pedum, & scopare dormitorium & ambitum, & minister intrans Refectorium per hebdomadam habet purgare omni die quasi. Idem minister mensæ habet præparare mensam & servire comedentibus.

Sunt & alii labores speciales, qui non ad hebdomadam, sed ex institutione officii fiunt, ut Hospitalarii, qui habet expedire hospites : & est unus de Sacerdotibus : & lavantur pedes hospitem ab omnibus fratribus. Et labores Officialis Infirmariæ, qui habet expedire Infirmariam in omnibus quasi paterfamilias. Et quando aliquis infirmatur, quod necesse sit sibi de nocte assistere, ad hoc eliguntur idonei, qui sciunt gerere curam infirmorum, tam de Sacerdotibus quam de aliis fratribus, a Priore. Et sic etiam fit de die, si necesse fuerit. Officium hoc tenet unus de Conversis & ad hoc idoneus. Et infirmis ministrantur omnia, quæ haberi possunt, ipsis necessaria, sive de communibus, sive in speciebus juxta dijudicationem medici vel alicujus discreti. Non autem aliquis intrat Infirmariam, ut ibi aliquando comedat carnes, nisi infirmitas magna & evidens quemquam ad hoc compellat, & cum hoc de singulari mandato Prioris.

Sunt & alii diversi labores singulis commissi Conversis ex officiis, qui habent, importare panem & vinum & omnia comestibilia. Et unus ad coquinam ad coquendum cibaria, & unus [ad] pistinam, & sic de aliis, ut sutorum, sartorum.

Generales autem labores sunt, qui fiunt in exercitiis, quod tempore æstivali fit post Nonam, & tempore hiemis inter Sextam & Nonam. Et hi fiunt generaliter ab omnibus tam a senibus quàm a juvenibus, qui non sunt occupati ex aliquo officio, ut exquisitio seu purgatio leguminum, fabarum, cicerum, lentum, & sic de aliis, & in loco exercitii deputato. Et isti labores sunt magis communes per totum annum.

Sunt & alii labores diversi, secundum quod necessitas exposcit, ut scopare, portare lapides, ligna, lavare vestes proprias, in hortis tempore æstatis eradicare herbas inutiles, comportare fœnum in pratis, & colligere uvas. Et isti labores fiunt propè Monasterium, & in locis sequestratis longè ab hominibus. Et quidquid injungitur a Priore vel Vicario, sive fit in adjutorium Officialium, sive alia ex causa, fit ab omnibus absque omni contradictione, & nullus utitur propria voluntate. Et pro quacunque re aliquis homo inclinatur seu increpatur, dicit: *culpa mea est*, & non excusat se, nisi fortè interrogatus fuerit, vel magna necessitas exposcat: & hoc tamen cum licentia.

Silentium summum observatur in ecclesia, in Refectorio, in dormitorio seu in aliis locis. Non audet quisquam loqui nisi priùs petita benedictione
a Se-

a Seniori ſe, cum quo vult loqui. Neceſſaria verò in omnibus rebus, ſecundum quod cuilibet competit, & haberi poſſunt, ut in libris ſeu in aliis, cuilibet miniſtrantur.

Præter ea verò, quæ ſcripta ſunt, poteſt te in aliis diverſimodè informare Johannes Lewbs, profeſſus Monafterii de Altenpurga, præſentium lator [qui] quaſi ad tres meſes in omni obſervatione concurrens ſufficientem notitiam habet, cui propter meas preces ſpeciales in ſumptibus uſque ad cellam ſubvenire velis. Spoliatus enim eſt rebus ſuis: & ſic ſuade Domino Priori & Jacobo Cuſtodi Sacriſtiæ, quibus tamen de eo mentionem facito, ſed pauciſſimis verbis. Inſuper ſi tibi videtur, Johannem Venatorem, tuum diſcipulum alloquere, ſi providere benè voluerit animæ ſuæ & ſufficientiæ corporali, poteſt ſecurè pro aſſumptione habitûs advenire (Mihi enim videtur ipſum eſſe benè aptum) Attamen ſi poteſt fieri, in patria ſeu Romæ, omnes Ordines Sacerdotii præaſſumere. Idiplum ex parte mei [dic] Reinhardo, poſtquam tamen ſufficientis fuerit ætatis, qui meus fuit juvenis. Difficulter portare poſſet abſque annorum (a) diſcretionem. Et ſcire debes, quòd ſolum principium quaſi inconſuetum aggravabat me & diverſæ tentationes. Nunc verò magnam conſolationem habeo, eo quòd per miſericordiam Omnipotentis & ejus Genitricis immeritus & verè indignus venire ad talem converſationem potui. Et quaſi jam non aggravant mentem meam omnia, quæ mihi præcipiuntur.

I i 3

Etiam

(a) uterque Cod. eorum.

Etiam cum omni diligentia peto , secundum quod tua discretio noverit fieri , ut observantias illas & scripta omnibus , quibus prodesse possunt vel potuerint , in aliquorum saltim imitatione revelare velis , non curans , si aliquibus displiceat. Quia si hominibus placere volumus , servi Dei non sumus. Et specialiter Domino Andreæ de Beltenbrug in scriptis transmittes , quia isdem Plebano in Spicz devotissimo & aliis , Caspari Sacristæ in Gesten &c. communicare potest , hoc tamen præ omnibus custodito propter meas specialissimas preces , ut non aliqua mentio in isto specialiter , & in aliis mei fiat. Propter hoc enim diu distuli tibi scribere , & cum timore feci , propter pericula diversarum tentationum & distractionem.

Finaliter committo me orationibus tuis devotis , & de meis , utinam devotis , non diffidas. Reinhardum habere propter Deum & meas humiles preces ut filium commissum. Spero enim de Dei mei misericordia eum in bonis & tuo adjutorio prosperari. Valeas in Christo & in ejus dulcissima Genitrice.

Scriptum in Monasterio Specus S. Benedicti

anno Domini 1400. 8. Idus

Junii.

VEN.

VEN. MARTINI
DE SENGING
PRIORIS MELLICENSIS
TUITIONES
OBSERVANTIÆ REGU-
LÆ S. BENEDICTI, PATRIBUS
GENERALIS CONCILII BASILIEN-
SIS OBLATÆ.

*Ex MSS. Cod. Monasterii
Mellicensis.*

WITNESSES
27th June

On this 27th day of June
1881 at the County of ...
the following persons were
present and gave evidence
that the above named ...

Witnessed and signed by me
the Clerk of the Court



Martini de Senging, Prioris
Mellicensis * Tuitiones pro obser-
vantia Regulæ S. P. N. Benedicti ex
Concilio Basiliensi.

*Reverendissimi, Reverendiq; Patres, ac
Domini Præstantissimi.*

Dignentur Dominationes Vestræ vigi-
lanter intendere circa reformationem
Ordinis S. Benedicti. Non enim
sufficit Monasteria ejusdem Ordinis,
in regulari observantia collapsa, re-
ducere ad sola tria substantialia, prout Reverendissi-
mus Pater, Dominus Legatus intendebat, Visita-
toresque ad id ordinavit. Neque enim est possibile
reformationem hujusmodi fieri, videlicet reducen-
do ad tria substantialia omissis accidentalibus. Hu-
jus varietatis sic potest capi intellectus.

li 5

Ec-

* Ita titulum refert Rubrica vetus Codicis Mellic.
signati lit. N. numero 16.

Ecclesia approbans & instituens statum Religionis, voluit hunc consistere in tribus, quæ dicuntur substantialia ipsius, videlicet in voluntaria paupertate, perpetua castitate, & obedientia, non qualicumque, sed *regulari*. Dicitur autem illa *obedientia regularis*, quæ exhibetur secundum aliquam regulam approbatam per Ecclesiam, quarum sunt tres, scilicet Regula S. Benedicti, Regula S. Augustini, & Regula S. Francisci. De voluntaria paupertate & perpetua castitate hoc, quod dixi, expressè habetur ex textu Capituli: *Cum ad Monasterium de Statu Monach. in fine, ubi dicitur, quod abdicatio proprietatis, sicut & custodia castitatis adeò est annexa Regule Monachali, ut contra eam nec Summus Pontifex possit licentiam indulgere.* Et unde hæc annexio nisi ex institutione Ecclesiæ, quæ etiam taliter perpetuam castitatem annexuit Ordini Sacerdotali?

Obedientiam regularem omnes Ordines expressè profitentur. Unde nos de Ordine S. Benedicti sic dicimus: *Ego N. promitto stabilitatem meam, conversionem morum meorum, & obedientiam secundum Regulam S. Benedicti.* Hinc quidam diffinientes, quid sit Monachus, dicunt, quod est persona, voluntariam paupertatem, perpetuam continentiam & obedientiam regularem expressè vel tacitè professæ. Ex his colligite, quod quamvis obligatio confurgens ex professione obedientiæ regularis, statui Religionis annexæ, in genere sit una, vel significetur per unum genus, descendendo tamen ad speciem, puta ad obedientiam regularem hujus vel istius Ordinis, invenitur diversificata. Quia aliter tenetur suo

Præ-

Prælatō obedire Monachus Ordinis S. Benedicti, aliter Monachus Ordinis S. Francisci, & aliter Canonicus Regularis Ordinis S. Augustini, secundum quod Regulæ suarum professionum sunt diversæ. Hæc autem diversitas quasi tota consistit in accidentalibus.

Pro quo sciendum, quod ad perpetuam castitatem omnes tenentur Religiosi æqualiter. Ad voluntariam etiam paupertatem æqualiter tenentur omnes Religiosi professi secundum Regulam S. Augustini. Sed Religiosi professi secundum Regulam S. Francisci tenentur ad hanc aliquo modo excellentiori. Quæ prima duo genera Religiosorum possunt habere divitias in communi, illi verò eas habere non possunt nec in speciali nec in communi. Et quamvis, quantum ad hoc substantiale, quod est voluntaria paupertas, Regula S. Francisci invenitur diversificata à Regulis S. Benedicti & S. Augustini, illæ tamen ultimæ duæ Regulæ, quantum ad illud, in nullo diversificantur. Et tamen Prælatō suo aliter obedire tenetur Religiosus professus secundum Regulam S. Benedicti, & aliter Religiosus professus secundum Regulam S. Augustini. Ille ad plura & rigidiora, iste verò ad pauciora & leviora, secundum quod Regula S. Benedicti rigidior est Regulâ S. Augustini. Hæc autem duarum obligationum diversitas tota consistit solùm in observantia accidentalium, quæ secundum Regulam S. Benedicti sunt abstinencia carnum servanda a sanis & fortibus Monachis, jejunium quotidianum, demptis diebus Dominicis, ab Idibus Septembris usque ad Pascha, & quartarum & sextarum feriarum a festo Pentecostes usque

usque ad Idus Septembris, exceptis casibus legitimæ dispensationis. etiam in Regula expressis. Item silentium observandum suis locis & temporibus modo in Regula expresso: clausura Monasterii, servitus & lectio mensæ, & cætera talia.

Ex quibus manifestè concluditur, quòd non stat aliquod Monasterium Ord. S. Benedicti ad obedientiam regularem, quæ est unum de tribus substantialibus religiosi status, esse plenè reformatum, omissis accidentalibus: Quia illa versatur & exhibetur in observatione accidentalium. Nam quantò minùs in aliquo Monasterio Ord. S. Benedicti observantur accidentalia, tantò minùs illud reformatum esse fatendum est ad obedientiam regularem. Et si quis vellet dicere, hanc solam ob causam esse de tribus substantialibus unum, quia quis obedit suo Prælato imperanti sibi, ut non habeat aliquam rem propriam, & ut non commisceatur alicui fœminæ, ille recederet a modo communi loquendi omnium. Haberet etiam necesse concedere, quòd solùm essent tria substantialia religiosi status secundùm rationem, & non secundùm rem, sicut circa Primum Physicorum dici solet, quòd sint tria principia rerum naturalium.

Ex præscriptis fortè posset quis moveri ad dicendum, quòd ergo securius esset Regulam servare ad litteram & in omnibus suis accidentalibus & observantiis &c. Ex quo videretur sentire, quòd a Monachis Regula S. Benedicti hoc modo non servetur, quòd illi de salute sua consequenda ex hoc reddantur inseguri. Sed hoc nullatenus est. Quod ut intelligatur, notetur, quòd hoc complèxum, *obedientia regula-*

regularis, capitur aliquando pro actu, aliquando pro habitu, aliquando pro quadam animi præparatione ad faciendum cuncta sibi imperata secundum Regulam suæ professionis, & potest dici *obedientia virtualis*.

His præmissis dicendum est, quòd esse reformatum ad omnimodam obedientiam regularem *actua-lem* ad hoc, quòd Monachus totam Regulam suam observet, non est de necessitate salutis. Sed quando illa est tanta, quòd sub ea secundum communem consuetudinem Monasterii sobriè, justè & piè vivitur, tunc ipsa cuilibet est sufficiens ad salutem, etiamsi ab eo non tota Regula ad litteram observetur. Hæc est sententia S. Bernardi in *de Præcepto & Dispensatione*, quam ibidem satis probat.

Secundò dicendum, quòd esse reformatum ad omnimodam obedientiam regularem *habitua-lem*, id est: quòd homo in se habeat perfectum habitum talis virtutis &c. non est de necessitate salutis, sed sufficit cuilibet non habenti hunc habitum, si ad hunc velit tendere, ut hunc acquirat.

Tertiò dicendum, quòd esse reformatum ad omnimodam obedientiam regularem *virtua-lem*, simpliciter est de necessitate salutis: quia quilibet Monachus ex voto suæ professionis semper tenetur habere paratam voluntatem ad faciendum omne illud secundum posse, quòd sibi suus Prælatus secundum regulam suæ professionis præcipit. Unde ergo Monachus Ordinis S. Benedicti tenetur obedire suo Abbati, sibi præcipienti, ut secundum regulam teneat silentium, jejUNET, maneat infra Monasterii clausuram,

ram, non comedat carnes, quamdiu est sanus & fortis, & non est constitutus in articulo arctæ necessitatis, esum carniū excusantis, & alia hujusmodi. Quam voluntatem si non habet, & maximè si habet voluntatem contrariam, qua non velit ad talia vel eorum aliqua sibi pro tempore per suum Abbatem imperata obedire, quàm diu in illa voluntate perseverat, est extra statum salutis. Semper enim quilibet Monachus professus secundum Regulam Sancti Benedicti tenetur suo Abbati ad talia præcepta obedire pro suo posse, & secus faciens peccat contra votum suum. Hæc est sententia omnium Doctorum, de hac materia scribentium.

Ex quo colligi potest, in quo statu sint illi, qui nuper auctoritati Sacri Concilii pertinaciter restiterunt & obstinatè, ac suis Visitatoribus obedire contempserunt volentibus eos reformare secundum Regulam suæ professionis, nolentes suscipere abstinentiam carniū &c. Nec habebant sibi blandiri spe falsa, si Concilium eos ita manere permittit: quia hoc permissivè facit, & vellet eos ad altiora reformare, si hoc absque gravissimis scandalis facere posset ac malis, quæ inde orirentur. Facit ergo simile, sicut facit creditor habens debitorem debentem ei viginti florenos, quos non posset ab eo obtinere, nisi aliquid majus perderet, & consulens de damno suo eligit potius ab eo accipere quatuor vel sex, aut quot absque suo damno habere potest, quàm omnino nihil.

Item sciendum, quòd, quamvis obligatio consurgens ex promissione obedientiæ Regularis secundum

dum formam nostræ professionis sit tam magna, ut omnia in Regula expressa, quantum ad virtuales obedientiam, comprehendat, ut dictum est, non tamen est universalis, sic ut taliter professus teneatur suo Abbati obedire ad omnia, etiam licita & honesta qualiacunque. Habet enim talis obedientia *regularis* terminos suos, quia contractum & cum limitatione fit & fieri solet, puta *secundum Regulam Beati Benedicti*. Et ideo si Abbas meus mihi præciperet portare cilicium sicut Cartusienfis, vel jejunare ferias secundas, tertias & quintas, aut Sabbato infra Pascha & Idus Septembris, & specialiter ubi demerita forsan excessuum aliquorum non exigunt, quamvis multum merear, si obediero, nulla tamen necessitas mihi imminet ei ad hoc obediendi, quia talia in Regula sancti Benedicti non sunt expressa.

Denique si etiam possibile esset fieri aliquam reformationem nostri Ordinis ad sola substantialia omissis accidentalibus, tamen incassum foret propter fictionem petentium. Nam si non reformati essent verè inclinati ad reformandum, videtur, quòd non esset major difficultas ipsis ad consentiendum plenæ reformationi, cum ratio ipsis dictare deberet, ipsos ad eam plenè obligatos fore. Unde etsi prima facie videntur illam suscipere voluntariè, non tamen diu in ea permanebunt. Quid etiam est hoc, quod vicinus visitabit vicinum, irreformatus irreformatum, quorum nec visitaturus nec visitandus debite Regularis vitæ observantiam in se aut aliis satis diligit, neque, quod plus est, hanc satis novit? Et si hanc scirent, quis æstimabit, si alicubi necesse esset Abbatem

batem admonere, quòd unus vicinus alium vicinum suum offenderet ipsum admonendo?

Item dato, quod istiusmodi visitatores essent boni zeli ad procedendum in ipsa visitatione secundum rigorem justitiæ, tamen per Juristas, ubicunque locorum venerint, superantur, ita ut nec os aperire audeant. Zelus autem ille procul est ab eis, cum etiam si alicui visitandorum aliquid objicitur per huiusmodi visitationem criminis aut excessus manifesti, indeliberatus respondere potest, quòd id agat, quod ipse & sui. *Turpe, ait Poëta, est doctori, cum culpa redarguit ipsum.* Et plerique tales, volentes amovere ab oculo fratris offensam festuæ, experti sunt trabes in oculis propriis. Aptè talibus visitoribus improperari potest dictum Apostoli dicentis: *Qui predicas non furandum, furaris: non mœchandum, mœcharis.*

Et hoc est, quòd Abbates missos Visitatores a sacro Concilio in Diœcesibus Augustensi & Constantensi certorum Monasteriorum refutaverunt, & contemptibiliter egerunt benè armati Juristis, sibi assistentibus, & suum inde emolumentum pinguisimum capientibus, nedum ab Abbatibus tantum, sed etiam sequestrati a Conventualibus, Visitatores, inquam, ad primævam Ordinis institutionem reformare molientibus. Hæc fuit, Patres Reverendissimi, causa ipsorum resistentiæ & exhibitionis irreverentiæ, contumeliæ, derisionis & oblatratuum, nedum ipsis Visitoribus, sed etiam specialiter sacro Concilio. Ad tantam namque insaniam demum perducti sunt suasionibus malignis membrorum, haud

haud dubium, diaboli, ut, cum eis invitis Visitatores exequi ipsorum vellent mandatum, processissentque ipsis resistantiam pertinaciter & obstinatè continuantibus ad excommunicationem ac interdictum loci, cum nequirent amplius, clauserunt omnes portas Monasterii, ne possent intrare. Et ita fecerunt in duobus Monasteriis.

Percipite, quæso Reverendissimi Patres, contumeliam, ignominiam ac contemptum sacro Concilio verius quàm Visitoribus exhibitum ab iis utique, qui quodammodo sub alis ipsius, immò in facie sunt. Citati namque impunes recesserunt a Domino Legato. Quid, putatis, faciunt a Concilio distantes? Verendum est ipsos animatos fuisse. Audite Reverendissimi Patres: præfati rebelles non solum impunes recesserunt a Concilio, sed benè remunerati hilariter recesserunt, obtinuerunt concupita, Visitatores utique in vita visitandis per omnia similes, cordialiter optatos. Quid enim? cæcus cæco ducatum præbet? Certe ambo cadent in foveam barathri. An boni erunt doctores, qui nunquam fuerunt discipuli? Quis vestrùm hoc credat, siquidem nullus eorum nec vidit nec practicavit observantiam Regularem. Audierunt quidam loqui de ea stridentes dentibus, continentes ac sapientes fortè non nunquam aures suas, sicut aspis ad vocem incantantis.

In quodam etiam Monasteriorum visitandorum quidam de Fratribus Conventualibus, ibidem primam Missam suam celebrantibus, Visitoribus propè existentibus, habuit solemnes nuptias, quasi totam communitatem cujusdam civitatis, propè sitæ

invitabat ad nuptias easdem, & utriusque sexus, quæ finita Missa convivata est in Refectorio Conventuali fratrum, carnes, & quæcunque potuerunt habere, post convivium fistulatoribus ludentibus in eodem loco choreas duxerunt tam viri quàm etiam mulieres, obtuleruntque singuli aliquam promptam pecuniam ipsi Monacho, novello Presbytero, aut xenia, quæ & sibi relinquebantur per Dominum Abbatem. Ecce his actibus diabolicis benè alludit textus Libri Exodi: *Sedit populus manducare & bibere, & surrexerunt ludere.* Scierunt Visitatores hoc, nec ignoravêre, cum propinqui fuerint, nec tamen veriti sunt, immò in sequenti Dominica similes cum alio quodam Monacho nuptias intimaverunt celebrandas.

Hinc, Patres Præstantissimi, oritur difficultas se submittendi efficaci reformationi. Timent enim, ne amplexentur stercora ob hoc, quia nutriti sunt in croceis. Inde refutaverunt Visitatores Concilii, & quæsierunt, ut scilicet darentur eis Visitatores, qui eos amovere non auderent. An verisimile fuerat, quòd etiam ab eis appellarent, sicut ab aliis nulliter & frivole appellaverunt? Nullatenus. Haberent tamen majores causas refutandi illos, si voluissent, propter præmissa. Vitiis enim eorum consentiunt, ut dixi, contra Regulam B. Benedicti. Hæc corde perpendenda forent, hæc condescensio, videlicet reductio Ordinis B. Benedicti ad tria substantialia tantum, omissis accidentalibus, carnalitatem fovebit in Monachis taliter visitandis & reformandis. O quantum laboraverunt carnales cum suis ad hoc patronis, donec illam obtinerent! Sed certum reputo,
agent

agant Patres Concilii, quidquid velint, nec ista tria substantialia diu servabunt. Neque credendum est promissionibus eorum vel juramentis. Consueti enim sunt perjurare, primam quoque fidem irritam fecerunt.

Novi enim unum ex eis, qui timens se visitari & reformari, aut fortè privari Abbacia, excogitavit nequiter unam viam, per quam se conservaret in Abbacia cum magnis sumptibus sui Monasterii. Misit primò huc ad Concilium pro Abbate quodam reformato de Austria, taliterque alloquendo exorditus est: Reverende Pater, dudum proposui in Monasterio meo observantiam regularem introducere, nescio tamen modum, & valde placet observantia in Mellico. Peto igitur, quatenus detis mihi informationes incipiendi: & aggrediar fortiter non obstantibus omnibus involuntariis fratribus meis. Cœpitque petere fratres sibi concedi de Mellico & Scotis in Wienna Pataviensis Diœcesis, omninoque recusatis fratribus de Castello & Nuremberga, cum plurimum sibi consultum fuerit.

Diffidens igitur se solis suis precibus posse hoc obtinere apud Abbates Mellicensem & Scotorum, pulsavit precibus per personas interpositas Dominum Legatum, qui paratus fuit scribere, scripsitque Duci Austriæ, ut mandaret Abbati aut scriberet. Ipse quoque Dominus Legatus ac Abbas reformandus eidem Abbati scripserunt, scilicet Mellicensi, ut concederet. Qui visis scriptis obtulit se ad concedendum unum fratrem, & Abbas Scotorum unum fratrem, quos Abbas reformandus adduxit in propriis

& gravibus expensis. Unus igitur ex eis auctoritate Domini Legati Prior claustralis constitutus est, & mansit ferè octo hebdomadis ibidem. Revocato eo certa ex causa ad Concilium secundus relictus est, qui statim die quarta, immediatè sequenti, in prægravem incidit infirmitatem, quæ infirmitas accidit sibi tempore refectionis in mensa: & omnino creditur fuisse infectus veneno. Statim enim lingua in ore versa est sibi quodammodo in globum, discurritque sibi per omnia membra, adeo ut penitus contractus fieret in pedibus ac manibus, officiumque linguæ tardè sibi restitutum est. (a)

Eo itaque recedente relictæ sunt ibi duo fratres benè instituti, sed ibidem professi, quos tanto odio habebat, ut etiam graves sibi essent ad videndum, tantumque per æmulos ipsorum pupugit, quod exierunt, & ad reformata Monasteria in Austria se dederunt. Et statim profugi redierunt & dominati fuerunt ut antea, assumptaque per omnia est vita prior. Videte Reverendi Patres, qualis fictio!

Audiens rursus idem Abbas Visitatores emissos ad visitandum certa Monasteria, inter quæ erat suum Monasterium unum, videns se non posse salvare suam præsidentiam, finxit se ire ad Curiam Romanam. Si ibi fuerit, nescitur, vel ubi longo tempore latuerit. Addidit inutiliter consumere pecuniam, cum prius dilapidaverit bona Monasterii, adeo quod obligatur benè in quinque millibus florenorum. Ante tamen finem expletæ visitationis revenit, credens forsitan esse finem visitationis. Cumque Visitatores venirent

(a) comma erasum ex codice.

venirent ante suum Monasterium volentes eum requirere, clausit circumquaque omnes januas Monasterii etiam tempore Divini cultus, nec volebat aliquo modo aperire. Hic patuit sua magna fictio, quam non potuit in longum occultare.

Est & aliud non minus plangendum, quod rarissimi inveniuntur Abbates in his Diocesibus, qui competentis sint litteraturæ, sed omnino stolidi & ignari, adeo quod plerique non sciunt proferre duas orationes congruas & continuas, quantumcunque breves, Latino sermone, cum Regula dicat, quod *Abbas debet esse doctus lege Divina, ut sciat, unde proferat nova & vetera.* Sed quotiescunque convocantur per Episcopum aut suum Vicarium ad habendos aliquos tractatus, unus pro omnibus loquitur laica (a) lingua. Non curant unquam legere aliquid in sacra Scriptura, nec alios sinunt talibus vacare. Quot igitur occasiones hactenus quæsierunt, ut Visitatores missos per sacrum Concilium ad se reformatum a se repellerent, ne per eos cogerentur vivere secundum Regulam suæ professionis? Primo nolebant habere reformationem Mellicensem. Dominus enim Legatus auctoritate sacri Concilii scripsit ad Mellicum & alia tria Monasteria, ab eodem reformatum, pro mittendis certis fratribus, qui instituerent fratres Monasteriorum reformatum, & vitam vivendi eis ostendendo. Missique sunt decem fratres sub propriis Monasteriorum expensis. Qui ut venerunt ad Sueviam, Abbates reformatum concordaverunt unanimiter, quod nullum de observantia Mellicensi

Kk 3

censi

(a) i. e. vernacula.

cesi essent recepturi, sed Castellensi. Unde major pars eorum rediit ad Monasteria sua, nec Monasteria expensas, pro ipsis factas, adhuc habent. Non enim volunt dare quidquam, qui erant Abbates reformandi, sed dixerunt, quod sine ipsorum requisitione fuerint adducti, & quare potius ad Diocesim Constantiensem, quàm Curientem, Basiliensem, Argentinensem, Maguntinensem, Eistettensem, Ratisponensem &c.?

Valuit eis hæc subdola petitio illorum, scilicet Castellensium fratrum, ad hoc scilicet, ut nec illam nec istam susciperent, & per eam illuderent hominibus incautis. Quia enim sciverunt adesse Mellicenses, & aliquos eorum deputatos esse ad se reformandum, & nullum de Castello, Castellenses petierunt, ut crederentur velle reformari. Sed si Castellenses affuissent, & fuissent deputati in eorum reformatores, & abfuissent Mellicenses, quis dubitat, quin tunc petissent reformationem Mellicensium, & recusassent recipere reformationem Castellensium.

Deinde videntes se Mellicenses non posse evadere, rursus contra eos aliud prætenderunt: quia adven-
runt a remotis, nescientes consuetudines & mores patriæ, & ideo petierunt reformatores compatriotas. Sed nonne secundum istas consuetudines & mores reformanda sunt Monasteria Ord. B. Benedicti, & non secundum observantias Regulares notas & consuetas Mellicensibus? Has horruerunt, & ideo Mellicenses refutaverunt, & compatriotas in reformatores habere voluerunt, quibus hæ observantiæ essent insuetæ & etiam ignotæ, qui eos relinquerent in facibus

cibus suis, & tales obtinuerunt. Has astutias & alias his similes, per quas se palliaverunt, nemo intelligit, sicut ipsi putant. De dicto igitur modo reformationis videndum est.

Sit autem Monasterium Ordinis S. Benedicti, auctoritate sacri Concilii reformatum ad observantiam trium substantialium omissis accidentalibus, ut intelligatur, quid hoc dictum sit, & an iste modus sit possibilis, quæro, an Abbati alicujus Monasterii liceat suis subditis imperare silentium, clausuram Monasterii, abstinentiam carnum, jejunium & alia, quæ accidentalia dicuntur, an non? Si hoc ei non licet, & tamen prius sibi licuit, antequam Concilium suis Visitoribus istum modum reformandi committeret: ergo hoc ei nunc non licet propter commissionem Concilii, Visitoribus factam. Ex quo ulterius sequitur & concedi oportet, quod Concilium committendo facere talem reformationem restrinxit potestatem Abbatis Monasterii, ut ei non liceat suos subditos per observantias regulares, illas eis imperando, ducere ad perfectionem vitæ Christianæ, ad quam tamen illi per hujusmodi observantias tendere tenentur ex obligatione suæ professionis, quia non licet ei illis formare præcepta secundum Regulam S. Benedicti, & eos cogere ad eorum observationem, qua ad hujusmodi perfectionem tandem de nolentibus voluntarii facti perveniant. Hoc autem esset impium.

Item sequeretur, quod tunc etiam subditi, Abbati suo ad hujusmodi præcepta obedire renuentes, non peccarent: quia nemo tenetur alteri obedire ad

præceptum, quod non licet ei facere. Hoc autem concedere videtur absurdum. Si verò dicatur, quòd licet Abbati alicujus Monasterii talia suis subditis præcipere, quæro, an illi ad hujusmodi præcepta teneantur ei obedire, an non? Si non: ergo non faciendo ista, immò etiam nolentes ea servare non peccant, & tamen promiserunt Deo obedientiam secundum Regulam S. Benedicti in sua professione: ergo facientes contra suam professionem sunt innocentes & immunes a peccato inobedientiæ.

Item cùm obedientia Regularis habeat exhiberi in talibus accidentalibus, si dicitur, quòd non tenentur ad ea obedire, sequitur, quod per Concilium, quod jussit eos solùm ad tria substantialia reformari, a jugo regularis obedientiæ, quod est unum de illis tribus, totaliter sint exempti: & si ab illo sunt exempti, non ergo ad illam sunt reformati: & sic non sunt reformati ad tria substantialia. Non ergo est possibile, quod sint reformati ad tria substantialia omissis accidentalibus.

Si vero dicitur, quod hujusmodi subditi tenentur ad hujusmodi præcepta suo Abbati obedire, quando illa eis fecerit: sed dicta jussio Concilii facit, quod Abbas eorum non tenetur eis talia præcipere, sed potest de illis supersedere. Benè. Superseadeat ergo, & non imperet ea, neque subditi ipsi observent. Iterum infero sicut priùs, quod non sint reformati ad tria substantialia, quia non ad obedientiam *regularem*, quam nec Abbas imperat, nec subditi observant.

Ex omnibus præscriptis colligitur, quàm necessaria esset reformatio, considerata tali deformatione Abba-

Abbatum & subditorum: considerato etiam, quod Monasteria a Fundatoribus ita solemniter dotata, in hunc finem dotata sunt, ut observantia regularis inibi custodiatur, cultusque divinus rite, devotè & solemniter peragatur, ut ipsorum Fundatorum animæ orationibus Suppositorum (a) Religionis remediarentur, ut, qui eleemosynam temporalem largiti sunt, spirituales recipiant. Quomodo igitur iudex iratus ille & excelsus hujusmodi interpellantium orationibus placabitur, cum ore laudent, vita blasphement? Unde forsitan & de illis prophetavit Isaias: *Populus hic labiis me honorat, cor autem ipsorum longè est a me.* Ut ergo mittantur nuntii, qui Deum placent, restat, ut tales per reformationem mittantur. Reformationem dico, non illam reductivam tantum ad tria substantialia omiſſis accidentalibus, quæ, ut tactum est, impossibilis est, sed reductivam ad primævam institutionem Regulæ S. Benedicti, heu nimis collapsam!

Ad reformationem veram faciendam pernecessaria est abſtinentia carniū regularis ac jejunium regulare, quamvis non sint aliqua de substantialibus Ordinis, sunt tamen observantiæ corporales præcipuæ, quibus abjectis quanta inconvenientia sequeretur, videndum erit: Et primo ex esu carniū a Regula prohibito. Nec obſtare videtur Constitutio Benedicti XII. qui prima facie videtur certis diebus certorum anni temporum sanis & fortibus Monachis Ordinis S. Benedicti indulgere eundem esum carniū, sanè autem intellecta nullo modo concedit,

Kk 5

nec

(a) i. e. personarum.

nec indulget hujusmodi esum carniū sanis & fortibus Monachis. Contrarium vero dicentes carnaliter nimis videntur interpretari præfatam Constitutionem, ut super hoc ostendemus [per] scripta subiicienda Vestrarum Reverendarum Paternitatum correctionibus.

Dignemini, quæso, considerare notabilem a Regula exorbitantiam. Regulare enim jejunium ab Idibus Septembris usque ad Pascha servandum extra Adventum & Septuagesimam deficiet: quod, ut præmissi, una de corporalibus observantiis principalis est. Et si pro tempore, rationabili causa postulante, cum certis dispensatur super hujusmodi jejunio, ut est labor gravis, aut fervor caloris nimii, teneritudo juvenum, decrepitus quoque senum: non tamen ex hoc conceditur esus carniū secundum Regulam nisi infirmis & omnino debilibus. Respicienda est etiam causa prohibitionis esūs carniū sanis & fortibus Monachis, quæ est repulsio fomitis carnalis libidinis, quem esus carniū videtur administrare. Voluit enim B. Benedictus professori suo præcludere omnes vias transgrediendi vota Deo promissa, quorum principale est castitas, quam omnis Religiosus fovet explicitè vel implicitè, ne haberet aliquam occasionem se excusandi de incontinentia. Crebrescit carniū edulio passio sitis, adeo quod nec in die sufficit, nisi protrahatur aliquoties usque in profundum noctis. Inducitur etiam consuetudo perversa. Sequitur nonnunquam tales, quia fortè debiles sunt capitibus, propter crebras & longas vigilias & labores Chori alienatio sensuum ex immoderato sumpto potu propter

propter carnum esum. Occasionantur ad manendum extra Collationem Conventualem, nonnunquam extra Completorium, plerumque extra Matutinum, aliquando ad petendum licentiam ad Infirmaryam. Prorumpunt etiam fortè in verba irreligiosa, habent quoque apparatus insulsos. Neque tales purgare se possunt per confessionem a tali crimine, cum non sit benè possibile, quod sciant se recolligere, cum quodammodo ratione careant.

Siquando vero aliquis satagit sibi reducere ad memoriam, juramento se firmat fuisse immunem, indignaturque nonnunquam sibi objicientibus, & supprimitur charitas proximi. Horum experientia crebro est habita. Ponamus etiam, quod talis non incurrat mentis hebetudinem (nam fortis fortè est capitis) tamen tardus est ad cultum Divinum, ad collationem, ad Completorium, & plerumque ad Matutinum, & fortè penitus obdormit. Cum hoc stat, quod certi plus indigentes libenter abstineant ad satisfaciendum Regulæ & promisso suo, qui nimirum occasionem scandali habent, videntes fortiores se non abstinere.

Item tales carnales quærunt sæpius etiam diversitatem in modo præparandi, quo scilicet lautius & delicatius præparari potest. Quod si denegatur eis, sunt impatientes & murmurant, ingrati que efficiuntur, cognoscentesque se oportere abstinere ab esu earum sequenti die, comedunt una vice, quod sufficit eis per duos. Et cum B. Benedictus modicè amplius a media nocte jubeat Monachos pausare, ut jam digesti surgant, ne sint scilicet graves & indispositi in labori-

laboribus chori, possintque seipsos excitare ad devotionem: si igitur abstinentes ab hujusmodi carniū esu pausant a media nocte per unam horam, necesse est, edentes carnes pausare per duas. Alioquin cum aliis surgentes indigesti, & consequenter indispositi erunt.

Ampliusque diversitas locorum, fratrum comedentium requirit diversitatem Lectorum, Servitorum Superintendentiumque. Diversitas quoque ciborum requirit diversitatem coquorum & aliorum laborum, ut in hieme calefactorum & hujusmodi. Salva igitur opinione melius sapientium, si Papa Benedictus voluerit concedere esum carniū sanis & fortibus Monachis certis temporibus & certis hebdomadæ diebus, ut isti carnales, licet malè, videntur sapere, tamen ut omnes istæ incommoditates superius positæ cessarent, melius utique fuisset, communiter concedere in refectorio omnibus simul, quàm in locis diversis, ut cuilibet patere potest. Multi enim, ut dixi, infirmi mente nedum Religiosi, sed etiam seculares ex tali diversitate scandalizantur. Religiosis quoque valde cavenda sunt scandala activa juxta Apostolicum consilium: *Si esca scandalizat fratrem meum, non manducabo carnes in æternum*. Unusquisque enim, id est: unaquæque pars Conventus cœnam suam præsumit ad manducandum, & alius quidem esurit, alius autem ebrius est. Sic igitur tepescit charitas alterutra.

Item non est causa, propter quam concedatur esus carniū sanis & fortibus Monachis. Si igitur dicitur, quod conservatio sanitatis viriumque corporalium,

ralium, hoc non apparet: quoniam videtur, quòd sanis magis obsint quàm profint. Ratio est, quia non possunt ita digerere sicut seculares, qui habent corporalia exercitia varia digestionì plus inservientia. Monachi autem non possunt hujusmodi exercitiis occupari propter Divinum officium, quod prolixum est. Experientia etiam docet. Multò enim plures infirmi reperiuntur in Monasteriis deformatis, ubi esus carnum continuatur, quàm in Monasteriis reformatis, nisi ex causa alia quis infirmetur, id est: continuam habeat infirmitatem, cum qua forsan venit ad Monasterium, quæ etiam verosimiliter per esum carnum non potest curari, aut nisi quis nequiter fingat se infirmum propter eundem esum sibi ministrandum. Apparet hoc etiam in Cartusiensibus, qui fortes sunt. Neque infirmis & omnino debilibus esus carnum ministrandus est qualiumcunque & quodocunque, sed tales & tunc, quales & quando peritus Medicus & timens Deum, discretusque Abbas judicaverint. Unde & Cartusienses etiam in extremis abstinent a carnibus. Quidam enim Medicus dicit, quod humidum radicale conservat hominem in vita: quando idem deficit, tunc etiam homo deficit in vita. Et illud humidum radicale, ut idem dicit, æquè per vitellos ovorum reparatur, sicut per esum carnum. Unde credo, quod Monacho infirmo aut omnino debili nigro, in tali articulo constituto, plus prodesset brodium (a) bonum carnum sorbere, quam frustatim carnes mandere.

Am-

(a) *i. e.* jusculum.

Amplius Fratres Ordinum Mendicantium certorum continuè abstinent a carnibus, ut Prædicatores, & solum ex ipsorum constitutionibus, qui etiam coguntur vagari propter mendicitatem, & forsan mendicando faciliùs acquirerent carnes quàm quoscunque alios cibos, & nihilominus strictam servant abstinentiam esûs carniùm, nisi infirmis graviter & omnino debilibus ministrantes. Et si tales ex Constitutionibus suis hujusmodi abstinentiam tenent, fortius nos obligamur ex Regula.

Ultra progrediar ad locum originis ipsius Ordinis, scilicet ad Specum S. Benedicti, ubi ista abstinentia usque modo servata est, quia observantia Regularis plenè observata est. Unde Cistercienses videntes collapsum quodammodo irrecuperabilem Ordinis S. Benedicti, volentesque se conservare in statu salubri, secesserunt ad loca eremi aspera, ubi diu hominibus incogniti, ut possent ablaetare ab oculorum concupiscentia, unde principaliter processit illa esus carniùm laxatio, cœperunt strictam ducere vitam, Regulamque ad unguem servare, carniùm esui plenè renuntiare. Unde demum Deo volente cœperunt ab hominibus visitari, numerusque ipsorum augeri. Beatus enim Bernardus cum aliquot suis fratribus carnâlibus se eis adjunxit atque Ordinem suscepit. Usque hodie quoque, ubi regulariter vivunt, dicuntur Regulam servare ad litteram. Sicut igitur tunc illi carnis lapsum timentes hominum consortia fugerunt, ut Regulæ observantiam continuare possent, qui lapsus carnis maximè evenit ex continuatione esûs carniùm, non fuerunt a Deo deserti,

deserti, sed mirabiliter multiplicati, & nedum per personas litteraturæ simplicis, sed etiam doctas & benè maturas: ita hodie, ut experientia docet, augetur numerus personarum mirabiliter. Multi enim videntes diabolum expulsum a locis Monasticis, & vitam in eis introductam Deo placitam ac secundum Regulam S. Benedicti statutam, multi, dico, scientia & moribus præditi, genere clari, magnarum possessores divitiarum, omnia reputârunt ut stercorea, ut Christum lucrifaciant, seculo diu fidem servantes tandem ad Christum conversi sunt.

Novi enim unum Monasterium (a) solemne Ordinis S. Benedicti, ubi ante ipsius reformationem fuerunt Monachi ad maximum numero quatuordecim, quanquam uberes habuerint fructus, annos videlicet omnis sterilitatis expertes, ubi unusquisque vivebat, prout voluit, emendo vendendoque portionem suam præbendam, nec inter multa Monasteria etiam vix unum fuisset repertum, in quo aliquis fuisset doctus, nisi fortè scientia inflante. Nunc verò in eodem Monasterio, de quo supra memini, sunt plus quàm septuaginta personæ religiosæ post ipsius reformationem, quarum multæ sunt graduatæ, adeò quoque dietim confluunt, ut jam locus citò non possit capere: & licèt his temporibus sint anni steriles, oporteatque jam dare magnas steuras & continuas, tamen nihilominus Deus illis benè providet, quippe quorum oculi in Deum sperant, ut det illis escam in tempore opportuno.

Consideretur etiam ex diversitate hujus observantiae

(a) fortè Mellicense.

vantiæ corporalis, quæso, quanta oriantur scandala apud laicos. Dum enim per viam proficiscuntur, alii in publicis hospitiiis sicut & laici utuntur carnibus. Veniunt alii, qui licet fateantur se fore ejusdem Ordinis, sed recusant carnes manducare satisfaciennes Regulæ. Pensate, quæso, quale ex hujusmodi diversitate talibus scandalum oriatur, cum vel illos judicent transgressores Regulæ, aut hos tanquam hypocritas spernant. Propter quod uniformitas hujus observantiæ corporalis necessaria esset, videlicet abstinentia carnum, quæ salvo Regulæ statuto laxari non potest.

Idem videtur fore considerandum, quod Monachi Ordinis S. Benedicti, quoad hanc observantiam corporalem in nullo differunt a Canonicis Regularibus, regulariter viventibus, qui tribus diebus dumtaxat certis anni temporibus in hebdomada carnes edunt.

Sed fortè quis dicet arguendo contra superiora, quæsonant, quod carnis lapsus vix potest vitari esu carnum continuato: & tamen Canonici Regulares regulariter viventes esum carnum hujusmodi continantes, huiusmodi lapsus sunt expertes: ergo etiam Monachi ejusmodi esum continuantes æqualiter possent hujusmodi lapsum evadere, & per consequens non fuit hæc causa principalis, propter quam prohibitus debuit esse ejusmodi carnum esus Monachis. Ad quod dicitur, quod Canonicis Regularibus non est prohibitus [esus carnum] ex Regula, cum hoc, ne surgant in ipsis motus carnales, moderate datur. Item comedunt omnes simul in uno Refec-

Refectorio, ubi evitabiliore sunt excessus quàm extra refectoryum. Item Benedictini debent esse rigidiore & altioris professionis & per consequens perfectionis quàm Canonici Regulares. Unde in habitu sunt magis abjecti. Item habitus ad carnem est magis asper, in vigiliis quoque sunt strictiores, in laboribus manualibus quoque plus fatigati. Restabat etiam in cibis eos esse frugaliore, ut quòd abstinere a carnibus, saltem sani: quod & voluit S. Benedictus. Nec Papa Benedictus videtur voluisse laxare hoc Regulæ statutum, sed magis stringere Monachos ad ipsum servandum, ut est in scriptis de super editis.

Et quamquam finalis intentio abstinentiæ carniū fuerit propter vitare carnis lapsum, tamen etiam ad hoc voluit S. Benedictus professores suos abstinere, ut corpus castigaretur, etiamsi nullus carnalis motus inde sequeretur, juxta exemplum Apostoli, qui dixit: *castigo corpus meum, & in servitutem redigo, ne, cum aliis prædicaverim &c.* Attenta tamen causa principali magis hi essent cogendi ad omnimodam abstinentiam carniū, qui jam diu earundem esum continuaverunt, ex quo etiam continuaverunt carnis lapsum diutina consuetudine, id est: corruptela, quem sic continuatum subito possent restringere: quoniam non expedit successivè fieri hujusmodi lapsus restrictionem, sed subito, cum periculum sit in mora. Talismodi etiam concessione datur occasio judicii proximorum, contra quod dicit Apostolus: *qui manducat, non manducantem non judicet.* Item contemptus. Unde id est: *Qui*

non manducat, manducantem non spernat. Item valde timendum est, quod talibus recenter reductis daretur occasio proprietatis, cum prius consueti sint ad velle & libitum suum ordinare dispositionem carnum secundum plus & minus, lautius & simplicius, accipere & dare a parentibus & alienis: foverunt quoque scholares, lenas ac alios quoscunque sibi ad hoc placentes alienos & domesticos, committantque furta, & nisi coguntur resipiscere radicatusque evellere hujusmodi abusiones, non est verisimile, quòd proficiant temporis successu.

Præterea si unus aut duo in tota Congregatione aliqua intenderent renuntiare vitæ enormiori priori, videntes alios in sua duritia perseverare, non videtur, quòd manerent cum eis in loco, ut etiam experientia probavit. Non etiam esset benè securum cum ipsis manere. Præterea plures, qui jam diu in observantia regulari vixerunt, si hujusmodi concessio fieret per sacrum Concilium, non manerent in Ordine S. Benedicti, sed intrarent Ordinem Cartusiensem, quorum etiam plures cognosco. Et ratio est: quoniam Prælati & subditi Regularis observantiæ multum inquietarentur per aliquos carnales, qui non desunt etiam Monasteriis regularis observantiæ. Ubique enim diabolus habet zizania in medio seminis boni. Hi tales nimirum tam apud Abbatem, quam apud Conventum instarent importunè & opportunè, ut, si non condescenderetur ipsis in suo Monasterio ad esum carnum, saltem licentia daretur eis ingrediendi Monasteria tali concessione gaudentia. Ex quibus instantiis maximè frangerentur etiam plures, qui videntur fore de numero perfectorum. Nulla

Nulla etiam videtur fore difficultas, vel saltem modica reducere hunc Ordinem ad primævam institutionem. Cum enim bonus Prælatus eligitur, qui manenet observantiam regularem, etiamli habeat multos fratres involuntarios, ipse vincit: sicut e contrario si est malus, fratres sui etiam boni & quamvis multi per eum vincuntur. Nec vita est adeò dura, quòd sit importabilis, cum sit *discretionem præcipua* secundum Gregorium.

His consideratis Reverendissimi Patres dignentur Ordinem conservare, quantum ad hoc statutum Regulare, in suo esse.

Item Reverendissimi Patres, ad bonam Ordinis S. Benedicti atque plenariam reformationem arbitror fore necessarium, quòd sit uniformitas in habitu, in cerimoniis & officio Divino. Videmus enim ferè omnes Ordines in his esse conformes. Primò quoad habitum non est, ut apparet, Ordo, qui tantum diversificetur in habitu, sicut apparet hodie in Ordine S. Benedicti. Est enim diversitas colorum ultra tres colores in Clementina *Ne in agro Dominico* expressos, qui etiam colores intelliguntur de vestibus habitui proximis, & sunt niger, brunus & albus. Secundò in scissura cucullarum & floccorum, caparum & scapularium, qui habitus exprimuntur suprà citato Cap. Quidam enim totaliter postponunt habitum regularem, & deferunt pallia more secularium, & capucia non annexa, sed in spatulis (a), ut sunt Episcopi ejusdem Ordinis, & nonnulli Abbates & alii Monachi, & in facie sacri Concilii.

Ll 2

Item

(a) i. e. humeris.

Item camifias lineas in capitiis apparentes contra Decretalem *Extra. de Statu Monach. cum ad Monast.* Item mitras more secularium Sacerdotum. Item caligas pretiosas, sotulares etiam cum chordulis contra Clem. *Ne in agro.* Item subpalliis extra domum, sed in domo scapulare sine capucio annexo. Item capucia in spatulis delata non sunt fissa in humeris secundum Clementinam: *Ne in agro.* Item quidam deferunt floccos, cucullas ac scapularia cum capuciis annexis, sed ab ante clausis, alii cum capuciis ab ante apertis, sed retro protenso usque ad iuncturas genuum. Plerique habent hujusmodi capucia ab ante aperta, foderata (a) cum zendato (b) vel serico, licet nigro contra Constitutionem Clem. *Ne in agro*, ubi hoc cavetur. Alii cum pellibus ovinis subtilibus in modum Cardinalium.

Item nonnullos Præsules ejusdem Ordinis vidi incedere equestres cum equitaturis splendidis & in palliis pretiosis. Simile vidi de quibusdam Abbatibus. Item dormiunt verisimiliter in lectis nudi in lintheaminibus lineis. Sunt item aliqui non utentes floccis nec cappis, sed solis cucullis & scapularibus. Alii econtra non cucullis sed solis floccis & scapularibus. Unde ut cognoscatur Episcopus Monachus ab Episcopo non Monacho, expedit, ut deferat ab extra habitum Religiosum ejusdem Ordinis juxta tenorem Canonum Juris similem, prout Episcopi Religiosi & Cardinales aliorum Ordinum faciunt. Non enim parva ex hujusmodi habitus occultatione seu non delatione possunt oriri scandala.

(a) pellita. (b) *sens* zendato, tela subserica.

dala. Statuatur hoc idem aliis ejusdem Religionis Monachis tam Abbatibus quàm quibuscunque aliis ejusdem Ordinis Prælati ac eorum subjectis, ut simplici habitu, Religioni respondentem, incedant tam exteriori quàm interiori.

Et expediret, quòd confirmarentur advizamenta (a) porrecta, quanquam non conclusa, in Concilio Constantiensi, nisi per hujusmodi advizamenta Religiosus unius Ordinis nequiret agnosci a Religioso alterius Ordinis propter habitus similitudinem: aut nisi professus a Novitio, aut Clericus a Converso etiam ejusdem Ordinis non valeat discerni. Et quoniam decentiâ habitus extrinseci dicti Ordinis Monachi professi & Novitii morum honestatem ostendere debent, advizatum fuit quòd Clerici Religiosi deferant largas & latas tonsuras, ita quod circulus ipsarum latitudinem duorum digitorum transversalium non excedant. Potest autem esse minor, quod non prohibet advizamentum. Item quòd decenter se habeant in vestibus, id est: tunicis, habitibus, scilicet exterioribus, & calceamentis juxta Constitutionem Clem. *Ne in agro*, & constitutionem Benedicti XII. de forma & honestate vestimentorum, ut videlicet portent tunicas & vestes habitui proximas nigri, bruni aut albi coloris juxta morem apud eos servari solitum. Brunum tamen colorem non intellige eum, qui aliquo modo tendat ad rubedinem, prout aliqui volunt intelligere, sed merè nigrum, non fuscum. Dicitur enim propriè brunus color hic, cùm fundamentum alicujus

Ll 3

panni

(a) i. e. consilia.

panni fuit rubeum, & ei superductus est color niger. Unde sub diversis nominibus niger color positus est propter diversarum terrarum diversam denominationem. Sintque istæ vestes rotundæ & talaræ, non fissæ, nec alia deformitate notandæ, largas manicas habentes usque ad pugnum protensas, nullo modo bottonatas seu nodatas: non tamen adeò largas, quòd latitudo ipsarum supra pugnum cum pollice erecto valeat extendi. Contra quod faciunt plures, deferentes manicas ab ante amplas, subductas pellibus pretiosis, aut ostendunt ab extra foderaturas hujusmodi pellium nobilium. Nec circa os cubiti, sicut quorundam abusus, ultra protendatur, quamquam brachium possit faciliter verti & infraduci. Plerique tamen contra hoc avizamentum habent manicas adeò linguatas, quòd nunquam sunt accommodata repositoria. Unde portant nonnunquam pecunias aut alias res in hujusmodi manicis contra Clem. *Ne in agro.*

Almuciis de pellibus loco capuciorum sint contenti in Monasterio, quibus utantur sub habitu regulari, non super habitum: nec sint simpliciter de pellibus solis, sed talibus pellibus superductus debet esse pannus coloris nigri vel bruni, prout practica Monasterium Sublacus & Specûs S. Benedicti hodie docent. Capuciis tamen honestis in locis, in quibus soliti sunt ipsa portare, fissis super humeros longitudine quatuor digitorum transversalium ad minus, uti de licentia Abbatis possunt. Sed consuetudo habet, quòd illi de Specu utuntur tantùm extra Monasterium, deferuntque sub habitu seculari. Et expe-

expedit, quia alias occultaretur habitus Religionis.

In vestibus zendatum pro foderaturis, vel manicas varias seu alia pretiosa non portent, sed tantum agniculorum seu agnellorum pellibus pro dictis foderaturis, aut saltem aliis pannis non pretiosis, nec etiam lineis utantur, saltem albis. Nec foderaturæ supra collum vel in fimbriis vestium vel oris manicarum appareant aliquo modo. Præterea cum ipsos de Monasterio continget proficisci, floccum, cucullam aut cappam deportent, & subtus cappam, si eam portaverint, scapulare.

Descriptio habitus regularis secundum suam denominationem.

Floccus est habitus protensus usque ad talos, rotundus inferius, adeo latus, quod passus infra ipsum faciliter fieri possit, habens manicas, quæ longitudine unius cubiti ultra manum extendantur, latitudo verò earum alium cubitum cum dimidio non excedat.

Capucium verò latitudine non attingat os cubiti, sed circa medium ossis cubiti & ossis superioris prope spatulam protendatur. Dictum verò capucium retro protendatur ad minus usque ad corrigiam, nec ultra ipsam per quatuor digitos valeat extendi.

Cuculla verò est habitus similis Flocco, nisi quod manicis caret.

Cappa est habitus dispositus in modum pallii communis, circumquaque clausi, nec fissuras aliquas habens ad equitaturam. In capucio ab ante aperto ejusdem habitus potest fieri nodus, cum quo claudatur propter ventum, ne intret.

Scapulare est habitus, duabus peciis (a), una ab ante, alia a retro connexus, quo utuntur sub cappis in via, in hospitiiis deposita cappa incedunt in eis, in laboribus & sub ornatu in Missa.

Omnes isti habitus debent habere capucia annexa, ab ante aperta.

Duo igitur primi habitus sunt Monachorum Clericorum professorum. Quicumque igitur Novitius Clericus in aliquo talismodi habitu in probationis anno incederet, & annum non professus transcenderet, hic tacitè videretur professus secundum dispositionem juris. Scapularia Clericorum in latitudine habeant dimidium cubitum ad minus, Scapularia verò Conversorum non sint ita lata, sicut Clericorum, nec ita protensa. Similiter aliæ eorum vestes breviores sint vestibus Clericorum. Conversi igitur professi in Monasterio & extra utantur pallio a pectore deorsum per totum, ab ante aperto, habentes capucium similiter ab ante apertum, ipsi pallio apensum, sub quo semper deferent scapulare modò, quo supra. Novitii Clerici habeant habitum similem cucullæ Clericorum professorum, nisi quòd in lateribus a brachiis deorsum per totum utrisque apertus sit. Utantur etiam scapulari, quando necessitas exposcit. Novitii verò Conversi solo utantur in omni loco scapulari.

Est autem consuetudo Monasteriis deferre Clericis professis in Monasteriis floccos & cucullas, ambos scilicet habitus, Floccos ad Missam Conventualem & Vesperas, cucullam verò ad alias Horas & ad mensam atque collationem.

Serva-

(a) *i. e.* partibus.

Servata igitur hac dispositione habitus, Monachi nigri different a modo dispositionis habitus omnium Ordinum. Nam alias cum pluribus aliis fieret coincidentia. Si enim Clerici deferrent capucia ab ante clausa, coinciderent cum Cisterciensibus. Item si Novitii Clerici deferrent cucullas similiter Clericis professis, tunc si ultra annum in eo starent, essent tacite professi, cum esset indistinctus ab habitu professorum. Et si Conversi deberent deferre scapularia tum etiam, dum professi essent, non different a Cisterciensibus, dummodo, ut advizamenta sonare videntur, capucia ab ante essent clausa. Item non different habitua Novitiis Conversis. Ergo videtur, quod dispositio & distinctio præscripta sit aptissima, & per sacrum Concilium approbanda.

Color verò habitus exterioris debet esse omnino niger. Item expediret, vestes etiam habitui proximas fore nigras, tum propter nomen, cum ejusdem Ordinis & Religionis Supposita dicantur *Monachi nigri*, tum propter vitandam diversitatem inter Supposita professa ejusdem Ordinis, quorum aliqua forsitan deferrent nigri, alia albi coloris vestimenta: tum etiam, quia hujusmodi colore, scilicet nigro, vestium prædictarum different a Cisterciensibus, qui ferunt albas vestes. Expediret tamen, quod Novitii deferrent albi coloris ejusmodi vestes, ut inter eos & professos etiam esset aliqua in vestibus differentia. Et quanquam vitandus sit exitus Novitiorum de Monasterio, ad pernoctandum saltem extra Monasterium, tamen quia casus varii sunt, quod oportet aliquando etiam tales emitti, expedit eos incedere

in habitu suo, quem in Monasterio deferunt, unà cum scapulari, ubi brevior sit propter itinerationem. Camisiis lineis aut cannabinis (a) non utantur, sed vel stamineam & vestem laneam loco dictarum camisiarum portent, in quibus etiam dormiant. Monasteria tamen Specus S. Benedicti & Sublacense, loco camisiarum puris vestibus laneis utuntur semper, cum stamineæ videantur esse nimis molles. Nec post balnea utantur lineis, cum etiam eadem Monasteria non habeant aliqua balnea, saltem pro sanis, nisi quis fuerit infirmus, qui tunc cum omni honestate & pudicitia summa ad unam tunam (b), aut si quis indiget phlebotomia ventosarum, similiter facit. Quamquam Regula S. Benedicti videatur professoribus suis, etiam sanis & fortibus concedere balneorum usum, quia in Capitulo Regulæ 30. dicit: *Balnearum usus, quoties expedit infirmis, concedatur: sanis autem & maxime juvenibus tardius concedatur.* Expositores Regulæ dicunt, quòd illud *tardius* intelligatur *ter in anno*, videlicet circa festa Resurrectionis, Pentecostes & Nativitatis Domini. Et videtur, quòd causa concessionis circa illa & non alia festa fuerit, quòd corpus abluatur, ut agilius ad hujusmodi laborum exercitium reddatur.

Alio modo intelligitur *ly tardius*, ut si aliquis labor habeatur & injungatur aliquando uni vel pluribus, qui cænulentus aut sordidus est, ut purgare latrinam, facere murum, coquere lateres, aut calcem præparare aut cæmentum, aut aliquis his similis:

tunc

(a) *Cod.* canapeis. (b) *vas aqua capax, dolium.*

tunc talibus ejusmodi laboribus exercitatis ablutio corporis conceditur propter sordium deterfiones.

Si tamen humanæ fragilitati in balneis deberet condescendi, hac dispositione arbitrarer fieri necessarium, ut fieret balneum sudoris in quodam vase magno capacitatis ad minus duarum personarum, ita quòd ab extra præparetur aqua calida in caldari quodam, fieretque ibidem caldar priori minus, in quo calefierent herbæ variæ secundum varietatem necessitatis restitutionis sanitatis fratribus infirmis, secundumque consilium Medici periti, ita quòd ab eisdem caldaribus per cannam quandam in vas prædictum ventilaretur calor. Cum paucis namque lignis hujusmodi fieret præparatio balnei, nec in idem vas plures quàm unus intraret, quo abluto succederet secundus & tertius usque ad finem. Et in casu, quo **Conventus** tantus esset, quòd una die non possent omnes ablui, facerent duobus continuis, nisi propter infirmitatem aut phlebotomiæ necessitatem oporteret intrare secundum ad alium. Et hoc ideo, quia corpora Monachorum, qui Mundo mortui sunt, debent esse tam occulta hominum visui, sicut si essent realiter mortua, ne videlicet contrahatur fomentum aliquod carnalis concupiscentiæ.

Nec difficilis videtur hujusmodi abstinentia, cum cernamus etiam puros laicos perpetuò abstinere a balneis. Item Canonici Regulares Ordinis S. Augustini vestiti balneantur, ne impudicitia insolescat. A fortiori igitur deberet hoc fieri a Monachis Ord. S. Benedicti, Magis etiam hujusmodi Religiosi deberent sollicitari de balneo animæ quàm corporis.

Item

Item apparet, pernecessarium fore, ut prohibeantur Monachi ejusdem Ordinis, ne intrent balnea communia tum propter conservationem pudicitiae, quam semper debent habere tanquam puellae seu Virginis quoad velandam corporis nuditatem, tum etiam propterea, quia Mundo mortui sunt. Unde non debent se ostendere viventibus, carnis curam facientes: tum etiam quia frequenter serviunt mulierculae nudae, unde posset per fenestras visus intrare mors in animam. In domo propria, Monasterio scilicet, non esset in talibus difficultas, cum propria possent aedificari & fieri balnea. Extra verò domum, videlicet in locis alienis talismodi Religiosi curam carnis facientes intrant balnea communia. Unde expediret, haud dubium providere per sacrum Concilium, ne aliqua talia fierent. Modus verò intercipiendi esset talis meo videre, quòd Religiosi hujusmodi, domos exeuntes proprias, prohiberentur omnino intrare balnea nisi necessitas infirmitatis cogeret balneari. Tunc fieret in domo in tuna quadam plena aqua calida aut in dolio, nisi esset in oppido, ubi essent domus religiosae, quae fortasse haberent balnea propria. Cum his coactus necessitate posset balneari.

Si autem quis gratiâ recuperandae sanitatis corporalis per aliquem peritum Medicum mitteretur ad thermas, ibidem disponat, si poterit fieri, ut solus intret adjuncto sibi, si necesse fuerit, ministro. Sin autem, saltem in camisia aut tenui tunica, ut staminea, pudicissime honestissimeque se conservet, nullas cum aliis exercens levitates, benè continens visum, in uno loco perseverans: habeatque duas hujusmodi stami-

stamineas, ut una siccante alterâ utatur. Et fortassè expediret sibi ferri de eisdem balneis aquas ad habitationem suam, nisi fortè ita naturaliter non operentur.

Præterea calceamentis utantur stivialibus, id est: ocreis exeuntes propter equitaturam. Ubi verò venerint ad locum, ubi ad tempus intendunt manere aut in domo propria, utantur botis seu sotularibus (a) altis & corrigiatis, non fibulatis, ita quòd altitudo spatium quatuor digitorum comprehendat supra cavillam (b). In stivalibus tamen ocreis fiunt a plerisque magni abusus. Portant enim more armigerorum cum fibulis in calce pedis clausas & rostratas ac benè strictas. Item nonnulli deferunt bursas sericeas, aliàs rubeas & splendentes. Quidam etiam cingula deferunt & peras, fibulis & aliis ornamentis argenteis decoratas aut aurichalco seu electro. Unde & quidam Prælati de hujusmodi metallo calcaria & strepas deferunt exeuntque cum magna comitiva, secum ferentes phyalas & alia pocula argentea, annulos quoque pretiosos in digitis ferentes, quæ omnia videntes scandalizantur.

Unde, Reverendissimi Patres, necesse reor ponere in his omnibus debitum moderamen, per certaque & discreta capitula sub certis pœnis, augendis etiam, ubi non sufficerent pœnæ in jure expressæ, ne videlicet hujusmodi exorbitantiæ ita periculosè continuentur: supplicoque, quantum fieri poterit, in his reformandis practica vitæ Monasteriorum Specûs S. Benedicti & Sublacensis sequatur, ubi est origo
Ordi-

(a) *sen* subtalaribus, *calceis*.
talus.

(b) *cavilla pedum est*

Ordinis S. Benedicti, vita quoque Regularis observantiae ab initio institutionis ejusdem Ordinis strictè continuata.

Porro de uniformitate Divini Officii, Reverendissimi Patres, necessarium reor tractari in Ordine S. Benedicti, & multis ex causis. Quibus etiam ex causis quasi omnes Ordines in toto Mundo sunt uniformes. Prima namque & principalis causa uniformitatis Divini Officii [est]. Cum enim in tota Christianitate, ut apparet, vix invenitur in aliqua Religione tantus collapsus, sicut in Ordine S. Benedicti, & ideo magis necessaria sit reformatio, sintque Monasteria admodum pauca reformata praefati Ordinis, Conciliumque sit congregatum propter reformationem faciendam in capite & in membris: Monasteria autem reformanda oportet habere personas ea instituturas in Regulari observantia, quas oportet recipi de Monasteriis reformatis, quæ tamen Monasteria, scilicet reformata & reformanda, verisimiliter in Divino Officio discordant: unde videtur, quod reformandi deberent sequi reformaturos tum propter tædium, quod alias haberent reformaturi, non scientes modum reformandorum, propter etiam tonos introducendos, melodias hymnorum, accentus Evangeliorum, Epistolarum, Prophetiarum & Lectionum & melodias alias Versiculorum, Responsoriorum brevium, Præfationum, *Kyrie, Ite Missa est, Te Deum laudamus* &c. Et nisi in his fiat uniformitas, timendum est vehementer, reformaturos non manere cum reformandis.

Item cum multi ejusdem Ordinis profugi & vagi
sint

sint Monachi, & nonnunquam breviariis carentes ad diversa Monasteria divertant; in quibus manent aliquando per unam vel duas noctes. Non invenientes igitur ibidem libros suæ rubricæ verisimiliter non orant horas Canonicas, & si orant, tunc majori tædio id faciunt & confusius, quàm aliàs facerent, si haberetur uniformitas ubilibet. Per hujusmodi etenim uniformitatem multos haberent adjutores reformandi, quibus aliàs carerent. Populus quoque, maximè litteratus, ædificaretur multum audiens uniformitatem, ubi aliàs scandalizatus fuit de discordia: multique intrarent Religionem, qui aliàs manent seculares, aut intrant alias Religiones, considerantes tantam diversitatem. Si enim intrarent aliquod Ordinis S. Benedicti Monasterium, & addicerent cum magna difficultate consuetudinem cantus & aliorum ejusmodi Monasterii, timerent tamen postea se mitti ad aliud Monasterium vel causâ reformandi, vel propter excessum aliquem, & quia multi sunt duri ingenii ad cantum addiscendum, qui aliàs multum etiam sunt docti, resilirent verisimiliter a tali proposito, aut intrarent Ordinem aliquem, in quo servatur uniformitas, ut sunt Ordo Cartusienfis, Cisterciensis & omnes Ordines Mendicantium.

Inveniuntur namque in una Diœcesi aliquando plura Monasteria S. Benedicti, quorum aliquando sunt tria in uno milliari, & neutrum concordat cum alio in Divino Officio. Unde ad servandam seu introducendam uniformitatem arbitror expedire, quòd omnia Monasteria S. Benedicti tenerent idem Divinum Officium cum Monasteriis Specûs & Sublacensis,

sis, quod fit secundum Romanam rubricam. Una causa est, quia eadem Monasteria habent originem ejusdem Ordinis, a quibus omnia alia Monasteria ejusdem originis prodierunt mediatè vel immediatè. Ecclesia etiam Romana est capitalis totius Christianitatis, cujus rubrica minus est reprehensibilis. Item cum eandem rubricam etiam habeant duo Ordines Mendicantium, scilicet Fratrum Minorum & Fratrum Eremitarum S. Augustini, sintque iidem Ordines in varias Mundi partes dispersi, facilius possunt haberi libri exemplares pro rescribendo.

Sed obstant fortasse reformandi in hujusmodi Divini Officii mutatione propter pretiositatem. Ad hoc poterit dici ipsis persuadendo, ut præscripta bona ex tali mutatione sequantur, quòd si non faciant repente singulorum librorum mutationem, saltem successivè hoc faciant, primo anno unum, secundo alterum, tertio tertium & sic de cæteris: & si non scribantur in pergamento, saltem in papiro: si non in textu, saltem in notula, vel etiam miscendo papiro pergamentum, donec tempus prosperius arridebit: & quia successivè modus ejusmodi plus placet, qui primo videbatur molestus.

Necessè denique arbitror, si cantus & aliàs Divinum Officium cum debitis religiosis prolationibus debet perfici consuetudinibusque & ceremoniis, si etiam ad hoc cæteræ regulares consuetudines non debent dari neglectui, nec tempora regularia, ad hoc statuta prætergredi, ut quædam tam in cantu quàm lectione, mero consuetudinario usu introducta, rescentur, cum sint superflua, & eorum intuitu debita
omit-

omittantur, ut sunt septem Psalmi Pœnitentiales, cottidie iterati, item Quindecim Gradus, Preces in ferialibus diebus perlongæ ad omnes horas, duæ vel tres Missæ quotidie cantatæ, ubi una tantum est de necessitate, & rarò duæ, sola die Natalis Domini tres. Multa etiam tam in Laudibus, quàm in Vesperis & Cursu Beatæ Virginis suffragia, & quasi quotidianum novem Lectionum officium mortuorum cantatum, & longè creberrimæ sunt Processiones, nonnunquam etiam per campos ad ecclesias remotas, ubi contrahunt familiaritatem venenosam cum personis extraneis, & etiam cum mulieribus, quæ difficillimè poterunt in mentibus eorum evelli. Quorum omnium intuitu, immò etiam adhuc plurimum, memoriæ non occurrentium, Officium Divinum ex Regula debitum, ac aliæ constitutiones Regulares confusissimè & cum magna festinatione, indevotione ac intentione perversa complentur, ita quòd plerumque in quibusdam Psalmis, in Versibus plerisque vix solus finis percipi possit, chariusque amplectuntur ista superflua & non debita, quàm Regularia & debita.

Opportunum item judico, quòd ubi anniversaria tanta sunt fundata apud aliquod Monasterium, quòd duæ Missæ sæpe vel quasi quotidie cantentur, ut dispensetur, quòd pro tempore Missa possit legi, & Officium mortuorum, videlicet *Placebo* & vigiliæ nunquam cantentur, sed semper legantur, & solùm cum tribus Lectionibus & Laudibus. Lektionen tamen legantur per accentus excepto die commemorationis animarum & anniversario Fun-

datorum, in quibus per totum cantetur. Si tamen specialius alias volunt aliquod anniversarium peragere, possunt cum novem Lectionibus, ita quod solæ Lectiones, cum Responsoriis cantentur & Antiphona ad Benedictus cum ipso Cantico, dummodo (a) alia omnia legantur aut agantur duo vel tria anniversaria sub uno.

Item quod tantum quatuor in anno fiant Processiones, scilicet Corporis Christi, in die animarum, Purificationis beatæ Mariæ, Dominicaque in Palmis. Et tales Processiones solum fiant in ambitu & ecclesia, nunquam autem extra portam Monasterii ex causis prius dictis. Experientia enim longa doctus didici, certè vix sufficere tempora diei & noctis, quantumcunque longa sint, ad rite, devotè & religiosè perficiendum Divinum Officium, omnibus superius expressatis tanquam superfluis resectis, ita quod ad hoc etiam aliæ regulares consuetudines & necessitates naturales compleantur, ut sunt Capitularia officia, correctiones in eisdem, dormitio, comestio, opus manuum, lectio cellæ, lotio pedum diebus Sabbati, confessio Sacramentalis, collectio ad hujusmodi confessionem, perspectio Cantus & Lectionum Chori, petitio necessariorum, scriptura, aliquando etiam lotio capitis & rasura, collatio serotina quotidiana cum lectione longa, expositio capituli Regularis quotidie, & aliquando audire sermonem. Immò audeo dicere, quod tempora diei naturalis sint nimis brevia ad hæc agenda semotis omnibus superfluis. Supplicatur ergo Vestr

(a) *Cod.* cum ubi.

stris Reverendissimis Paternitatibus, ut considerata hac dispositione dignentur ea confirmare, aut per Sacrum Concilium confirmari ordinare, attento, quod huic Sacro Ordini S. Benedicti pro sui relevatione ac conservatione sit pernecessaria.

Cùm etiam ex Regula S. Benedicti ad tenendum cerimonias in ipso Officio Divino, nec non cæteris operibus & locis obligemur, sintque nonnullæ diversitates in eisdem quasi in omnibus Monasteriis ejusdem, in tantam quoque devenierint dissuetudinem in certis locis Monasticis, quod plerumque supposita in eisdem verecundentur eas praticare, remissiusque se in eisdem habentes, quàm plerique Sacerdotes & Clerici seculares: in choro namque cantantes hinc inde spatiantur circumferentes oculos huc illucque, in personas muliebres visum jacentes, ac nonnunquam ibi figentes: propter quod haud dubiùm aliud canunt, ac aliud ruminant contra Capitulum Regulæ XIX. ubi sic dicitur: *ergo sic stemus ad psallendum, ut mens nostra concordet voci nostræ.* Item contra descriptionem septimi gradus humilitatis Cap. VII. Regulæ positi, ubi sic dicitur, quòd Monachus *non solùm corde sed etiam corpore humilitatem videntibus se semper indicet, id est, in opere, in Oratorio, in Monasterio, in horto, in via, in agro vel ubicunque sedens, ambulans vel stans inclinato sit semper capite, defixis in terram aspectibus &c.* Neque tales inclinant nec discooperiunt aut stant, vel flectunt valde rarò, & cum hoc indevotè, cùm ad hoc admoneamur ex Regula Cap. XX. ubi dicitur: *Si cùm hominibus potentibus volumus aliquid suggere-*
Mm 2 re,

re, non præsumimus nisi cum humilitate & reverentia: quanto magis cum Domino Deo universorum cum omni humilitate & puritatis devotione supplicandum est? Et non in multiloquio sed in puritate cordis & compunctione lachrymarum nos exaudiri sciamus &c. Ubi per hoc, quod dicitur: Si cum hominibus &c. voluit, quod[si] loquentes hominibus potentibus, Regibus, Principibus & Prælati discooperimus, inclinamus, flectimus genua, sic etiam facientes simus loquendo cum Deo, id est: orando, Ex hoc itaque Capitulo elicitur, quod obligemur ad ceremonias. Et per hoc, quod dicitur: & non in multiloquio &c. monet superfluas orationes abjicere, & necessarias seu debitas cum cordis devotione & lachrymarum compunctione complere.

Præterea ceremoniæ nonnullæ regulares fiunt per signa, ut sunt discooperationes, inclinationes, operum charitatis exhibitiones, prostrationes. Quædam fiunt ob Dei & Sanctorum ejus honorem & reverentiam, ut fit in orationibus, de quibus in Capitulis Regulæ a decimo usque ad vigesimum inclusive. Aliæ fiunt coram ipsis senioribus a junioribus propter reverentiæ exhibitionem, ut petitio benedictionis, inclinatio, discooperatio, ut est in Capitulo LXIII. Regulæ. Sed aliquando fiunt junioribus ab ipsis senioribus, ut denominatio fraternæ dilectionis in eodem Capitulo. Præterea quædam fiunt ad fratrum communitatem, ut servitium mensæ, lotio pedum in Capitulo XXXV. Quædam fiunt coram infirmis, ut provisio aut servitium eorum, ut in Capitulo XXXVI. Quædam fiunt ad hospi-

hospites, ut reverentialis inclinatio, aut totius corporis prostratio in terra, sicut habetur in Capitulo LIII. Aliquæ fiunt ob excessuum punitionem, ut prostratio totius corporis in terram, sustinentia percussionis virgarum, inedia, carceris, comestionis in terra coram communi Conventu, objurgationis quoque publicæ in Capitulo, privationis vocis & loci Capitularium, stationis etiam ad mattam tempore Divini Officii pro tarditate ad idem veniendi, taciturnitatis continuæ, nisi habeat licentiam, & etiam excommunicationis, si necesse fuerit, & in modo se habendi tempore ejusdem excommunicationis. Hæc omnia habentur ex Regula ex Capp. XLIII. XLIV. & etiam ex Capp. XXIII. XXIV. XXV. XXVI. XXVII. XXVIII. XXIX. & XLII.

Sunt tamen plurimi, qui, ut dixi, minimè hujusmodi cerimonias curant servare, immò derident eas servantes. Cùm autem (a) sine hujusmodi cerimoniis vitæ Regularis non possit verisimiliter proficiendo crescere, attento, quòd his contemptis receditur longè ab humilitate, quæ est Religionis fundamentum, & spreto fundamento non potest quid solidi ædificii fieri: supplicatur Vestris Reverendis Paternitatibus, quatenus dignentur statuere hujusmodi ceremoniarum uniformem observationem, cùm ad eas servandas ex Regula teneantur Monachi Ordinis S. Benedicti: dignenturque cooperari ad ipsarum confirmationem, per sacrum Concilium faciendam sub certis pœnis expressis secundùm ejusdem sacri Concilii arbitrium, & ut servetur ubilibet

M m 3

in

(a) *Cod. enim.*

in eisdem cerimoniis modus Monasteriorum Specûs S. Benedictini & Sublacensis ex causis de uniformitate Divini Officii assignatis.

Fortè quadam desunt.

Ejusdem Martini de Senging EPISTOLA

Ad

Ven. Johañem de Weilhaim,
Priorem Mellicens.

De Statu Monasterii Bursfeldensis sub initium suæ reformationis.

Jesum consolatorem & se ad quævis grata.

PRædilecte Frater. Sentiens verissimis argumentis Vos mihi semper fuisse inclinatum veræ charitatis affectione tam Vobis absenti quàm præsentī (omni siquidem charitatis officio me prosecutus hætenus fuistis demeritis meis id utique non exigentibus) grossæ ob hoc ingratitude vitio me novissimè in vos peccasse arbitrari possem prima facie, sine spe brevis reditûs præsentiam meam clam Vobis auferendo, amico vale prætermisso, irrequisito quoque vestro consilio in ævum fortè mihi salubri, ne indignatio hujusce forsan occasione concepta

pta

pta radicetur in terra cordis, pariat quoque, quod absit, odium, per quod delear de memoria bona vestra, ac reperirem pro benedictione maledictionem: non modò congruum, sed & debitum iudicavi, Vobis scriptis singularibus mentem meam aperire, quibus & amicitiam ac fraternum zelum priores renovare, mœstitiâque mentaliter conceptam consolari valerem. Etsi nulli hinc scripserim præterquam Domino meo Abbati & tribus fratribus novissimè professis pro eorum stabilimento, quibus ex debito obligari me arbitror, quia filios meos reputo: Vobis tamen nunc etiam singulariter scribere volui, ne meorum successuum maneatis expertes cum multis, sed potius aliud sentiatis cum paucis. Sit phylacterium hoc impigra Christi tumbæ & perseverans visitatrix, quæ suo charitatis ardore prima omnium videre resurgentem Christum meruit, Apostolorumque fuit Apostola, quæ discipuli Christi & Petro manifestare iussa est Christi resurrectionem. Quasi enim Petrus non fuisset unus ex discipulis Christi, ita nostra chartula remandat tibi dilecte salutes. Sic igitur mandavi nuntiis his: dicite successus meos Abbati, Fratribus & Fratri Johanni. Privilegium amoris singularis in eo intelligi exhortor.

Veniam ad me purgandum, quantum potero. Abs vale singulari & fraterno me vobis subtrahere nequaquam intendi, prout uni dixeram, qui itidem suspicabatur de se. Verùm tempus protrahebatur discurrendo ad Abbatem, & in ordinandis necessariis, fratribus etiam mecum convalescentibus me tenentibus sermonibus, & propter equi defectum ac

subitam auræ mutationem, & propter locum pro nocturno tempore destinatum, qui quantum ad restans ejusdem diei tempus, in improporcionata adhuc erat distantia, ad quem adhuc eodem habui sero pertingere propter inveniendos comites pro via ulteriori. Sic itaque factum fuit, ut propter hujusmodi timores, cùm actu de hoc cogitarem, vobis non valefecerim nec fratri Johanni Slecht. (a) Ob hoc supplico, quatenus piam apud vos capiat interpretationem vobis insperatus meus celer recessus.

Nôsse tamen vos opto, me prospero successu, regia viâ, venisse huc ad Bursfeldiam die S. Cosmæ & Damiani, Deo, cœlo, electis & hominibus ac jumentis mihi servientibus ad hoc feliciter. Nam benè sanus & potens corpore unà cum jumento huc veni. Verùm in via substiti pluribus diebus. In Wallses octo milliaribus a Mellico expectando alium equum mansi usque ad sextum diem. In Ratisbona tribus diebus expectando comites propter inseguritatem. In Nürnbergga septem diebus fui subtiliter tentus per Magistrum Conradum. (b) Dominum Doctorem, quia verè magnam mihi exhibuit charitatem. Ego credo & nihil dubito, quin suis expensis seclusa omnia spe rehabendi ipse emisset mihi equum cum omnibus necessariis. Mansi Bambergæ per unum diem. In Salveld quodam

(a) *Dicto de Häching, Monacho Mellic. facto anno 1435.* (b) *Hic videtur esse Conradus de Herbipoli, Canonici Juris Doctor, Mellicii Monachus creatus anno 1470.*

dam Monasterio unum diem. In Erfordia Monasterio S. Petri unito cum Bursfeld uno die.

Tractor hic verè humaniter & charitativè. Est locus solitarius, silvis circumquaque cinctus super ora cujusdam fluminis navalis, dicti Wezara, situs, bonis abundantis piscibus, ut trutis magnis, quas hic vocant efoces, & anguillis. Sunt propè Monasterium super eodem flumine quatuor arcæ piscium. Habentur hic boni casei caprini. Tandem, vix tamen, didici bibere cervisiam. Vini usus est hic, sed in solo sacrificio altaris. Laudabilis est hic conversatio. Jam recenter iterum instituit unum Monasterium in Hassia Dominus Abbas ad instantiam Domini Lantgravii Hassiæ, qui est fautor hujus Monasterii & princeps pacificus, licet hoc Monasterium Bursfeld non sit in terra & sub Dominio suo, quoniam est in Saxonia in Ducatu Brunsvicensi.

Jam de novo obtulerunt se tres Abbates pro unione suorum Monasteriorum Bursfeldæ, scilicet Ettenheymünster, ad S. Stephanum in Herbipoli, & Hirsaw, sed dilati sunt usque ad proximum Capitulum Bursfeldense, quod in quarta hebdomada post Pascha celebrabitur.

Pauperis est dotationis & simplicis structuræ. Unde quoad structuræ simplicitatem & dotationem non scio in tota Austria aliquod Monasterium, quin sit notabilis excessus, in regulari tamen vita nullum. Magna enim se detinent charitate Supposita. (a) Habent tota æstate & autumno labores manuales

Mm 5

cum

(a) i. e. Monachi.

cum humulo, fœno duplici, collectione fructuum arborum &c. aliquando per diem ad duas horas continuas.

Pater (a) est bonus, exemplaris, adeò ut benè verificetur de eo dictum Sapientis in Ecclesiastico: *rectorem te posuerunt? Noli extolli, esto in illis sicut unus ex eis.* Victum tamen & vestitum sufficientem paupertate non obstante suis subministrat. Nisi enim temporaliter à susceptionis hospitum, a visitationis Monasteriorum necessitate [impediretur], deliciae suae essent continuare cum fratribus in Conventu in exercitiis regularibus. Unde frequenter prædictis cessantibus est in Matutino, Capitulo & Refectorio. Verùm non sic abundanter sunt singula loca pro Conventu præparata sicut in Mellico. Nam Monasterium hoc fuit ante paucos annos adhuc meo ævo Monialium, totum ruinosum, & quasi de novo construi necesse est.

Rasura fratrum fit per ipsos fratres Clericos, non per aliquem secularem. Abest enim ab hominibus. Unde proxima civitas distat duobus miliaribus benè mensuratis. Locus rasuræ non est stuba, sed hieme & æstate in quadam habitatione frigida. Singulis octo diebus raduntur barbæ, & singulis quindenis capita. Cellulæ sunt simplices & bassæ. Interstitia sunt sepes luto liti. Januas nullas habent sed vela. Possum contingere manu trabem pavimenti superioris. Refectorium est competens, loca tamen sunt vitreis benè munita. Per singula loca secreta currit aqua. Infirmitorium
necdum

(a) Joannes de Indagine.

necdum vidi, dicitur tamen humile. Testudines hic sunt raræ.

Fui a principio adventus mei ad hunc locum, videlicet fortè post quatuor dies valde alteratus. Itaque timui me non supervicturum. Motus ob hoc feci confessionem magis prægnantium peccatorum de tota vita. Et cum proposuissem suscipere Sacramentum extremæ unctionis (timui enim propter incontinentiam Sacramentum Eucharistiæ suscipere) supervenit consolator DEus, faciens proventum cum dolore, & mitigavit ipsum. Unde in septem diebus non potui sequi Conventum. Facta est tunc mecum magna charitas. Adjunctus fuit mihi frater continuus, me obstetricans. Urina fuit missa ad unum Physicum in unam civitatem Imperialem distantia trium milliarium in magna pluvia. Portatum est mihi regimen scriptum & quædam medicinæ. Convalui Deo volente. Reintravi Conventum septima die, & usque nunc sanus continuavi. Veruntamen nolite annuntiare in Geth neque in compitis Ascalonis, ne forte lætentur filia Phylistiim.

Recommendo me vobis cordialiter. Salvate collegium Conversorum & fratrem Johannem Slecht. Sint vobis intimiùs recommendati tres novissimè professi. Valete. *Ex Bursfelda per Fr. Martinum die S. Lucæ 1457.*

Cum hanc Martini nostri Epistolam prelo jam parâssem, & alia quæpiam circumspexissem, quæ ab illius argumento non admodum abluderent, incidi in litteras Reverendissimi ac Excellentissimi Domini Thebarum

barum Archiepiscopi, Apostolici apud Colonienses Nuntii, in quibus singularia quædam & scitu non indigna de hodierna fortuna Monasteriorum, quæ se dudum Monasterio Bursfeldensi Congregationis nomine uniêrunt, referuntur. Scriptæ autem hæ litteræ fuerunt ad Eminentissimos S. R. E. Cardinales eo tempore, quo de stabilienda Monasteriorum Congregatione Benedictino-Bavarica Romæ alibique maximè agebatur. Eæ sic habent:

* * *

Retuli Eminentissimis Vestris, litteris 15. Februarii datis, quòd scripserim personis fide dignis Monachum, ut haberem notitiam, quæ desideratur a Congregatione deputata super negotia Congregationis Benedictino-Bavaricæ, circa disciplinam Ecclesiasticam ac œconomicum gubernium Monasteriorum illius Congregationis, conformiter ad ea, quæ Eminentissimæ Vestræ a me requisierunt litteris 24. Januarii ad me ordinatis.

Cùm itaque responsiones ab iis, quibuscum super hoc negotio corresponderi, advenerint, eas Eminentissimis repræsento fideliter in sex capita divisas, sicuti ab illis habeo, a quibus informationem capere debui.

Primò in ordine ad disciplinam Ecclesiasticam audio, quòd a tempore concessæ Exemptionis supradicta Congregatio celebraverit quatuor Capitula Generalia, id est: annis 1684. 86. 89. 1692. Subsecutæ sunt postea visitationes Monasteriorum ad minimum duæ in duobus annis, quando præscripto

scripto tempore, scilicet ante erectam Congregationem Monasteria Bavariæ exceptis illis, quæ in Diocesi Augustana constituta sunt, aut nunquam aut rarissimè visitata sunt ab Ordinariis, taliter quod Religiosi triginta & pluribus annis in Monasterio viventes nec recordentur alicujus visitationis celebratæ.

Secundò in illius Congregationis Monasteriis est stabiliter introducta recollectio Spiritus, quæ fit tribus vicibus de die, usus Exercitiorum S. Ignatii & renovatio votorum solemniū faciendæ voce & in scripto semel in anno. Insuper frequentiora jejunia: lectio spiritualis tam in refectorio super mensam, quàm extra refectorium statutis temporibus de die iteranda. Unde bonus odor est conceptus de istius Congregationis Religiosis, & in tota Bavaria sparsus.

Tertiò circa paupertatem regularem informatus sum, quemlibet Religiosum de anno in annum tradere Prælato specificationem omnium rerum, quas habet apud se & ad proprium usum: & Superior vel auget vel imminuit usum rerum descriptarum juxta arbitrium & beneplacitum suum, ut tollat omnem omnino proprietatis occasionem.

Pro instructione Novitiorum habent communem Novitiatum in Monasterio S. Stephani prope Frisingam, ubi observatur exactissimè disciplina Monastica sub directione hominum ætate profectorum, & in disciplina regulari ac virtutibus Religiosis practicatorum, ubi plurimum adfert fructum unio multorum Novitiorum: quod neutiquam fieri pos-

ri posset, si, quod sæpius ante contigerat, in particulari aliquo Monasterio unicus tantum Novitius instrui deberet.

Ut etiam aliquid de commodo Studii Communis referam & explicem, dico, quod habeant Studium Theologiæ in Monasterio Sancto Andæ, & Monasterio Frauencellensi: Studium Philosophiæ Schyræ, præterquam quod aliqui cum consensu Capituli Generalis possint ad alias Universitates mitti ad studia. Et hæc sunt quatuor puncta seu capitula concernentia regularem disciplinam.

De reliquis duobus punctis circa œconomiam non potui in particulari aliquid expiscari, nisi quod in Capitulis Generalibus Domini Abbates reddant exactam rationem suæ administrationis Commissariis, ab eodem Capitulo pro recipiendis rationibus ordinatis ac constitutis. Dant etiam notitiam omnium reddituum & exituum seu expensarum cujuslibet Monasterii seriò indagando, an debita contracta aut bona alienata sint &c. Credibile est, expensas Monasteriorum esse nonnihil imminutas, cum Religiosi juvenes minoribus impensis & sumptibus in studiis alantur, quàm antea factum sit. Domini Abbates accedunt communiter refectorium ad regularem mensam, quod antea non faciebant, atque ideo multæ inutiles expensæ causabantur.

Visitationes triennales in hac Congregatione consuetæ, sine splendore & magnis expensis celebrantur. Nulla amplius pretiosa honoraria, uti olim Ministris Episcopalibus dari consueverant, in electionibus novorum Abbatum donantur. Denique

que post erectam Congregationem sublata est frequentia comminationum, quæ sub quocunque prætextu sine sufficiente causa præteritis temporibus facile expediebantur ab Ordinariis cum maximis expensis Monasteriorum.

Hæ sunt notitiæ, quas cum omni circumspectione debita excepi circa statum Congregationis Benedictino - Bavaricæ, quæ multum diversa est a *Congregatione Bursfeldensi* istarum partium, quæ quia non potuit sese eximere a subjectione Episcoporum, jacet in deplorato statu, & deficit vehementer tum in disciplina regulari & Ecclesiastica, tum œconomica, præsertim in principalioribus Monasteriis. In cujus rei argumentum & pro clara probatione illorum, quæ in relatione mea afferro, licitum mihi sit in ista occasione Eminentiss Vestræ humillimè significare ac præsentare, quòd in Diœcesi Coloniensi Monasterium *Cornelii Münster*, aliàs Congregationis Bursfeldensis, post multas visitationes & comminationes, quas ab Archiepiscopi Coloniensis Ministris perpeßum est, inventum fuerit habere uno eodemque tempore tres Abbates resignatos aut depositos. Nam isti Ministri & Commissarii Episcopales nihil magis curabant, quàm occasionem habere novos Prælatos in dicto Monasterio idenidem benedicendi ac instituendi ea solum de causa, ut ex ejusmodi electionibus & institutionibus ac confirmationibus Monachorum loculos emungere, ac magnam pecuniarum summam ad se attrahere possent: atque ideo maximè solliciti fuerunt occasione depositionis alicujus Superioris vel Prælati, non adeò boni, sese offeren-

te, ad novas electiones quantocyùs procedere, alios atque alios eligendo sine delectu subjectorum habiliùm, & in ipsa depositione aut electione absque prævia inquisitione in mores eligendorum, ac in causas depositionum frequentes Prælatorum mutationes moliri. Ex quo factum est, ut, sicut sine omni delectu & prævia in qualitatem personæ inquisitione ad Infulam promoti sunt, ita postea de facili sine respectu ad quamlibet instantiam, etiam insufficientem, a dignitate Prælaturæ dejiciebantur cum maximo Monasterii damno, infamia ac pecuniarum expensis: quia Monasterium hujusmodi depositis Prælati obligatum mansit quot annis magnam pecuniæ summam subministrare, tantummodo ut quieti persisterent in Conventu. Atque per hunc procedendi modum insigne illud Monasterium *Cornelii-Münster* eò devenit, ut præclara illa fundatio hodie non longè a totali ruina absit.

Etiam Monasterium *Brauvillere*, aliàs ditissimum, in districtu sacræ Nuntiaturæ Colonienfis existens, ad incitas & extremam necessitatem redactum est propter dissensiones Monachorum. Hoc Monasterium etiam non est exemptum a jurisdictione Ordinariorum, sed subjacet Ordinario Colonienfi, qui ne quidem permittit, ut Visitatores ex Congregatione Bursfeldensi faciant suum officium, illudque reforment, ac emendanda emendent. Quin immò cum clarè cognoscat Ordinarius Colonienfis, modernum Abbatem esse omnino incapacem ad regimen continuandum, indulsit quidem post longam tergiversationem, ut S. Sedi Pontificiæ supplicari posset

posset pro Coadjutore, qui incapaci Prælato auxilia-
trices manus porrigeret eumque succollaret: sed pro
officio Coadjutoris Episcopus Coloniensis præsentavit
ac promovit virum septuaginta duorum annorum,
decrepitum & valetudinarium, pro cuius in
officio Coadjutoriae institutione prænominatum Monasterium
solvere debuit duo millia Scutorum Romanorum,
nostra moneta ultra quatuor millia florenorum
in parata pecunia. Et quas utilitates vir adeo
decrepitus & extrema senectute exhaustus Monasterio
causabit?

Ita etiam proceditur in aliis Monasteriis, in S.
Nuntiatura existentibus, non exemptis ab Ordinari-
orum jurisdictione, ubi Episcopi liberè suam au-
thoritatem exercere & disponere possunt.

Unde putarem ego, non tantum utile & S. Or-
dini proficuum, sed etiam omnino necessarium fore,
ut omnia Monasteria (exceptis illis, quæ in ipso ter-
ritorio & jurisdictione Episcoporum existunt) a ju-
risdictione Episcopali eximerentur, ut saltem disci-
plina Monastica restitueretur, & in antiquum florem
reponeretur, tacendo de rebus œconomicis.

Rogo Eminentias Vestras, dignentur hanc meam
informativam narrationem benignis auribus excipe-
re, & me, qui sacrae Purpuræ reverentiam facio,
porro suis gratiis fovere.

Coloniæ 22. Martii 1693.

Eminentiarum Vestrarum

*Humill. devotissimus & obli-
gatissimus servus*

G. A. Archiepiscopus Thebarum.

Tom. VIII.

Nn

S. Jo-

S. Johannis Capistrani

Ord. FF. Minorum

EPISTOLA(a)

Ad Universitatem Wiennensem.

Argumentum.

Narrat felices & amplos, quos Dei gratiâ in Moravia fecit, Catholicæ fidei progressus, Universitatemque rogat, ut doctrina præstantes aliquot viros ad se mittat, qui publicæ suæ cum Rockizano Hussita Concertationi intersint.

Sacræ & Illustri Theologiæ Artium Universitati Wiennensi Frater Johannes de Capistrano, Ordinis Minorum minimus & indignus, commendationem humilem & devotam, ac gratiam salutarem, & pacem in Domino sempiternam.

NOlo vos admirari, Clarissimi Viri, Doctoresque celeberrimi diuturnum silentium meum, quo vobiscum usus sum, postquam ex ipsa inclyta Urbe Wiennensi discessi: quandoquidem nihil grave, quod scribendi ad vos causam mihi

(a) *Ex Cod. Mellic. N. 13.*

hi præberet necessariam , [occurrit]. Neque enim id ulla negligentia vel oblivione erga me vestri factum fuisse putetis , cum tantus sit cumulus vestrorum erga me beneficiorum , ut vestri memoriam nulla unquam possit delere oblivio. Quis enim tanta ingratitude plenus extiterit , ut tam grandi honore a vobis susceptus , possit conscientia reclamante , tantæ humanitatis & benivolentiæ oblivisci , quanta , ut apud vos essem , amplexati me fuistis , ultra quàm decebat parvitatem meam ? Equidem ita me Illustrissimæ vestræ Universitati perpetuò devinctum fateor , ut semper illam sim cum honore habiturus. Cui cum præter me habeam nihil , meipsum totum dedam , totumque tradam , quo uti valeat tanquam mancipio suo. Sed de his hætenus.

Ut Hieronymus ait , *tractant fabrilia fabri*. Igitur Clarissimi Doctores , de tuenda causa inter Bohemos & me , Catholicæ scilicet fidei nostræ , cujus tutelam cum non minùs libenter quàm acute protegendam susceperitis , semper omnibus postpositis magnum mihi præstant argumentum ad vos esse recurrendum tanquam ad eos , qui non solùm provocati , sed sponte hujuscemodi causam tueri minimè verentur tum pro sustentanda veritate , tum quia vestrum & meum est officium , non solùm causam Catholicæ fidei defendere , sed augmentare & magnificare , magnificatamque conservare.

Postquam hanc Moraviam patriam sum ingressus , Præstantissimi Magistri & Doctores , ut debui , semper pro viribus contra Bohemorum damnatas hæreses egi , neque minis neque aliquo alio timore

unquam a prædicandi officio destiti, sed palam locutus omni, quo valui, studio, ad refellendam illorum damnatam opinionem, qui dicunt necessarium esse ad salutem sub utraque specie communicare, me contuli. Quo factum est, ut non solum multi Barones, Nobiles & Sacerdotes, atque omnibus computatis ultra quam quatuor millia meis in manibus Hussitarum errores abjuraverint, (ut sileam multos alios conversos, qui sub istorum Baronum conversorum dominio degunt) sed toto Bohemiæ regno sublevato & in rumore posito, Barones ipsi Bohemi, sub utraque specie communicantes timentesque de populorum conversione incitaverunt, & ut veriùs dicam, compulerunt Magistrum Johannem Rokiczan ad habendum mecum disputationem, ut ego ab illo devictus cogar silentium imponere, aut ille a me superatus fiat illis causa salutis.

Ipse autem Rokiczanus audacia pro sapientia usus, ut se insuperabilem Baronibus redderet charumque & gratum, pridie suas ad me litteras dedit satis honestas, licet tamen meo iudicio, summo cum cordis dolore. Quarum quidem litterarum copiam cum responsivis meis pariter & non nullas alias litteras ad me destinatas, ad suam Regiam Majestatem transmittam. Quas omnes cum instituerim ad vos esse deferendas nomine Serenissimi Domini Regis, rogo, ut non pigeat illas perlegere, ut maturius & cautiùs determinationi suæ Regiæ Majestatis consulere possitis, quæ pro loco, tempore & die & personis affuturis in actu facienda est. Antea enim, quam a Johanne Rokiczan invitatus fuisset, mihi ipsi pro loci digni-

dignitate & peritissimorum pro pulchra corona ipsam Inclytam Wiennam delegeram, si hujusmodi actus deberet celebrari. Sed ne ipsi Bohemi dicant me elegisse locum pro arbitratu meo, malo, ut a Serenissimo Domino Rege locus determinetur, quàm a me, ne collationem facere recusent. Et quanquam non ignorem, hujusmodi fidei causam determinandam fore per sanctam Romanam Ecclesiam, tamen quia aliàs & in Concilio Constantiensi & Basiliensi determinata & decisa fuit, non incongruum visum fuit, ut pro fidei defensione & Bohemorum reductione illam viriliter aggrediamur.

Quamobrem cùm hujusmodi disputatio celebranda omnino sit, me totum ad ipsam sacram vestram Universitatem convertam, illam precibus, quibus valeo, obsecrando per eam summam benivolentiam, quam erga me gerit, per pretiosissimum Christi sanguinem, per communem Bohemorum salutem, perque ea studia, quibus tanto tempore delectatur, ut determinato priùs loco per Sacram Regiam Majestatem, eligere dignentur nonnullos viros peritissimos, & quàm maximè in sacris litteris, ex sufficientioribus totius almi studii Wiennensis, qui quidem ad locum determinandum habeant proficisci. Si Vienna eligeretur locus, nihil mihi gratius nihilque jucundiùs afferri poterit. Quoquo modo tamen res se habeat, victoriam de Bohemis assequi volumus Divina favente gratia, si operam dare volueritis. Comparabitis etenim laudem & gloriam immortalem apud Deum & apud homines, si rem hanc attentare minimè dubitabitis. Ego autem omnem

N n 3

spem

Spem præter cœlestem in vobis fixi & locavi. Quos quidem tanto adjumento mihi esse, si volueritis, posse intelligo, ut nihil sit præterea mihi requirendum. Quare si mei memorem, si me charissimum, si dignum denique vestris beneficiis judicatis, hoc a vobis peto, ut omnino huic præclaræ Collationi celebrandæ, quæ non parvum pondus habet, nonnulli ex vobis velint interesse, cùm magnum & maximum decus simulque ornamentum Illustrissimæ vestræ Universitati sitis allaturi.

Pergite itaque Præclarissimi Viri, & ad quod vestra præclara studia vos incitant, dirigite gressus, ut vobis laudem, splendorem & præmia, mihi lætitiâ & consolationem & jucunditatem, Bohemis-que universis salutem & pacem æternam afferatis.

Valeat Sacra Illustrissimaque Universitas vestra Wiennensis ad gaudia sempiterna. Libellum, quem his diebus contra Bohemos edidi, ad vos aliàs transmittam, mitteremque nunc illum libenter, si transcribendi otium præstaretur, cùm tantis [negotiis] simus præpediti, ut vix has manu festina exarare valuerim. Valete interim, & quid de hujusmodi collatione facienda sentiatis, nobis rescribere non sit molestum. Ex Znoyma XXIV. die Septemb. anno Domini 1451.

Totius almæ Universitatis Wiennensis inutilis servus, licet Orator fidelissimus Frater Johannes de Capistrano Minorum minimus & indignus, filiusque vester immeritus.

Ejusdem

Ejusdem
EPISTOLA SECUNDA

*De publicis & promiscuis Bal-
neis Religiosorum.*

**Ad Thomam de Paden,
Priorem Mellicensem.**

Monitum (a) Librarii.

Quæsitum fuit a Venerabili Patre Johanne de Capi-
strano, Generali Ordinis Fratrum Minorum Ci-
tramontano, utrum Religiosus balneans inter se-
culares, non domesticos sine signo vel habitu Re-
ligionis suæ incidat excommunicationem, quod
asserebatur præfatum Patrem Johannem prædi-
casse, & ubi Canon hic in Sexto contineatur: Et
si sic, quis a tali excommunicatione possit hujus-
modi Religiosum absolvere. Item quis dispensare
possit super irregularitate, siquam taliter excomu-
nicatus Divinis se immiscendo &c. contraxisset.
Super quibus respondit præfatus Venerab. Pater.

*Reverendo in Christo Patri & Religioso Ve-
nerabili Fratri Thomæ Ord. S. Benedicti, sacri Mona-
sterii Mellicensis dignissimo Priori, mihi perco-
lendissimo.*

VEnerande in Christo Pater humili cum recom-
mendatione gratiam salutarem & pacem in Do-

N n 4

mino

(a) *id totidem verbis præfigitur Epistola in Cód. Mellic.
N. 13.*

mino sempiternam, & animum ad obsequia grata paratum. Hesternadie vestras suscepi litteras, quibus quæritis, an verum sit, quod fama vestras perduxit ad aures, me videlicet prædicasse, Religiosos, qui balneantur cum laicis, non domesticis, sine signo Religionis suæ, excommunicatos esse ex Canone Sexti: & quod si ita est, velim vos informare, in quo loco Sexti præfatus contineatur Canon &c.

Ad quod breviter quæsitum respondeo: verum esse, me juxta prædictum Canonem & alia Canonica jura prædicasse multoties. Canon autem ille Bonifacii VIII. est in ti. *Ne Clerici vel Mo. se ne s. mi. C. ut periculosa*, ubi sequitur Textus: *ut periculosa Religiosis evagandi materia subtrahatur, districtius inhibemus, ne de cætero aliquis quancunque Religionem tacitè vel expressè professus in studiis vel alibi temere habitum Religionis suæ dimittat, nec accedat ad quævis studia litterarum, nisi a suo Prælato cum consilio sui Conventus vel majoris partis ejusdem sibi eundi ad studium licentia primitus sit concessa. Si quis autem horum temerarius violator extiterit, excommunicationis sententiam incurrat ipso facto &c.* Talis est textus. Glossa autem Joannis Andreæ ita dicit: *ut periculosa, tracta fuit de Extravaganti: Gravis & dolore non vacua. Et in verbo: quancunque Religionem* dicit Glossa: *dum tamen approbatam de voto eod. Lib.* Et in verbo: *expressè* dicit Glossa super eodem Libro de Regulis c. 1. &c. sicut in libris vestris plenius videre poteritis. Attendite tamen ad verbum: *temere*, super quo dicit Glossa:

ex

ex causa enim licet habitum transformare, si justa sit, puta timor supra de vi. & ho. Cler. c. Clerici.

Idem autem Joannes Andreas in eod. c. *Ut periculosa* in Novella sua Lectura dicit, quod prædicta excommunicatio ligat Religiosos balnea intrantes sine habitu in conspectu secularium personarum. Sed si occultè intrent & stent ita, quod a secularibus non videantur, non incidunt. Ex quo etiam includitur, quod Religiosi exuentes se, id est: deponentes habitus propriæ Religionis in conspectu secularium sive in claustro, sive alibi, ut ludant ad pilas, vel similia, excommunicationem incurrunt. Idem est etiam, si causa non esturgens, ut quia vadunt ad piscandum deponentes habitum in conspectu secularium.

Archidiaconus autem in prædicto c. *ut periculosa* dicit: licet ista constitutio attribuaturs Domino Bonifacio, tamen originaliter fuit Innocentii IV. Et infra in verbo *temere* Archidiaconus ipse apostillat dicens: *hoc dicit, quia ex causa posset &c.* Et in verbo *habitum* dicit: *habitus Monachialis videtur esse cuculla, ut patet in eo, quod legitur & notatur 19. q. 3. mandamus. 20. q. 3. præsens.* Et eadem causa in *themate.* Et supra de *eta. & quali. intelligimus.* Et in verbo: *dimittat* dicit idem Archidiaconus: *adeò habitus est annexus ossibus Monachorum, quod in quocunque loco consistentes, sive in lecto quiescentes constanter eo uti debent, ut habetur. 20. q. 1. c. vidua.* Ad hæc supra de *vita & hon. Cler. c. Clerici in fin. & 23. d. c. Sanctimonialis*, ubi Glossa dicit: *etiam in infirmitate.* Et opponit Archidiaconus

nus de *cap. sine ornatu* 21. q. 4. Sed idem ipse solvit, quia illud Capitulum loquitur in Clericis secularibus, qui non sunt ita adstricti sicut Monachi. Et igitur dicit Archi-Diaconus, pœnam istius prohibitionis extendi etiam ad Abbatem, quia Monachorum appellatione includitur etiam & Abbas, ut in *c. Mandato. de Simonia*. Et probat per multa jura, ostendens etiam, quòd licet Monachus dimittens habitum postea reassumat, sicut faciunt Apostatae, quamvis postea efficiatur bonæ famæ, non potest eligi in Abbatem argum. 1. q. *ultra si quis omnem*. Et adhuc etiam allegat multa jura.

Hoc etiam tenet Dominus Petrus de Anchara-
no in dicto *c. ut periculosa* dicens: *Sed nunquid in lecto debet tenere, scilicet habitum? Respondeo: Canon sentit, quòd sic 20. q. 1. c. si. dum dicit: semper.* Subdit Johannes Andr. hìc, scilicet in dicto *c. ut periculosa* in Novella: *Non putat de mente hujus textus, quòd Monachus in cella sua dimittens habitum, vel dum balneum intrat in occulto, vel jacens sine habitu ligetur hac constitutione, videlicet quòd incidat excommunicationem, sed tunc demum, quando exhibet se aspectibus hominum sine habitu suæ Religionis.*

Hoc etiam tenet Frater Petrus nostri Ordinis in Directorio Juris in *ti. de Ornatu Ordinis §. item honestas*. Et in *ti. ne Cler. vel mo. §. Sed quid si Religiosis*. Et in *ti. de sent. exc. §. 25*. Hoc communiter tenent moderni Doctores in Universitatibus Italiæ, licet verbum *temere*, non amplè declarant. Ideo dicendum secundum Papiam, *temere, id est:*

id est: præsumptuosè, fatuè, stultè, sine causa, sine consilio. Unde *temeritas* præsumptio, violentia, fatuitas. Et est temeritas cum inconsiderata dolorum perpeffione gladiatoria periculorum susceptio. Et hinc temerarius dicitur præsumptuosus, audax, qui audet audenda & non audenda.

Ad id, quòd dicitis, quòd insuetus est Canon apud vos, valde miror: quia in Universitatibus, ubi Canonica jura leguntur, ventilatur Capitulum: *Uit periculosa. Ne Cleric. vel. Monachi Lib. VI.* Nec tamen abolitus est per antiquitatem dictus Canon, nec per contrariam consuetudinem abrogatus: quin immò talis consuetudo, quæ dicenda est potius corruptela, peccatum magis aggravat; quia tantò graviora sunt peccata, quantò diutiùs infelicem animam detinent alligatam, ut in *c. fi. extra. de Consuet.* & in *C. quanto. c. t. & extr. de Simo. C. non satis &c. se & in C. non debet de consang. & affinit. & in C. cum haberet, de eo, qui dum in ma. quam pol. per adult. ad fin.*

Est ergo remedium, ut communiter servant Religiosi de observantia per Italiam balneis indigentes ex consilio Medicorum, quòd provideant sibi de levibus & antiquis habitibus vel tuniculis cum cuculla, aut occultè intrent, ita quòd nudi a secularibus non videantur. Sed certè, ut mihi relatum est per eos, qui interfuerunt, quod abominabilius & impudicitius est, & a Religiosis personis tanquam pestiferum & perniciosum venenum protinus fugiendum, quod etiam mulieres indistinctè, juvenes & profectæ nudæ cum viris nudis balnea, quæ dixistis,

stis, frequentius intrant. Cujus turpitudinis ab-
usum judicandum vestris conscientiis sub Divino
timore & salutis desiderio relinquo.

Abbas autem absolvere poterit sive Prælatus,
quia absolutio a tali excommunicatione non est spe-
cialiter Sedi Apostolicæ reservata. Ergo Episcopi
& Prælati Episcopalem jurisdictionem habentes su-
per suos subditos absolvere possunt, ut in *C. Imper.
de sent. excomm.*

De irregularitate autem majus dubium est per
ea, quæ notantur in *C. cum æterni* §. *sciturus de sen.
re judic. Lib. VI.* dum dicit: *damnabiliter in-
gressit se Divinis.* Unde dicerem, quod si scienter &
appensatè in contemptum Canonis post excommu-
nicationem, talis irregularitas non nisi auctoritate
Apostolica poterit aboleri, ut in dicto *c. cum æterni.*
Cautela igitur est in tali casu recurrere ad Reveren-
dum Dominum Senensem in Nova Civitate, qui
nunc auctoritate fungitur Apostolica. Valete fe-
liciter, & animadvertite diligenter, quòd si non vul-
tis pati pro sanctimonia & honestate vestra, ut mu-
lieres, quantumcunque velatæ & antiquæ, vestrum
claustrum ingrediantur, nedum Ecclesiam: quanto
minus ergo talibus Religiosis convenit balnea nudos
cum nudis mulieribus introire? Ex Vienna 1455.
die ultima mensis Februarii.

Vester, si quid est,

Frater Joannes de Capistrano

manu propria me subscripsi.

Animad-

Animadversio in præcedentem
Epistolam, ipsius, ut videtur, Thomæ de Pa-
den, Prioris Mellicensis.

IN hac Epistola notandum. Johannes Andreæ, su-
per cujus dicta fundat se Pater Johannes de Capi-
strano, super Canone: *ne periculosa*, in Novella sua
Lectura dicit, quod prædicta excommunicatio ligat
Religiosos balnea intrantes sine habitu in conspectu
secularium personarum: sed si occultè intrent & stent,
ita quod a secularibus non videantur, non incidunt.
Ubi idem Johannes in fine addit, quod si Monachus
in cella dimittat habitum, aut jaceat sine habitu, non
incidit, sed solum cum conspectibus hominum se ob-
jicit sine habitu. Ubi tantum vult dicere, quod in-
tentio Canonis solum ligat, dum depositio fit in con-
spectu hominum. Sed verba Canonis non videntur
sonare ad illam intentionem, sed ad illam, ne Monachi
apostatent ab Ordine & vagentur hinc inde ut secu-
lares: Et hoc expressè continetur in initio Canonis,
quia talis est *temeraria* depositio habitus, non autem
illa, quæ fit ad utilitatem in balneo vel ad solatium
parvum in horto, ubi non deponitur habitus temera-
riè nec dimittitur, nec abjicitur, sed locatur ad locum
aliquem, ut statim reinduatur. Item sequeretur con-
tra Joannem Andreæ, quod si quis volens apostatare
ab Ordine, & adhuc existens in Monasterio occultè
abjiceret habitum in cloacam cum spretione & con-
temptu, & sic occultus sine habitu maneret in Mona-
sterio per triduum, donec tempore opportuno clam
exiret, sequeretur [inquam], quod in illo triduo talis
non esset excommunicatus, eò quod hoc non fecit in
conspectu hominum &c. Udal-

Udalrici de Weilhaim
 Canonici Reg. S. Aug. in Diessen

Ad

Johannem de Weilhaim
 Priorem Mellic.

EPISTOLA

*De tribulationibus & procellis Monasterii
 sui ob sanctioris disciplinae introductionem. (a)*

*Obedientiam filialem tam debitam quam
 condignam cum orationibus in Christo
 utinam devotis.*

Pater amantissime. Jam per multos annos nulla a me habuistis scripta. Sed nolite cogitare, quòd hoc omiserim propter aliquam indignationem aut displicentiam, aut quòd oblitus sim de beneficiis vestris olim mihi a vobis impensis, & de magna charitate mihi exhibita, aut quòd decreverit in me charitas erga Vestram Paternitatem: aut quòd ductus sim pœnitentia de ingressu meo Religionis. Nequaquam: sed confiteor coram Deo, quòd si non intrâssem Religionem, adhuc intrarem & refero vobis grates æternaliter, quòd me induxistis

(a) *Ex Cod. Mellic. H. 45.*

stis & informâstis ad intrandum. Spero enim me per vos salvâri. Nullum habeo amicum post patrem meum carnalem, qui mihi tanta bona contulit, quàm sicut Paternitas Vestra. Absit a me, ut de illis ingratus existam & ea oblivioni tradam. Sed propter multas rationabiles causas omisi, ut vobis non scriberem.

Et primò quia hucusque quasi per decem annos in tanta anxietate & tribulatione fui una cum fratribus meis de Understorff & maximè cum Decano nostro Magistro Johanne, cui semper adhæsi, propter sanctam observantiam, quòd etiam tæduit nos quàm pluries vivere. Tradidit enim nos Dominus culpis nostris exigentibus in manus inimicorum nostrorum, ut ij, qui antea expulsi fuerunt, cùm primò inciperetur observantia in Monasterio nostro, nolentes ad hanc dare consensum, dominerentur nobis. Et hucusque fortiores nobis fuerunt. Qui etiam nos sine misericordia afflixerunt die ac nocte, sperantes illo modo nos remove a Monasterio. Sed confortati in Domino hæc omnia sustinuimus per longa tempora propter observantiam, & hucusque semper timebamus expulsionem. Sed pius & misericors Dominus videns afflictionem nostram & intentionem rectam eripuit nos ab inimicis nostris & æmulis in tantum, ut omnia, quæ cogitabant mala erga nos & sanctam observantiam, Dominus permisit super eos. Et pro nunc non est mihi timor, quia certus sum, quòd pro nunc habebimus progressum in sancta observantia.

Igitur

Igitur Venerabilis Pater nolui hucusque vobis insinuare anxietatem meam, nec alicui amicorum meorum, ne aliquem contristarem. Et forsitan Deo volente ita factum est: quia si vobis insinuâsem omnia, quæ hucusque sustinui in observantia in loco isto, forsitan a vobis informatus fuisset, & ad alium locum me dedissem, & ex illa mutatione multa mala & scandala venissent, quæ omnia fuissent in detrimentum animæ meæ. Et devotione quadam motus vovi, quòd propter nullam tribulationem mutare vellem locum, sed omnia tolerare pro Christo (etiam mortem) sicut etiam mihi factum est.

Pro observantia incarceratus binies fui. Decem diebus in tenebris sedi. *Te Deum Laudamus* ibi cantavi. Per decem septimanas a Monasterio exclusus fui, sed cum honore statim reversus. Bis coram Principe & Consulibus steti & respondi pro observantia. Et tandem dedit nobis Dominus victoriam, ita ut quinque fratres inimici regularis vitæ & persecutores nostri missi & separati sint a loco isto. Et hæc noviter facta sunt.

Venerabilis Pater, multa haberem vobis scribere, sed nuntius modò expectat nolens tardare, ut amplius scriberem. Sed in brevi Domino concedente vobis scribam omnia gesta nostra. Dominus mirabilia operatur nobiscum & in omnibus Monasteriis circumquaque. Supplico vobis cordintimè, ut aliquid mihi scribatis. Commendo me orationibus

nibus vestris. Scripta sunt hæc raptim in Monasterio Diessensi in die S. Magni anno 1456.

*Item hucusque nulli unquam
audebam scribere.*

*Frater Ulricus de Weilhaim,
Professus in Diessen.*

Ad calcem hujus Epistolæ sequentia sua manu Joannes de Weilhaim noster adnotavit: Idem postea de dato feria 6. post festum S. Andreæ anno 1458. misit prolixum scriptum (a) de majoribus tribulationibus & vexationibus, quàm fuerint præcedentes, & de malitia adversariorum. Item tertium scriptum non fuit allatum, sed aliàs novi certitudinaliter, quòd Magister Johannes Schön, Zelator Religionis promotus est in Præpositum dicti Monasterii Diessensis.

(a) Hoc nondum reperi in Bibliotheca Mellis.

Cœnobitarum Mellicensium EPISTOLA ENCYCLICA

De obitu

Ven. Nicolai de Mazen,
Abbatis & Reformato-
ris sui (a)

Universis & singulis venerabilibus in Christo Patribus, Dominis ac Fratribus, Abbatibus, Præpositis, Prioribus, Decanis, ac eorundem vicesgerentibus, & Conventibus eorum venerandis, Frater Leonardus electus, totusque Conventus Monasterii Mellicensis Ord. S. Ben. Pataviensis Diœcesis, humilem in Christo recommendationem, & nobis afflictis orbatisque condolere.

Patres amabiles, & Fratres in Christo venerandi. Solicitat nos gemituum luctusque intolerabilis magnitudo, persuadet gratitudinis integritas, admonet verus amor, ejus singulariter animam fidelibus, præsertim Religiosis, commendandam, per cujus vitæ decursum sacra Religio felicia suscepit incrementa, cujus ope multos sanctæ Ecclesiæ filios regularibus disciplinis constat imbutos, cujus denique exemplo ac religiosa doctrina ad vir-
tutum

(a) *Ex Cod. Tegernseens.*

tutum studia innumerabiles allecti promotique creduntur. Illorum, inquam, animabus singulariùs succurrendum fore arbitramur, qui, dum in hac adhuc terra viverent, obsequioso virtutum famulatu rei Ecclesiasticæ vigilantì sollicitaque curâ promovendæ inludârunt indefessè.

Cum quanta verò laborum instantia ac sedulitate Reverendus in Christo Pater, Dominus Nicolaus, noster nostrique Monasterii Pater & Abbas quondam Divinis rebus, Monasticæ disciplinæ ac virtutum studio tam in se quàm ad proximos operam dederit, multorum, qui hunc in corpore positum noverunt, testatur laudis preconium. Cùm itaque Pater misericordiarum ac Dominus universæ terræ eundem Venerabilem in Christo Patrem nostrum, quod quidem cum multa cordis anxietate scribimus, viam universæ carnis nuper infra sacram Domini-
cæ incarnationis noctem ingredi jussit, Ecclesiæ sacris devotè procuratum, idcirco universalitati vestræ ex laudabili, quæ inter sacræ Religionis Monasticæ personas in commendandis utrimque fratrum animabus noscitur vigere consuetudine humiliter & devotè duximus supplicandum, quatenus ejusdem Venerabilis Patris, fidelis quondam animarum zelatoris, animam Divinæ pietati ac misericordiæ in vestris orationibus sincero commendare velit affectu, consuetudinesque Monasteriorum vestrorum, in hujusmodi charitatis operibus hætenus observatas, illi fideliter impertiendo : nomen quoque ipsius pro annua statuenda memoria, virtutis ipsius ac religionis nostrique precatûs intuitu Mortilogiis ve-

stris annotantes. In quo præter spem æternæ retributionis etiam nobis solatium gratiamque facietis singularem.

Insuper venerabiles Patres & Fratres in Christo charissimi annuam honorabilis viri Conradi Seüringer, genitoris ejusdem quondam Venerabilis Patris nostri, sub eisdem nocte & hora defuncti secumque sepulti, simili apud Dominum vestris charitatibus recommendamus affectu, ut, sicut in vita sua dilexerunt se, & in morte non sunt separati, sic Divino conspectui vestris devotis orationibus suffragantibus pariter repræsentari mereantur per Dominum nostrum Jesum Christum. Amen.

Interea animam cujusdam Fratris Egidii Hager, nostræ Congregationis Diaconi professi, & ante triennium defuncti, eadem devotione per vos petimus adjuvari, fidem de prædictis manus vestræ subscriptione nobis facientes.

Datum in præfato nostro Monasterio Mellicensi
in Festo S. Scholasticæ Virginis anno Domini
MCCCCXVI.

Johan-

Johannis de Welming

Abbatis Mellicens.

EPISTOLÆ (a)

De restituenda universim in Ordine S. Benedicti Monastica disciplina & procuranda rituum ac observantiarum conformitate.

I.

Ad Casparum Abbatem
Tegernseensem.

Supermelliflua dulcedinis suavitate abundanter indefesseque inter procellosos hujus Mundi occursum, ipsius, quem cuncta desiderant, frui, cunctasque laborum fatigas optatum in finem cedere, nec non cum orationibus sincerissimum in omnibus complacendi affectum.

Reverende Pater, amicorum colendissime.
Nuper receptis, & diligenter pensatis Paternitatis Vestræ scriptis, doctrina salutari Religionisque nostræ zelo & affectu refertis, clarè pastoris boni emicuit pia, discreta, utilis ac necessaria mentis sollicitudo cum devota precum ad parvita-

O o ;

vita-

(a) *Ex Cod. Tegernseens.*

vitatem meam instantia pro unionis modo observantiae nostrae Religionis, ejusdem inter nos conformitate, nec non perpetua stabilitate, animadvertens sollicitè dissimilitudinem observantiarum Ordinis nostri, disgregationis & instabilitatis matrem, providensque humanae conditionis fluxibilitatem, per quam faciliùs defluit bonum quàm conquiritur, potissimè si desit tutela provida Rectorum cum vigilantia continua. Nil siquidem adeò inest menti nostrae, quin inertiam labi contingat, sicuti prò pudor experientia ostendit in nostrae sacrae Religionis collapsu, quae pluribus in locis viduata pastoribus, dilacerata ordinibus, facta videtur scandalum interitûs.

Hinc noverit Paternitas Vestra percolenda, saepius inter plures Ordinis nostri Patres de stabiliendis nostris, ceremonialibus ac observantiae unione introducenda retroactis temporibus collationes varigenas habitas fuisse, certis quidem Patribus ad hæc anhelantibus, aliis ad alia se referentibus; sed penè omnibus mihi id onus imponentibus, cum utique plus aliis mens mea perplexa temporalium causarum retribus id efficere nequiverit. Considerata siquidem negotiorum magnitudine & propria in his inidoneitate ac inexperientia plus placuisset dudum habuisse mutuam Dominorum Patrum in aliquo loco ad invicem conventionem.

Inde juxta Paternitatis vestrae desiderium, petitionem & oblationem, habito cum certis Dominis & Patribus colloquio, placuit de his collationem sufficientem haberi in Monasterio nostro per certos Pa-

Patres, licet paucos, proximo mense Februarii, si & in quantum Paternitas vestra Reverenda aliquem vel aliquos e vestris mittere decreverit. Alioquin si auræ asperitate aut alio impedimento id a parte Paternitatis Vestræ fieri nequiret, saltem sine ulteriori dilatione Paternitas Vestra dignaretur mittere ad Octavas Paschæ, ubi sufficiens, & quantum fieri posset, conclusiva deliberatio de singulis necessariis & utilibus fieri deberet Deo assistente ac dirigente, sicut hæc latius in præsentī calamo commisi ad sincerissimum & affectu plenum Patrem meum & filium Paternitatis Vestræ, Fratrem Conradum, quem affectuosius præsumo commendatum unà mecum & meis Eidem Paternitati Vestræ, mihi sincerius præcolendæ, Domino Priori & omnibus filiis Vestris, Patribus meis prædignis.

Datum in Monasterio Mellicensi die S. Galli Abbat̃is anno Domini MCCCCLIX.

Fr. Johannes Abbas Monasterii Mellicensis.

II.

Ad Eundem.

Reverentiam & orationes, & omne, quod decet, & potest cordis mei affectus.

Reverende in Christo Pater, Domine & amice percolende. Abundè refrigeratus, directus ac consolatus per Vestræ Paternitatis Reverendæ Filios & Patres meos in Christi amore sincerissimos, præsentium bajulos, gratias, quas possum,

Deo offerens pro vestri & totius sacri Conventus vestri Religiosissimi zelo, conversatione ac incremento ejusdem in omni disciplina & vita Monastica ac regulari, obnixius deprecor, magis ac magis in id ipsum nos extendentes, viriliter perseverare, ac confidenter stare, conari ac laborare pro Monasticæ disciplinæ Ordinis nostri efficaci manutentione, unionem ac conformationem, quemadmodum providus & zelosus Pater meus, Dominus Prior (a) Vestræ Paternitatis Reverendæ diligenter ad hoc egit & se occupat, uti id ore ad os & scriptis ostendere, ac de cunctis copiosè eandem informare poterit. Quapropter eidem Patri mora non imputetur, quæ protelata est ob aliorum Patrum absentiam & petitionem meam, ut ejus in Domino frui possemus dulci alloquio & præsentia, quem unà cum altero filio vestro superfluum puto commendare, cum vita religiosa eos meritò commendet.

Cæterum Patrum Præstantissime, noverit Paternitas Vestra, de pluribus quoad regularis observantiæ incrementum factam esse collationem, sed conclusum adhuc absolutè nihil, sicut de his clarè constat sæpe dicto Patri Priori. Omnia siquidem tempus habent. Vestris tamen devotissimis orationibus spero suo in tempore rebus dari finem felicem, quem concedat Omnipotens omnibus nobis.

Datum in Monasterio Mellicensi die 26. Mensis Februarii anno Domini MCCCCLX.

Fr. Johannes Abbas Monasterii Mellicens.

III.

(a) *Bernardus de Wahing.*

III.

Ad Eundem.

*Reverendo in Christo Patri, Domino Caspa-
ro, Abbati Monasterii in Tegernsee, Patri & Amato-
ri suo singularissimo, Agni Paschalis veri gaudium
perenne, atque cum debita reverentia
orationes in Domino.*

Reverende, emerite ac in Christo colendissime
Pater. Nuper receptis vestræ amplectendæ
Paternitatis scriptis, charitatis ac Religionis
zelo eximiis adeò incaluit cor meum, quòd nihil
plus liberet, quàm tanti Patris votis, piis & justis,
quantocyùs effectualiter in omnibus, prout exilitas
mea sufficeret, cooperari. Id siquidem Deo gratius
ac animarum salutis accommodum, & denique statui
nostro necessarium ac debitum. Sed heu temporum
varietate vel potius malitia in tantum adsunt mentis
distractiones, ut vix tot timoribus & tortuosis per-
plexitatibus ac varietatibus cor hominis sufficiat.

Inde, Patrum Optime, instantibus ac plenæ fi-
duciae precibus ad præsens satisfacere totaliter ne-
quiens, eò quòd Synodo, si etiam haberi poterit,
personaliter non interero: Nihilominus nacta ali-
quali occasione operam dabo videre tanti Patris ac
Patrum & fratrum in Christi visceribus percolendo-
rum desiderabilem præsentiā: interim possetenus
acturus, & utinam ad vota in his, quæ ad nostræ
Religionis ac observantiæ uniformitatem, conserva-

O o s tionem

tionem ac incrementum, Deo auxiliante opportuna videbuntur, & per vestros avisata sunt, vestrum omnium devotissimis foci orationibus, desideriis & adminiculis!

Etiam, Reverende Pater, presentium latorem, dilectum in Christo Fratrem Leonardum, qui satis honeste & religiose nobiscum conversatus est, Vestrae committo Paternitati.

Datum in Monasterio Mellicensi Secunda post Quasi modo geniti anno Domini 1460.

Fr. Johannes Abbas Monasterii Mellicensis. (a)

Caspari Abbatis Tegernseensis EPISTOLA,

*qua ad præcedentem
respondet.*

*Jesum Crucifixum, in quo Pascha gaudiosum,
& in eo cum orationibus affectum plus quam
amorosum.*

Reverende, Supercolende, Dignissime ac amantissime Abba. Dum essem pridie propter quorundam Fratrum ab hac vita decessum
confe-

(a) *alias tres ejusdem Epistolas vide paulo post.*

confectus nimio mœrore, mox Deo dirigente adfuit inopinatè Vestræ Paternitatis Colendissimæ afferens omni charitatè plenas & ornatissimas, mihi tunc diu desideratas plurimumque gratas. Tantam exinde consolationem recepi, ut omnis mœror, si non aufugit penitus, tamen non modicum sit mitigatus.

Placent profectò Paternitatis Vestræ sollicitudo, zelus ac diligentia multa in re nostra tam honesta quàm sancta. O finis quando veniet? O si, quod tam ardentè desidero, ut fiat, aliquando factum gaudenter videbo! O si, quod benè apparet initiatum, optatò aliquando fine adimpletum videam! O quis scit, si tam diu in hujus vitæ miseria durabo, ut aliquando valeam gaudenter oculis conspicere carnis, pro quo tam crebrò & acriter pungit & sollicitat stimulus mentis? Timeo vehementer, quòd mors vorax, dira nimis & rapax mihi tam diu non parcat. Tunc quoque spes omnis decidet, ignorans de meis successoribus, quid fiet.

Hinc optarem unicè & desiderarem, ne impedimentum pararet multitudo, aut ne diutiùs negotium hoc maneret in suspenso. Nos pauci, qui dudum simul convenimus, puta Monasteriorum quinque Abbates & Conventus, rem ipsam plenius discuteremus, atque ut sic ad finem tenderemus optatum. Non tamen per hoc vestræ Colendissimæ Paternitatis intentionem, quæ justa [est] & sancta, aliquatenus reprehendo, sed rem taliter conclusivè terminari videtur difficile valde, & mora prolixior dispendium parit, estque non modicum nociva. En præstò sum hodie & omni tempore, prout etiam sum antea pollic-

licitus, non personis parcere, non rebus. O læta mors & dies lætitiæ ab hac vita decedere prius plantatis & benè regulatis, nec non firmiter roboratis omnibus & singulis, quæ ad rem nostram accommoda & necessaria noscuntur! Sufficiant nunc ista de his. Nam Prior noster reliqua supplebit.

Unum autem avidissimè ac desideratissimè præstolabor, ut Vestræ amplectendæ Paternitatis venerabilis persona, quemadmodum ejusdem scripta promittunt, se nobis in Monasterio Tegernsee, dum id commodius poterit, visibilem exhibeat pro ædificatione, gaudio & consolatione singulari, nullo unquam tempore tradenda oblivioni. Tunc enim de rebus nostris & aliis possemus pariter quietiùs & plenius conferre.

Nova nostra in patria sunt omnia mala: ideo de eis nil scribo. Deus nos adjuvet & donet vitam æternam amen.

13. die Maji anno Christi 1460.

Fr. Caspar Abbas Monasterii Tegernseensis.

Observatio in præmissam Epistolam.

NEquaquam vanè Sanctissimus Abbas auguratus fuit timuitve, ne sibi festina mors tantam felicitatem, quantam in patrata Benedictinorum Monasteriorum unione meritò reponebat, invideret. Si quidem ex Tegernseensium Cœnobitarum Epistola Encyclica,

cyclica, quam lectu dignissimam ex Codice Mellicensi, signato nunc Lit. H. num. 45. mox integram exhibebo, satis constat, Casparum Aindorffer, Abbatem hactenus laudatum, anno illico insequente diem supremum obiisse. En ipsam Encyclicam, cujus auctorem esse Bernardum de Wabing, Priorem Tegernseensem nullus dubitaverim.

Tegernseensium EPISTOLA ENCYCLICA

De Obitu

Domini Caspari

olim Abbatis in Tegernsee. (a)

Reverendo in Christo Patri ac Domino, Domino Johanni Abbati, nec non honorabilibus, Religiosisque Viris R. Priori, totique Conventui Monasterii Mellicensis fratribus sibi in Christo dilectissimis, Fratres Prior & Conventus Monasterii Tegernsee, heu oves sine pastore, in Jesu omnium Salvatore post luctus & lamenta presentis miserie vera futurae beatitudinis gaudia feliciter assequi sempiterna.

Reverende Pater, honorabilesque Religiosi Patres & Fratres. Cum sit versa in luctum nostra cythara, gaudium nostrum & omne solatium

(a) *Ex Cod. Mellic. H. 45.*

latium ingenti mœrore sit penitus absumptum, nil scimus aut possumus aliud depromere, nisi lamentum cordiale, carmen perlugubre ac totius amaritudinis intolerabile vœ. Revera nunc istis diebus, malis id nostris exigentibus, ira Dei gravissima desæviit in nos, ac veluti torrens aquæ vehementer inundantis operuit nos. Siquidem recessit a nobis pastor optimus, dux noster & bellator fortis interiit, capitis nostri corona decidit, decor omnis noster totaliter emarcuit, norma vitæ nostræ & exemplar virtutum & morum occubuit, lucerna nostra extincta est, & caligo tenebrarum irruit in nos. Hinc premunt, quin immò opprimunt nos totos vehementes angustia & mœror circumvallatos undique amaritudine ac repletos inæstimabili dolore.

Sanè, quod gementes & flentes atque dolentes cumque luctu referimus gravissimo, noster quondam Ductor & Præcessor dignissimus, nostri Monasterii intus & extra Restaurator, quin verius, alter Fundator, nec non nostræ sacrae Religionis observantiæ Reparator, Institutor, Augmentator & Conservator, Reverendus Pater Dominus divæ memoriæ Caspar, olim Abbas noster & prænobilis vertex, qui dum in humanis vitam ageret, nostri statum Monasterii annis triginta quatuor, mensibus sex, laudabiliter & optimè gubernando sic providè temporalia & sagaciter administrabat, ut curam non minus necessariam spiritualibus solerter ac devotè impenderet: sic curis externis vigilanter intendebat, ut interna nequaquam negligeret: sic in istis sollicitè agebat, ut in illis minimè teperceret: sic manu utraque

que utens pro dextera, ut, quamvis corpore & viribus imbecillis, infirmitatibus continuis, gravibus ac diversis creberrimè ureretur, non tamen illis, scilicet temporalibus, ministerium necessarium subtrahabat, nec istis, ut puta spiritualibus, solertia debita jugique vigilantia aliquatenus deerat.

Hic talis ac tantus Jesu Christi imitator præcipuus, vitæ regularis zelator maximus, in consiliis sagax & providus, in agendis constans & strenuus, ad Deum devotè fervidus, ad fratres religiositate præclarus, omni quoque morum honestate perspicuus, hominem non verens, Deum solum timens, in magnis & assiduis infirmitatibus plus gaudens quàm dolens, Deoque semper gratias agens, nunquam otio torpens, assiduè orans aut legens aut curæ domesticæ aut fratrum utilitati prospiciens, quotidie Deo Patri Filium in sacrificio offerens, carnis comoda non quærens, eique vix necessaria indulgens, supra indictam Ordinis censuram & præter Regulæ rigorem seipsum districtiùs affligens, in adhibendis ad consilium fratribus semper eorum potius voluntatem quàm propriam perficiens, pacem ad subditos ac inter eos unitatem concordix velut unum summè necessarium, sine quo cætera sunt nihil, summopere providens, jugiter nutriens, conservans & augens: hoc solum præ omnibus intendens, ut ipsi & singuli fratres essent in idipsum unum, invicem amantes, pacem sectantes, alterutrum obedientes, idem sapientes, unum cor & animam in Deo habentes. Hæc & his similia studio, quo poterat, vir optimus iste in se suisque subditis efficere sedulò magnopere satagebat,

bat, sese nihilominus bonorum omnibus exemplum vividum in cunctis præbebat.

Nam quidquid ad animæ salutem pertinebat, plus opere quam sermone implebat. Fuit namque lucerna, quæ non sub modio curæ corporeæ, nec torporis aut desidiæ latebat, sed super candelabrum sanctæ Deoque dilectæ conversationis posita cunctis lucebat. Eminebat quippe in ipso exteriori habitu animi ejus interna pulchritudo. Erat enim in incessu venerabilis, benignitate affabilis, moribus immutabilis, humilibus placabilis, rebellibus inexorabilis. Veruntamen rigorem austeritatis temperabat in eo mansuetudo humilitatis. Delinquentibus minabatur frontis austeritas, sed blandiebatur cordis serenitas. Erga benè agentes Petrus apparebat in vultu, erga delinquentes Paulus in Spiritu, & juxta Patris sanctissimi Benedicti monitum in eo durum Magistri, pium Patris semper ostendebat affectum.

Nempe in suis judiciis supremum judicem vehementer formidabat, cui se redditurum de cunctis rationem inevitabiliter cogitabat. Sed quid plura? Virtutum cultor, vitiorum ultor, fratrum amator, neminem palpan, peccata non dissimulans, præesse dolens, prodesse gaudens, plus amari a subditis quam timeri appetens, misericordiam judicio præponens, sub onere Prælaturæ crebrò suspirans & gemens, dignitatem cœlestem plus quam terrestrem ambiens. Absolvi namque ab officio sæpissime postulabat, & alteri cedere frequenter affectabat, nec petulanti, ut assolet, in ipso officio quocunque detinebatur affectu, sed solo charitatis communisque utilitatis respectu.

Non

Non enim propria quærebat, sed propriis communia anteponebat, seque ultrò laboribus cunctis ingerebat, majorem fructum de aliorum sperans quiete, quam si vacaret sibi ipse.

Erat autem in regiminis cura plurimum pavidus, in judiciis providus, in imperiis moderatus, in increpatione discretus, suam propriam fragilitatem semper suspectus. Erat quoque sobrius, castus, pudicus, quin immò pudicissimus, sed & in omnibus temperatus ac benè regulatus. Erat demum pro salvandis animabus sollicitus, ac de reddenda pro eis ratione semper timens & anxius.

Hic itaque vir cœlicus & homo Angelicus post mira & grandia, quæ annis & mensibus, ut supra, in sui regiminis cura operatus est, bona, postquam plurima & gravia, quæ annis totidem in suo corpore pertulit, mala, cum se sentiret ad exitum jam propinquare, recepto secum devotius viatico, corpore videlicet Dominico, nec non sacro perunctus oleo XVII. die mensis Januarii, portas mortis horridas pertransiens, ac luce vitæ præsentis valedicens, paulo post Solis occubitum nos orphanos, desolatos relinquens Solem adiit, qui nescit occasum.

Verùm cum vix aliquis inveniatur & rarus, etiam quantumvis perfectus & justus, qui viam vitæ mortalis Mundique spurcitas impollutus transcurrere valeat, ut nil prorsus cœnulentum, quod horrendi exustionem purgatorii non vereatur, remaneat, maxime in eis, qui cura temporalium onerati in regimine animarum cæteris præsunt: ea propter ad vestras devotiones spiritu anhelò currentes, cum devoto

Tom. VIII.

P p

pre-

precatu exoramus attentius, ut, siquid, quod oculos lateat mortalium, Pater noster præactus hinc secum purgandum tulerit, eidem pietatis affectu apud justum indicem vestro fideli dignemini interventu succurrere.

Si verò nil dignum cruciatu, sicut optamus, in eo remanserit, apud eundem nihilominus misericordem Dominum pro gratiis reddendis debita juxta mutuæ conditum fraternitatis officia cum additionibus quantocius persolvere velitis: nomen quoque ipsius, ut vobiscum in memoria remaneat perpetua, vestro mortuorum catalogo diligentius annotare, pro nobis omnibus ut sic desolatis, orbatis, afflictis, tribulatis & nimium conturbatis apud Patrem misericordiarum, consolatorem mœrentium preces effundere, nobisque impetrare, quod propriis assequi meritis diffitemur.

Hoc autem potissimè ac devotissimè precamur, quatenus vestrarum interventione orationum devotarum apud Dominum misericordiarum talem nobis pastorem & ducem obtineatis, cujus doctrinam imitari & vitam sit nostræ professionis jam citius attingere finem. Sed o Abba Caspar, pastor bone, quis nobis dabit alterum te? Certè quia similem tibi est impossibile inveniri, optamus, ut nobis talis divinitus detur, qui tua vestigia a longe saltem imitetur: qui per te plantata sustentet, rigata fecundet, ædificata non dissipet, restaurata conservet, firmata amplius roboret: sanata non aliquatenus infirmet, neque a tuis rectis semitis vel modicum declinet. Tribuat hoc ipsum pius & misericors Dominus

minus, qui cū sit potens, sit etiam volens
Amen.

En Patres & Fratres, quia amor ejus, de quo sermo, sed & dolor pro eodem nos verbis excedere fecit, quod quidem vestra charitas velit benigniùs interpretari. Datum xx. die Mensis Januarii anno Christi 1461.

Ven. Bernardi de Wahing, Prioris Tegernseensis Epistola de ejusdem Abbatis Caspari obitu & electione Conradi, hujus nominis V. Abbatis Tegernseensis (a) scripta ad Johannem de Weilhaim Mellicensem.

In Jesu Christo cum orationibus devotis & recommendationibus solitis filialem sincerissimum affectum.

Reverende cordialissime Pater, nunc inter mortales unice & singularissime dilecte, immò super omnes amantissime. Vestrae Reverendae Paternitatis pridie ad me scripta recepta mihi morrenri & amarè dolenti non modicum attulerunt solamen. Quippe eo extincto, qui me amplius quàm seipsum diligebat, mihiq̃ue ad vota singula parere, nec non in omnibus consentire, & semper complacere studebat, qui denique mihi, dum viveret, lux
P p 2 erat,

(a) *Ex eod. Cod.*

erat, oculus & dux, quin immò pater, mater, soror & frater, pastor quoque pius & rector, nec non benignus in omnibus auxiliator & optimus semper consiliator: hic me nuper seminecem superstitem relinquens, ab hac luce migraturus, finem jam adesse præsentiens, singulis fratribus per ordinem cum amplexu & osculo valefaciens expletis orationibus solitis, sana ratione inter fratrum manus appodiat, (a) circumstantibus omnibus, & pariter orantibus, corde & animo in Deum suspensus, veluti suaviter obdormiens, beato & Christianissimo fine quievit.

In cujus transitu, & ante & post, quantum contristatus extiterim, afflictus & anxius, quantumque viribus mentis & corporis extenuatus, novit ipse, qui omnia scit. Quin etiam ipse, prout sentio, agnosco, quamvis non plenè. Siquidem ex quàm pluribus satis evidenter conjicio, quòd eum, qui ut sic dum humanitus viveret, mihi vita extiterat, nunc, o Deus miserere, sum citiùs secuturus in morte, nec post eum, qui alterum cor, & cujus anima cum mea erat eadem secundum Deum, diutiùs subsistere valeo aut volo. Nulla unquam citò pertransiens & umbratilis consolatio animum sic penitus mœrore absumptum, ac ingenti dolore nimis depressum, poterit in pristinum restaurare, quamvis, o Pater dulcissime, consolationes tuæ, tuis scriptis gratissimis misericorditer mihi exhibitæ, aliquantulum meam affecerint mentem.

Con-

(a) *reclinatos.*

Consolatur proinde non modicum, quòd virum hunc optimum, multarum utique & magnarum operatorem virtutum, quibus per omne tempus, dum viveret, incessabiliter insudavit, quasque tandem fine laudabili consummavit, abiisse potius crediderim quàm obiisse. Sed unde & quo? Certè de morte ad vitam, de tenebris ad lucem, de mœrore ad gaudium, de miseria transitoria ad gloriam sempiternam. Quòd cum ita sit, ut piè spero & opto, veruntamen de ejus abscessu & absentia affectus sensualis gemitum extorquet, lachrimas exprimit, atque crebriores excitat singultus. Rursus ea, quæ modò divinitus mecum sunt acta, mentem dejectam relevant & erigunt, ac plurimùm consolantur: sed & robur præstabunt, & vires restituent qualescunque.

Ut autem vestra Reverenda, semperque amanda Paternitas nostri statum ad præsens noscat Monasterii & fratrum, utque, prout decet congaudeat, & orationes efficaces pro bona continuatione effundat, Eidem summarie notifico, quòd, dum divæ memoriæ Reverendi Patris, olim Domini Casparis Abbatis fuisset funus lachrimabile juxta morem traditum sepulturæ, mox ego timoribus & curis maximis repletus Capitulum convocavi, meamque mentem & consilium super plurimis agendis, cavendis & prævidendis latius explanavi. Et quia vacante Abbazia jam singula vatabant officia, ego cum clavibus officium Prioratus resignans hortabar supplicando instantius, ut regimen Monasterii alicui & eam committerent, qui posset & nôset in agen-

dis nos omnes dirigere, & in casibus & curis emergentibus cuique supervenienti respondere: volensque exire omnes acclamabant, & precibus multis exorabant, ut id onus usque ad novi Abbatis institutionem de novo assumerem, & ne meipsum quaerendo partialem me redderem, sed communi potius utilitati providerem.

Igitur piis annuens votis eorundem, coassumtis per me & sociatis mihi quibusdam in auxilium fratribus, ne mora nobis dispendium faceret, quamvis viribus destitutus competentibus, acquievi. Moxque die altera Capitulum convocans, plenius mentis conceptum coram omnibus exposui. Gratia autem assistente Divina, meis votis in cunctis sine resistantia singuli parebant, me nihilominus, quem desolatum nimium cernebant, suis piis solaminibus sinceriter confortantes fidem praestabant, quod mihi adhærere, & in omnibus meis monitis & suasionibus vellent plenariè consentire. Ecce cum bona voluntate fraterna concordia, ubi idem in idipsum aderat sapere & sentire, quod & meritò Deum exorabilem nobis & placabilem effecit.

Accito itaque cum testibus Notario publico diem pro electione futuri Abbatis, consentientibus universis assignando, feriam videlicet secundam, quæ erat in crastino festi S. Pauli conversionis, tanquam terminum peremptorium cum sequentibus immediatè præfixi. Erat autem hæc dies octava post sepulturam Domini Abbatis defuncti. Misi quoque concitè ad Dominum loci Ordinarium, eundem ex nomine totius Conventus vocans ad interessendum

lum hujusmodi nostræ electioni. Vocavi etiam Venerabiles Dominos Abbates Monasteriorum Scheirn & Montis Andechs. Qui unà cum legatis Domini Ordinarii accelerantes in jam dicto festo nobiscum præsentés affuerunt. Cum quibus in crastino servatis servandis juxta formam Decreti Balingensis Concilii, & per viam mixtam, in quam præteris coram Notario & testibus capitulariter consensimus, ad electionem processimus, Compromissarios statuantes duos Abbates prædictos unum Venerabili Patre Domino Johanne Simonis, Decano Ecclesiæ Frisingensis, assistentibus Venerabilibus viris, Domino Decretorum Doctore Stedler in Spiritualibus Vicario, nec non Domino Wilhelmo Tacz, jam dictæ Frisingensis Ecclesiæ Canonici.

Porro ipsis Dominis Compromissariis jam dictis inter alia commissionem sub jurejurando fecimus, ut votis singulorum singillatim & secretè percrutatis, eum in Abbatem eligerent, qui votorum pluralitatem ultra medietatem totius Conventus esset habiturus, nullum habendo respectum ad meritum vel Zelum. Expleto igitur scrutinio omnium vota exceptis duobus peregrinis in duas personas confluerunt, quarum nulla juxta conditum ultra medietatem attigerat, sed citra numerum medium pariter stabant. Quo experto una ex his duabus Deo inspirante mox sua vota in alterum transtulit, in quam etiam illa duo vota peregrina translata sunt. Et sic de novo omnes unanimi consensu & concordī voluntate in eandem personam consensi-

mus eamque Deus dudum elegerat, in nostri Monasterii Abbatem & pastorem elegimus.

Ipse est Venerabilis Pater, Dominus Conradus de Weilhaim, qui fuit nostri Monasterii Cellarius & provisor in temporalibus annis quàm plurimis, vir utique bonus & religiosus, industrius, providus & gnarus, zelum habens ad observantiam, & in temporalibus experientiam multam. Qui quidem mihi singulariter & intimè conjunctus ac insuper consentaneus in omnibus, talem se erga me exhibet, quòd extra & præter beneplacitum meum & velle, ut ita dicam, nec pedem velit movere. Deus-Homo ipsum confirmet, ac sibi ad gloriam nos/infirmul unanimis in cunctis conservet! Pro quo tu Pater sancte, Deum exora quotidie devotè.

Hic itaque Deum offendere timens ejusque voluntati contraire non debens nec valens, licèt cum plurima & importuna renitentia raptus, tractus & coactus, obedienter subiit onus. Pro quo Deo grates & laus.

Hæc sunt, Pater Colendissime, quæ tuæ Venerandæ Paternitati volui ad præsens insinuare, ut & tuis precibus sanctis & meritis nobis apud eum, quem amas, quæ sunt bona & necessaria, obtineas, ut quemadmodum cœpimus, proficiendo quotidie in melius finem tandem optatum & optimum feliciter assequamur amen. Valentini 1461.

*Fr. Bernhardus, Prior in
Tegernsee.*

Nota

Nota Johannis de Weilhaim in præmissam
Epistolam.

EX præmissa epistola luce clariùs patet viri mitten-
tis religiositas, charitas, styli scientiæque clari-
tas atque profunda humilitas. Qui cùm alter erat,
in quem vota concurrerant, nomen suum reticet,
& in concurrentem sua transfert vota & quod mi-
rabile est, ad hominem comparatione sui nullius
momenti existentem, se tantùm inclinat, prout te-
nor epistolæ declarat. O Deus piissime & miseri-
cors, fac me talem, qualem me vir tantæ excellen-
tiæ reputat amen.

EPISTOLA

Conradi Abbatis Tegernseens.

Ad

Johannem de Weilhaim
Mellicens.

De sua electione in Abbatem.

*In eo, qui est, singularissimæ charitatis af-
fectum cum Orationibus, quæ mens sic colligata
& unita valet.*

DEcessus ab hoc seculo nequam & accessus ad
eum, qui pro piissimis laboribus coronat la-
borantem usque ad vesperam viriliter in sua

P p s

vinea

vineæ si gaudium præstat, incussit tamen immensum fletum & dejectionem in eo, quia redundavit in caput meum. Onus enim grave cecidit super caput meum, onus mihi impossibile, onus excessivæ proportionis ad personam, vitam, scientiam &c. onus, inquam, quod secundum B. Benedictum taliter gravatus semper meminisse debet, sciens, quam difficilem rem suscipit, animas præcipuè regere, multorum servire moribus, arguere, obsecrare, increpare &c. reddere rationem Deo de singulis animabus & judiciis, culpam sibi incumbere, quidquid ipse in omnibus utilitatis minus potuerit invenire, proferre nova & vetera, lucrari animas, castum in moribus, vitia odientem, non turbulentum, non anxium, servare in omnibus discretionem & potissimè sanctam Regulam. O ubi hæc & alia ad illa necessaria sunt? Ad hæc quis idoneus? Ille solus, cui gratia Divina suffragatur. Ego non talis si sine Dei offensa potuissem, fugissem, certassem, restitissem usque ad mortem. O utinam hæc vocatio miseratione, & non ultione Dei facta sit!

Terret valde illud: *Cui plus committitur, plus ab eo exigitur*: quantò status altior, tantò casus proclivior: Alios regere, qui se hucusque neglexit! O pie Jesu quid fecisti mihi sic? Nonne facies tentato & destituto proventum? Facies quidem, si fecero meum. Talis ergo sic minùs idoneus, impotens & dejectus quærat auxilium, solatia, directorem, te Deum meum præcipuè: te deinde, quem alloquor, te, qui & ego: aliàs colligati fraterna charitate sumus, ex quo mihi plus teneris. Auxiliare ergo

ergo mihi , frater mi , consolare mœstum , erige dejectum , conforta pusillanimum . Sit demum affectus erga me & Monasterium nostrum , uti fuit tempore pii patris antecessoris . Sic curramus viam mandatorum Dei hîc , ut tandem epulemur Pascha æternum Amen . Datum Dominica *Reminiscere* per fratrem tuum Conradum , dictum Abbatem 1461 .

Inscriptio : Zelatori sacrae Religionis
P. Johanni dicto de Weil-
haim, suo Cordiali.

Johannis Abbatis Mellicensis
EPISTOLA IV. (a)
Ad Conradum Abbatem
Tegernseensem,

*De negotio unionis & conformitatis in
Regulari observantia Monasteriorum
Benedictinorum in Germania.*

*In Christo Jesu orationes , & ad beneplacita
paratam cum affectu complacendi volun-
tatem.*

Reverende in Christo Pater. Patres & Domini Abbates nostri in Austria aliàs circa festa Pentecostes & ex post, scriptis Dominorum

(a) *Ex Cod. Tegerns.*

norum Patrum & Abbatum Provinciæ Moguntien-
sis informati sunt, quomodo de his, quæ per eos
hucusque deliberata sunt pro sancto unionis obser-
vantiarum Ordinis nostri, informationem vivæ vo-
cis oraculo per vestræ Paternitatis Reverendæ Domi-
num Priorem citiùs habituri essent: sicut hoc idem
nuper circa festum Visitationis Beatæ Virginis exili-
bus, ut potui, precibus a Paternitate Vestra Reve-
renda optavi. Inde verosimiliter demeritis meis
frustratus hucusque, non desino mei & citatorum
Dominorum & Patrum Abbatum Ordinis nostri lo-
co adhuc obnixiùs pulsare & petere confidentia sin-
gulari, quatenus Paternitas Vestra Reverenda ob tam
grande bonum Ordinis dignetur annuere quantocyùs
descensum ad Patres Provinciæ Salisburgensis, præ-
fato viro Patri Priori Vestro ad hauriendum ex eo in-
formationem in prætactis, ac ex post deliberare, &
si videbitur, aliquos ex nobis mittere ad cæteros
Patres & Dominos Abbates Provinciæ Moguntinen-
sis pro consummatione operis tam felicitis, offerens
meos & me pro posse. Ocyùs ex Monasterio
Mellicensi, 3. Fer. ante Michaëlis an-
no Domini 1464.

Con-

Conradi Abbatis Tegernseensis
EPISTOLA

Ad

Melchiorum (a) Abb.
S. Udalrici Augustens.
in eadem causa. (b)

Reverendo in Christo Patri, Domino Melchiori, Monasterii S. Udalrici in Augusta Abbati, nec non Capituli Provincialis digno Præsidenti, Amatori suo singulari, in Jesu Christo cum orationibus sincerissimum affectum, nec non animum constantem ad incepta jam dudum pro Ordinis exaltatione firmiter prosequendum Deo ad laudem animarumque eternam salutem.

Reverende Pater, & uti confido, amator singularis. Venerunt pridie, id est, in festo Omnium Sanctorum Reverendi Patris Domini Abbatis Mellicensis ad me litteræ, quarum data sonat de feria III. ante Michaëlis, in effectu continentes, qualiter ipse idem jam dictus Reverendus Pater & alii quidam cum eodem Abbates Provinciæ Salzburgensis scriptis Dominorum Abbatum Provinciæ Mogun-

(a) Cognomento de Stamheim, anno 1435. Monachum Mellicensem. (b) Ex cod. Cod.

Moguntinensis dudum informati extiterint super unione observantiarum Ordinis nostri ejusque reformationis, de qua jam dicti Domini Abbates apud se diu & multum tractaverunt secum in ejusmodi unionem &c. nostræ Salzburgensis Provinciæ Patres Ordinis convenire cupientes &c. Et quoniam Dominus Abbas Mellicensis prædictus de commissione, a quibusdam vestræ Provinciæ Patribus Priori meo tunc factâ, dudum certa ex me & iterata scripta recepit, quarum occasione cum aliis, prout scribit, perpaucis colloquium habuit, quos sibi consentaneos & gratos invenit, fuissentque iidem parati ad Patres vestræ Provinciæ juxta intentionem ipsorum in finem, qui quæritur, ex suis tunc mittere duos vel tres. Sed quia nec diem nec locum assignatum receperunt, idcirco eorundem piis votis hucusque respondere ad placitum & parere neglexerunt. Denique mei Prioris antedicti præsentiam, quam optabant & sperabant, obtinere hætenus minimè potuerunt: quem etiam ego ad vestræ Paternitatis aliorumque preces & beneplacitum ad eosdem mittere etsi volui, non valui causis & impedimentis legitime retardatus.

Hinc etiam Patres prædicti, ignorantes, quid agerent, seipsos suspenderunt, certiora sibi nuntiari postulantes. Sed & ego jam diu a Paternitate Vestra cum desiderio informari exspecto, qualiter erga vestros agatur in negotio, & quid Patres Bursfeldenses in ipsorum privato diffinierint Capitulo, utrumne unionem sanctam cum cæteris velint subire, ac insuper quid vestra Paternitas cum suis Collegis, dum
nuper

nuper vice altera congregati fuissent, in re ipsa pariter decreverit fieri &c. Hæc etenim vestra Paternitas mihi suo tempore insinuare promisit: quod quidem opportunè ut fiat, etiam atque etiam exopto. Quibus agnitis eadem Domino Mellicensi responsurus aliquid certius valeam renuntiare.

Dignetur itaque vestra Paternitas mihi rescribere, & siqua poterit, sano cum consilio solamina præstare, ut saltem post festa Paschalia Patrum fieri conventio possit. Nec forsitan locus aptior dari poterit quàm Augusta, cùm a nobis nimium distet civitas Nürenberga. Ego pro sancta unione & Ordinis totius necessaria reformatione, quod mea interest, negligere nec debeo nec volo. Puto etiam hucusque meam bonam voluntatem satis cum effectu ostendisse.

Scribit Dominus Mellicensis, quòd ex nostris paucissimi sint, qui velint, nec tamen alii multi hos paucos impedire possint. Huic addo ego, quòd ex his paucissimis, qui velint, sint forsitan jam nulli, qui possint. Nam ad præsens in partibus Austriæ per omnia malè [est] & deterius quàm unquam. Rediit unus de fratribus meis, dudum ad vindemias missus, ex cujus relatione, si fides in Deum non esset, humanitus sequi desperatio posset: qui pluribus vicibus in itinere manus violentas, Deo eum tenente, evadere potuit difficulter. Clerus præcipuè deprimitur, exactionatur, profligatur & exosus habetur a cunctis. Monasteria devastantur, spoliantur, desolantur, nec est, qui eripiat, aut piè condoleat miserando.

Nostrium quoque Monasterium in Austria hoc
anno

anno damnificatur in mille florenis & aliquantulum supra. Deo gratias! Sed heu nondum finis. Præterea quidam Patres Religiosi cum suis Conventibus totalem a suis ædibus & Monasteriis quotidie cum gemitu expulsionem expectant. Ecce hi quomodo ad sanctam unionem se dare poterunt nunc vel deinceps, nisi forsitan pius Deus novum benedictionis & benignitatis annum suis famulis dignetur propitius elargiri. Quod ut faciat, oremus pariter quotidie devoti. Ipse vestram Paternitatem feliciter conservet per tempora multa amen.

Datum ex Tegernsee die octava mensis Novembris anno 1464.

*Frater Conradus Abbas
Monasterii Tegernsee.*

L. J. u. r.

Ejusdem Conradi
EPISTOLA

Ad

**Joannem Abbatem
Mellicensem. (a)**

De eadem re.

Reverendo in Christo Patri, Domino Johanni, Abbati Monasterii Mellicensis, amatori suo & amico singulari, Jesum Patris unicum Virginis partum, mentis jubulum, in quo seipsum cum affectu & orationibus devotus.

Reverende Pater, & uti confido, amator singularis. Dudum vestra Paternitas mihi scripsit supplicando pro Priore meo, quatenus eundem circa festum Mariæ Magdalænæ, vestræ Paternitati & aliis quibusdam Reverendis Dominis Abbatibus in civitate Khrembsa præsentem facerem ob causas &c. Sed quoniam id fieri tunc temporis non potuit, & ex post varigenis infauſtisq; occurſibus, rebus in diversa mutatis, major eundem mittendi dilatio intervenit, tandem fratribus duobus vindemiarum tempore ad Austriam euntibus ipsum Priorem cum eisdem missem, si pro tunc de actis & conclu-

Tom. VIII.

Qq

sis

(a) *Ex eod. Cod.*

sis Patrum quorundam Provinciæ Maguntinæ citiùs informatus fuisset. Nam Dominus Abbas S. Udalrici mihi vice altera tunc scripserat, qualiter ipse cum aliis Patribus, sibi adhærentibus essent conventuri ad simul tractandum & consiliandum de mediis congruis & modo se cæteris uniendi, mihiq; per eos consiliata & ut sic diffinita quantocyus insinuare promisit. Quod quia facere neglexit, me animo hærentem diutiùs in suspenso reliquit. Unde & Priorem meum retinui, quousque certiùs agnoscerem, quid facere Patres jam dicti decrevissent.

Cùm verò vestræ Paternitatis scripta aliàs circa festum S. Michaëlis missa, nuper in festo Omnium Sanctorum ad me venissent, in quibus iterum Vestra Paternitas Priorem meum ad se mittendum precabatur: quod quia tunc fieri non poterat, & tempus jam aptum transierat, mox eundem ad Augustam transmissi, ut ibidem apud Dominum Abbatem S. Udalrici de ejusdem & aliorum sibi conjunctorum intentione se plenius informaret, & quod melius mihi foret agendum, consequenter edoceret. Qui etiam redeundo secum attulit varia scripta, ex quibus instructus de futuris agendis majori, quàm antea, sum dubio constrictus. Transmitto autem vestræ Paternitati scripta hæc ipsa, quibus se ipsam informare, mihiq; iis perpensis sanius consulere valebit. Siquidem non magnæ efficacix, immò neque multum utile video, Priorem meum vel solum vel cum alio ex me vel nomine aliorum ad intentionem Domini Abbatis prætaçti ad Augustam ac deinceps Nürnbergam transmittere, cum nos ipsi in nostra Provincia,
vel

vel saltem aliqui ex nobis simul hucusque convenire & efficaciter colloqui, mutuasque intentiones & consilia, prout utique optatum & expediens fuisset, ad invicem conferre nequivimus. Et forsitan ex nostris nimis sunt pauci, qui sanctam hujusmodi velint unionem amplecti. Quare cum Patribus Provinciæ Moguntinæ ad finem, quem intendunt, in negotio tam arduo utiliter & cum effectu tractare, utrum nobis consultum & multum utile; Vestræ Paternitatis saniori judicio hîc & in aliis me plenissimè submitto.

Ego quidem Ordinis intuitu & pro bono communi ejusdem, obque rogatum quorundam Venerabilium Patrum in negotio hoc sancto collaborando hætenus, quod potui, etiam cum mei detrimento fideliter ac sollicitius effeci. Insuper si qua per me restarent in futurum fructuosè facienda, paratum me redderem, non parcerem personis nec rebus. Quin immò si res ipsa exposceret pro Ordinis exaltatione, perfectæque & uniformi ac stabili ejusdem reformatione, me ipsum impenderem & offerrem ad laudem Dei Omnipotentis, qui nos pariter in id ipsum salvet feliciter & conservet amen.

Datum in die S. Nicolai anno Christi 1464.

Fr. Conradus Abbas Monasterii Tegernsee.

Melchioris Abbatis

Sanct-Udalricani

Ad

Johannem Abbatem

Mellicens.

EPISTOLA (a)

in eadem causa.

*Venerabili in Christo Patri, Domino Johanni
Abbati Mellicensi, in Christo Jesu ad sacram Reli-
gionem devotum affectum, atque ipsius salubre incre-
mentum [G] sincerum effectum pro
salute.*

Venerabilis Pater. Transmisit ad me Reve-
rendus Pater, Dominus Abbas Tegernse-
sis religiosum Patrem Bernardum, Priorem
suum cum scriptis, insinuando, Patres nonnullos,
potiores tamen, Provinciæ Salzburgensis anhelare
ad unionem sive uniformitatem observantiæ Regu-
laris cum Patribus Provinciæ Moguntinæ, qui et-
iam exposuit affectum Vestræ Paternitatis & cæte-
rorum Patrum, licet paucorum Provinciæ Salzbur-
gensis ad dictam unionem Patrum Provinciæ Mo-
guntinæ, simul etiam studiosius inquirens de his,
quæ

(a) *cod. Cod.*

quæ interim Patres Provinciæ præactæ de hujusmodi uniformitate tractârint. Cui exposui ea, quæ mihi constabant, prout idem Pater Prior Vestræ Paternitati latiùs enarrare studebit, unum præsertim sibi pandens, quòd videlicet Patres Provinciæ Moguntinæ statuerint iterum pro eo negotio tractando simul convenire ad Nürnbergam ad proximam Dominicam *Jubilate* post Pascha. Unde motus laboravi seriòsius & institi, quantum potui, apud præfatum Patrem Dominum Tegernseensem, ut ad me mittat ad Augustam adhuc ante Dominicam Palmarum antedictum Priorem suum Bernardum, ut mecum ad eandem convocationem eat ad Nürnbergam: qui etiam aliàs pluries mecum fuit in Congregationibus, ubi de hujusmodi uniformitate tractatum fuit.

Propter quod etiam valde optarem Paternitatem Vestram unacum aliis Patribus, saltem aliquibus, Provinciæ Salzburgensis aliquem nobilem & rationabilem Patrem vel Fratrem de Provincia Salzburg. transmitti ad Monasterium Tegernsee, qui unacum Priore præfato veniret ad me ad terminum prædictum, Dominicam vid. Palmarum, ubi ambo mecum expectarent adventum cæterorum Patrum Provinciæ nostræ, præcipuè de observantia Mellicensi, qui antequam ad præfatam Convocationem veniant ad Nürnbergam, statuerent priùs convenire in Augusta ad colloquendum antea ac conferendum de his, quæ in Nürnbergam tractanda erunt, ubi expediens apparet fore etiam præfatos Patres Vestræ Provinciæ.

Qq 3

Itaque

Itaque si sic expedire visum fuerit Paternitati Vestrae, poterit facere, quod optimè noverit faciendum. Ego si quid facerere possem pro sancta religione nostra, paratus essem neque corpori neque rebus parcere ad laudem Dei Omnipotentis, qui est benedictus in secula, cui me & mihi commissos commendet, oro, pro nunc in tribulationibus constitutos, qui teste B. Martino, nunquam sic prope est hominibus, sicut in periculis constitutis.

Datum in Augusta in die S. Catharinae
V. & M. Anno 1464.

*Frater Melchior Abbas ad S.
Udalricum Augustae.*

Conra-

Conradi Abbatis Tegernseensis

EPISTOLA (a)

Ad

Melchiorum Abbatem

Sancti-Udalricanum.

*Reverendo in Christo Patri & Domino
Melchiori, Abbati Monasterii SS. Udalrici & Afre
Auguste, amatori suo singulari, in Jesu Christo ora-
tiones cum sincero affectu, nec non complacendi vo-
luntatem cum effectu, pro posse scilicet, & firmiter
prosequi dudum pro sancta unione salubriter
incepta usque in finem.*

Reverende Pater, amatorque singularis. Nu-
per ante tempus Adventus, ad Paternitatem
Vestram misi Priorem meum ob causas,
prout constat. Qui rediens Vestre Paternitatis in-
tentionem litteris Ejusdem ad me missis, scilicet &
verbis propriis sufficienter exposuit. Grata erant
omnia. Sic fieri optabam, quemadmodum narra-
ta eadem sonabant & scripta. Unde mox hac &
alia occasione fratrem Cellerarium meum misi ad Au-
striam, cum quo Domino Abbati Mellicensi Ve-
stre Paternitatis litteras transmissi: Eum quoque
meis scriptis unacum Prioris prout acti plenissime,
prout potui, de singulis informavi.

¶ 4

Verum

(a) Ex Cod. Cod.

Verum cum frater prædictus venisset in Strenberg, a fide dignis avisatus, progredi ulterius nec valuit nec debuit. Substitit itaque in Achleütn repausans, [&] laico cuidam nostro familiari Monasterio, & in partibus Austriæ undique benè noto negotia circa Imperialem Majestatem & alios ejusdem patriæ potentes peragenda commisit. Cui similiter litteras prædictas & scripta ad Dominum Mellicensem deferenda commendavit. Quibus ut sic præsentatis jam dictus Dominus Mellicensis prodando responso tunc deliberaturum se dixit & responsa daturum per nuntium eundem, quem juxta pollicitationem sibi factam sperabat rediturum ad se. Quia verò certis infortuniis obstantibus nuntius expeditis negotiis in reditu Monasterio Mellicensi applicare non potuit, & sic frater prædictus jam in crastino Festi S. Scholasticæ ad nos reversus, nullum responsum secum reportavit. Hoc autem refert, quia non malè nec pejus, sed pessimè res agitur in partibus prædictis, & non alicui de loco ad locum transitus patet securus. Nam & nuntius prædictus evadere non potuit: quin bina vice captivatus & tortus pœnas non immeritas luere fuit coactus.

Hæc Vestræ Paternitati ad præsens significare curavi, ut, quantum ad negotium unionis & sanctæ reformationis eadem Vestra Paternitas juxta sapientiam desuper sibi datam & gratiam satagat, ut nihilominus, quod intenditur, proveniat Deo ad laudem & toti Ordini ad majorem profectum. Nam quamvis ex parte Patrum nostræ Provinciæ nunc
rebus

rebus se taliter habentibus, ut vobiscum juxta placitum concurrant, possibilitas non adsit, venient forsitan aliquando tempora feliciora, quando ex impossibili facile, immò necessarium fiet.

Ego hucusque quod potui facere, non neglexi, & ignoro, quid amplius restet faciendum per me. Unde de cætero me absolvens Vestræ Paternitati, quia potens est, ipsum sanctum negotium sincerissime recomendo, simul & me ipsum in Christo devotè, qui nos pariter salvet & conservet feliciter amen.

Sumus propter nostros Principes in magna tribulatione. Forsitan Vestræ Paternitati de eorum discordia constat, quia publica. Unde de hoc scribere utile non est. Orationes a Vestra Paternitate & a vestris devotis pro nobis fieri obnixè precamur. Datum Julianæ Virg. anno Christi 1465.

Fr. Conradus Abbas Monasterii in Tegernsee.

Johannis Abbatis Mellicensis

EPISTOLA V.

Ad

Conradum Abb. Tegernf.(a)

In eodem negotio.

Reverendo in Christo Patri Domino Conrado, Monasterii in Tegernsee Abbati emerito, Patri & amico suo præcipuo, in Christo Jesu ad S. Religionem salubre incrementum, & in eodem se cum affectu & orationibus devotis,

Reverende Pater, amicorum præcipue. Suscepi Paternitatis Vestræ, mihi sincerius percolendæ, scripta aperientis causas in iis omissionis missionis Domini Prioris vestri, uti optârunt certi Domini Patres Abbates Ordinis ad Austriam, ac Domini Abbatis S. Udalrici & aliorum sibi conjunctorum intentionem, desiderium & mutuam conventionem, eligensque in his hæere parvitatæ meæ judicio, paratus insuper pro Ordinis exaltatione & uniformi ac stabili reformatione nec parcere personis sive rebus, immò tanquam verus pastor & animarum sollicitus rector semetipsum impendere.

Pro quibus altissimo referens gratias, ac zelo Ordinis nostri sancto congaudens, effectualiter, prout
scirem

(a) *Ex eod. Cod.*

scirem & possem volenti animo concurrerem tam sancto operi una cum aliis Dominis & Patribus Abbatibus Provinciæ nostræ, si ipsa tempora & patriæ negotia unà cum certis circumstantiis infauſtis ad opus tam sanctum & arduum non tardarent. Equidem sicuti etiam Paternitas Vestra Reverenda sentit, absque mutuis Dominorum Patrum Abbatum Provinciæ nostræ, vel saltem illorum, qui in observantia regulari utcumque nobiscum concurrunt, aggregatione, colloctione, tractatu & concordia nihil uniformitatis conclusivè fieri poterit cum Reverendis Dominis & Patribus Provinciarum aliarum, & potissimè Moguntinensis, propter nimiam ad invicem differentiam in rubricis, cerimoniis & pluribus aliis, etiam certis Regulæ impertinentibus, sed plus observantiam onerantibus, ut apparet. Nec facile debemus transgredi terminos Patrum nostrorum, quia nova aliquando ea facilitate deseruntur, qua & accipiuntur.

Unde Patrum Percolende, conandum videtur, ne leviter moveamur a nostris introductis, quæ longæva & matura deliberatione acta, continuata & originata sunt a Patribus doctis, peritis ac religiosis, professis in locis, ubi a tempore Sanctissimi Benedicti, Legislatoris nostri creditur viguisse regularis observantia. Nihilominus omnimodis expediens videtur, ut certi Domini Patres Provinciæ nostræ saltem circa Festa Paschalia ad interloquendum se in loco apto convenirent. Ideo dabitur opera possibilis, quatenus circa eadem tempora Dominus Pater & Abbas in Cella Mariæ cum aliis

aliis sibi adjunctis iter ad Paternitatem Vestram Reverendam in Tegernsee arripiant, in ascensu declinantes ad Monasteria Ordinis nostri viciniora, ibidem exploraturi mentes Dominorum Patrum eorundem, offerentesque, si unà cum eis certos mittere placeat.

Insuper si visum fuerit, nacta opportunitate circa Dominum Metropolitanum Provinciæ nostræ aut suos, attentabitur promoveri negotium pro posse. Apparet siquidem opportunum fore, si quo modo Patres Ordinis Provinciæ nostræ, vel saltem aliqui se mutuo intelligerent. Ex post efficacius in negotio unionis agi posset, quia forte certæ observantiæ nostræ etiam in aliis Provinciis nobiscum ex post concurrerent, ac sic efficacius finis præincentus obtineretur. Quapropter unacum Paternitate Vestra Reverenda apparet, interim suspendendam missionem esse circa Palmarum ad Augustam, sicut etiam Reverendo Domino Patri Abbati S. Udalrici ibidem in præsentem scribo juxta tenorem copiarum hic inclusarum, obnixius petens, quanto citius unacum scriptis suis mittere ad Augustam dignetur.

Demum Patrum amantissime, Vestræ Paternitati Reverendæ & Vestrorum devotionibus sumus interim nos in tribulationibus positi recommitti, ut Domino Deo nobis assistente, qui propè est tribulatis, in omnibus sic agamus & procedamus, sicuti suæ beneplacitum fuerit voluntati, & necessarium ac utile nostræ saluti amen.

Datum in Monasterio Mellicensi Dominica post Conversionis S. Pauli Apostoli anno 1465.

Fr. Johannes Abb. Mon. Mellic.
Ejusdem

Ejusdem
EPISTOLA VI.

Ad
Melchiorum Abbatem
S. Udalrici August.
Cujus in priori fit mentio.

*Reverendo in Christo Domino Melchior (a),
Monasterii SS. Udalrici & Afre in Augusta Abbati
emerito, Patri suo sincerius percolendo, in Domino
Jesu orationes devotas, atque in religionis nostræ
zelo incrementum & unionem profi-
ciam.*

Pater Reverende. Receptis scriptis Paternita-
tis Vestræ Reverendæ de data S. Catharinæ,
& cæteris copiis ac litteris Reverendi Domi-
ni Abbatis in Tegernsee atque Prioris sui intellexi,
Reverendam Paternitatem Vestram & Dominorum
Patrum Abbatum nostri Ordinis Provinciæ Mogun-
tinæ conatus & commendabilem ac multigenam so-
licitudinem pro inductione uniformitatis observan-
tiæ regularis. Et quia bonum quantò communius,
tantò præstantius, ideo placeret concurrere cum Pa-
ternitate Vestra Reverenda ad hoc ipsum Dominum
Prio-

(a) ita Cod. Tegerns.

Priorem in Tegernsee, ac aliquem expertum Provinciae nostrae circa Dominicam Palmarum in Augusta. Quod & ego judicarem opportunum valde & necessarium propter variam & multiplicem dissidentiam cerimoniarum & rubricarum in observantia nostra, in tantum, quia vix pauca reperiuntur Monasteria in praefatis uniformia. Insuper introducta per Dominos Patres de Bursfeldia in multis valde a nobis differunt, propter quae non sine notabili labore & experientia multiplici conandum est Dominis Abbatibus ac Patribus Ordinis, ut talia assumant, concludant & approbent solerter, ne in inductione ad unionem aliquem contingat rationaliter gravari, sed respectus habeatur generaliter & consideratio ad personas, tempora & loca, ut nemo terreatur, aut justè subterfugium petat.

Inde videretur conandum, quantum possibile foret, ad sequendum ipsam Regulam nostram & practicam ejusdem derivatam immediatius a Monasteriis Legislatoris nostri, discretam satis, & ad perfectum accommodam, ne si a principio nova & varia constituerentur, minus voluntarios resipiscere faciant. Equidem considerata nunc temporis fragilitate humana, discretionem praecipua opus est talia ordinare, quae verisimiliter continuari poterunt. Unde cuncta cerimonialia observantiae nostrae indifferentia moderari possent, ne nimia corporis fatiga in talibus spiritum extinguat. De his utinam daretur, sicut verisimiliter expediret, latius os ad os conferre!

Interim

Interim tamen, quantum patriæ nostræ negotia, dura & minus prospera admittent, habebitur opera possibilis circa Dominum Metropolitanum Provinciæ nostræ, atque Dominos Patres Ordinis dictæ Provinciæ, si quo modo aliqui ex Patribus Ordinis, saltem circa Festum Paschæ venire possent ad Tegernsee, aut ad locum alium aptum, & consequenter, si opus fuerit, ad Paternitatem Vestram Reverendam ad interloquendum se de præfatis. Si quidem Patribus Provinciæ nostræ satis dubium est aliquid concludere de mittendis communiter, eo quod non plenè constat de modis & mediis aliisque per Paternitatem Vestram Reverendam & cæteros Reverendos Dominos & Patres Provinciæ Moguntinæ.

Dei misericordia dirigat utrimque Dominos Patres, ut sic procedant in re tam necessaria & sancta, quatenus Dei honor, animarum salus, & Ordinis nostri exaltatio votivè & feliciter proveniant. Demum Patrum Colendissime, simus invicem commendati, sicut confido. Datum in Monasterio Mellicensi Dominica post Conversionis S. Pauli Apostoli anno Domini 1465.

Fr. Johannes Abbas Monasterii Mellicensis.

Mel-

Melchioris Abbatis S. Udalrici

August.

EPISTOLA.

Ad

Conradum Abb. Tegerns.(a)

Reverendo in Christo Patri ac Domino, Domino Conrado Abbati Monasterii Tegernsee, suo amatori & amico præcipuo, Jesum Christum, in quo omne bonum suum, cum orationibus affectum sincerum, & ad omne beneplacitum animum paratum.

Reverende Pater, amator & amice singularis. Celebravimus proximè in Bambergâ juxta morem & Ordinis statuta Capitulum Provinciale cum solemnitatibus & ritibus solitis, ubi fructum fecimus majorem, quàm in retroactis Capitulis multis. Interfuit eidem Pater Bernardus Vester, qui Paternitati vestræ multa consolatoria narrabit. Nam tractatibus & actibus singulis, sicut unus nostrum, interfuit, quæ ibi sunt gesta, prout vidit & audivit, latius poterit & plenius voce viva enarrare, quàm ego ea calamo valeam in charta enarrare.

Vestræ

(a) *Ex Cod. Tegerns.*

Vestræ Paternitatis zelum bonum, quem ostendit, & desiderium sanctum, quod ad unionem & Ordinis veram reformationem habet, Patres plurimum commendant, & laus Vestræ Paternitatis & fama exinde major accrescit. Immo Pater suavissime, fidem maxime bonam & famam permagnam apud Patres nostræ Provinciæ obtinuisti. Unde mihi maximum est gaudium, quod præfatum Bernhardum ad nostrum misisti Capitulum. Idcirco & hortor & moneo cum omni charitate in sincera veraque confidentia, ut vestra Paternitas perseveret, atque pro bono communi totius Ordinis & reformatione ejusdem nobis cooperetur. Quod quidem efficacius fieri non poterit, nisi conformes in observantiis efficiamur, & sanctam unionem, pro qua jam diu laboravimus, reformati inter nos faciamus, prout etiam Patres trium observantiarum (a) jam finaliter consenserunt, & in votis concordēs fuerunt. Deus omnipotens nos dirigat, & nostris cordibus inspiret, atque perficere concedat, quæ suæ sunt placita voluntati, & nostræ proficiant saluti amen.

Vestra Paternitas cum Monasterio Tegernsee a Consulatu Civitatis Nürnbergensis est magnifice honorata cum speciali *propina*, Patri Bernhardo, tanquam Priori seorsim soli, singulariter oblata, quod etiam mihi & cæteris solatium fuit & gaudium singulare. Benè valeat Paternitas Vestræ, & constans permaneat. Nam

Tom. VIII.

R r

finem,

(a) ni fallor, Mellicensis, Castellensis, & Bursfeld.

finem, quem diu quæſivimus, Deo donante tandem in brevi assequemur ipsi ad laudem & gloriam, qui bonorum & omnium largitor & auctor. Datum anno 1467.

*Fr. Melchior Abbas
Monasterii.*

*SS. Udalrici & Afræ in
Augusta.*

Abbatum Provinciæ Moguntinæ
EPISTOLA (a)

Ad eundem

Conradum Abb. Tegernf.
De aditatis in suo Capitulo Provinciali.

Reverendo in Christo Patri ac Domino; Domino Conrado Abbati in Tegernsee, Patri & Domino sibi in Christo semper sinceriter præamando, in Jesu omnium vero Salvatore, veram & æternam nobiscum optamus consequi salutem, affectum insuper, quem amor sanctus ferventior efficit, offerimus cum pace devota.

Reverende & Religiosissime Pater. Quod Ordinis & sanctæ unionis intuitu vice tunc tertia Vestra digna Paternitas Virum, Religio-
nis

nis zelum habentem, beneque meritum ac nobis percharissimum, Fratrem Bernhardum nobis fecit præsentem, unacum cæteris Patribus universis optime commendatum gratumque recepimus & tenemus.

Pensavimus altè & pensamus Vestræ Paternitatis sanctum propositum & animum, quem geritis ad observantiam sanctam. Hinc non modicum lætificati sumus, & plurimum ædificati. Fratrem prædictum præter morem & contra Capituli statutum ad interessendum nostris tractatibus & Capitularibus actibus sponte admisimus, ei veluti cuique ex nostris locum assignantes eidem. Et quoniam, ut libet Vestræ Paternitati scribere: multa nec tempus nec facultas indulget, præsumimus de fratre prædicto, quòd referenda suo tempore non negligat latius referre, portantes interea ex superabundanti, & manentes cordibus sinceris Vestræ Paternitati, ut suum fervorem sanctum continuando retineat, & interim ex narratis per fratrem Bernhardum consolationem recipiat, permaneatque constans & firma. Nam negotium sanctum fini, qui quæritur, ad nostram sanctam, veram piamque intentionem jam magis magisque approximat: quamquam Sathan cum suis, qui ejusmodi nunquam abest suis machinationibus, nunc iterum se palam ingerendo transitum ulteriorem præpediat: sed Deo auctore eò major nobis profectus inde accrescit, quò illo contra nos acrius sæviante in perseverando constantiores fuimus reperti. Non sinunt occupationes graviores, quibus nunc premimur, calamum extendere ad ampliora.

R r 2

Domi-

Dominis Præfidentibus in Capitulo publicè est facta commissio de scribendo Vestræ Paternitati & cæteris de Provincia Salzburgensi Patribus & Dominis prædignis. His & præsens bajulus fidelis nostram insufficientiam supplebit. Deus autem Omnipotens nos unum facere dignetur, atque uniat in se, & secum feliciter faciat in æternum vivere & regnare.

Valeat Paternitas Vestra Reverenda in ævum in Jesu cum omnibus veris obedientibus filiis. Datum ex Mōnasterio Montis Monachorum anno Domini 1467. feria V. post *Jubilate*.

*Fr. Eberhardus Abbas Montis
Monachorum.*

Fr. Sebaldus Abbas S. Ægidii.

*Fr. Martinus Abbas in Mün-
ster Schwarzach.*

VEN.

VEN. PATRIS
JOHANNIS
DE WEILHAIM
PRIORIS MELLICENSIS
VITA,

A duobus Benedictinis Tegern-
seensibus cœvis conscripta.


*Ex MS. Cod. Monasterii
Tegerns.*

THE
SINAI
LIBRARY
OF THE
SINAI

AT

THE
SINAI

THE
SINAI



INCIPIT VITA VEN. PATRIS JOHANNIS DE WEILHAIM.

In Christi nomine amen!



Nno Domini MCCCCIII. ex patre Udalrico, Slitpacher cognomento, ac ejus conjugē Dorothea, de Murnau oriunda, in festo Sancti Udalrici Episcopi Diocesis Augustensis, in civitate Schongau, nascitur eorum primogenitus, quem Johannem vocaverunt, qui ab eis in puerili ætate scholaribus traditus est disciplinis.

Anno Domini MCCCCXIII, defunctis utrisque parentibus infra octo dies sub Adventu Domini, sequenti anno translatus est ad civitatem Weilhaim ad maternos amicos, ibidem educatus: unde sæpe dictus est *de Weilhaim*, quanquam frequentius juxta cognomen paternum *Slitpacher* vocaretur.

Anno vero Domini 1421. ad Ulmam veniens, annis duobus, non tamen integris, illic in scholis

R r 4

mora-

moratus est. Reversusque ad Weilhaim sub anno Domini 1424. post festa Paschalia descendit ad studium almæ Universitatis Wiennensis, [&] ibidem ad annum usque undecimum incompletum demoratus est. Quibus sub annis quantum profecerit, quidque egerit, causâ omittimus brevitatis.

Deinde sub anno Domini 1434. accessit Monasterium Mellicense, aliquot Fratres ejusdem sub salario annuo taxato eruditurus. Qui sæpius secum retractans, ad qualem statum se vellet convertere, tandem proposuit ad vitam claustralem se donare. Hinc subsequenti anno 1435. in Vigilia Nativitatis S. Johannis Baptistæ assumpsit tonsuratus habitum probationis sive Novitiorum. Qui anno sequenti, videlicet 1436. die 19. Aprilis votum emisit Professionis secundum Regulam B. Benedicti.

Post paucos lapsos annos ad suggestionem Fratris Conradi de Geisenfeld, Magistri Artium, Dominus Abbas Christannus, tertius in reformatione præfati Monasterii Mellicensis, injunxit ipsi Fratri Johanni, ut *Expositionem Regule S. Benedicti* compilaret. Qui obedientia obstrictus, licet invitus, assumens laborem, & continuans, usque ad Capitulum XLV. vel circiter, sensit opus nimis grave fore sibi, vires & scientiam suam excedere. Ideo humiliter petiit a tanto onere supportari. Et exauditus fuit absolutus.

Rursum antedictus Frater Conradus, postea in nostro Monasterio S. Quirini Martyris in Tegernsee ex causis incorporatus, non cessans instigavit Dominum Christannum Abbatem, ut iterum ipsi Johanni injungeret, quatenus talem laborem susciperet. Quo facto

facto tunc ex voto suæ professionis adstrictus obedientiâ, pro executione Operis assumpsit pro the-
mate Abrahamæ a Domino Gen. XVII. dictum, & ab
Apostolo ad Rom. c. 4. allegatum, scilicet: *Patrem
multarum gentium constitui te.* In cujus laborioso
processu, extenso quàm plurimum, gravatus, a la-
bore Conventuali, Divini videlicet cultus, nullam
habuit, nec habere desideravit exemptionem, quia
laborem suum latere voluit, nec quisquam præter
Dominum Abbatem & prædictum fratrem Conra-
dum rem agnovit. Cui ipse frater Johannes, dum
perfecit ex integro, eundem ad emendandum seu ap-
probandum exhibuit. Et ita usque ad Capitulum
Regulæ S. Benedicti LII. pervenit.

Nam sub anno Domini 1441. cum duobus col-
legis sibi adjunctis ad Monasterium SS. Udalrici &
Afræ in Augustam causâ reformationis transmissus
fuit cum tristitia & lachrimis tempore Quadragesi-
mali. Dehinc æstivo tempore supervenit dictus fra-
ter Conradus, quodam alio fratre associato sibi. Pri-
mi autem duo fratres adjuncti fratri Johanni ante hie-
mem ad Mellicum redierunt.

Deinde sub anno Domini 1442. ad instantiam Il-
lustris Principis Domini Alberti Ducis Bavariæ, &
epistolis pluribus repetitam, duo fratres Conradus
& Johannes vix inducti, profecti sunt ad Monaste-
rium Beatissimæ Virginis Mariæ, *Ettal* nuncupa-
tum, a Serenissimo Principe & Domino, Domino
Ludovico, Divæ memoriæ Romanorum Imperato-
re ac Bavariæ Duce ex mirabili visione sibi in Italia
ostensa fundatum & constructum. Ad quod Mona-

sterium in Vigilia sive Profesto Dominicæ Ascensionis applicuerunt, ubi permanentes ultra quadraginta hebdomadas, sæpe dictus frater Johannes advertens prolixitatem Operis coepit aliud *brevius* colligere multa omittendo, & pauca adjungendo, atque ad prænominatum Capitulum LII. Regulæ procedendo.

Anno autem Domini 1443. ad Monasterium suæ professionis in Quadregesima reversus idem Opus sive *Glossam Regulæ* ibi ad finem perduxit. Ne tamen prima Expositio ex toto incompleta foret, eandem stylo cursorio & brevi perfecit. Successivè verò valde multa conscripsit Opuscula, aliorum exarando, & quædam compilando, prout inferius aliqua exprimentur.

Post hæc sub anno Domini 1451. associatur Reverendis Patribus, Dominis Abbatibus Martino, Monasterii B. Mariæ V. ad Scotos Wiennæ, nec non Laurentio Cellæ Mariæ, postea ad Gottwicum translato, Magistris Artium, vice Domini Reverendi Patris sui Abbatis Stephani, etiam Artium Magistri excellentis, nec non Baccalarii Sacræ Theologiæ, ad visitandum Monasteria Apostolica auctoritate Provinciæ Salzburgenfis Ordinis Beatissimi Patris Benedicti sexus utriusque. O. quantos timores, labores, fatigas & pericula itinerum cum prædictis duobus Abbatibus toleraverit, quis queat enarrare? Neque opus est commemorare.

Denique sparsim & diversis temporibus fuit directus ad quatuor Monasteria, in quibus officium gessit Prioratus, quæ claustra sunt Cella Mariæ, Formbach, Gottwicum & Ebersperg. Tandem ex Ebersperg

Ebersperg accedente consensu Domini Abbatis ipsius ad instantiam & petitionem Reverendi Patris & Domini, Domini Sixti Episcopi Frisingensis per medium ejus Vicarii, utriusque Juris Doctoris, altera vice perrexit ad Monasterium Ettal quatuor mensibus ibidem existendo. Deinde ad cœnobium S. Sebastiani in Ebersperg, prout Dominus Prælatus scripto manus suæ desideravit, revertitur. In quibus quinque cœnobiis quis hæsitet non sine labore ipsum habitasse?

Sed in Monasterio Mellicensi ter fuit Prior Clausstralis, pluries Subprior, bis quoque Vicarius Generalis, donec duo electi Abbates auctoritate Sedis Apostolicæ, cui dictum Monasterium immediatè subiectum est, confirmarentur. Haud dubiè in dictis Obedientiis, & aliis nobis ignotis non pauca gravamina sustinuit. Nunc tangamus Opuscula, quæ compilavit prosaicè & metricè, licet non semper servato ordine temporis.

In primis *Excerptum* satis utile fecit *super Quarto Libro Sententiarum ex Lectura egregii Sacre Pagine Doctoris Magistri Nicolai de Dincklspübel*, quam idem in Mellico composuit. Quod *Excerptum* fuit ignorante fratre Johanne cum multa admiratione in Studio Wiennensi ad pennas scribentium pronuntiatum.

Composuit & tertium breve Opusculum super Regula S. Benedicti præmisso themate: *hoc fac & vives*, quod *Memoriale Viaticum Regulæ* attitulavit, & in multis reperitur locis, quod occasione Schismatis inter sacrum Basiliense Concilium, cui adhærebat,

bat, & Dominum Papam Eugenium pro suo itinere ad cautelam composuit.

Collegit & *Glossam textualem super Novo Testamento*, interlineares Glossulas inferendo.

Consimile Opus fecit super Libro Psalmorum, nec non Expositionem titulorum, qui solent Psalmis præferri: & illud *Claviger Psalterii* nuncupatur, quia per titulos materia Psalmorum quasi per *clavem* ostium domorum aperitur.

Etiam parvum Opusculum de continentia cujuslibet Psalmi, quoad ejus materiam, breviter perstrinxit, ut sibi tunc videbatur, & hoc *Materiale* (a) *Psalmorum* vocitatur.

Item grande Opus super Biblia collegit cum magno labore de continentia cujuslibet Capituli, quoad sensum litteralem, & ipsum *Extractiones Biblie* attitulavit, & in nostro Monasterio Tegernsee de sua manu retinetur: & præter suam intentionem fuit nomen ejus notificatum, & conscriptum de bona littera ad suum Monasterium Mellicense transmissum fuit.

Confecit aliud simile compendiosius sub themate: *Quaecunque scripta sunt &c.* quod *Summarium de continentia Biblie* attitulatur.

Dictavit Opus Metricum super Biblia sub themate: *Colligite fragmenta*, quod *Fragmentum Biblie* nominavit, ubi pro quolibet Capitulo unum Versum dictavit secundum ordinem litterarum Alphabeti usque ad *V.* inclusivè, sic tamen, quòd loco litteræ *K*, a qua paucae dictiones inchoantur, *J* consona ponatur. Dantur & signa, per quæ *quota* Capitu-

(a) f. Memoriale.

pitulorum noscitur singulorum non cum gravi labore.

Confecit rursus aliud breve, quod *Gemma Bibliæ* dicitur, servato ordine litterarum alphabeti interpolatim, in quo unum metrum perstringit materias quandoque duorum, aliquando trium Capitulorum.

Dictavit etiam metricè notabile *Opus super Quatuor Libros Sententiarum*, ubi mira compendiositate cujuslibet distinctionis quasi tota materia comprehenditur.

Aliud breve dictavit pro qualibet distinctione, unum tantum versum fabricando secundum ordinem litterarum Alphabeti juxta formam omnino in Fragmento Bibliæ observatum.

Composuit etiam *Memoriale metricum super Regula beati Benedicti* pro quolibet Capitulo unum metrum juxta ordinem alphabeti litterarum, sicut in Fragmento Bibliæ observavit.

Confecit & alterum *brevius* secundum modum in *Gemma Bibliæ* tentum.

Confabricavit quoque *Memorialia metrica de vita S. P. Benedicti* secundum tenorem Libri II. Dialogorum B. Gregorii Papæ, unum *latius*, secundum *brevius*, & tertium *brevissimum*.

Item *Speculum Humanae Salvationis*, a quodam rhythmicè cum figuris aptis compilatum, pro quolibet capitulo originaliter exemplaris octo versus distat, & id *Compendium humane salutis* appellavit.

Compilavit *Tractatum brevem de felicitate Beatorum*.

Tracta-

Tractatum de ascensionibus cordis.

Expositionem Officii Capitularis.

Glossam super Mysticam Theologiam S. Dionysii ex Commentis Domini Linconiensis & Wercellensis collectum.

Excerpsit etiam *Consolatorium Viatoris ex Summa Galensi*, alias *Collectionum*, valde bona: nec non aliqua *exempla brevia de vita SS. PP. antiquorum.*

Plures quoque fecit *Collationes ad Conventum Mellicensem ex obedientia de cunctis festis sibi iuncta.*

Et *Quæstionem determinavit, an Monachis Ordinis B. Benedicti sanis & fortibus sit esus carnum concessus per Constitutionem Domini Benedicti Pape duodecimi*, & clarius ostendit, quod non sit eis indultus, sed partim restrictus.

Excerpsit *Tractatulos ex Libris Venerabilis Richardi de S. Victore de SS. Trinitate & Contemplatione Majori*, servato ordine competenti: etiam de eisdem libris sex, scilicet de *Trinitate*, & *Quinque de Contemplatione Majori*: nec non & de *Minori*, quæ alias de *Patriarchis* vocatur, breves sententias sive auctoritates excerpsit.

Quanta dictamina, alia prosaice, & præcipuè metricè fecerit, ignoramus, neque ipsum scire arbitramur, quamvis de nonnullis nomen ignoretur.

Plures etiam libros magnorum auctorum exemplariter scripsit, de quorum numero est *Expositio notabilis Domini Cardinalis super Regula S. Benedicti*, Johannis de Turrecremata appellatum.

Dictus

Dictus etiam frater pro quodam consanguineo suo, Canonico Regulari Ord. S. Augustini collegit *Brevem Glossam textualem super Regula ejusdem S. Augustini.*

Item *Avisamentum Prælatorum.*

Item *Formulam Metricam Vitæ Christianæ.*

Item *Tractatulum metricum de Quantitate Syllabarum cum Commento, & de Figuris Generalibus ex Doctrinali tractus.*

Item *Tractatulum de preparatione ad Missam, in Cella Mariæ collectum.*

Item *tres Tractatulos de Charitate, Humilitate & Hospitalitate.*

Item *multas Responsiones ad dubia sibi proposita.*

Item *Tractatulum reprebensivum cujusdam scripti a Cartusiano contra Regulam S. Francisci & Fratres Minores facti.*

Item *egregias & sufficientes fecit Responsiones ad plurimas Questiones varias & difficiles.*

Item *fecit Excerpta super novem Libros Reductorii Moralis Magistri Petri Berchorii de Pictavia.*

Denique pro cultu Dei scripsit Missalia tria, Gradualia, Nocturnalia & Diurnalia pro suo & usu aliorum.

Hæc pauca nos Fratres N. & N. in nostro Monasterio Tegernsee pro memoria viri consignavimus & nostrorum successorum. Nam ad Cœnobium nostrum affectum habuit singularem, prout rebus effectualiter & multiformiter ostendit, a quo etiam falsus est multa percepisse beneficia charitatis, quæ nolumus causâ humilitatis commemorare. Extra Visita-

fitationem generalem Monasteriorum Provinciae Salzburgensis Ordinis nostri, tribus vicibus nos ex charitate visitavit cum nostra non minima congratulatione & gaudio: ubi etiam, veluti humanum extat, ad certos habuit notitiam & affectionem plus familiarem.

Insuper Venerandi Patres & Praelati nostri fuerunt ipsi valde favorosi, scilicet Dominus Abbas Calpar Aindorffer, felicitis recordationis, nostri loci Reformatore, vir prudens & Zelator vitae Regularis. Similiter Dominus Conradus, de Weilheim oriundus, diligens Monasticae observantiae conservator & manutentor. Quamplurima praetermisimus & omittimus, ne adulari censeamur.

Obiit autem dictus vir Johannes Slitpacher tempore Domini (a) Martini Papae V. anno Domini 1418. auctoritate ejus Professus reformati Monasterii, sub anno Domini 1482. vigesima quinta Octobris. Cujus anima in sancta pace requiescat. Amen.

(a) Ita apographum mecum communicatum.

APPEN-

APPENDIX,

In qua nonnulla, quæ Vitam
Johannis de Weilhaim
ampliùs illustrant exhibentur.

I.

Petri de Schaumberg,
Cardinalis & Episcopi Augu-
stani

EPISTOLA (a)

ad Christannum Abbatem Mellic.

*Quem rogat, ut de suis quosdam Fratres mit-
tat, qui regularem disciplinam in Monasterio
SS. Udalrici & Afræ suo exemplo
sustinent.*

*Venerabili in Christo Patri ac Domino Chri-
stanno, Abbati Monasterii Mellicensis, Pataviensis
Diœcesis, amico nostro in Christo sincerè dilecto, since-
rum affectum in singulis complacendi cum desiderio
omnis boni.*

Venerabilis & Religiose Pater, in Christo Jesu
nobis dilectissime amice. Ad aures vestras
non sine ingenti jubilo cordis & claritate spi-
ritua-

Tom. VIII.

S s

ritua-

(a) Ex Cod. Mellic. G. 2.

rituali deducimus per præsentes, vepres & zizanias, quæ prò dolor in sato agri Dominici, Monasterio scilicet SS. Udalrici & Affræ, civitatis nostræ Augustensis, nobis pleno jure subjecto, procurante factore malorum operum pluribus retroactis temporibus pullulârunt, per gratiam Spiritus Septiformis, cooperantibus nobis ad id quibusdam notabilibus Prælati vestri Ordinis, quos ad ipsum laudabilius perficiendum vocavimus, aliquantulum excidimus, & in culturam redegimus, ut speramus, Deo gratam.

Cùm autem in præfato Monasterio paucitas sit Suppositorum & fratrum Religiosorum, saltem Monasticæ disciplinæ & regularis observantiæ expertorum: & ne propter penuriam agricolarum Deo placentium, scientiumque malas segetes a bonis evellere, contingat prædictas zizanias periculosius pullulare, & fundamentum positum demoliri: ideo ad vos tanquam ad hortulanum prædignum sacrae plantationis hortuli Patris vestri Benedicti beati recurrimus, cum exauditionis fiducia vobis obnixius supplicantes, quatenus sine temporis morula velitis aliquos de vestris fratribus, quos noveritis ad dirigendam & irrigandam istam novellam plantationem & surculos non ex integro virides, habiles & idoneos, & in Monastica disciplina & sacra reformatione moribus & scientia exercitados, ad præfatum nostrum Monasterium destinare festinetis, ut supra fundamentum solidè positum possint ædificia spiritualium virtutum solidius ædificari, in perpetuas æternitates permansura. In quo exhibebitis propria

pria vobis dictante conscientia obsequium Deo gratissimum, & nobis charitatem & benivolentiam nostris mentibus pro condigna retributione; siquando poterimus, conglutinabiliter imprimendam.

Datum ex civitate nostra Augustensi in crastino Epiphaniæ anno MCCCCXLI.

II.

Johannis Abb. Monasterii

SS. Udalrici & Afræ

EPISTOLA (a)

Qua vita transmissorum sibi Fratrum Mellicensium commendatur.

Universis & singulis Venerabilibus in Christo Patribus, Abbatibus Prioribus, Conventibus Ord.

S. Ben. presentes inspecturis, sinceram fraternamque in Domino Charitatem.

VObis & cuilibet vestrum harum tenore refulgeat, quod dilecti nobis in Christo Fratres Conradus de Geysenfeld, & Johannes Slitpacher Presbyteri, & Johannes de Ulma Subdiaconus, singuli suorum officiorum executionem ha-

S s 2

ben-

(a) *indidem.*

bentes, nobiscum per annum steterunt ob profectum regularis observantiæ, seseque benè, laudabiliter ac religiosè gesserunt. Quos etiam diuturnius cordicitus gratissimè conservâssemus nobiscum, nisi tam importuna iterata vocatio Illustris ac Magnifici Ducis Alberti Bavarix eos nobis abstulisset. Quapropter rogamus per viscera misericordiæ Jesu Christi, quatenus eosdem benignè, favorabiliter, charitativeque suscipere ac recolligere dignemini: in quo nobis ac Ordini gratum exhibebitis beneplacitum. Datum nostro in Monasterio SS. Ulrici & Affræ infra muros civitatis Augustensis situato, anno MCCCCXLII. quarto Nonas Maji sub sigilli nostri minoris munimine tergoteus appressi.

III.

Sigismundi Religiosi, Cœnobitæ Sancti-Udalricani, de vita & moribus eorundem & aliorum Fratrum Mellicensium, qui Monasterium S. Udalrici reformârunt, Testimonium, Chron. Augustani Parte II. cap. IV. apud Pistorium Rer. Germ. Script. Tom. III. pag. 607.

Juxta sacros Canones sanitas Orbis terrarum est frequens convocatio Conciliorum. Celebrato igitur Concilio Constantiensi ac dein inchoato Basi-

Basiliensi sancta Ecclesia maximè in Religiosis cœpit reformari. Sanè dudum Illustrissimus Dux Austriæ Albertus, post Rex Romanorum, ex Sublacensi Monasterio Patres impetraverat, qui Monasterium Mellicense Pataviensis diœcesis reformârunt, ex quibus post per Bavariam, Austriam & Sueviam multa sunt reformata. Nam & ceremoniarum cultus aptior & ex fonte primo, ubi S. Benedictus plantavit, religio purior hauriebatur. Præerat tunc huic loco mitis animi vir Dominus Joannes, de quo diximus, qui dissimulando in regularibus dissolutionem in subditis generare sinebat: ob quæ primò ab inclyto Ecclesiæ membro, Domino Petro, Episcopo Augustensi, post Cardinali & Legato Apostolico sæpius correptus, deinde a Patribus Ordinis coactus assumere fratres de præfato Monasterio & sacram observantiam inducere fuit. Assumpti sunt inprimis inter alios duo gemelli Fratres, quî aliis coadunatis pro tempore sacris actibus insistebant. Erat odor ille aliis ad vitam, qui perseverabant in loco, aliis in mortem, qui exierunt, fugientes salutem. Reducitur Divini cultus frequentia, silentium in claustrum, devotio in Ecclesiam, castitas in Dormitorium, parsimonia in Refectorium: proscribuntur a Conventu Fratrum vitia, præsertim proprietatis: intercluditur aditus secularium &c.

Duo illi *gemelli Fratres*, quorum meminit loco citato *Sigismundus*, fuere *Venerabiles Patres* Henricus & Johannes, de *Carniola* cognominati, quorum sequens Epitaphium in Monasterio S. Udalrici habetur:

EPITAPHIUM

Ven. FF. Henrici & Johannis
Mellic. O. S. Ben. hujus Monaste-
rii SS. Udalrici & Afræ Refor-
matorum.

Sanguis, conditio, quos ætas officiumque
Junxerat, hos pariter nunc humus una tegit.
Nam genuit fratres Carinthia terra gemellos,
Quæis laudis titulum vita probata dedit.
Henricus primo nomen, reliquoque Johannes,
Atque Prior primus, Subprior alter erat.
Hi duo virtutum plantas servare salubres:
Unde celebre sibi nomen uterque tenet.
Namque Monasterium hoc recto de tramite lapsum
Instauraverunt auxiliante Deo.
Mille, quater centum quinquaginta dedit & sex
Natalis Domini, cum moriuntur ibi,
Prima dies Maji primo fuit ultima vitæ,
Alterius quintâ mors fuit ante die.

IV.

Johannis de Weilhaim

Brevis narratio (a) de tentata
anno MCCCCXLII. reformatione Mo-
nasterii Ectalensis O. S.
Bened.

DOminus Albertus Bavarorum Dux impetrata a Concilio Basiliensi facultate reformandi Monasteria sui Dominii, audiens duos Monachos (b) Monasterii Mellicensis, de suo principatu oriundos, Augustæ in Monasterio SS. Udalrici & Afræ constitutos, scripsit illis successivè quatuor epistolas invitando eos ad terram suam. Qui primum dissimulantes, post secundam litteram Principis rescripserunt, humiliter eum rogantes, quòd permetteret ipsos Augustæ demorari, quia consolationem jam de Mellico acceperant super scrupulis suis, occasione schismatis habitis. Cum verò tertio rescriberet, unus dictorum fratrum vadens Monachum, petiit, ut sineret eos causis expressis stare in dicto Monasterio S. Udalrici, ad quod sub expensis ejusdem missi fuissent. Qui non acquiescens viva voce desiderium suum confirmavit, & id ipsum Augustæ, cum Dominum Fridericum Romanorum Regem illic comitatus fuerat, replicavit.

S s 4

Tan-

(a) *Ex Cod. Mell. H. 45.*

(b) Johannem de Weilhaim & Conradum de Geisenfeld.

Tandem dicti Fratres ejus petitioni annuentes, deducti sunt ad Principem, eo vecturam providente ad Monacum, & inde transvecti ad Monasterium Beatæ Virginis in Etal Frisingensis Diœcesis, quò in Vigilia Dominicæ Ascensionis applicuerunt. Cùm autem post multos labores & diligentiam parùm proficerent ob omnimodam Abbatis inutilitatem locum deferere deliberârunt, præsertim quia idem Abbas ipsis violentiam inferrenisus est. Dominus verò Dux, ipsorum discessionis audiens voluntatem ipso Abbate referente, sed causas obticente, infra octo dies per nuntios tres misit præfatis fratribus litteras, desiderans, ut ibidem perseverarent. Qui habita deliberatione, ad nullum tamen terminum, se obligantes, in loco usque medium Quadragesimæ perdurârunt, & tunc abscesserunt, unus (a) ad Tegernsee, alter (b) ad Mellicum redeundo.

Ex præmissis patet, quàm cautè est Monachis, reformaturis aliquem locum, agendum, cùm dictus Dux, plurimùm fervidus ad Monasteriorum reformationem, non habens collaterales, negotium promoventes, paulatim rem reliquerit infectam. Tandem tamen fundavit novum Monasterium Ord. S. Ben. in monte Andechs, qui vulgariter *Sanctus Mons* nominatur, ubi moriens in capite Quadragesimæ in civitate Monacensi est adductus & sepultus, prout vivus locum elegit. Cujus anima requiescat in pace. Defunctus est anno Domini 1460.

V.

(a) Conradus. (b) Johannes.

V.


Angeli Rumpleri Testimo-
nium de Joanne Slitpacher de
Weilhaim, *Histor. Formbacensis Lib. II.*
in Thesauro Anecdotor. Noviss. Tom. I.
Parte III. col. 447.

HUjus (*Caspari Abbatis Formbacensis*) tempo-
ribus quid acciderit, compertum non ha-
beo: tradunt tamen, alteram reformatio-
nem sub eo accidisse. Verum non alia statuta tra-
dita sunt quàm in prima, nec alii reformatores affue-
runt. Abbas tamen vix nomen retinuit. Nam
in pluribus negligens fuerat: unde & increpatio-
nes non evasit. Ut tamen diutiùs perseveraret,
Joannes Schlitpacher, homo religiosus, & summæ
in rebus Divinis prudentiæ, anno Prioris officium
tenuit, cui adjunctus fuerat Frater, quem *Jacobum*
vocitabant. Huic non tantam laudem adscribunt
ut Joanni. Nam, quod reprehensibile est, Joanne
Lectiōi regulari operam dante, is cum cæteris fra-
tribus gulæ & Baccho indulgebat. Unde quod
ille ædificabat, hic destruebat. Nam ajunt, *Schlit-*
pacher semper quatuor horas legere solitum. Ve-
rùm peracto anno ad proprias ædus reversi sunt,
& Frater Georgius Prioris officium
suscepit.

JOHANNIS
HOC NOMINE TERTII
EPISCOPI EYSTETTENSIS
HISTORIA
REFORMATIONIS MO-
NASTERII SANCTÆ WAL-
PURGÆ

Ord. S. Bened.

Ex MS. Cod. Bibl. Mellicensis.



INCIPIT HISTORIA

Iohannes Dei gratiâ sanctæ Ey-
stettensis Ecclesiæ Episcopus devotissimis
Christi Virginibus, carissimisque Soro-
ri ac filiabus Sophiæ Abbatissæ, Wal-
burgæ, Katherinæ & Margarethæ
Sanctimonialibus Monasterii sanctæ Walburgis Civi-
tatis nostræ, restauratæ Sacræ Religionis perpetuum
stabilimentum; & ad coronam laboris thalamum in-
troire Christi sponsi vestri.

Deus, qui glorificatur in Concilio Sanctorum,
magnus & excelsus super filios hominum, vocat, quos
eligit, relictisque paternis ædibus in terram peregri-
nationis abire jubet, & quæ illic super firmam pe-
tram ædificavit, solidissimo incremento juxta Divi-
num promissum confirmat, ut nec irascentibus ven-
tis, aut jaculis antiqui hostis collabi queant. Hæc
vobis consolatio sit Dilectissimæ Soror, & Filiæ, ne
tædio vincamini, exivisse terram nativitatis vestræ
ac de domo paterna, Monasterio scilicet Montis
Beatæ Mariæ Virginis apud Bodardiam, in qua dul-
cibus

eibus amplexibus Issengardis prudentissimæ fœminæ Matris vestræ in omni Regulari disciplina educatæ estis. Neque terreamini in terra aliena procellis adversantibus, sive laboris magnitudine, Sponsi vestri Salvatoris nostri imitantes vestigia, qui de summis cœlorum descendens, in hujus exilii valle peregrinatus est, non alia utique, quàm nostræ salutis causâ, cujus amore, si verè illum diligitis, omne exilium præsentisque seculi æumnas, & misérias pro nihilo ducetis. Quin imò libenter portabitis, quando rependere ei gratitudinem rectè cogitatis, à quo & æterna gaudia, immensamque remunerationem consequi speratis, cùm ipse pro vobis sustulerit majora, quibusque nihil dignum retribuere valetis.

Sed & si actus atque merita præclarissimæ & Illustris Virginis Beatæ Walburgæ Patronæ Vestræ consideraveritis, cujus vitam & gesta legentes, ejusque stillantes & miraculis coruscantes cottidie cernentes, hoc ipsum compertum habetis, reliquisse ipsam pro Christo parentes, honores, divitias, & quæ mundi hujus sunt, contempsisse, universam exivisse potentissimam Anglorum Regiam domum, ac in terram alienam penè desertam assumpto sacro velamine in Religionis habitu, magnos Christi Confessores, Germanos suos secutam, quorum primus Willibaldus Episcopus, alter Wunebaldus Abbas sub Regularis militiæ censura ipsam Christo famulantem diligentissimè instruxere. Quæ cùm tam amplissimo regno, splendidissimæque gloriæ Christi amore se subtraxerit, districtioni monasticæ corpus nobile & delicatè nutritum subjiciens, magnum imi-

ratio-

tationis, virtutum & sanctimoniarum vobis præstat exemplum, ut transitoria singula respicientes, cupiatis terrena pro cœlestibus commutare, ac mundi gloriâ, universisque concupiscentiis carnis abjectis velitis cum illa in Christi thalamo æternaliter conregnare.

Multæ, ut arbitror, hujus seculi Virgines sunt, & utinam paucae, quæ si scirent, post annales & amplius carceres reginas se futuras, aut in magnis potentatum divitiis seu honoribus regnaturas, facile poenas omnes pro gloria transitoria tolerarent: quanto magis decet Christi sponsam afflictiones, molestias, & quæcunque sponsus in ea permiserit, spe æternæ gloriæ perpetuò mansuræ, patientes sustinere, cum certa sit, quod fidem is non fallat in cœlis, cui fidem servavit in terris, attestante Apostolo: *Quia Deus fidelis est, & verax*, quæ repromisit, fideliter & observat?

Ad hoc non parum movebunt vos Dei in vos collata beneficia. Virginitatis namque candore ab illo decoratæ estis, quæ cum super excellens Divinumque munus sit, hanc se duntaxat consecutas fatebuntur, quibus cœlesti donò largitum fuerit. Præterea agebat sapiens neminem continentem, nisi Deus det, esseque Sapientiam scire, cujus est hoc donum. Admiranda etenim virtus corporis integritas tum Angelicæ comparticipat naturæ, cum vim consuetudinis vincit, ardentem in membris flammam extinguit, amorem conjugis, liberorumque dulcedinem contemnit, ac si quid reliquum est carnalium voluptatum, desiderio cœlestium superat. Quæ cum

cum corporis vires excedant, non suis meritis usurpet humana fragilitas, quod ex gratia cœlestis possidet largitoris, sciatque, quæcunque hanc custodierit illæsam, tam se gratam Deo, ut jam inter Angelicos censeatur concives computari.

Esse autem virginitatem Deo placitam, & quasi Divinæ amicam naturæ, ipse non solum postquam Unigenitus æterni Patris filius humanam in terris Matrem Virginem, Virgo in ævum permanens delegisset, multosque utriusque sexûs virginitatis flore à se ditatos, alios quidem miraculorum prodigiis insignitos, alios verò Martyrum coronâ perseverante constantiâ laureatos, cœlestis regni fecerat hæredes & consortes, ostendit: verum etiam in retrò seculis, & apud Hebreos, & illos, qui Divinæ Religionis fuerunt ignari, portentis quibusdam, & signis demonstravit. E quibus scimus quosdam prophetiæ spiritu polluisse, nonnullos contra naturæ cursum exhibuisse miraculum. Et ut illas, quales Divinæ literæ commemorant, prætereamus, fuere apud Romanos Vestales Virgines, quarum una, Æmilia nomine, dum in templo Vestæ pro imperii sui officio lampadem accendere tentaret, extincto foculo carbonem adjiciens emicantem statim ignem accepit. Altera ejusdem Ordinis Virgo Vestalis aquam in ministerium hauriens, dum repentino impetu cribrum pro vase arripuisset, aquam ipsam in cribro deferens non effudit.

At illa corporis integritas Deo perfectè grata atque placens comprobabitur, quæ in voto perpetuæ continentiæ, voluntate spontanea consecratur. Quod hinc comprehendere potestis: quoniam si rem alienæ

næ potestatis, quamvis pulchram aut pretiosam admiremur, placeatque hæc pro tempore aspectu, nusquam tamen ex integro diligitur, nisi in vestrum dominium fuerit translata. Quod si etiam usu illius accommodato parumper perfruamini, non censebitis propterea, quin imò expleto commodi usu omnis ad eam cessabit affectus. Sic & Christus in sibi duntaxat desponsatis virginibus, & quæ se illi perpetua castitate dedicârunt, admiratur ac diligit virginitatem, in tantumque complacet, ut nihil gratius sibi offerri potuisset; quamquam ad tempus fortasse contineas, veluti seculi virgines, quæ vel ob inopiam, aut alias fortuito sæpè continent, non magni hujusmodi continentiam Dominus existimabit. Hinc fructuosiora opera dicimus, quorum exhibitioni votum sive obligatio in Deum ad ea perficienda præcedit, illaque minora, quæ quis sua sponte Deo præstat, faciatve vel ne, suo arbitrio reservans: veluti majorem mercedis gratitudinem, consequitur, qui arborem simul & fructus donat, quàm is, qui solos fructus alicui offert. Propterea Dominus & Salvator noster, dum in Evangelio Discipulum suum descripsisset, illum esse dicebat, qui, postquam ejus amore parentes, agros & domum reliquisset, etiam se ipsum abnegaret, hoc est, voluntati propriæ renunciaret, tollens crucem & sequens Christum.

Nec idcirco dicitur minùs sponte Christum sequi, quia obligatus voto, quod promisit, explevit. Nam ut cum effectu satisfaceret, Deumque tanquam legitimum creditorem de solutione certum redderet, ad promissum constitutum sua sponte se obligavit supererogans

erogans obligationem, ad quam non tenebatur, & quod sui erat arbitrii se privans, ut ne persuasore iniquo, etiam si vellet retrocedere, creditorem suum fallere posset: Denique & videmus sic homines agere in seculo, ut quos ex amore beneficiorum capiendorum certiores reddere volunt, promissionibus obligationibusque firmioribus securos constituunt, ac si quid illis his præcedentibus donatum fuerit, multò gratiùs acceptant, & inter chara beneficia computant. Et si quidem promissor debitum fallat, licet aliud munus liberaliter tibi offerat, parvam utique gratiam referes, sed solutum debitum gratiùs te accepisse affirmabis.

Ad promissorum verò evidens testimonium gloriosissimæ martyres, ac Christi sponsæ Beatæ Agnes & Lucia non immeritò adducuntur, quarum virginitatem Ecclesiæ Historia plus cæteris, pari etiam martyrio laureatis, commendat: non alia utique de causa, nisi quia cœlesti sponso continentiaæ votò astrictæ, terrenum sponsum contempserunt. Unde utraque præter miraculorum virtutem prophetiæ spiritum meruere, quo & pacem Ecclesiæ à Deo datam, quave corona in æterna gloria cum Christo decorandæ forent, quasi jam accepissent, prædixerunt. Hinc præclarissima Agnes ait: *Induit me Dominus cyclade aurò textâ, & tanquam sponsam decoravit me corona, posuitque signum in faciem meam.* Cujus quidem coronæ meritum sibi duplicandum à Domino affirmabat Lucia Virgo Christo devota, si vim etiam in corpore passa mentem incorruptam retineret. Hanc reor coronam seminis illius, quod jaëtans Evangelicus

gelicus agricola centesimum fructum profert : & signum in facie positum contestor illorum , qui non coinquinaverunt vestimenta sua , suntque sine macula , ac signati in frontibus suis sequuntur Agnum , quocunque ierit. Quod itaque Agnes Beatissima in vita prædixerat , post mortem apparens in veste splendida & gemmis ornata parentibus demonstravit , sequens Agnum nive candidiorem per omnes cœlestis aulæ mansiones , locum & nomen sempiternum melius à filiis & filiabus in domo Domini , veluti Regia sponsa jam consecuta.

Quas quidem connubas vestras vobis exemplum proponite devotissimæ Christi Virgines & sponsæ , certas vos reddentes , si Sabbata atque mandata Domini custodieritis , lucidissimas mansiones , locumque & nomen melius in domo ejus recipietis. Non fallit cœlestis promissor , si fidem observaverit humanus constitutor. Novit legem conjugii , quam statuit , ut mutua & reciproca sit in matrimonio obligatio , tantumque debeat maritus fidei , quantum observaverit uxor. Si fidem integram Christo tenueris in terris , reddet tibi coronam , quam descripsit Agnes futuram in cœlis.

Sed ne vos fallat opinio : non blandiamini , quasi sola corporis integritate hanc posse consequi existimetis. Certè conjunx legitima , quamvis casta , etsi omni obediat corporis officio , dissentiat autem voluntati mariti , jussionibus illius minimè parens , garrula fuerit fortasse , semper renitens , quietisque impatiens , nusquam perfectè ab illo diligitur , chara habebitur ; quoniam amor magis animorum

concordiam desiderat quàm corporum. Consensu namque contrahitur matrimonium, & individuam vitæ consuetudinem teneri vult. Quinimò hoc inter carnale conjugium, & spirituales desponsationem distat, quòd, ut de primo inquit, *erunt duo in carne una*, & de altera ait Apostolus: *qui autem adheret Domino, unus spiritus est*; sicque necesse habes, quæcunque Christo desponsata es, ut unus spiritus, uniusque voluntatis cum illo existas, nunquam ab illo discordes: quæ prohibuerit, evites: quæ mandaverit, exequaris. Præterea idem Apostolus Virginem Deo placentem asseruit cogitare, *quæ Domini sunt, ut sit sancta corpore & spiritu*. Non denique magni existimavit Dominus carnalem etiam parentum cognationem, quasi illi affectiones præbere videretur, sed cum se quærerent; *quæ est mater mea, & qui sunt fratres mei?* respondit: *qui facit voluntatem Patris mei, qui in cœlis est, hic meus frater, soror & mater est*, huic omnes affectiones dandas contestans, qui Divinæ pareret, satisfaceretque voluntati, non ei, qui sola carnis ratione niteretur, ob quod & matrem non primo sed ultimo loco expressit. Ostendit & hoc factò, dum lectissimæ Martyri suæ Agathæ in tabula meritorum taliter describeret insignia; *mentem sanctam, spontaneum bonorem Deo, & patriæ liberationem*, ut quæ mentem sibi sanctam, honoremque spontaneum Deo exhibuisset, patriæ liberationem suis precibus obtinuisset.

Mentem igitur sanctam, dilectissimæ filiæ exhibete Christo. Diligit namque corda pura Dominus, hisque se ostendit, quemadmodum & in Evangelio ait :

ait: *Beati mundo corde, quoniam ipsi Deum videbunt.* Hinc Propheta exoptat: *Cor mundum crea in me Deus.* Mens illa sancta est, quam vir gentilis Tullius in suis Officiis (a) descripsit dicens: *Mente pia nihil divinius dedit homini Deus ipse.* Hac contemplamur Deum, in corpore positi, ad ecclesia sursum erigimur, ipsum adoramus, cum ipso confabulamur. De hac mente sancta reor Apostolum Joannem dixisse: (b) *Si cor nostrum non reprehenderit nos, fiduciam habemus ad Deum, & quidquid petierimus, accipiemus ab eo: quoniam mandata ejus custodimus, & quæ sunt placita coram illo, facimus.* Hæc, inquam, mens est ornerus ille præcipuus sanctarum mulierum, quem definit Apostolus Petrus, summus Ecclesiæ Pastor, ut sit (c) *sancta conversatio earum in timore, non extrinsecus capillatura, aut circumdatio auri, aut indumenti vestimentorum cultus, sed qui absconditus est cordis homo in incorruptibilitate quieti & modesti spiritus, qui est in conspectu Domini duplex.* (d) Interior ergo homo est, quo spiritu vivimus, spirituque coram Deo per fidem ambulamus; qui si quietus & modestus fuerit, erit in conspectu Domini meritò duplex; si rectus & simplex, totum corpus lucidum reddet. Si autem nequam, hoc est, perversa fuerit mentis intentio, totum corpus tenebrosus erit. Videte igitur charissimæ, ne lumen, quod in vobis est, tenebræ fiant: quin imò per rectam intentionem in interiore homine Christo

T c 2

per

(a) *Lib. III.* (b) *I. Joan. III. 21. & 22.* (c) *I. Pet. III. 2. &c.* (d) *ita Cod. Vulgata: locuples.*

per fidem & lucis opera cohabitare studete, ne in sola carnis puritate gloriantes, neglecto oleo bonorum operum, extinctisque lampadibus famæ laudabilis vitæ à thalamo sponsi vestri, quod absit, cum fatuis virginibus excludamini.

Sed dicetis fortasse: cur nobis præ cæteris tantum (a) commemoras Walpurgam & Agnetem Virgines Sanctas? Ad quæ ego: certè, quia illarum apud Deum obtentu puto vos ad hunc locum destinatas. Indicant hoc clarissima omina, si poni debeant, quæ ostenderunt. Nam cum sæpè mecum cogitasset, duceremque noctes insomnes, quibus mediis abusus noxius, & detestatæ vitæ enormitas insolentium mulierum, quæ locum sacrarum stillantium Reliquiarum occupabant, è medio tolli possent, revivisceretque regularis vitæ sanctitas, jam penè pedibus conculcata, maximas recuperandæ salutis reperimus instantias. Imperitum etenim vulgus, quod id plurimum vano errore ducitur, hanc rem, usum videlicet, longævo tempore usurpatum mutari impossibile judicabant. Ex hinc animatæ Moniales dissolutæ ac magis resistentes, quæcunque monita salutaria pro nihilo ducebant. Concurrabant & his parentum, cognatorum, affiniumque præsidia dicentium, quia nobilibus ortæ parentibus, religionis asperitatem ferre non valerent. Hinc adversus renitentium contumaciam Ecclesiasticâ censurâ processum est, resque ad summi Pontificis audientiam deducta. Nec defuere minæ, quod causa
perni-

(a) *Cod. tanti.*

pernitiosa malique exempli armis defenderetur. Sed quia Dominus est dissipans consilia gentium, & reprobatur cogitationes populorum, remittit Pontifex Maximus causam Episcopo, mandatque, ut juxta officii debitum evellat & dissipet, plantet, & ædificet. Intelligunt sanius cognati de salute agi cognatorum, animosque laxant iratos. Interea, ut ad cor revertantur induratae permittit Dominus unam ex his affligi pustula in facie, quem morbum cancrum appellant, vitamque miserabiliter cruciatae extinxit. Aliæ insolite lascivientes, scandalis subactæ, cum dedecore plurimo evagantur. Verum ne quæque opportuna obmitterentur, vocati sunt Patres Religionis, viri probatiores, qui locum & personas circumspicientes statuere, quæ disciplinæ monasticæ aptiora videbantur.

At incassum acta sunt omnia. Simulatæ nonnullæ obtemperavere, ut ficta fide cautius fallere possent. Aliæ relicto loco in viam alienam abierunt. Non minus tamen curæ nobis fuit, quomodo personis in vita regulari exercitatis collapsam religionem repararemus vagabaturque mens non parum ad diversa. Inspirato autem consilio cum fama insignis monasterii Montis Boppardiensis ubique crebresceret, per venerabilem, probatissimumque virum Rudolphum Decanum Wormaciensem Religiosissimam faminam Isengarden, Matrem vestram, accersiti obtinuimus. Quid plura? quod Deo auctore agitur, sanctorum precibus facile impetratur. Factum est, ut, dum illa mittendas vos delegisset, reluctante maligno hoste, quæ locum sanctæ Walburgis

contumaciter occupabant, non modicè ad malum agitabantur. Obseratis nempe ostiis, dejectis muris dum obeditioni resistere tentarent, ea die quasi victæ, armis depositis ad fugam omnes se converterunt, malitiæ suæ reliquias gravi Monasterii jactura relinquentes, cui omnia munimenta jam abstraxerant.

Consolatio verò Divina vestro adventui quàm plurimum præfidiata est. Advenistis tutè, nullis molestiæ insidiis. Sed & fato quodam pro vestro stabilimento, quæ Romanus concesserat Pontifex, illico supervenêre. Necdum tamen his consenserat ex antiquis Monialibus Abbatisa Elizabeth superstes, mulier utique prudens & circumspecta, quæ quamvis in primis renitens, divino tamq̃ ducta perluafore faciliè vobis assentiens, omnem monasterii curam lætanter Sororis Sophiæ commisit manibus. In Natalitio itaque Beatissimæ Agnetis sacratæ Virginis locum ingressæ Angelum Domini præparatum invenistis, qui & sordes præcedentium purgaret, sequentibusque mundatum relinqueret. Incepistis dehinc dirutas reficere officinas, ut juxta Apostolum, *non quod spiritale, sed quod animale prius esset, deinde quod spiritale*, jaciendisque fundamentis grandis subacta est profunditatis molestia, ut suspicatus sit nemo tantam laboris difficultatem superventuram. *Quod verò difficilius, hoc præclarius*, inquit Cicero. Meritis castissimæ Christi Sponsæ Beatæ Walburgæ Patronæ vestræ ad consummationem felicem perducentur ædificia & officinæ necessariae.

Supereſt

Superest autem, ut ad spiritualis ædificii opus manus apponatis: propter id enim priora inchoata sunt, nec dicitur quicquam gestum, dum restat aliud faciendi. Ad reerigendam, reformandamque suffocatam regularis vitæ disciplinam nobis elaborandum est. Quod tum difficile fortassis putatis, quia de loco quietis secretique otii dulcedine existis, pugnam adversus indomitas, insolentes, impatientes-ve Monachas suscepturæ, quæ nec subesse, aut disciplinam ferre norunt; quin imò abjecto iugo Domini, suavem contemplationis cibum fel & amarum dicunt, auribus percipere salutis verbum contemnunt, emendationem vitæ aspernantur, correctionem vitiorum non sustinent, nullis Superiorum præceptis obediunt, Regulam & quicquid iuste sancitum, si transgrediuntur, levifaciunt pro libito propriæ voluntatis, etiamsi indecens, indecorum impudicum-ve sit, agere volunt, student corporis delitiis, carnis voluptates sectantur, nec aliquod obscœnitatis genus obmittunt, si non loci oportunitas prohibeat.

Porro luctamen hoc acre suspicemini, amantissimæ, si quæ ex præcedentibus ad vos revertantur. Neque tamen bellum recusabitis Christi amore, ac spe confortatæ æternæ gloriæ, memores, quod ait scriptura: *Nemo coronabitur, nisi legitime certaverit.* Existimatisne, magnum vos in monasterio sub quiete & tranquillitate præstitisse obsequium Deo? Fateor quidem non parvum hoc esse fructum labiorum vestrorum consentientium nomini ejus: sed nunc excellentiorem viam vobis demonstro, quoniam majora pro laude ipsius vobis debentur certamina,

ut patienter toleretis adversa, corripiatis inquietas, consolemini pusillanimes. Hæc vobis gratia erit apud Dominum, qui ex numero plusquam centenario ancillarum suarum ad hoc opus singularis dilectionis suæ dono vos deputavit. Certè nulla re majus charitatis indicium attestante Joanne Apostolo Deo poterimus [exhibere] quàm si sicut ipse pro nobis animam posuit, ita & nos pro fratribus animas ponamus. Unde cùm percunctanti sibi à summo Ecclesiæ Pastore, an eum diligeret? responsum foret, quòd ipso teste eum amaret, non aliud illi imposuit, quàm ut oves pasceret, omnibus dans intelligi hoc præcipuum fore dilectionis divinæ signum, si proximos pascendo pro salute illorum etiam nos ipsos poneremus. Si ergo peccantem ab errore iniquitatis suæ revocas, si titubantem & pusillanimum confortas, si ignorantem & dubium, qualiter in via Domini ambulare debeat, instruis ac doces, cæterosque errantes in viam rectam perducis, nonne Deo reddis animas, quas diabolus conabatur auferre? In hoc gratum Deo exhibebis obsequium, offeresque sacrificium acceptum, cùm id tua cura tuaque diligentia consequatur, pro quo se ipsum Deo Patri holocaustum immolavit. Tum autem gratius erit, si ex præda antiqui hostis Deo, quod suum erat, recuperaveris, Evangelio sacro attestante: *Gaudium est Angelis Dei super uno peccatore pœnitentiam agente, quàm super nonaginta novem justis, qui non egent pœnitentia.* Qua contestatione Divina clarè convincitur, majoris meriti mercedem illos absque dubio apud Deum consecuturos, qui reducendis errantibus,

bus, reformandisque perversis moribus operas impendunt, quàm si loca pia & religiosa pro his, qui justi sunt, erigerent: sicut & lex imperatoria laudabiliorem illum judicat, qui opus non benè factum reformat, quàm illum, qui primus adinvenit.

Quod si laboris magnitudini conferre velis, hoc ipsum comperies, multò gravius onus pro tollendis abusibus, renovandisque bonis moribus tibi incumbere, quàm si bonum aliquod aut ordinatum ex novo statueres, sive benivolos animos ad recta sectanda induceres. In primis namque pugnandum tibi erit adversus repugnantes defendentesque diu usitata; etsi absurda sint. Nemo enim de se malè sentire vult, pauci suos errores cognoscunt, quin & errata sæpè defendimus, & si meliora proponantur, veterum usu allecti abhorremus, dicente Evangelio: *Nemo bibens vinum vetus, statim vult novum. Dicit enim, quia vetus melius est.* O quàm benè attendunt scripturam hanc utriusque Ecclesiastici statûs homines nostri temporis, qui benè agere recusant, & perversè vivere quærunt! Quot glossis veteres abusus defendunt, non reminiscetes, quid doceat Apostolus: *Expurgate, inquit, vetus fermentum, ut sitis nova conspersio.* Et alibi: *Renovamini spiritu mentis vestræ, & induite novum hominem, qui secundum Deum creatus est.* Difficile est valde in his destruere corpus peccati, ut amplius non serviat peccato, sed tamen non impossibile: potest enim Dominus de lapidibus suscitare filios Abrahæ: Et vineæ cultor nunc novas vites ponit, veteres verò præcidit, suffodit, stercus apponit, quo reducat,

T t 5

ut

ut fructum plus afferant. Sic omnes nos Dominus vult adhibere diligentiam, nihilque incultum in sua vinea remanere.

Ad hanc culturam in terra aliena vos posuit idem Dominus, Religiosissimæ Soror & filiæ, ut & antiquas sterilesque arbores diligenter colendo fructiferas reddatis, & novas plantando recens & nobile germen suavium fructuum Christo relinquatis, sicque in thesauro spiritualis lucri vestri nova inveniat & vetera. Non vos terreat in hoc delectabili labore alienæ patriæ asperitas: quoniam à mundo seclusæ omne solum patriam existimare debetis, quæ nihil proprium in eo possidetis. Mementote, quod semper electos suos Dominus peregrinari jussit, sicut ipse ad nos peregrinatus est. Et ne longiores petamus, Illustrissima Patrona vestra vobis testis existit. Minores forsitan prospexit Dominus fructus vestros, antequam exiretis; hinc vult, ut planta transplantata fortius crescat, qui ait, Prophetam non esse acceptum in patria sua. Si igitur summis electis suis pares vos hoc munere constituit, videte, ne ingrata tanto beneficio reperiamini, neve in vacuum gratiam Dei accipiat. Ipse vobis assistet, qui dicit: *In tempore accepto exaudi vi te, & in die salutis adjuvi te.* Non patietur labores vestros incassum ire. *Administrat enim, ut ait Apostolus, semen seminanti, & multiplicabit semen vestrum, augetque incrementa frugum justitiæ vestræ, ac tandem reddet vobis mercedem laborum Sanctorum suorum.*

Non tædeat vos, neque abhorreatis habitare cum perversis & malis: quoniam hæc est probatio fidei

fidei vestrae. Non enim satis bonus censetur, qui cum bonis bonus est, sed, qui inter malos nihilominus bonus perseverat. Inde beatus Job testatur dicens: *Frater fui draconum, & socius struthionum.* Legitur & Loth in Sodomis cum malis bonus extitisse, qui fugiens, de securitateque confidens graviter peccavit. Denique sic sæpè Dominus bonis malos associat, ut per eos latentem virtutem illorum exerceat. Sic beato Martino Bricium adjunxit, patientiamque ejus per illum comprobavit. Unde minime Religiosos illos, sive quodcumque alios approbamus, qui, cum persecutionem, quamvis modicam apud fratres, aut socios sustinent, statim fugæ remedium quærunt, putantes in locis aliis posse Deo securius, quietiusque servire, non animadvertentes, quod *si desit animus, non adjuvat locus*, ut inquit Gregorius. Nec te putabis in loco alio securiorem futurum, qui hostem habes illicò te secuturum. Quod si ad Dominum te converteris, hic tibi auxilium præstabit, cujus oculi in omni loco contemplantur bonos & malos.

At non inficior, quin imò & affirmo, in sanctis Deoque sacratis locis, præcipue autem circa Sanctorum venerandas Reliquias posse illorum patrocinio multa gratiarum dona impetrari. Hi enim loca pia sanctificant, in quibus & Deus glorificatur, virtutes & miracula Christi fidelibus ostenduntur, ipsique intercessores continui apud Altissimum pro his existunt, qui nisi nos defenderent, & tuerentur, iram Dei, quam peccata nostra provocant, graviori vindicta sæpè sæpiusque haud dubium sentiremus.


Igitur

Igitur dilectissimæ Christi Virgines & sponsæ, glorificate nobiscum Dominum, qui in hoc consilio Sanctorum suorum, Patronorum nostrorum Willibaldi Episcopi & Walburgæ Virginis huc vos perduxit, & ad reformandum locum istum, instituentumque sanctæ Regularis observantiæ atque monasticæ vitæ normam posuit, [Eundemque] devotè invocate, quatenus sic mentes vestras illuminet, vires perseverantia corroboret, ut illorum intercessionibus adjunctæ valeatis opus Domini bonum, quod incepistis, ad suam laudem, multorumque salutem feliciter consummare, recepturæ [ad] hujus finem vitæ cum virginitatis corona præmia vestri laboris sempiterna, quæ vobis sponsus vester Christus pariterque nobis præstare dignetur regnans cum Sanctis omnibus in secula benedictus Amen. Datum Eystett in castro nostro Montis S. Willibaldi VII. die mensis Februar. Dominicæ Incarnationis anno MCCCCLVII. sub Pontificatu Sanctissimi Domini nostri Calixti Papæ III. & Imperio Inviictissimi Cæsaris Friderici III. Romanorum Imperatoris feliciter regnantis Amen.

ANO-

**ANONYMI
CARMEN
RHYTHMICUM
VETUS
DE MISERIIS ORDINIS
MONASTICI.**

Ex Cod. MS. Mellic.



Olim Ordinem nostrum Principes ama
Et Romani Praefules ipsum honora
Grata privilegia gratis nobis da
Et praeter suffragia nihil postula } bant.

Nunc est tributarius idem Ordo fac
In communem hominum sortem est redac
Servituti sub jacet totus, & confrac
Pro subventionibus ad usuras trac } tus.

Plures domus Ordinis debitis gravan
Et ex hoc pericula magna generan
Nam, ut debitoribus debita solvan
Oportet, quod redditus vel terræ vendan } tur.

Bona nostra tradita Ordini jam pri
Successores filii auferunt ei
In factis hujusmodi peccant multum qui
Primam eleemosynis non servantes fi } dem.

Olim dum simplicitas Ordinis vige
Nos laudabant homines, nullus nos læde
Collectas ab Ordine nemo require
Sed Ordo pacificè Deo servie } bat.

Nunc

Nunc videntes homines grandes appara
 Equos, & Sammarios, splendidos orna
 Dicunt: nisi locuples esset horum Sta
 Non valerent ducere tales equita

}tus.

Propter terras etiam, vineas & pra
 Quæ sunt à fidelibus nobis quondam da
 Nos rodunt, lacerant, dicunt nimis la
 Sunt bona, quæ possidet gens hæc cuculla

}ta.

Ipsi non considerant, quando labora
 Non ut nos tantummodo, sed multos pasca
 Supervenientibus bona nostra da
 Et exinde modicum nobis reserva

}mus.

Nos sumus in pluribus similes jumen
 Cui dantur paleæ excusso frumen
 Sustentamur etenim pane & pulmen
 Servato hospitibus lauto nutrimen

}to.

Nos sumus agricolæ, sed nostra cultu
 Sæpe fit inutilis nobis propter plu
 Jam corrupti æeris turbata natu
 Modò lædit vineas, modò lædit ru

}ra.

Ea, quæ pauperibus solebamus da
 Et in usus varios hospitum apta
 Cogemur de cætero nobis reserva
 Ne nos hæc benignitas cogat mendica

}re.

Quid

Quid prodest tot vineas, tot agros tene
 Laborare jugiter, & semper ege
 Mendicis Ordinibus melius est ve
 Quàm nobis, qui talia videmur habe- } re.

Papa nihil appetit ab his sibi da
 Quia nudus aliquis nequit spolia } ri.
 In hoc solent Ordines isti gloria
 Quòd possessionibus nolunt onera }

Ipsi nihil possident, non sunt indigen
 Colunt enim divites, frequenter poten } tes.
 Apud eos comedunt nihil respuen
 Quæ sibi conveniunt, dapibus uten }


Surgentes à prandio, remotisque men
 Benedicunt Dominum manibus exten } sis.
 Retributis hospiti gratiis immen
 Recedunt, non computant de factis expen }

De ista materia plura non loqua
 Sed omissis aliis ad nos reverta } mur.
 Pœnas hujus temporis lætè patia
 Ut bonis cœlestibus frui merea }

Signum est, quòd Dominus non vult nos peri
 Qui nos tanquam filios non cessat feri } re.
 Ipse per hæc tristitia det nos hinc transi
 Quòd ad vera gaudia possimus perveni }

Amen.

Index



INDEX.

A.

<i>Abbas</i> laudatus 589	ejus electio 597	officii gra- vitas 602
<i>Abbates</i> quales esse debeant 517	reformationem de- clinantes	ibid.
<i>Abstinentia</i> exempla 51 sq. 79 258 297 382 390		
<i>Adelheidis</i> de Apiaco		206
— — de Brisaco		436
— — de Munzenheim		213
— — de Rhinfelda	168	347
— — de Singolzheim		340
— — de Toroltzheim, Sororum subtiliens. vi- tæ		218
<i>Ægroti</i> vid. <i>Infirmi</i> .		
<i>Agape</i> quid?		367
<i>Agnes</i> de Apiaco	261	266
— de Blozenheim		336
— de Herckenheim, fundatrix Monaster. Sub- tiliens. 26 ej. vita		148
— de Ochsenstein		77
— dicta Wallaria		210
<i>Amor</i> Dei		161
<i>Tom. VIII.</i>	U u	<i>Ange-</i>

I N D E X.

<i>Angeli</i> apparent cuidam Sorori 286 eorum musica auditur vid. <i>Musica cœlest.</i>	
<i>Anima</i> Monachi à beatis Spiritibus suscepta	478
<i>Anima</i> ex purgatorio liberatæ ostenduntur cuid. So- rori	180
<i>Anna</i> de Wineck	231
<i>Anniversaria</i> quomodo celebrandam	545
<i>Apparitiones</i> vid. <i>Visiones.</i>	
<i>Aqua</i> in vinum mutata	342
<i>Aranea</i> in Missa sumta	479
<i>Arca</i> lignea per somnium visa	153
Ast, (Conr.) Generalis Mag. Ord. Præd.	419
Aufmüllen	26 30
S. Augustinus in honore habitus	415
<i>Avis</i> importuna imprecatione Sacerdotis moritur	479

B.

<i>Balnea</i> an Benedictinis concessa	538	communia eis non frequentanda	540	Jo. Capistrani hac de re Epistola	567
Benedicta de Egensheim					70
— — de Mulhausen					64
Benedictini Ordinis reformatio ad conformitatem in observantia regulari p.	531	seqq.	581	seqq.	
	603	seqq.	vid. <i>Reformationis.</i>		
Bernhardus de Wahing					595
Bertha de Rubéaco					139
P. Burchardus, Dominicanus					128

C.

<i>Cantrici</i> s Officium	87 264	neglectum punitur	92	sq.
				<i>Cantus</i>

I N D E X.

<i>Cantus</i> Sororis jamjam morientis	259
<i>Capitis</i> dolores miraculo curati	<u>294</u>
<i>Carnes</i> , pro piscibus habitæ <u>485</u> earum abſtinentia neceſſaria Benedictinis <u>521</u> ſeqq. eſus an con- cedatur Conſtitutione Benedicti XII. ibid. cur prohibitus à S. Benedicto <u>522</u> an omnibus in- firmis concedendus <u>525</u> an lapſum carnis cau- ſet <u>526</u> <u>528</u> ab iis quidam continuo abſti- nent	<u>526</u>
Casparis Abbatis Tegernſeensis epiſtola <u>586</u> obitus	<u>589</u> <u>595</u>
<i>Caſtitatis</i> exempla	<u>113</u> <u>119</u> <u>149</u> <u>228</u> <u>341</u>
Catharina de Gebeswiler	<u>3</u> <u>13</u> <u>14</u> <u>34.</u>
<i>Cella</i> Monachorum Sublac.	498
<i>Ceremonia</i> Monaster. Ord. S. Ben.	547
<i>Certitudo</i> de ſalute æternâ	<u>152</u> <u>159</u> <u>267</u> <u>299</u>
<i>Cervical</i> ſanctæ cujuſd. Sororis capitis dolores ſa- nat	<u>294</u>
<i>Charitas</i> mutua	<u>53</u>
Chriſtannus, Subprior Waldſaſſenſis	475 ſq.
Chriſtus vid. <i>Jeſus.</i>	
<i>Circatricis</i> officium	<u>94</u> ſq.
<i>Claritas</i> corporum in Reſurrectione	<u>254</u>
Colmaria, urbs deſcripta <u>6</u> obſidionis periculo libe- rata	<u>164</u>
<i>Columba</i> candida ſuper caput	<u>417</u>
<i>Congregatio</i> Benedictino-Bavarica	<u>556</u> ſeqq.
<i>Cogitationes</i> vanæ	<u>229</u>
<i>Conjugium</i> ſanctum	<u>402</u>
Conradus V. Abb. Tegernſeens. electus <u>597</u> ſeqq. ejuſ Epiſtola <u>601.</u>	

I N D E X.

<i>Conversatio</i> bonorum cum malis	668
<i>Conversio</i> duobus fratribus precibus Sororis impetrata	109
<i>Consolationes divinae</i> in morbis, tentationibus &c. vid. Vit. primar. Soror. Sub Tilia per tot.	
<i>Cor</i> mundum Deo placet	658
<i>Corona</i> tres, Virginitatis præmium	324
<i>Crudelitas</i> in Virginem	120 seqq.
<i>Crux</i> plumbea miraculo per aërem delata	33
<i>Curiositas</i> victa	371.

D.

<i>Decima</i> exactæ	126	<i>remissæ</i>	127
<i>Defectio</i> Monachi visione impedita	473		
<i>Defunctorum</i> ira in cœnobitas negligentes visione ostensa	486		
<i>Dentium</i> dolores miraculo curati	295.		
<i>Devotio</i> erga B. V. Mariam	59	112	241 302 323
singularis	166		
DEUS loquens in corde	73	ejus pietas in homines	
15 visio externa & interna	425	sq. Sermo qualis, 429 præsentia in anima unde cognoscatur 430 Timor ibid. solus cor possideat 432 ei quomodo placere queamus 433	
<i>Diabolus</i> apparet i 10 in specie porci	98	221	<i>monialis</i> 298 <i>matronæ</i> 300 Clerici deformis 372 piis non timendus 430 orantem illusionibus suis impetit 475
<i>Disciplina</i> rigidæ exempla	81	155	240 298 345

Electio

I N D E X.

E.

<i>Electio</i> Abbatis	597. seqq.
Eligenta de Sulzmat	295
Elisabetha de Eycken	446
— — de Junckholz	223
— — Kempfin	412
— — de Neustat	424
— — de Rubeaco	325
— — de Senheim	291
<i>Epistola</i> Abbatum Provinciæ Moguntinæ	626
— Bernhardi de Wahing	595
— Burchardi Dominiciani	129
— Caspari Abb. Tegernseensis	586
— Conrad. ejusd. Monast. Abb.	601 605
	609 615
— Encyclica cœnobii Mellicens.	578.
— — — Tegernseens.	589
— Johannis, Abb. Waldsass.	467
— de Weilhaim Prioris Mellicens.	574
— de Welming Abb. Mellicens.	581 603
	618 621
— Melchioris Abb. S. Udalricani	612 624
— Petri de Schaumburg Card. & Episcopi Augustani	641
— Sigismundi Religiosi, Cœnobitæ S. Udalricani	644
Ernesti Monachi Waldsass. mors beata	481.
<i>Extases.</i> 75 84 85 136 151 157 178 184	
187 249 254 271 274 277 329 352	
393 408	437
U u 3	Fratres

I N D E X.

F.

<i>Fratres</i> Sororis precibus conversi 109	duo discor-
des reconciliati precibus Sororis	165

G.

Gerhardus Monach. Waldsaff. aquam leviter congelatam cum equo transit 484	carnes pro piscibus habet
	485
Gertrudis de Bruck	214
— — de Columbaria	89
— — de Girsberg	224
— — de Hattstat	376
— — de Herckenheim	195
— — de Rhinfelda	251
— — de Saxonia	348
Giselhilde Soror. Monast. sub Tilia	227
Godefridus Comes de Habsburg	284
<i>Gratia</i> cœlestis extraordinaria 242	ob desertionem
ægotantis 237 ob potum vini melliti 243	
item ob verbum incautum subtracta 248	influxus, illuminationis & consolationis divinæ.
vid. Vit. primar. Soror. sub Tilia per tot.	

H.

Habitûs uniformitas in eodem ordine necessaria 531	
descriptio	535
Hedwig de Gewiler	380
— — de Gundelsheim	118
— — de Laufenberg	269
	Hedwig

I N D E X.

Hedwig de Logelnheim	<u>133</u>
— — de Steinbach	<u>102</u>
Heilradis de Horburg	<u>306</u>
Helwigis de Wigenheim	<u>115</u>
Herburgis de Herckenheim	<u>154</u>
P. Hermannus de Havelberg	<u>381</u>
<i>Hora Canonica</i>	<u>495</u>
<i>Hospitalia</i> tria in mente constructa	<u>238</u>
Hugo de S. Charo	<u>29</u>
<i>Humilitas</i> <u>403</u> vid. Vit. Soror. primar. Subtil. pas- sim.	

I.

<i>Jejunium</i> Sublacens. Monast.	<u>497</u>
<i>JESUS</i> apparet sororibus devotis <u>246</u> <u>277</u> <u>289</u> in specie pueri <u>109</u> <u>188</u> <u>197</u> <u>212</u> <u>327</u> <u>350</u> <u>480</u> <u>489</u> patiens <u>171</u> <u>449</u> ejus crebra me- moriam <u>421</u> apparet in specie leprosi <u>196</u> . ju- venis decori <u>199</u> Sacerdotis Missam celebran- tis <u>277</u> <u>418</u>	
<i>Imago</i> miraculosa	<u>215</u>
<i>Incendium</i> Monasterii Sanctimonialium Admontens. describitur	<u>456</u>
<i>Infirmorum cura</i> singularis <u>234</u> seqq. relicta causa gratiæ subtractæ	<u>237</u>
<i>Innocentia</i> exempla	<u>104</u> <u>257</u>
<i>Inspiratio</i> divina	<u>374</u>
<i>Invidia</i> , peccatum grave	<u>104</u>
Johannes Baptista Patronus Monasterii sub Tilia <u>311</u> <u>125</u> <u>288</u> ejus imago miraculosa <u>32</u> . seqq. im- petrat pecuniam egentibus <u>125</u> item decima- rum remissionem <u>127</u>	
U u <u>4</u>	Johan.

I N D E X.

Johannis Capistrani Epistola ad Universit. Viennens.

- 562
- — Carthusiensis Spiritus propheticus 483
- — de Ellenbogen, Abb. Waldsaff. 467
- — de Weilheim Prior Mellic. Epistola 574
- Vita 631 narratio de tentata Reformatione Monasterii Ettalensis 647 de eo testimonium 649
- — de Welming Abb. Mellicens. Epistola

581

Iracundia deploratur 197

L.

- Labores* Monachor. Sublacens. speciales 498 generales 508
- Lacrymandi* desiderium 441
- Leupoldus, Monach. Waldsaff. 189
- Liber* Catharinæ de Gebeswiler signo quodam comprobatur 14 34
- Liberi* propter Deum relictii 313 549
- Lucas Evangelista, Medicus 293

M.

- Magnes* per somnium visus 153
- Manus* refulgens 252
- Margaretha de Brisaco 387
- — Kentzingensis 400
- Maria B. V. devotè culta 59 112 241 302 323
- apparet Sororibus quibusdam devotis 201
- 209 246 253 277 & Monacho 289 Ho-
spitio

I N D E X.

spitio quosdam pegrinantes excipit	361.	la-
stat Monachum		478
<i>Maritus propter Deum relictus</i>	313	349
Martyr (<i>Petr.</i>) Ord. Præd.		281
<i>Mater orans pro filii morte</i>		250
de Mazen <i>Nicol.</i> Abbas Mellicens.		579
Mechtildis de Columbaria		331
— — de Stans		448
— — de Wincenheim		106
<i>Mens pura Deo placet</i>		658
<i>Miracula</i>	32 116 215 294 342	484
<i>Monachi ad seculum redeunt</i>	461.	Waldsassien-
ses , 467 negligentes officia defunctorum		
486 profugi & vagi		542
<i>Monachus mortem suam prædicens</i>	472	ab apolita-
sia visione retractus 473 imprecatione avem		
occidit 479 araneam in Missa sumit ibid. pue-		
rum JESUM deosculans 480 490 ejus defi-		
nitio		506
<i>Monasterium sub Tilia</i>	3 seqq.	Adelhusanum 439
Sanctimonial. Admontens.	459	Waldsass. 488
Sublacense 493 Bursfeldense	553	Cornelii
Münster 559 Braunvillere	560	Etalense 647
S. Walpurgæ reformatum		651 seqq.
<i>Monasteriorum S. Benedicti reformatio</i>		505 seqq.
<i>Mors prædicta</i>	104 225 256 335 418 472 476	
483 filii à matre absente visa	249	filio matris
precibus accelerata	250	sonitu arcæ reliquia-
rum nunciata 470 beata Ernesti Monachi		
Waldsass.		481
<i>Mortis beatæ exempla.</i> vid. in Vit. primar. Sor. sub		
Tilia passim.		

I N D E X.

Mortuus loquitur 477
Musica cœlestis audita 143 236 293 308 310

N.

Nativitatis Christi hora revelatur 207 seqq.
Nomen Jesu 366.
Novitiarum instructio 45.
Novitiatus Monasterii Bursfeldens. 557

O.

Obedientia regularis 401 506 diversimodè accipitur 508 seqq. habet terminos suos 511
Obsidio urbis precibus averſa 163
Odor suavis sanctitatis index 14 34 69 112 114
 138
Officii divini frequentatio 47 uniformitas necessaria 542
Opera bona Dêo annuatim oblata 239
Oratio sanctæ Sororis pro longiore Vita 244 421
 pro religioso accusato 255 matris pro filii morte 250
 pro spe salutis æternæ 267 semper exaudita 303
 pro defunctis 384 396 seq. illusionibus diaboli impedita 475
Ordinis monastici tria substantialia 506 uniformitas necessaria 531 542
 miseria carmine rhythmico descripta 672

P.

Parentum in filiam crudelitas 120 seqq.
Passio

I N D E X

<i>Passio</i> Christi ostensa piæ cuidam Sorori	217 339
ejus Memoria in mente & corpore	288 ex ejus
meditatione vulnus contractum	440
<i>Patientia</i> in morbo	411
<i>Patriarchæ</i> Veteris Test. apparent cuidam Sorori	273
<i>Paupertas</i> voluntaria Religiosor.	507 regularis 557
<i>Paupertatis</i> amor,	66
<i>Pecunia</i> , ejus defectus sublevatur	125 deprecatur
	304
<i>Peccatorum</i> remissio revelata	193 promissa 279
<i>Pestis</i> visione prænunciata	480
Petrus & Paulus Apostoli apparent	99
Petrus Abbas Aulæ Regiæ	467
<i>Prædones</i> , ab illis pios conjuges Deus defendit	306
<i>Prægnatus</i> vitæ æternæ	161 seqq. 188 249 259
	271 275 329 393 vid. <i>Ecstasis. Visio.</i>
<i>Priorissæ</i> officium	56
<i>Processiones</i> quatuor in anno	546
<i>Propheta</i> , circa eorum Deopneustiam scrupulus	83
<i>Propheticæ</i> Spiritus Joh. Carthusiensis	483
<i>Purgatio</i> animæ à peccato	183
<i>Purgatorium</i> in visione	177 seqq.

R.

<i>Rasura</i> Monachorum Sublac.	554
<i>Refectionis</i> modus Monaster. Sublacens.	497. tem-
pus	498
<i>Reformatio</i> Ordinis S. Bened.	505. quænam sit de
necessitate salutis	509 eidem resistentes in quo
	statu

I N D E X.

statu sint § 10. ad sola substantialia non possi- bilis? § 05 seq. § 19 vel dato hoc, saltem incassa § 11 ejus difficultas unde § 14 subdole peti- ta § 15 § 19 necessaria est § 20 variæ de ea- dem re Epistolæ § 31 seqq. 603 seqq. Mona- sterii Ettalensis tentata 647 item S. Walbur- gæ Eystatt. 660 seqq. difficilior quam nova alicujus boni institutio	667
P. Reinerus <i>Ord. Prædic.</i>	11
<i>Remissio</i> Peccatorum revelata 193 promissa	279
<i>Revelationes</i> vid. <i>Ecstasis & Visio.</i>	
<i>Resurrectionis</i> Christi Festum celebratum	199
Rinlindis de Biseck	190 313
<i>Risus</i> morientium	191 230 317
Rokiczan (<i>M. Joh.</i>) Hussitæ Disputatio cum Joh. Capistrano	564
Rudigerus Prior Waldsaff. à B. Maria lactatus	478.
Fr. Rudolphus de Rhinfelda è purgatorio liberatur 177.	

S.

<i>Sacramentum</i> altaris gratia speciali à quibusdam ac- ceptum 73 203 311 scrupulus circa illud 82 per angelos ministratum 163 175 illud per- ceptura ignoscit hostibus suis 211 ab ipso Christo distributum	276 289
<i>Salutis certitudo</i> quibusd. revelata 152 189 299.	
<i>Sanctimoniales</i> vid. Sorores.	
<i>Sepultura</i> locus somnio prædictus	153

Silentii

I N D E X.

<i>Silentii</i> stricta observatio	43 107 173	in Mona-	
sterio Sublacensi			500
<i>Sitis</i> ægrotanti Sorori divinitus levata			327
<i>Somnia</i> divina	242 334		369
Sophia de Rhinfelda			256
<i>Sorores</i> primæ Monasterii sub Tilia 35 earum per-			
fectio	39	<i>silentii</i> observatio	43
<i>Novitiarum</i>		<i>instructio</i>	45
in B. V. Mariam devotio			59
<i>Orationes</i> assiduæ	47	<i>Charitas</i> mutua	53
specialiter à Deo consolatæ	64	Vid. Vit. ear.	
per tot.			
<i>Stella</i> supra caput visa			416
Stephania de Phirreto			112
<i>Superbia</i> Deo maximè displicet	431.		

T.

Taulerus <i>Joh.</i>	405
<i>Temporis</i> observatio	68
<i>Tentationes</i> varia	170 267 300 417
Sub Tilia <i>Monasterium</i> ejus Abbatisa de Gebeswi- ler 13 primordia 24 fundatrices 26 confir- matio papalis 28 Sororum primarum perfe- ctio 39 Priorissæ	45
SS. Trinitatis Mysterium ostensum cuidam Sorori	275
Tuda de Columbaria	245
— de Egensheim	97

U.

<i>Vigilia</i> Monachor. Sublacens.	496
<i>Virgi-</i>	

I N D E X.

<i>Virginitas</i> mirè conservata	113	119	in matrimo-	
nio	341	aliquo modo recuperata	437	coro-
nata	324	laudata	653	corporis non sufficit
	657	ejus firmum propositum	120	321 331 .
<i>Visio</i> Dei interna præstantior externâ	425	de hac		
variæ quæstiones	426	seqq.		
<i>Virginum</i> colloquia crebra cum viris Deo displicent	431			
<i>Virtutum</i> omnium exempla vid. in Vit. prim. Sor.				
Subtil. per tot.				
<i>Visitationes</i> Monaster.				558
<i>Visitatores</i> contemti			512	seqq
<i>Visiones</i> gloriosæ & aliæ	75	85	91 96 99	108
	111	125	135	137 144 147 153 171
	174	176	181 184 188 192 196	207
	209	212 217 221 246 249	252	259
	271 273 282 285 289	318 320		323
	325 329 337 339 347	350 372		378
	393 480 482 486 489			499
<i>Vita</i> precibus prolongata	244			421
<i>Vita</i> Joh. de Weilheim Prior. Mellicens.				631
<i>Vita</i> primar. Sororum Monasterii sub Tilia	35	seqq.		
Sororum Monasterii Adelhusani	439	Admon-		
tensis	459	seqq.	Monachorum Monasterii	
Waldsaff. Ord. Cisterc.				467
Underlinden Monasterium				8
<i>Unctio</i> extrema Christi manibus morienti collata				289
				186
<i>Unio</i> animæ cum Deo				477
<i>Vox</i> mortui audita				
<i>Vulnus</i> in pectore ex meditatione passionis Christi	440			B. Wal-

I N D E X.

W.

B. Walburga	652
Fr. Walter <i>Ord. Prad.</i>	<u>26</u> 65
Fr. Wernerus de Erlebach	<u>318</u> <u>368</u>
de Wintelnheim <i>Agnes</i> fundatrix Monasterii sub Tilia	<u>26</u>

F I N I S.







